

东雅堂韩昌
黎集注

佚名

文硕阁

wenshuoge.com

目录

关于我们	4
提要	6
重校昌黎集凡例	7
昌黎先生集序	8
昌黎集序说	9
东雅堂昌黎集遗文	10
朱子校昌黎集传	16
卷一	26
卷二	45
卷三	61
卷四	71
卷五	85
卷六	102
卷七	110
卷八	119
卷九	134
卷十	148
卷十一	162
卷十二	171
卷十三	180
卷十四	189
卷十五	203
卷十六	209
卷十七	218
卷十八	225
卷十九	232
卷二十	241
卷二十一	248
卷二十二	259
卷二十三	266
卷二十四	275
卷二十五	281
卷二十六	289
卷二十七	296
卷二十八	303
卷二十九	310

卷三十	315
卷三十一	324
卷三十二	330
卷三十三	336
卷三十四	342
卷三十五	348
卷三十六	351
卷三十七	355
卷三十八	362
卷三十九	367
卷四十	375
东雅堂昌黎外集注卷一	383
东雅堂昌黎外集注卷二	387
东雅堂昌黎外集注卷三	393
东雅堂昌黎外集注卷四	395
东雅堂昌黎外集注卷五	399
东雅堂昌黎外集注卷六	402
东雅堂昌黎外集注卷七	405
东雅堂昌黎外集注卷八	407
东雅堂昌黎外集注卷九	409
东雅堂昌黎外集注卷十	413

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书

东雅堂韩昌黎集注

提要

【臣】等谨案东雅堂韩昌黎集注四十卷不着撰人名氏惟卷末各有东吴徐氏刻梓家塾小印考陈景云韩集点勘书後曰近代吴中徐氏东雅堂刊韩集用宋末廖莹中世彩堂本其注采建安魏仲举五百家注本为多间有引他书者仅十之三复删节朱子单行考异散入各条下皆出莹中手也莹中为贾似道馆客事见宋史似道传徐氏刊此本不着其由来殆深鄙莹中为人故削其名氏并开板年月邪云云今考此本前列重校凡例九条内称庙讳一条确为宋人之语景云之说为可信知此本为莹中注也景云又自注此文曰东雅堂主人徐时泰万历中进士官工部郎中今考明进士题名碑万历甲戌科有徐时泰长洲人盖即其人矣乾隆四十六年三月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

重校昌黎集凡例

重校昌黎集凡例

是集庆元间魏仲举刊五百家注引洪兴祖樊汝霖孙汝听韩醇刘崧祝充蔡元定诸家注文【洪辨证樊谱注孙韩刘全解祝音义蔡补注】未免冗复而方崧卿举正朱子校本考异却未附入读者病之今以朱子校本考异为主而删取诸家要语附注其下庶读是书者开卷晓然今举凡例于左

一朱子考异凡例见于文集序首并仍其旧一阁京杭蜀石本异同已见朱子考异凡例今更加雠校是正颇多观者当自知之

一注引经子史等事则书于考异之上释音则附其下

一小圈下今按云云者并是考异全文

一注引经子史书传事为证者则入如集中有关系时政及公卿拜罢月日更博采新旧史唐登科记附益之

一旧注引某氏云者今仿朱子离骚集注例皆删去惟考异下有纠方之缪者则存之如复志赋谁无施而有获所辨之类是也

一先儒议论有关系者随所闻见增入如闵已赋固哲人之细事兮东坡颜乐亭记尝有评议元和圣德诗婉婉弱子赤立伛偻南轩所议之类是也

一正文或有疑字并依考异文从口如蓝田县丞厅壁记再进再屈口人之类是也

一皇朝庙讳诸本多易本字如贞元作正元之类非临文不讳之义徒失古意今例但空本字点画若唐讳如以丙为景以民为人之类却存古不改

一考异於正文本字或一字或二字并提起今例如本字在句末即入注脚不复重出句读中或一两字各有考异并总附於一句之下

昌黎先生集序

昌黎先生集序

【朱子云此集今世本多不同惟近岁南安军所刊方崧卿校定本号为精善别有举正十卷论其所以去取之意又它本之所无也然其去取多以祥符杭本嘉佑蜀本及李谢所据馆阁本为定而尤尊馆阁本虽有谬误往往曲从它本虽善亦弃不录至於举正则又例多而词寡覽者或颇不能晓知故今辄因其书更为校定悉考衆本之同异而一以文势义理及它书之可证验者决之苟是矣则虽民闲近出小本不敢违有所未安则虽官本古本石本不敢信又各详着其所以然者以为考异十卷庶几去取之未善者覽者得以叁伍而笔削焉】○【方云序只云目为昌黎先生集诸本亦多无文字者今从之後凡从方氏者不复论所不同者乃着之】

内人李汉编【蜀本作朝议郎行尚书屯田员外郎史馆修撰上柱国赐绯鱼袋李汉编今本或有并序二字非是】

文者贯道之器也不深於斯道有至焉者不也易繇爻象【繇音宙占辞名也】春秋书事诗咏諷书礼剔其伪皆深矣乎秦汉已前其气浑然迨乎司马迁相如董生扬雄刘向之徒尤所谓杰然者也至後汉曹魏气象萎尔司马氏已来规范荡悉谓易已下为古文剽掠潜窃为工耳文与道蓊塞固然莫知也先生生於大历戊申幼孤随兄播迁韶岭兄卒鞠於嫂氏辛勤来归【来或作求非是】自知读书为文日记数千百言比壮经书通念晓析酷排释氏诸史百子皆搜抉无隐【或无皆字】汗澜卓蹕瀟泠澄深【左太冲吴都赋云泓澄瀟泠郭璞江赋云瀟泠园泫瀟於旻切泫音玄或作沅非是】诡然而蛟龙翔蔚然而虎凤跃锵然而韶钧鸣【方从杭蜀本作发今按二字两通但作鸣则句响而字稳耳故今定从诸本而特着方本所从以备参考後皆放此】日光玉洁周情孔思千态万貌卒泽於道德仁义炳如也洞视万古愍惻当世遂大拯颓风教人自为【左氏成公二年其自为谋也则过矣为下伪切】时人始而惊中而笑且排先生益坚终而翕然随以定呜呼先生於文摧陷廓清之功比於武事【阁本作士非是】可谓雄伟不常者矣【常方从杭本作赏云取汉书功盖天下者不赏之语今按不赏乃蒯彻教韩信背叛之语而唐太宗亦尝自言武德末年实有功高不赏之惧施之於此既不相似且非臣子所宜言者李亦未必敢取以为用也当从诸本为正】长庆四年冬先生歿内人陇西李汉【或无陇西二字】辱知最厚且亲遂收拾遗文无所失坠【左传国语多用失坠字或作坠失或无失字者皆非】得赋四古诗二百一十联句十一律诗一百六十杂着六十五书啓序九十六哀词祭文三十九碑志七十六笔砚鳄鱼文三表状五十二摠七百【或作七百一十六或作七百三十八方氏考其数皆不合而姑从阁本杭本以为唐本旧如此既非文义所系今亦不能深考】并目錄合为四十一卷目为昌黎先生集传於代又有注论语十卷传学者顺宗实录五卷列於史书不在集中先生讳愈字退之官至吏部侍郎余在国史本传

昌黎集序说

昌黎集序说

宋景文公云柳柳州为文或取前人陈语用之不及韩吏部卓然不丐於古而一出诸已

苏明允上欧阳书云孟子之文语约而意深不为巉刻斩絶之言而其锋不可犯韩子之文如长江大河浑浩流转鱼鼉蛟龙万怪遑惑而抑絶蔽掩不使自露而人望见其渊然之光苍然之色亦自畏避不敢迫视

东坡云杜诗韩文顔书左史皆集大成也又云唐之古文自韩愈始其後学韩而不至者为皇甫湜学皇甫湜而不至者为孙樵自樵以降无足观矣山谷与王观复书云杜子美到夔州後诗韩退之自潮州还朝後文章皆不烦绳削而自合矣又云老杜作诗退之作文无一字无来处盖後人读书少故谓韩杜自作此语耳又答洪驹父云诸文皆好但少古人绳墨耳可更熟读司马子长韩退之文章

秦少游云探道德之理述性命之情发天人之奥明死生之变此论理之文如列御寇庄周之作是也别黑白陰阳要其归宿决其嫌疑此论事之文如苏秦张仪之所作是也考同异次旧闻不虚美不隐恶人以为实录此叙事之文如司马迁班固之所作是也原本山川极命草木比物属事骇耳目变心意此托词之文如屈原宋玉之所作是也钩庄列之微挟苏张之辩摭迁固之实猎屈宋之英本之以诗书折之以孔氏此成体之文如韩愈之所作是也盖前之作者多矣而莫有备於愈後之作者亦多矣而无以加於愈故曰总而论之未有如韩愈者也

陈後山云杜之诗法韩之文法也诗文各有体韩以文为诗杜以诗为文故不工耳

李方叔云东坡教人读战国策学说利害读贾谊晁错赵充国章疏学论事读庄子学论理性又须熟读论语孟子檀弓要志趣正当读韩柳令记得数百篇要知作文体面

昌黎集序说

东雅堂昌黎集遗文

钦定四库全书

东雅堂昌黎集遗文

联句

有所思联句【此下三联句见孟东野集】

相思绕我心日夕千万重年光坐晚晚春泪销颜容【郊】台镜晦旧晖庭草滋新茸望天山
上石别劒水中龙【愈】

遣兴联句【说见上】

我心随月光写君庭中央【郊】月光有时晦我心安所忘【愈】常恐金石契断为相思肠
【郊】平生无百岁岐路有四方【愈】四方各异俗适异非所将【郊】驾蹄顾挫秣逸翩
遗稻粱【愈】时危抱独沉道泰怀同翔【郊】独居久寂默相顾聊慨慷【愈】慨慷丈夫
志可以耀锋铓【郊】蓬甯知卷舒孔顔识行藏【愈】朗鉴谅不远佩兰永芬芳【郊】苟
无夫子听谁使知音扬【愈】

赠劒客李园联句【同上】

天地有灵术得之者唯君【郊】筑炉地区外积火烧氛氲【愈】照海铄幽怪满空歆异氛
【郊】山磨电奔奔水淬龙螭螭【愈】太一装以宝列仙篆其文【郊】可用慑百神岂唯
壮三军【愈】有时幽匣吟忽似深潭闻【郊】风胡久已死此劒将谁分【愈】行当献天
子然後致殊勲【郊】岂如丰城下空有斗间云【愈】

遗诗

同窦【牟】韦【执中】寻刘尊师不遇【此诗得於五窦联珠集公时任都官外郎同洛阳
令窦牟河南令韦执中以访之元和五年也诗以同寻师为韵人各一首洪氏年谱亦见】

秦客何年驻仙源此地深还随蹑舄骑来访驭风襟院闭青霞入松高老鹤寻犹疑隐形坐敢
起窃桃心春雪【今按此诗得於文苑英华其後即以正集中春雪诗首句云新年都未有芳
华者系之疑亦公作也已上并方本所载诸本所无者今悉存之诸本更有遗文一卷方独取
赠族侄嘲鼾睡三篇余并不録今并附见于後其可疑者亦但存其目而不载其文云】

片片驱鸿急纷纷逐吹斜到江还作水着树渐成花越喜飞排瘴胡愁厚盖砂兼云封洞口助

月照天涯暝见迷巢鸟朝逢失辙车呈丰尽相贺宁止力耕家

赠族侄【上或有徐州字】

我年十八九壮气起胷中作书献云阙辞家逐秋蓬岁时易迁次身命多厄穷一名虽云就片禄不足充今者复何事卑栖寄徐戎萧条资用尽濩落门巷空朝眠未能起远怀方鬱悰击门者谁子问言乃吾宗自云有奇术探妙知天工既往怅何及将来喜还通期吾语非佞当为佐时雍

嘲鼾睡【李希声家有退之遗诗数十篇希声云皆非也独嘲鼾二篇似之録于末】

澹师昼睡时声气一何猥顽颺吹肥脂坑谷相崑磊雄哮乍咽絶每发壮益倍有如阿鼻尸长唤忍衆罪马牛惊不食百鬼聚相待木枕十字裂镜面生痱瘡【痱音肥瘡音濕痱瘡肿病也】铁佛闻皱眉石人战摇腿孰云天地仁吾欲责真宰幽寻虱搜耳猛作涛翻海太阳不忍明飞御皆惰怠乍如彭与黥呼冤受菹醢又如圈中虎号疮兼吼馁虽令伶伦吹苦韵难可改虽令巫咸招?爽难复在何山有灵药疗此愿与采

澹公坐卧时长睡无不稳吾尝闻其声深虑五藏损黄河弄瀆瀑梗?连拙魮南帝初奋槌一窍泄混沌【庄子应帝王篇南海之帝儵北海之帝忽中央之帝混沌相与甚善儵与忽谋报混沌之德曰人皆有七窍以视听食息此独无有尝试凿之日凿一窍七日而混沌死】迥然忽长引万丈不可忖谓言絶於斯继出方袞袞幽幽寸喉中草木森苯?【苯音本?音忖草木丛生也】盗贼虽狡狴亡?敢窥阊鸿蒙总合杂诡譎骋戾狠乍如鬪呶呶忽若怨??赋形苦不同无路寻根本何能埋其源惟有土一畚

昼月

玉盃不磨着泥土青天孔出白石补免入臼藏蛙缩肚桂树枯株女闭户陰为阳羞固自古嗟汝下民或敢侮戏潮盗视汝日瞽

赠张徐州莫辞酒

莫辞酒此会固难同请看工女机上帛半作军人旗上红莫辞酒谁为君王之爪牙春雷三月不作响战士岂得来还家

辞唱歌【诸本注云此篇恐非公作今姑存之】

抑逼教唱歌不解看艳词坐中把酒人岂有欢乐姿幸有伶者妇腰身如柳枝但令送君酒如醉如憨痴声自肉中出使人能透随复遣慙悵者赠金不皱眉岂有长直夫喉中声雄雌君心岂无耻君岂是女儿君教发直言大声无休时君教哭古恨不肯复吞悲乍可阻君意艳歌难

可为

知音者诚希【古诗不愁歌者苦但伤知音希】

知音者诚希念子不能别行行天未晓携手踏明月

酬蓝田崔丞立之咏雪见寄

京城数尺雪寒气倍常年泯泯都无地茫茫岂是天崩奔惊乱射挥霍讶相纏不觉侵堂陞方应折屋椽出门愁落道上马恐平鞞朝鼓矜凌起山斋酩酊眠吾方嗟此役君乃咏其妍水玉清顔隔波涛盛句传朝飧思共饭夜宿忆同羶举目无非白雄文乃独玄

潭州泊船呈诸公

夜寒眠半觉鼓笛闹嘈嘈閤浪春楼堞惊风破竹篙主人看使范客子读离骚闻道松醪贱何须恹错刀饮城南道边古墓上逢中丞过赠礼部卫员外少室张道士【中丞谓裴度也】

偶上城南土骨堆共倾春酒三五盃为逢桃树相料理【料音聊】不觉中丞喝道来

池上絮

池上无风有落晖杨花晴後自飞飞为将纤质凌清镜湿却无穷不得归

记

监军新竹亭记【按此文恐非公作今删去】

书

答侯生问论语书【公作论语传未成而歿见於张籍祭诗辩於洪庆善之说者甚明今世所传如宰予昼寝以昼作画子在齐闻韶三月不知肉味以三月作音浴乎沂以浴作浴子在回何敢死以死作先虽甚鄙浅然为伊川之学者皆取之】

愈白侯生足下所示论语问甚善圣人践形之说孟子详於其书当终始究之若万物皆备於我反身而诚是也苟有伪焉则万物不备矣践形之道无他诚是也足下谓贤者不能践形非也贤者非不能践形能而不备耳形言其备也所谓具体而微是也充实之谓美充实而有光辉之谓大充实则具体未大则微故或去圣一闲或得其一体皆践形而未备者唯反身而诚则能践形之备者耳愈昔注解其书而不敢过求其意取圣人之旨而合之则足以信後生辈耳此说甚为稳当切更思之愈白

墓志

相州刺史御史中丞田公故夫人魏氏墓志铭【下或有注并序字
今按此篇不类公它文目云元和八年则又非少作其非公作无疑今删去】

啓

皇帝即位贺宰相啓

愈啓伏见册命皇帝以閏月三日嗣临大位以主神人含生之类孰不蒙赖相公翼亮圣明大庆资始伏惟永永与国同休愈下情不胜庆跃限以所守不获随例拜贺谨差某奉啓不宣谨啓

状

奏汴州得嘉禾嘉瓜状【方本有之以附嘲鼾睡之後云此篇见文苑英华盖为董晋作董晋行状亦可考】

右谨按符瑞图王者德至於地则嘉禾生伏惟皇帝陛下道合天地恩沾动植迺无不协远无不宾神人以和风雨咸若前件嘉禾等或两根并植一穗连房或延蔓敷荣异实共蒂既叶和同之庆又标丰稔之祥感自皇恩微茎何极於造化亲逢嘉瑞小臣喜遇於休明无任【云云】

皇帝即位贺诸道状

伏见勅命皇帝以闰正月三日嗣临宝位海内惟新凡在臣庶不胜庆幸惟俯同下情未由拜贺但增驰恋谨奉状不宣某再拜【或无此三字】

皇帝即位降赦贺观察使状

二月五日恩赦今月二十四日卯时到州当时集百官僧道百姓宣示讫圣上以继明之初垂惟新之泽曲成不遗於万物大赉遂延於四海寰宇斯泰品类皆苏渥恩普沾远近同庆【苏渥或乙此二字非是】愈以藩条有制拜贺无由不胜欣拚之至谨差萍乡县丞李某奉状陈贺【某或作於】潮州谢孔大夫状【此篇见洪氏年谱方氏增考云公既南行家亦谴逐二月二日已过商州之南而此状言七月二十七日牒则八月作也不知其家何故犹未至潮又侄孙湘亦从公而南故宿曾江口有示湘诗而过始兴江口诗谓目前百口还相逐与状言妻子孙侄未到者皆不相应此状恐妄也今按公之到郡既不见年月之实则此状无由可考方氏引曾江始兴二诗以证此状之妄盖亦有理但恐或是已过始兴留家在後而独先到郡亦不可知但其状词颇类袁州申使状则又未有以必见其妄故今且存之亦阙疑之意也】

伏奉七月二十七日牒以愈贬授刺史特加优礼以州小俸薄虑有阙乏每月别给钱五十千以送使钱充者开缄捧读惊荣交至顾已量分惭惧益深欲致辞为让则乖伏属之礼承命苟贪又非循省之道进退反侧无以自宁其妻子男女并孤遗孙侄奴婢等尚未到官穷州使宾罕至身衣口食绢米足充过此以往实无所用积之於室非廉者所为受之於官名且不正恃蒙眷待辄此披陈

疏

宪宗崩慰诸道疏

愈言上天降祸大行皇帝奄弃万国伏惟攀慕永痛哀感难胜某承诏不任号絶限以官守拜慰末由伏增惶恋谨差某奉疏不宣韩愈再拜

题名

长安慈恩塔题名【已下并方本所载】

韩愈退之李翱习之孟郊东野柳宗元子厚石洪濬川同登

洛北惠林寺题名

韩愈李景兴侯喜尉迟汾贞元十七年七月二十二日鱼于温洛宿此而归昌黎韩愈书

谒少室李渤题名

愈同樊宗师卢仝谒少室李拾遗

福先塔寺题名

处士石洪濬川吏部员外王仲舒弘中水部员外郑楚相叔敖洛阳县令潘宿阳乾明国子博士韩愈退之前试左武卫胄曹李演广文前杭州钱塘县尉郑絃文明元和三年十月九日同游

嵩山天封宫题名【欧公跋语附】

元和四年三月二十六日与着作佐郎樊宗师处士卢仝自洛中至少室谒李徵君渤樊次玉泉寺疾作归明日遂与李卢道士韦蒙僧荣并少室而东抵衆寺上太室中峯宿封禅坛下石室遂自龙泉寺钓龙潭水遇雷明日观啓母石入此观与道士赵玄遇乃归閏月三日国子博士韩愈题

欧公集古跋尾云右韩退之题名二皆在洛阳其一在嵩山天封宫石柱上刻之记龙潭遇雷事天圣中余为西京留守推官与梅圣俞游嵩山入天封宫徘徊柱下而去遂登山顶之武后封禅处有石记戒人游龙潭者母语笑以黷神龙龙怒则有雷恐因念退之记遇雷意其有所诫也其一在福先寺塔下当时所见墨蹟不知其後何人模刻于石也

迂杜兼题名

河南尹水陆运使杜兼尚书都官员外郎韩愈水陆运判官洛阳县尉李宗闵水陆运判官伊阙县尉牛僧孺前同州韩城县尉郑伯义元和四年九月二十二日大尹给事奉诏祠济渎回愈与二判官於此迎候遂陪游宿愈题

华岳题名【此文刻於金天祠石阙昔人尝集华岳题名自唐开元至後唐清泰録为十卷此文虽未必尽出公手然笔削之严要非公不可故録之】

淮西宣慰处置使门下侍郎平章事裴度副使刑部侍郎兼御史大夫马总行军司马太子右庶子兼御史中丞韩愈判官司勲员外郎兼侍御史李正封都官员外郎兼侍御史冯宿掌书记礼部员外郎兼侍御史李宗闵都知兵马使左骁卫将军威远军使兼御史大夫李文悦左厢都押衙兼都虞候左卫将军兼御史中丞密国公高承简元和十一年八月丞相奉诏平淮右八日东过华陰礼于岳庙总等八人实备将佐以从

东雅堂昌黎集遗文

朱子校昌黎集传

朱子校昌黎集传

新书本传

宋景文公【今以李翱所撰行状皇甫湜所撰墓志神道碑旧史本传资治通监洪兴祖所撰年谱程俱所撰历官记方崧卿增考年谱考其同异详略附注本文之下以见公之行事本末而文之已见於集者不复载云】

韩愈字退之邓州南阳人七世祖茂有功於後魏封安定王父仲卿为武昌令有美政既去县人刻石颂德终秘书郎【李白作文公父仲卿去思碑云南阳人而公常自称昌黎李翱作公行状亦云昌黎某人皇甫湜作墓志不言乡里又作神道碑乃云上世尝居南阳又隶延州之武阳而旧史亦但云昌黎某今按新史盖因李碑而加邓州二字也然考汉书地理志有两南阳其一河内修武即左传所谓晋啓南阳也其一南阳堵阳即荆州之南阳郡字与赭同在唐属邓州者也元和姓纂唐书世系表有两韩氏其一汉弓高侯颍当玄孙骞避乱居南阳郡之赭阳九世孙河东太守术生河东太守纯纯四世孙安之晋员外郎二子潜恬随司马休之入後魏为玄菟太守二子都偃偃生後魏中郎颍颍生播徙昌黎棘城其一则颍当裔孙寻为後汉陇西太守世居颍川生司空棱後徙安定武安至後魏有常山太守武安成侯耆徙居九门生尚书令征南大将军安定相王茂茂生均均生暄暄生仁泰仁泰生叡素叡素生仲卿仲卿生会愈而中间尝徙陈留以此而推则公固颍川之族寻棱之後而不得承骞之系矣而洪兴祖所撰年谱但以骞之後世尝徙昌黎遂附新史之说独以赭阳为均州小有不同耳及其再考二书而见公世系之实则遂讳匿不敢复着仲卿会愈之名而直以为不可考今固不得而据也唯方崧卿增考引董?说以为骞乃韩瑗韩休之祖而公自出於寻棱与二书合其论南阳则又云今孟怀州皆春秋南阳之地自汉至隋二州皆属河内郡唐显庆中始以孟州隶河南府建中中乃以河南之四县入河阳三城使其後又改为孟州今河内有河阳县韩氏世居之故公每自言归河阳省坟墓而女挈之铭亦曰归骨于河南之河阳韩氏墓张籍祭公诗亦云旧莹盟津北则知公为河内之南阳人其说独为得之公诗所谓旧籍在东都我家本澠谷则必以地近而後尝徙居耳但据此则公与昌黎之韩异派而每以自称则又有不可晓者岂是时昌黎之族颇盛故随称之亦若所谓言刘悉出彭城言李悉出陇西者邪然设使公派果出昌黎也则其去赭阳已历数世其後又屡迁徙不应舍其近世所居之土而远指邓州为乡里也方又引孔武仲之说亦同董氏而王銍以为公生於河中之永乐今永乐犹有韩文乡则其说为己详盖其世系虽有不可知者然南阳之为河内修武则无可疑者而新史洪谱之误断可识矣】愈生三岁而孤随伯兄会贬官岭表会卒嫂郑鞠之【李汉序云先生生於大历三年戊申三岁而孤见祭嫂丈及乳母志会事见卢东美志洪谱云卢志所谓宗兄乃大宗小宗之宗旧史以为从父兄误矣又云旧史大历十二年夏五月起居舍人韩会坐元载贬官柳宗元先友记云会善清言有文章名最高以故多谤会既卒公携家北归葬会河阳建中贞元闲复避地於江南韩氏有别业在宣城因就食焉见欧阳詹哀词复志赋祭嫂及老成文示爽诗】愈自知读书日记数千百言比长尽能通六经百家学【行状云读书能记它生之所习墓

志云先生七岁好学言出成文 今按复志赋云值中原之有事兮将就食於江之南始专专於讲习兮非古训为无所用其心则公之为学正在就食江南时也】擢进士第【洪谱云贞元二年丙寅公年十九始至京师见祭老成文欧阳哀词答崔立之书五年己巳有上贾滑州书六年庚午有河中府连理木颂七年辛未有序送齐皞序八年壬申登进士第时年二十五见上邢君牙书唐科名记云贞元八年陆?主司试明水赋御沟新柳诗公名在榜中见与陆员外书旧史云大历贞元间文士多尚古学而独孤及梁肃最称渊奥愈从其徒游锐意钻仰欲自振於一代泊举进士投文於公卿间故相郑余庆颇为延誉由是知名是年有争臣论九年癸酉博学宏词试太清宫观紫极舞赋顔子不貳过论见上考功崔虞部书及与韦舍人书十年甲戌有省试学生代斋郎议方考此议当系十一年试宏词下未详是否洪谱又云是年尝归河阳省坟墓见祭老成文有赠张童子序十一年乙亥又试宏词见答崔立之书有三上宰相书皆不报是年去京师过潼关有感二鸟赋既归河阳有画记遂自河阳如东都有祭田横文 今按八年以後此年以前又尝游凤翔以书抵邢君牙不得意去有岐山诗洪程皆定为此年六月误矣】会董晋为宣武节度使表署观察推官晋卒愈从丧出不四日汴军乱乃去依武宁节度使张建封建封辟府推官操行坚正鯁言无所忌【董晋行状云十二年七月晋拜宣武节度使受命遂行韩愈实从公行状云董公辟公以行得试秘书省校书郎为观察推官墓志云先生三十有一而仕神道碑云十四年用进士从董晋平汴州推官旧史作巡官 洪谱云二状载公入汴在十二年丙子与史合志碑所记皆後二年殊不可晓岂今年辟公以行至十四年始有成命邪亦不应如是之缓也方考蜀本樊本无三十一而仕之文但云历官二十有七年尔然自公卒之年逆数之亦当以十四年三十一岁为历官之始故公入汴虽在十二年然水门记十四年正月作石本犹但称摄节度掌书记前进士韩愈是辟命犹未下也计必是年辟命乃下故碑志之言如此不当以命下之缓为疑也 今按公入汴之年洪方得之碑志所计年数若以命下之日言之亦未为失但云十四年从董晋平汴州则误矣又送俱文珍序亦在十三年安得言十四年乃入汴乎要当以公之自言及二状二史通监为正持正狂躁其考之或有未审不足据也旧史之作巡官则程记已辨其非矣 洪谱又云十三年丁丑公在汴有复志赋送汴州监军俱文珍序十四年戊寅公在汴有天星诗水门记杨燕奇碑十五年己卯董晋行状云二月三日丞相薨公从丧行四日而汴州乱有汴州乱诗历官记云汴军乱愈家在围中寻得脱下汴束趋彭城愈从丧至洛还盟津度汜水出陈许间以二月暮抵徐州节度使张建封居之于符离睢上及秋将辞去建封奏为节度推官试协律郎至冬建封使愈朝正于京师见欧阳哀词是年有此日足可惜汴泗交流诗答李翱书上建封书论晨入夜归事後又有谏击球书贺白兔状徐泗豪节度掌书记厅石记崔翰墓志十六年庚辰春公朝正回徐有归彭城诗夏去徐西居於洛阳见孟东野书及题下邳李生壁按公与东野书欲至秋辞去而题李生壁在五月十四日则不待至秋而已去徐矣旧史亦云公发言真率无所畏避岂竟以此不合虽建封之知已亦不能容邪公既去徐而建封卒翌日徐军乱见白乐天哀二良文在洛有与卫中行书冬公如京师】调四门博士【洪谱云十七年辛巳公在京师从调选三月东还见与卢汝州荐侯喜状将归有赠孟东野房蜀客诗是年有送李愿归盘谷序李楚金墓志公自去年冬参调竟无所成而归今年冬再往十八年壬午春始有四门博士之授为博士日尝谒告归洛因游华山即答张彻诗所谓洛邑得休告华山穷絶陁者也李肇国史补云愈好奇与客登华山絶峯度不可返发狂恸哭为书与家人别华陰令百计取之乃下沈顔作誓书以为肇妄载岂有贤者轻命如此考公诗则知国史补乃实录也是年有送陆歙州序上已

日燕太学听弹琴序与崔羣书施士丐墓志马彙行状】迁监察御史上疏极论宫市德宗怒贬阳山令有爱在民民生子多以其姓字之【洪谱云十九年癸未公年三十六自博士拜监察御史时有齿落哭杨兵曹陆歙州惨诗及与陈京给事书禘祫议论?停选举状苗氏墓志又上李实书称前守四门博士时已罢博士未受御史之命书云愈来京师於今十五年盖公自贞元五年从郑滑闲复来京师至此十五年矣实録於实诋之不余力而此书乃盛称其所长此又不可晓也方考唐制凡居官以四考为满公在官踰年耳不知何故而罢罢而复迁行状墓碑皆只言选授四门博士迁监察御史而此书称前官又以文投?於李实似若不得已者是固尝罢博士而别迁也是岁七月公犹任博士乞免停选状谓臣虽非朝官月受俸钱可以考也罢免之由不可详究然恐不至於媚实以求进也或云德宗末年不任宰相所取信者李实韦执谊辈耳公盖未免於屈身以伸道也然公天旱人饥状专指李实而言其修实録又於实一辞不恕独於此书抵牾如此又公年十九始来京师在贞元二年也至贞元十九年实十八年矣今云来京师於今十五年洪虽以再至言之其实牵合也并志所疑以俟知者洪谱又云是时有诏以旱饥蠲租之半有司徵愈急公与张署李方叔上疏言关中天下根本民急如是请寛民徭而免田租天子惻然卒为幸臣所谗贬连州阳山令幸臣李实也见进学解及祭张署文旧史云愈尝上章数千言极论宫市之弊贬阳山令疏今不传则公之被绌坐论此两事也方考云公阳山之贬寄三学士诗叙述其详而行状但云为幸臣所恶出宰阳山神道碑亦只云因疏关中旱饥专政者恶之则其非为论宫市明矣今公集有御史台论天旱人饥状与诗正合况翱湜皆从公游者不应公尝论宫市数千言而状及碑志略不一言及也然行状且谓为幸臣所恶而公诗云或自疑上疏上疏岂其由则是又未必皆上疏之罪也又曰同官尽才俊偏善柳与刘或虑语言泄传之落冤讎又岳阳楼诗云前年出官由此祸最无妄奸猜畏弹射斥逐恣欺诳是盖为王叔文韦执谊等所排矣德宗晚年韦王之党已成是年补阙张正买疏谏它事得召见与所善者数人皆被谴斥意公之出有类此也忆昨行云伾文未揃崖州炽虽得赦宥常愁猜是其为叔文等所排岂不明甚特无所归咎驾其罪於上疏耳洪兼宫市旱饥两事言之而又不考韦王始末故为申及之洪谱又云以公诗考之盖以十九年冬末贬官二十年甲申春始到阳山时有同冠峡贞女峡和张十一功曹送刘生谢李员外诸诗及别知赋送杨八弟归湖南序区册序答窦存亮书王弘中燕喜亭记】改江陵法曹参军【洪谱及历官记云廿一年乙酉正月丙申顺宗即位二月甲子大赦八月辛丑改元永贞迁者皆追回愈为观察使所抑财徙江陵府法曹参军事见八月十五夜赠张功曹诗及张署墓志河南同官记洪又云公以今年春遇赦夏秋离阳山俟命於郴者三月至秋末始受法曹之命见祭李郴州文时有郴州祁雨及郴口诸诗自郴至衡有合江亭及谒衡岳庙诗自衡至潭有陪杜侍御游湘西寺及湘中诸诗自此泛洞庭有阻风赠张十一诗至岳州有别窦司直诗赴江陵有途中寄翰林三学士诗又有送孟瑁序荆潭唱和序上李巽书郑夫人殯表及五箴序云余生三十有八年则其箴盖是年作所谓幕中之辨盖谓在徐州时台中之评则谓为御史时也】元和初权知国子博士分司东都三岁为真【洪谱云永贞二年丙戌正月丙寅朔改元元和时宪宗即位之踰年也公年三十有九其春夏犹在江陵有李花寒食出游夜归赠张十一郑羣赠箴答张彻诸诗六月自江陵召拜国子博士还朝後有丰陵行游青龙寺赠崔立之送文畅诸诗城南诸联句及祭十二兄岌文并墓志二年丁亥春公为博士有元和圣德诗并释言行状云宰相有爱公文者将以文学职处公有争先者构公语以飞之公恐及难遂求分司东都而公作周况妻韩氏墓志乃云从兄俞卒开封尉愈於时为博士乞分教东都生以收其

孥於开封界中教畜之飞语即释言所解之谗而竟不能解故以兄丧为辞而求去耳时宰相郑絪翰林舍人李吉甫裴垪也公以夏末离京赴东都有酬裴十六途中见寄诗是年有张中丞传後叙答冯宿书卢於陵墓志三年戊子改真博士见行状有酬崔十六少府及东都遇春诗与少室李渤书裴复墓志新史渤传云洛阳令韩愈遗渤书盖公时为博士五年方为河南令未尝为洛阳令也】寻改都官员外郎即拜河南令【洪谱云四年己丑公年四十二改都官员外郎守东都省神道碑云除尚书都官郎中分司判祠部行状新旧史皆云员外郎送李正字序亦但云都官郎碑文误也方考公除都官六月十日也制辞亦作员外郎洪谱又云神道碑云中官号功德使司京城观寺尚书斂手失职先生按六典尽索之以归诛其无良时其出入禁譁衆以正浮屠历官记云公判祠部日与宦者为敌恶言骂辞狼籍公牒乃上书留守郑余庆乞与诸郎官更判不见允在东都有游嵩洛诸题名送李翱侯参谋和卢汀钱徽与窦韦寻刘尊师诸诗送李正字归湖南序并诗郑涵校理序祭薛公达文并墓志京兆韦夫人墓志河南府同官记五年庚寅授河南县令神道碑云魏郛幽镇各为留邸贮潜卒以橐罪士官无敢问者先生将撻其禁以壮朝廷断民署吏俟令且发留守尹大恐遽相禁有使还为言宪宗悦曰韩愈助我者是後郛邸果谋反东都将署留守以应淮蔡人有上留守郑公启时公以论事失郑公意既令河南军人有罪公追而杖之留守不悦公以后辨明且力求去见集中行状云改河南令日以职分辨於留守及尹故军士莫敢犯禁疑郑公卒听其言故军人畏服如此也在河南有感春诗燕河南秀才序送石洪序并诗及月蚀招杨之罍河南令含池台诸诗张圆墓碣卢殷墓志】迁职方员外郎【洪谱云六年辛卯行尚书职方员外郎是年春公尚在河南有送穷文辛卯年雪寄卢仝谁氏子诸诗送温造序乳母志至京师有酬卢云夫望秋作石鼓歌复讎状卢丞房武毕垪墓志】华陰令柳涧有臯前刺史劾奏之未报而刺史罢涧讽百姓遮索军顿役直後刺史恶之按其狱贬涧房州司马愈过华以为刺史陰相党上疏治之既御史覆问得涧赃再贬封溪尉愈坐是复为博士【洪谱云七年壬辰二月乙未以职方员外郎复为国子博士年四十五旧史云愈因使过华上疏理涧公自去年以来未尝出使或云即公赴职方时过华覩其事遂疏于朝尔进学解云三年博士冗不见治旧又作三为博士按公贞元壬午授四门博士元和丙戌为国子博士丁亥分教东都今年又自郎中下迁兄四为博士矣此先言暂为御史继言三为博士则自丙戌而後三历此官也若云三年则自元年夏赴召至四年春尚为博士首尾已四年矣方考云丙戌初除丁亥分教自不必厘而为二其为博士实三迁也当作三为为是今按上句言暂为御史而此言三年博士正以其居官之久近为言恐当作年为是然亦未敢必也洪谱又云是年二月有论钱重物轻状新志云自建中定两税而物轻钱重民以为患於是诏百官议革其弊方考以为此议在穆宗即位之初通监附之长庆元年秋为得其实今年初无此议也惟会要载元和六年二月制谓建中後货轻物重许诸道所纳见钱五分量徵二分余三分兼纳实估匹段或当时有此议然亦非七年也况公六年二月尚在东都洪误矣洪谱又云是年有石鼎联句赠刘师服诗祭石洪文李素石洪墓志路应神道碑】既才高数黜官又下迁乃作进学解以自谕执政览之奇其才改比部郎中史馆修撰【洪谱云此除在八年癸巳三月乙亥旧史云执政览其文而怜之以其有史才故除是官时宰相武元衡李吉甫李绹也是年有答刘秀才论史书及乌氏田氏庙碑郑儋神道碑李虚中董溪息国夫人墓志】转考功知制诰【洪谱云九年甲午十月甲子为考功郎中依前史馆修撰十二月戊午以考功知制诰是年有元微之书田弘正书送张道士序刘昌裔神道碑王适孟郊扶风郡夫人墓志十年乙未公知制诰有和庠部卢曹长元日朝回及寒

食直归遇雨二诗与李绹书进顺宗实录状旧史云愈撰实录繁简不当叙事拙於取舍按退之作史详略各有意削去常事着其系於政者其褒善贬恶之旨明甚当时议者非之卒窜走无全篇良可惜也史又云愈说禁中事颇切直内官恶之往往於上前言其不实此言是也是年有与柳公绰二书论淮西事宜状说见明年又有捕贼行赏表蓝田县丞厅记独孤郁卫之立墓志徐偃王庙碑】进中书舍人初宪宗将平蔡命御史中丞裴度使诸军按视及还具言贼可灭与宰相议不合愈亦奏言淮西连年侵掠得不偿费其败可立而待然未可知者在陛下断与不断耳执政不喜会有人诋愈在江陵时为裴均所厚均子锷素无状愈为文章字命锷谤语器暴由是改太子右庶子【?谱云十一年丙申正月丙戌以考功郎中知制诰迁中书舍人丙申赐绯鱼五月癸未降为太子右庶子行状云盗杀武元衡公以为盗杀宰相而遽息兵其为懦甚大兵不可以息以天下力取三州尚何不可与裴丞相议合故兵遂用而宰相有不便之者月满迁中书舍人後竟以它事改右庶子时宰相李逢吉韦贯之也其云月满迁中书舍人者盖唐制台郎满岁则迁公以去年冬知制诰至今春竟一岁矣李汉云收拾遗文无所失坠公掌纶诰一年无一篇见收者失坠多矣唯後集有崔羣户部侍郎制一首尔今按行状通监洪谱论淮西事宜状在去年知制诰时而神道碑新史则在迁中书舍人之後但行状言公所论有杀宰相事乃在去年六月而状中实无此语若状果在六月之後则不应全不言及则是此状不惟不在十一年正月之後亦不在十年六月之後也故通监直以系於五月之下行状叙事虽实而记言则误碑文新史固为失之今当以通监为正洪谱又云是年有酬卢云夫曲江荷花行周况妻韩氏墓志王用碑科斗书後记】及度以宰相节度彰义军宣慰淮西奏愈行军司马愈请乘遽先入汴说韩弘使協力元济平迁刑部侍郎【行状神道碑及旧史云十二年丁酉秋以兵老久屯贼未灭上命裴丞相为淮西节度使以招讨之丞相请公以行赐三品衣鱼为行军司马从丞相居於鄆城军出潼関公请先乘遽至汴感说都统弘弘说用命师乘遂和公知蔡州精卒悉聚界上以拒官军守城者率老弱且不过千人亟白丞相请以兵三千人闲道以入必擒吴元济丞相未及行而李愬自唐州文城垒提其卒以夜入蔡州果得元济三军之士为公恨蔡州既平布衣栢耆以计谒公公与语奇之遂白丞相曰淮西灭王承宗胆破可不劳用衆宜使辩士奉相公书明祸福以招之彼必服丞相然之公口占为书使栢耆?之以至镇州承宗果大恐上表请割德棣二州以献遣子入侍丞相归京师以功?刑部侍郎诏公撰平淮西碑其辞多叙裴度事时先入蔡州擒元济李愬功第一愬不平之愬妻出入禁中因诉碑辞不实诏令磨公文命翰林学士段文昌重撰文勒石是年有送殷侑序祭张署文并墓志及东征往还醺唱诸诗晚秋鄆城夜会联句为刑部时有举钱徽自代状十三年戊戌四月郑余庆为详定礼乐使奏韩愈李程为副是年有李惟简墓志权德舆碑】宪宗遣使者往凤翔迎佛骨入禁中三日乃送佛祠王公士庶奔走膜呗至为佛法灼体肤委珍贝腾沓系路愈闻恶之乃上表极谏帝大怒持示宰相将抵以死裴度崔羣曰愈言讪谤罪之诚宜然非内怀至忠安能及此愿少寛假以来谏争帝曰愈言我奉佛太过犹可容至谓东汉奉佛以後天子咸夭促言何乖刺耶愈人臣狂妄敢尔固不可赦於是中外骇惧虽戚里诸贵亦为愈言乃贬潮州刺史既至潮以表哀谢帝颇感悔欲复用之持示宰相曰愈前所论是大爱朕然不当言天子事佛乃年促耳皇甫鎛素忌愈直即奏言愈终狂疏可且内移乃改袁州刺史初愈至潮问民疾苦皆曰恶溪有鳄鱼食民畜产且尽民以是穷数日愈自往视令其属秦济以一羊一豕投谿水而祝之是夕暴风震电起谿中数日尽涸西徙六十里自是潮无鳄鱼患袁人以男女为隶过期不赎则没入之愈至悉计庸得赎所没归之父母七百余入因与约

禁其为隶【洪谱云公以十四年己亥正月癸巳贬潮州刺史宰相疑冯宿草疏出宿为歙州刺史时宰相皇甫鎛程异也公之被谪即日上道便道取疾以至海上据宜城驿记则以三月二日过宜城据泂吏诗则以三月几望至曲江据谢表则以三月二十五日至潮州据祭文则以四月二十四日逐鳄鱼其自曲江至潮以十许日行三千里盖泂水湍急故也方考乃云谢表及祭神文皆止云今月而逐鳄鱼文正本皆但云年月日则公之到郡实不知何月日也况自韶至广虽为顺流而自广之惠自惠之潮水陆相半要非旬日可到故公表亦云自潮至广来往动皆经月则公到郡决非三月而逐鳄鱼亦未必在四月二十四日也今按道里行程则方说为是但与大颠第一书石本乃云四月七日则又似实以三月二十五日到郡也未详其说阙之可也洪谱又云公自京师至潮有路旁堠至蓝关示侄孙湘武关西逢配流吐蕃食曲江驿次邓州界过南阳泂吏题临泂寺至韶州寄张使君酬张使君惠书过始兴江口感怀赠元十八协律初南食贻元十八答柳柳州食虾蟆别赵子诸诗及宜城驿记潮州谢表祭鳄鱼文请置乡校牒贺册尊号表是年七月己丑羣臣上尊号大赦十月己巳准例量移改授袁州刺史】召拜国子祭酒【洪谱云十五年庚子闰正月穆宗即位公以今年春到袁途中有酬张韶州端公及韶州留别张使君二诗至袁有袁州谢上贺穆宗即位贺赦贺册皇太后贺庆云五表举韩泰自代状滕王阁记九月召拜国子祭酒而阁记乃云十月袁州刺史者盖命下在九月受命在十月也有祭湘君夫人文祭文所谓复其章绶者公为行军司马时赐金紫今为祭酒始复其旧也自袁趋京师有次石头驿寄江西王中丞合老仲舒诗至江州有寄鄂岳李大夫程及题西林寺故萧二郎中旧堂诗因话录云萧颖士子存字伯诚为金部员外郎恶裴延龄之为人弃官归庐山公少时尝受金部赏知及经江州游庐山访金部故居因赋此诗留百缣以之行次安陆有寄随州周员外君巢二诗至枣阳县有题广昌馆诗至□州有醉中留别李相公诗以冬暮至京师是年有南海庙碑与孟简书论黄家贼事宜及典贴良人男女状又论夷?请因改元大庆遣使宣谕仍择经略使抚之又有柳子厚及侄孙滂祭文墓志洪谱又云行状云公入迁祭酒有直讲能说礼而陋容学官多豪族子宾之不得共食公命吏曰召直讲来与祭酒共食学官由此不敢贱直讲奏儒生为学官日使会讲生徒奔走听闻皆相喜曰韩公来为祭酒国子监不寂寞矣公在国子有雨中寄张籍诗举张惟素自代反请复国子监生徒状论新注学官牒荐张籍状请上尊号表】转兵部侍郎【洪谱云此除在长庆元年辛丑七月时有举韦顓自代状李邢张彻祭文李邢郑羣薛戎墓志今按方氏增考论钱重物轻状当在此年秋】镇州乱杀田弘正而立王廷凑诏愈宣抚既行衆皆危之元稹言韩愈可惜穆宗亦悔诏愈度事从宜无必入愈曰安有受君命而滞留自顾遂疾驱入廷凑严兵迓之甲士陈庭既坐廷凑曰所以纷纷者乃此士卒也愈大声曰天子以公为有将帅材故赐以节岂意同贼反邪语未终士前奋曰先太师为国击朱滔血衣犹在此军何负朝廷乃以为贼乎愈曰以为尔不记先太师也若犹记之固善且为逆与顺利害不能远引古事但以天宝来祸福为尔等明之安禄山史思明李希烈梁崇义朱滔朱泚吴元济李师道有若子若孙在乎亦有居官者乎衆曰无愈曰田公以魏博六州归朝廷官中书令父子受旗节刘悟李佑皆大镇此尔军所共闻也衆曰弘正刻故此军不安愈曰然尔曹害田公又残其家矣复何道衆乃謹曰侍郎语是廷凑恐衆心动遽麾使去因泣谓愈曰今欲廷凑何所为愈曰神策六军之将如牛元翼比者不少但朝廷顾大体不可弃之公久围之何也廷凑曰即出之愈曰若尔则无事矣会元翼亦溃围出廷凑不追愈归奏其语帝大悦转吏部侍郎【洪谱云长庆元年七月镇州乱杀田弘正立王廷凑命深州刺史牛元翼节度深冀以讨之十月命裴度为镇州

四面行营都招讨使元翼为廷湊所围二年壬寅二月赦廷湊诏愈宣抚归而牛元翼粟出行状云公还於上前奏与廷湊及三军语上大悦曰卿直向伊如此道由是有意大用授吏部侍郎今按先太师谓故镇帅王武俊也神道碑云方镇反太原兵以轻利诱回纥召先生祸福譬引虎啗臙血直今所患非兵不足遽踈陈得失

今按此数语不可晓它书亦皆无之未详何谓恐有误也洪谱又云是年有次壽阳驿次太原呈副使吴郎中次承天营奉酬裴司空镇州路上酬裴司空重见寄镇州初归诸诗及韦侍讲盛山诗序论变盐法事宜状二年壬寅九月转吏部侍郎行状云凡令吏皆不锁听出入或问公公曰人所以畏鬼者以其不能见也鬼如可见则人不畏矣选人不得见令史故令史势重听其出入故势轻是年有郢州谿堂诗窰司业祭文墓志楚国夫人墓志黄陵庙碑】时宰相李逢吉恶李绅欲逐之遂以愈为京兆尹兼御史大夫特诏不台参而除绅中丞绅果劾奏愈愈以诏自解其後文刺纷然宰相以台府不协遂罢愈为兵部侍郎而出绅江西观察使绅见帝得留愈亦复为吏部侍郎【洪谱云三年癸卯六月以吏部侍郎为京兆尹兼御史大夫勅放台参後不得为例十月癸巳为兵部侍郎庚子为吏部侍郎行状云改京兆尹六军将士皆不敢犯私相告曰是尚欲烧佛骨者安可忤故盗贼止遇旱米价不敢上李绅为御史中丞械囚送府使以尹杖杖之公曰安有此使归其囚是时绅方幸旦夕且相宰相欲去之故以台与府不协为请两改其官绅既复留公入谢上曰卿与绅争何事公因自辨数日复为吏部侍郎神道碑云复为兵部侍郎铨不锁入吏选父七十母六十身七十悉与三利取才财势路絶今按碑失兵部一节此兵字当作吏字不鎖入吏即谓前纵吏出入事三利取才未详其义疑铨法有此语或是有脱误也洪谱云公为京兆有举马总自代状贺雨及贺太阳不亏表祭竹林神曲江祭龙文再为兵部有举张正甫自代状是年有罗池庙碑送郑权序并诗祭马总女孥文并李干女孥墓志韩弘碑论孔戣致仕状】长庆四年卒年五十七赠礼部尚书谥曰文【洪谱云四年甲辰正月敬宗即位二月有王仲舒碑四月有张彻墓志八月有孔戣墓志是年公没年五十七行状云得病满百日假既罢以十二月二日卒於靖安里第公属纆语曰某伯兄德行高晓方药食必视本草年止於四十二某疎愚食不择禁忌位为侍郎年出伯兄十五岁矣如又不足於何而足且获终於牖下幸不至失大节以下见先人可谓荣矣明年张籍祭公诗有云去夏公请告养疾城南庄籍时官休罢两月同游翔又曰共爱池上住联句舒遐情又曰公为游溪诗唱咏多慨慷城南庄在长安城南公之别墅也池上联句集中无之游溪诗即南溪始泛三首是也又曰公有旷达识生死为一纲及当临终晨意色亦不荒赠我珍重言傲然委衾裳其於死生之际如此神道碑云遗命丧葬无不如礼俗习佛法画写浮图日以七数之及拘陰阳所谓吉凶一无污我今按此事可见公之平生谨守礼法排斥异教自信之笃至死不变可以为後世法而谱不载盖不以为然也】愈性明锐不诡随与人交终始不少变成就後进士往往知名经愈指授皆称韩门弟子愈官显稍谢遣凡内外亲若交友无後者为嫁遣孤女而恤其家嫂郑丧为服葦以报【行状云公气厚性通论议多大体神道碑云朝有大狱大疑文武会同莫先发言先生援经引决考合传记侃侃正色伏其所词墓志云公洞朗轩辟不施戟级平居虽寝食未尝去书怠以为枕餐以饴口讲评孜孜以磨诸生恐不完美游以诙笑啸歌使皆醉义忘归呜呼可谓乐易君子钜人者矣碑又云内外惇弱悉抚之一亲以仁使男有官女有从不敢於已生交於人已而我负终不计死则庀其家均食剖资虽微弱待之如贤戚人诟笑之愈笃未尝一食不对客闺人或画见其面退相指语以为异事未尝宿货余财每曰吾前日解衣质食今存有已多矣】每言文章自汉司马相如太史公刘向扬雄後

作者不世出故愈深探本元卓然树立成一家言其原道原性师说等数十篇皆奥衍闳深与孟轲扬雄相表里而佐佑六经云至它文造端置辞要为不袭蹈前人者然惟愈为之沛然若有余至其徒李翱李汉皇甫湜从而效之遽不及远甚从愈游者若孟郊张籍亦皆自名於时【墓志云先生之作无圆无方至是归工抉经之心执圣之?尚友作者跋邪舐舐以扶孔氏存皇之极知人罪非我计茹古涵今无有端涯浑浑灏灏不可窥校及其酣放豪曲快字凌纸怪发鲸铿春丽惊耀天下然而栗密窃眇章妥句适精能之至入神出天呜呼极矣後人无以加之矣姬氏已来一人而止矣按知人罪非我计此句中必有脱误疑当云人知人罪非我所计方氏附録程子曰韩愈亦近世豪杰之士如原道之言虽不能无病然自孟子以来能知此者独愈而已其曰孟氏醇乎醇又曰荀与扬也择焉而不精语焉而不详若无所见安能由千载之後判其得失若是之明也又曰退之晚年之文所见甚高不可易而读也古之学者修德而已有德则言可不学而能此必然之理也退之乃以学文之故日求其所未至故其所见及此其於为学之序虽若有所戾者然其言曰轲之死不得其传此非有所袭於前人之语又非凿空信口率然而言之是必有所见矣若无所见则其所谓以是而传者果何事邪 今按诸贤之论唯此二条为能极其深处然复考诸临川王氏之书则其诗有曰纷纷易尽百年身举世何人识道真力去陈言夸末俗可怜无补费精神其为予夺乃有大不同者故尝折其衷而论之窃谓程子之意固为得其大端而王氏之言亦自不为无理盖韩公於道知其用之周於万事而未知其体之具於吾之一心知其可行於天下而未知其本之当先於吾之一身也是以其言常详於外而略於内其志常极於远大而其行未必能谨於细微虽知文与道有内外浅深之殊而终未能审其缓急重轻之序以决取舍虽知汲汲以行道济时抑邪与正为事而或未免杂乎贪位慕禄之私此其见於文字之中信有如王氏所讥者矣但王氏虽能言此而其所谓道真者实乃老佛之余波正韩公所深诋则是楚虽失而齐亦未为得耳故今兼存其说而因附以狂妄管窥之一二私窃以为若以是而论之则於韩公之学所以为得失者庶几其有分乎】

赞曰唐兴承五代剖分王政不纲文弊质穷?俚混并天下已定治荒剔蠹讨?儒术以兴典宪薰醲涵浸殆百余年其後文章稍稍可述至贞元元和间愈遂以六经之文为诸儒倡障堤末流反剗以朴剗伪以真然愈之才自视司马迁扬雄至班固以下不论也当其所得粹然一出於正刊落陈言横骛别驱汪洋大肆要之无抵牾圣人者其道盖自比孟轲以荀况扬雄为未淳宁不信然至进谏陈谋排难恤孤矫拂媮末皇皇於仁义可谓笃道君子矣自晋讫隋老佛显行圣道不断如带诸儒倚天下正议助为怪神愈独喟然引圣争四海之惑虽蒙讪咲踣而复奋始若未之信卒大显於时昔孟轲拒扬墨去孔子才二百年愈排二家乃去千余岁拨衰反正功与齐而力倍之所以过况雄为不少矣自愈没其言大行学者仰之如泰山北斗云

文録序 赵 德

昌黎公圣人之徒欤其文高出与古之遗文不相上下所履之道则尧舜禹汤文武周孔孟轲扬雄所授受服行之实也固已不杂其传由佛及聃庄杨之言不得干其思入其文也以是光於今大於後金石燹铄斯文灿然德行道学文庶几乎古蓬茨中手持目览饥食渴饮沛然满饱顾非适诸圣贤之域而谬志於斯将所以盗其影响僻处无备得以所遇次之为卷私曰文

錄實以師氏為請益依歸之所云【實或作室】

記舊本韓文後 歐陽文忠公

予少家漢東漢東僻陋無學者吾家又貧無藏書州南有大姓李氏者其子彥輔頗好學予為兒童時多游其家見其弊筐貯故書在壁間發而視之得唐昌黎先生文集六卷脫略顛倒無次第因乞李氏以歸讀之見其言深厚而雄博然予猶少未能其義徒見其浩然無涯若可愛是時天下學者楊劉之作號為時文能者取科第擅名聲以夸榮當世未嘗有道韓文者予亦方舉進士以禮部詩賦為事年十有七試于州為有司所黜因取所藏韓氏之文復閱之則喟然嘆曰學者當至於是而止爾因怪時人之不道而顧已亦未暇學徒時時獨念于予心以謂方從進士千祿以養親苟得祿矣當盡力于斯文以償其素志後七年舉進士及第官于洛陽而尹師魯之徒皆在遂相與作為古文因出所藏昌黎集而補綴之求人家所有舊本而校定之其後天下學者亦漸趨於古而韓文遂行于世至于今蓋三十余年矣學者非韓不學也可謂盛矣嗚呼道固有行於遠而止於近有忽于往而貴于今者非惟世俗好惡之使然亦其理有當然者故孔孟惶惶於一時而師法於千萬世韓氏之文沒而不可見者二百年而後大施於今此又非特好惡之所上下蓋其久而愈明不可磨滅雖蔽于暫而終耀于無窮者其道當然也予之始得於韓也當其沈沒棄廢之時予固知其不以追時好而取勢利於是就而學之則予之所為者豈所以急名譽而干勢利之用哉亦志乎久而已矣故予之仕於進不為喜退不為懼者蓋其志先定而所學者宜然也集本出於蜀文字刻画頗精於今世俗本而脫繆尤多凡三十年間聞人有善本者必求而改正之其最後卷秩不足今不復補者重增其故也予家藏書万卷獨昌黎先生為舊物也嗚呼韓氏之文之道萬世所共尊天下所共傳而有也予於此本特以其舊物而尤惜之【泉本云吾少居漢東年十五六時於里人李堯輔家見一弊筐棄在壁角中有故書數十冊因得韓文於其間皆脫落無次序吾略讀之愛其文辨而意深當是時學者方作時文天下之人無道韓文者予亦將舉進士以觖祿利未暇學也遂求於李氏而得之以歸補次成秩而藏之數年始及第遂官于洛而得師魯與之游因出韓文而學之自後天下學者亦稍稍近古吾家所藏書万卷然獨韓文最為舊物君為吾愛惜之可也今按泉州本乃汪彥章所刻此序獨與諸本不同不知何據其所謂君者又不知為何人也今并存之以俟知者】

潮州韓文公廟碑 蘇文忠公

匹夫而為百世師一言而為天下法是皆有以參天地之化關盛衰之運其生也有自來其逝也有所為矣故申呂自岳降而傳說為列星古今所傳不可誣也孟子曰吾善養浩然之氣是氣也寓於尋常之中而塞乎天地之間卒然遇之則王公失其貴晉楚失其富良平失其智賁育失其勇儀秦失其辯是孰使之然哉其必有不依形而立不恃力而行不待生而存不隨死而亡者矣故在天為星辰在地為河岳幽則為鬼神而明則復為人此理之常無足怪者自東漢以來道喪文弊異端並起歷唐貞觀開元之盛輔以房杜姚宋而不能救獨韓文公起布衣談笑而麾之天下靡然從公復歸于正蓋三百年於此矣文起八代之衰而道濟天下之溺忠犯人主之怒而勇奪三軍之帥此豈非參天地關盛衰浩然而獨存者乎蓋嘗論天人之辨以

谓人无所不至惟天不容伪智可以欺王公不可以欺豚鱼力可以得天下不可以得匹夫匹妇之心故公之精诚能开衡山之云而不能回宪宗之惑能训鳄鱼之暴而不能弭皇甫鏖李逢吉之谤能信於南海之民庙食百世而不能使其身一日安於朝廷之上盖其所能者天也其所不能者人也始潮人未知学公命进士赵德为之师自是潮之士皆笃於文行延及齐民至于今号称易治信乎孔子之言君子学道则爱人而小人学道则易使也潮人之事公也饮食必祭水旱疾疫凡有求必祷焉而庙在刺史公堂之後民以出入为艰前守欲请诸朝作新庙不果元佑五年朝散郎王君滌来守是邦凡所以养士治民者一以公为师民既悦服则出令曰愿新公庙者听民讜趋之卜地於州城南七里期年而庙成或曰公去国万里而谪于潮不能一岁而归没而有知其不眷恋于潮也审矣轼曰不然公之神在天下者如水之在地中无所往而不在也而潮人独信之深思之至焄蒿凄怆若或见之譬如凿井得泉而曰水专在是岂理也哉元丰七年诏封公昌黎伯故榜曰昌黎伯韩文公之庙潮人请书其事于石因为作诗以遗之使歌以祀公其词曰公昔骑龙白云乡手抉云汉分天章天孙为织云锦裳飘然乘风来帝旁下与浊世扫秕糠西游咸池略扶桑草木衣被昭回光追逐李杜参翱翔汗流籍湜走且僵灭没倒景不可望作书诋佛讥君王要观南海窥衡湘历舜九疑吊英皇祝融先驱海若藏约束蛟鳄如驱羊钧天无人帝悲伤讴吟下招遣巫阳爓牲鸡卜羞我觴於粢荔丹与蕉黄公不少留我涕滂翩然被髮下大荒

朱子校昌黎集传

卷一

<集部,别集类,汉至五代,东雅堂昌黎集注>

钦定四库全书 集部二

东雅堂昌黎集注卷一 别集类一 【唐】

赋【宋莒公云冯章靖亲校旧本每卷首具列卷中篇目冯悉以朱墨灭杀之惟存其都凡集外别有目錄一卷今按李汉所作序云总七百首并目錄合四十一卷则正与冯合】

感二鸟赋【并序 公贞元十一年正月至三月以前进士三上宰相书不报时宰相赵憬贾耽卢迈宜其不遇也五月东归遇所献二鸟感而作公之赋见於集者四大抵多有取於离骚之意此篇苏子美亦谓其悲激顿挫有骚人之思疑其年壮气鋭欲发其藻章以耀于世苏语虽少贬然进学解所云不虚矣】

贞元十一年【一或作五以诸谱考之作一为是】五月戊辰愈东归癸酉自潼关【潼关在华阴】出息於河之阴时始去京师有不遇时之叹见行有笼白乌白鸛而西者【旧史德宗贞元十一年河阳献白乌】号於道曰某土之守某官【一作某土之守臣某用礼记全句守音狩】使使者进於天子【使使下去音】东西行者皆避路【西下阁杭本无行字考之礼记及公送温造序当有】莫敢正目焉因窃自悲幸生天下无事时承先人之遗业不识干戈耒耜攻守耕获之勤读书着文自七岁至今凡二十二年其行已不敢有愧於道【於杭作之非是】其闲居思念前古当今之故亦仅志其一二大者焉选举於有司与百十人偕进退【十或作千此专为选举而言也贞元九年应宏词者仅三十二人作十为是退上或再有偕字】曾不得名荐书【方从阁本名上有列字名下有於字 今按嘉佑杭本与谢本并无此二字语简而意已足方本非是】齿下士于朝以仰望天子之光明今是鸟也惟以羽毛之异【以下或有其字】非有道德智谋承顾问赞教化者乃反得蒙采擢荐进光耀如此【此下诸本有可以人而不如鸟乎一句今从阁本文粹删去】故为赋以自悼且明夫遭时者虽小善必达不遭时者累善无所容焉其辞曰

吾何归乎【此句或在苟有食其从之下】吾将既行而後思诚不足以自存苟有食其从之【苟或作敬非是】出国门而东骛【音务驰也】触白日之隆景时返顾以流涕念西路之羌永【路一作洛羌或作差 今按作差固谬然羌乃发语之词施之句内似亦未安以上文返顾流涕之语推之则西路乃长安之路而此字当为浸渐愈益之意不知的是何字又恐或是逾字】过潼关而坐息窥黄流之奔猛【黄流或作流黄】感二鸟之无知方蒙恩而入幸惟进退之殊异增余怀之耿耿彼中心之何嘉【之或作其嘉或作憇非是】徒外饰焉是逞【焉或作而】余生命之湮厄曾二鸟之不如汨东西与南北【楚辞汨余若将不及说文水流

也汨音聿】恒十年而不居【恒或作亘而或作以恒居邓切与亘竟之亘同班固叙传恒以年岁选诗徙倚恒漏穷】辱饱食其有数【其一作兮】况策名於荐书【策方从阁杭作荣云公上宰相书非苟没於利荣於名也与此义通今按唐人口字俗体从竹从宋亦有只从艹者与荣字絶相近故阁本作荣盖传写之误耳方引荣於名亦与此语意不相似於或作与亦未是】时所好之为贤【好去声】庸有谓余之非愚昔殷之高宗得良弼於宵寐【或云昔上当有在字或是念字由上句末有愚字相似而脱也】孰左右者为之先信天同而神比【先下或有容字信或作容皆非是汉酈食其传沛公吾所愿从游莫为我先韩语祖此】及时运之未来或两求而莫致虽家到而户说【或作晓】祇以招尤而速累盖上天之生余亦有期於下地盍求配於古人独怊怅於无位惟得之而不能【惟方作虽惟字正是韓转处作虽即无力矣能或作孤亦非是】乃鬼神之所戏幸年岁之未暮庶无美於斯类【今按上文之意若曰天之生我必有所用何不力慕古人如传说之徒而独怊怅於无位耶惟或者苟得其位而不能追配古人但如二鸟之空被荣宠乃是鬼神之所戏耳故幸年岁之未晚而庶几无慕于斯类也斯类盖并指二鸟与彼得之而不能者而言也欧阳文忠读李习之幽怀赋以谓翱一时有道而能文者莫如韩愈愈尝有赋矣不过美二鸟之光荣叹一】

【饱之无时尔是心使光荣而饱则不复云矣若翱独不然其赋曰衆器器而杂处兮咸叹老而嗟卑视余心之不然兮虑行道之犹非怪神尧以一旅取天下而後世子孙不能以天下取河北以为忧呜呼使当时君子皆易其叹老嗟卑之心为翱所忧之心唐之天下岂有乱与亡哉欧阳子之论善矣虽然公不云乎文章之作常发於羈旅草野至王公贵人气得志满非性能而好之则不暇以为感二鸟赋盖所谓发於羈旅草野者使其光荣而饱忧天下之心孰谓公一日忘耶】

复志赋【并序 公贞元八年擢进士第十一年犹未得仕东归十二年始佐汴州明年又辞以疾此赋句法步骤离骚往往相似晁无咎尝取此赋於变骚中】

愈既从陇西公平汴州【陇西公董晋也按晋行状贞元十一年七月拜检校尚书左仆射汴州刺史晋受命遂行公及刘宗经韦弘景实从之辟公为汴州观察推官其曰明年七月则十三年作也】其明年七月有负薪之疾【负薪贱者之称礼记问庶人之子长曰能负薪矣幼曰未能负薪也又君使士射不能则辞以疾曰某有负薪之忧郑氏注忧亦作疾公羊注云大夫病曰犬马士病曰负薪公病作此赋故云】退休于居作复志赋其辞曰

居悒悒之无解兮【悒音邑忧也选云良增悒悒解或作辞】独长思而永叹【音滩骚云心郁郁之忧思兮独永叹乎增伤】岂朝食之不饱兮宁冬裘之不完昔余之既有知兮诚坎轲而艰难【坎轲不平易貌选坎轲多辛苦 轲音可坎或作轹】当岁行之未复兮从伯氏以南迁【岁行十二年而一复大历十二年公从兄会南迁韶州时年十岁故云岁行未复也伯氏兄称诗伯氏吹埙仲氏吹篪】凌大江之惊波兮过洞庭之漫漫【按唐地理志洞庭在岳州巴陵县郭璞注山海经云洞庭地穴湖水广圆五百余里日月若出没於其中也漫漫大水貌选归海流漫漫 漫谟官切】至曲江而乃息兮【唐地理志韶州治曲江县】逾南纪之连山【唐一行以天下山河之象存乎两戒分南北纪韶在南纪之外焉诗云滔滔江汉南国之纪

南纪字杜诗多用如南纪风涛壮南纪阻归楫相国生南纪之类】嗟日月其几何兮携孤嫠而北旋【孤谓孤儿嫠谓寡妇左氏传云莒子杀其夫已为嫠妇谓会卒於韶州公从嫂归葬河阳携户圭切嫠音厘旋以宣切还也孤嫠一作嫠孤】值中原之有事兮将就食於江之南【方从阁本无将字於下有大字或又无之字今详文势皆非是建中二年成德魏博山南平卢节度相继称乱三年王武俊李希烈反四年泾原姚令言犯京师德宗幸奉天朱泚犯奉天兴元元年李怀光反如梁州贞元元年公以中原多故避地江左】始专专於讲习兮非古训为无所用其心【方从阁本古作诂为作焉非是】窥前灵之逸迹兮【灵一作修】超孤举而幽寻既识路又疾驱兮孰知余力之不任【音壬】考古人之所佩兮閱时俗之所服【骚云謇吾法夫前修兮非世俗之所服服亦佩也考古之所佩与时之所服言当世之士不及古人远矣惟已可庶几古人也阁杭作阙非是】忽忘身之不肖兮【之或作而又或作之者皆非是】谓青紫其可拾【夏侯胜谓诸生曰经术苟明取青紫如俯拾地芥耳梁刘孝标辨命论曰视韩彭之豹变谓鸷猛致人爵见张桓之朱绂谓明经拾青紫岂知有力者运之而趋乎公此语事本夏侯胜传而意取刘孝标论】自知者为明兮【老子知人者知自知者明】故吾之所以为惑【吾下或有志字非是】择吉日余西征兮亦既造夫京师【京师在西故云西征公贞元二年自宣城至京师既或作冀】君之门不可迳而入兮【迳或作径】遂从试於有司惟名利之都府兮羌衆人之所驰【羌起羊切一或作差非所或作四骚云羌衆人之所仇羌楚人发语端词犹言卿何为也字】竞乘时而附势兮纷变化其难推【附势或作射利或只附字作射字班彪曰乘时射利商人之功此借用其语以讥世也】全纯愚以靖处兮将与彼而异宜欲奔走以及事兮顾初心而自非朝骋骛乎书林兮夕翱翔乎艺苑【扬雄长杨赋云并包书林剧秦美新云发秘府览书林遥集乎文雅之囿翱翔乎礼乐之场班固宾戏云真婆娑乎艺术之场休息乎篇籍之囿骋或作驰楚词朝骋骛乎江皋作驰非是】谅却步以图前兮【却去约切退也家语儒行篇是犹却步而欲求及前人不可得也前汉刘向传犹郤行而求及前人也】不浸近而愈远哀白日之不与吾谋兮至今十年其犹初岂不登名於一科兮【贞元八年公登第】曾不补其遗余进既不获其志愿兮退将遁而穷居【骚云进不入以离尤兮退将复修吾初服】排国门而东出兮【贞元十一年公东归】慨余行之舒舒【慨或作嗟】时凭高以回顾兮涕泣下之交如【之或作而易大有卦厥孚交如】戾洛师而怅望兮【戾即计切诗云我客戾止洛师洛阳也】聊浮游以踟蹰【庄子圣人踟蹰以兴事注从容也骚云聊浮游以逍遥踟音踟蹰音除】假大龟以视兆兮【大或作火】求幽贞之所庐【幽贞隐者易幽人贞吉庐寄也曹植节游赋曰非吾人之所庐顔延年拜陵庙诗幼壮困孤介未暮谢幽贞】甘潜伏以老死兮不显着其名誉【音坎】非夫子之洵美兮吾何为乎浚之都【夫子谓董晋也浚之都汴州也公贞元二年丙寅始自江南入京师十一年乙亥春三上宰相书不遇夏东归秋至洛阳十三年丙子秋从董晋入汴州晋辟署试校书郎为汴宋濠颍泗州观察推官凡十余年矣故上云至今十年其犹初】小人之怀惠兮犹知献其至愚固余异於牛马兮宁止乎饮水而求刍伏门下而默默兮【下而或作下之】竟岁年以康娱【竟或作卒】时乘闲以获进兮【闲何艰切闲暇也又居菟切空隙也楚辞九章篇愿乘闲而自察】顔垂欢而愉愉【而或作之】仰盛德以安穷兮又何忠之能输昔余之约吾心兮谁无施而有获【方从阁本谁作惟下又有德字云李本谓陈无已去德字今本复讹惟为谁其误甚矣今按此句本用楚词孰无施而有报孰不殖而有获之语词意既有自来又与上下文势相应故嘉佑杭本与诸本多如此乃是韩公本文相传已久非陈以意定也阁本

之谬如此而方信之反以善本为误今不得不辨也又嘉佑杭本世多有之而其不同处方皆不録岂其偶未见耶抑忽之而不观也】嫉贪佞之洿浊兮【说文洿浊水不流孟子数罟不入洿池 洿汪胡切】曰吾其既劳而後食【方无既字非是】惩此志之不修兮爱此言之不可忘【修方作循云唐人书修近循楚词亦有误者 今按唐人书字之误方说是也然此乃修误作循非循误作修也修犹修好修怨之修盖因旧增新之意耳】情怊怅以自失兮心无归之茫茫【之或作而】苟不内得其如斯兮孰与不食而高翔抱关之厄陋兮有肆志之扬扬【诸本多作阳阳後汉孔嵩传云晨门肆志於抱关史记晏婴传志气扬扬公当是用此语诗君子阳阳则注谓无所用其心非公所用字也】伊尹之乐於畎亩兮焉富贵之能当恐誓言之不固兮斯自讼以成章【斯或作聊讼或作诵】往者不可复兮冀来今之可望【音忘】

闵已赋【公尝佐董晋于汴未几晋薨复佐戎徐州徐帅张建封也建封又薨公罢去来居于洛时贞元十六年也晁无咎尝取此篇于续楚词而系之曰愈才高数黜官颇自伤其不遇故云】

余悲不及古之人兮伊时势而则然【而或作兮】独闵闵其曷已兮【闵闵或作闷闷 按洪庆善云欧宋皆无兮字後皆复添或云咸通本复志赋与此赋皆无兮字未知孰是】凭文章以自宣昔顔氏之庶几兮在隐约而平寛【楚辞居处愁以隐约兮注谓隐身守约也选魏文帝典论云文王幽而演易不以隐约而不务】固哲人之细事兮夫子乃嗟叹其贤恶饮食乎陋巷兮亦足以颐神而保年【阁本无食字非是】有至圣而为之依归兮又何不自得於艰难【何下或有苦字 东坡为胶西守孔宗翰作顔乐亭诗其序有曰昔夫子以簞食瓢饮贤顔子而韩子乃以为哲人之细事何哉苏子曰古之观人也必於其小焉观之其大者容有伪焉人能碎千金之璧不能无失声于破釜能搏猛虎不能无变色於蜂虿孰知簞食瓢饮之为哲人大事乎司马温公又曰子瞻论韩愈以在隐约而平寛为哲人之细事以为君子於人必於其小观焉光谓韩子以三书抵宰相求官与于襄阳书求朝夕刍米仆赁之资又好悦人以志铭而受其金其戚戚于贫贱如此乌知顔子之所为哉司马苏氏之论当矣虽然退之尝荅李习之书曰孔子称顔回一簞食一瓢饮人不堪其忧回也不改其乐彼人者有圣者为之依归而又有簞食瓢饮足以不死其不忧而乐也岂不易哉若仆无所依归无簞食瓢饮无所取资则饿而死不亦难乎而此赋又云尔盖闵已之不若也东坡温国独谓其不然要为顔子言之尔】曰余昏昏其无类兮望夫人其已远【诗小雅焦贛易林读远字皆协平声作还字者非夫冯无切】行舟楫而不识四方兮涉大水之漫漫勤祖先之所贻兮勉汲汲於前修之言【骚云不量凿而正枘兮固前修以菹醢注前修前世修名之人也】虽举足以蹈道兮【蹈道字本穀梁传云蹈道则未也】哀与我者为谁衆皆舍而已用兮忽自惑其是非下土茫茫其广大兮余壹不知其可怀【壹本多作岂 阁杭本作壹旧监本潮本尚作一讹壹为岂自蜀本也檀弓云予壹不知夫丧之踊也韩语盖原此】就水草以休息兮恒未安而既危久拳拳其何故兮亦天命之本宜【本或作所】惟否泰之相极兮咸一得而一违【阁本作衰非是】君子有失其所兮小人有得其时聊固守以静俟兮诚不及古之人兮其焉悲【人下一无兮字焉於虔切】

别知赋【公岁癸未贞元十九年冬以监察御史言旱饥得罪黜连之阳山令明年春至邑连

在唐属湖南道时杨仪之以湖南支使来公为赋以别之集中又有序送焉】

余取友於天下将岁行之两周【周谓十二年公自兴元元年甲子以中原多故避地江南至贞元十九年癸未凡二十年矣故云两周】下何深之不即上何高之不求纷扰扰其既多咸喜能而好修【好去声纷一或作伊纷扰或作伊纷其或作而咸一作或非是】宁安显而独裕顾厄穷而共愁【穷或作塞】惟知心之难得斯百一而为收【之或作而斯或作在百一或作一旦皆非是陆机叹逝赋得十一於千百韩用此意】岁癸未而迁逐侣虫蛇於海陬【陬音鰕侣一或作旅】遇夫人之来使【夫音冯无切使去声将命者】辟公馆而罗羞【而或作以】索微言於乱志【前汉艺文志昔仲尼没而微言絶注微妙之言耳】发孤笑於羣忧物何深而不镜【一作考】理何隐而不抽始参差以异序卒烂漫以同流【参差上楚簪切下楚宜切又楚佳切不齐也以或作於烂漫本或作烂熳或作澜漫云漫莫半切又谟官切大水也】何此欢之不可恃遂驾马而回輶【遂或作卒而或作以輶车輶也诗五檠梁輶文意谓仪之讫事而反】山礧礧其相轧【礧五交切一或作磬】树蓊蓊其相摻【蓊蓊木茂也前汉观衆木之蓊蓊摻绞也仪礼殇之經者不摻垂注不绞其带之垂者杜诗古木龍嵒枝相摻蓊音翁又乌孔切摻居由切摻或作繆】雨浪浪其不止【楚辞沾余襟之浪浪并音琅】云浩浩其常浮【江淹别赋云风萧萧而异响云漫漫兮奇色公此颇效其体云或作雪浩浩或作活活其或皆作而】知来者之不可以数【楚辞哀时命篇俛者不可与期渊明归去来辞知来者之可追数频也论语朋友数斯疎矣数音朔】哀去此而无由【或无者字或无之字皆非是而或作以】倚郭郛而掩涕空尽日以迟留【而或作其】

古诗

元和圣德诗【并序 此诗元和二年作宪宗纪永贞元年八月即位明年正月改元元和杨惠琳据夏州叛三月辛巳夏州兵马使周承全斩惠琳传首以献九月辛亥高崇文奏收成都擒刘辟以献十月壬午淄青李师道十一月戊申武宁张愔皆受命二年正月己丑朔上亲献太清宫太庙辛卯祀昊天上帝于郊丘还宫大赦天下公时为国子博士分教东都此诗所以作也 穆伯长曰退之元和圣德诗淮西碑柳雅章之类皆辞严义伟制作如经能峩然耸唐德於盛汉之表笔墨间录云此序乃司马迁之文非相如文也】

臣愈顿首再拜言【此下或有曰字】臣伏见皇帝陛下即位已来诛流奸臣【永贞元年八月庚子宪宗即位壬寅贬右散骑常侍王伾为开州司马前户部侍郎度支盐铁转运使王叔文为渝州司户九月贬韩泰等为诸州刺史十一月贬中书侍郎平章事韦执谊为崖州司户诛流奸臣谓此也】朝廷清明无有欺蔽外斩杨惠琳刘辟以收夏蜀东定青徐积年之叛海内怖骇不敢违越郊天告庙神灵欢喜风雨晦明【或作明晦】无不从顺太平之期适当今日臣蒙被恩泽日与羣臣序立紫宸殿陛下【或无陛下】亲望穆穆之光而其职业【而或作况】又在以经籍教导国子诚宜率先作歌诗以称道盛德不可以辞语浅薄不足以自効为解【或作懈或作辞皆非是自左传请以曹为解迂固相承用之非一】辄依古作四言元和圣德诗一篇凡千有二十四字指事实録具载明天子文武神圣以警动百姓耳目传示无极【警或作惊流俗妄改也史记尊宠乐毅以警动燕齐义当用此】其诗曰

皇帝即阼【或作祚史记文纪有皇帝即阼一全语实用阼字 今按阼谓东阶也作祚非是】物无违拒曰阳而阳曰雨而雨【尚书洪范篇八庶徵曰雨曰阳曰肃时雨若曰乂时阳若】维是元年有盗在夏欲覆其州以踵近武【近或作其踵继也武迹也先是德宗建中间李希烈朱泚等反至是杨惠琳刘辟继踵而起焉】皇帝曰嘻岂不在我负鄙为艰纵则不可出师征之其衆十旅【十或作千方云按此专纪杨惠琳之乱也时严绶在河东表请讨之诏与天德军合击未尝他出师也十旅为正 今按周礼五人为伍五伍为两四两为卒五卒为旅则一旅五百人而十旅五千人也方说得之亦见以顺讨逆师不在衆之意】军其城下告以福祸腹败枝披不敢保聚擲首陴外【陴城上女墙左氏卫人登陴音脾】降幡夜豎【谓承全斩惠琳也】疆外之险莫过蜀土韦臯去镇刘辟守後血人于牙不肯吐口【传言辟尝病见问疾者必以手行入其口辟辄裂食之其很恶如此 人或作入】开库啗士卒曰随所取【曰方作日 今按此乃述其诱啗士卒之词方本非是】汝张汝弓汝鼓汝鼓【上鼓字或作伐或作桴或作击春秋传云伐鼓于社伐击也诗采芑伐鼓渊渊振旅闐闐】汝为表书求我帅汝【传言辟守後务讽诸将徼麾节】事始上闻在列咸怒皇帝曰然嗟远士女苟附而安则且付与读命於庭【读或作续非是】出节少府【唐百官志云符宝郎凡命将遣使皆赐旌节旌以颡赏节以颡杀】朝发京师夕至其部【辟既自为留後上初嗣位未能讨是岁十二月以辟为西川节度副使知节度事】辟喜谓党汝振而伍蜀可全有此不当受【不当或作当不非是 辟既得旌节志益骄求兼三川上不许】万牛脔炙【或作?脔切也庄子不敢食一脔?与炙同广韵引周书始燔肉为炙又礼记毋啜炙 脔力转切?之夜切或曰即戡字侧吏切】万瓮行酒以锦纒股以红帕首【方云荆公本音麦潮本亦然方言注络头帕头也音豹今多读作莫辖切公送李益郑权序皆用此语或作帑字盖二音通读 今按集韵帕莫白切无莫辖音帑莫葛切带也方说误 实录曰禹会涂山之夕大风雷震有甲步卒千余人其不被甲者以红绡帕抹其额自此遂为军容之服】有恇其凶有饵其诱【凶方作胷 今按此二句盖言有畏其暴者有贪其利者故从之者衆耳非本心乐从也方本非是 黄石公记曰芳饵之下必有悬鱼重赏之下必有死夫诗意取此】其出穰穰【诗降福穰穰注衆也穰音攘】队以万数【所矩切】遂劫东川遂据城阻【上既不许辟三川元和元】

【年正月辟遂发兵围东川节度使李康於梓州欲以同幕卢文若为东川节度使因陷梓州降李康】皇帝曰嗟其又可许爰命崇文分卒禁御【初上欲讨辟而重於用兵宰相杜黄裳荐神策军使高崇文可用元和元年正月命崇文将步骑五千为前军神策京师行营兵马使李元奕将步骑二千为次军与山南西道节度使严砺同讨辟甲午崇文出斜谷元奕出骆谷同趋梓州三月克之】有安其驱无暴我野日行三十【贾捐之传云吉行五十里师行三十里】徐壁其右【壁或作辟】辟党聚谋鹿头是守【六月辟城鹿头关连八栅屯兵万余人以拒崇文崇文击败之辟置栅於关东万胜堆崇文遣骑将高霞寓攻夺之下瞰关城凡八战皆捷鹿头山南距成都百五十里】崇文奉诏进退规矩【规或作合】战不贪杀擒不滥数【杭本三馆本文粹作蓝缕唐本作褴褛蜀本始作滥数校本多从之今姑存其旧 今按蓝缕无理滥数盖用左传数俘之语蜀本得之他本皆误】四方节度整兵顿马上章请讨【请或作乞】俟命起坐皇帝曰嘻无汝烦苦【嘻叹辞也或作嘉非是】荆并泊梁【荆谓荆南节度使裴均并谓河东节度使严绶梁谓山南西道节度使严砺也】在国门户出师三千各选尔丑【丑类也】四军齐作殷其如阜【殷其或作殷殷或作其殷殷安也音隐】

诗如冈如阜】或拔其角【拔或作披】或脱其距【距鸡距史记投石超距距其吕切】长驱洋洋无有齟齬【前汉齟者齿不正也说文齟齬不相值也选或齟齬而不安上牀吕切又壮所切下音语】八月壬午辟弃城走载妻与妾包裹稚乳是日崇文入处其宇【日或作曰】分散逐捕搜原剔薮辟穷见窘无地自处俯视大江不见洲渚遂自颠倒若杵投臼取之江中【九月崇文克成都辟与卢文若帅数十骑西奔吐蕃高霞寓等追之及于羊灌田辟赴江不死擒之崇文遂入自成都】枷脰械手妇女累累啼哭拜叩来献阙下以告庙社周示城市咸使观覩解脱挛索夹以砧斧【砧当作枯与榘同战国策范雎曰臣之胷不足以当榘质要不足以待斧钺是也】婉婉弱子赤立伛偻【上音姬下音缕】牵头曳足先断腰膂【南轩曰诵退之圣德颂至婉婉弱子赤立伛偻牵头曳足先断腰膂卢世荣举子由之说曰此李斯颂秦所不忍言而退之自谓无媿於风雅何其陋也此说如何曰退之笔力高得斩截处即斩截他岂不知此所以为此言者必有说盖欲使藩镇闻之畏罪惧祸不敢叛耳今人读之至此犹且寒心况当时藩镇乎此正是合於风雅处只如墙有茨桑中诸诗或以为不必载而龟山乃曰此卫为邻国所灭之由退之之言亦此意也退之之意过於子由远矣大抵前辈不可轻议】次及其徒体骸櫟挂【传云斩于城西南独柳树下子超郎等九人与部将崔纲以次诛说文櫟衰挂也挂从旁指也古乐府死人骸骨相櫟挂上抽庚切下豕庾切】末乃取辟骸汗如写【音湑蓼萧诗用韵如此或作雨非是】挥刀纷纭争刳脰脯【争或作犹刳或作切皆非是仪礼有刳肺此诗苏黄门独谓不然且曰此特宪宗命崇文诛一刘辟尔其言辟弃城走争切脰脯何其琐屑之甚谓之造语工则可谓之得雅体未也诗载文王伐崇武王伐纣固自有体退之独不到此邪亦其少年所为文也按公时年四十不可谓少大抵德不足则夸宪宗功烈固伟比文武则有间矣王荆公尝论诗曰周颂之词约约所以为严德盛故也鲁颂之词侈侈所以为夸德不足故也是诗也其亦鲁颂之谓欤】优赏将吏扶珪缀组帛堆其家粟塞其庾【塞下其字或作仓非是以上句偶之可见】哀怜阵歿廩给孤寡赠官封墓周币宏溥经战伐地寛免租簿施令酬功急疾如火【十月减剑南东西川山南西道今岁赋释胁从将吏葬阵亡者廩其家五岁赐文武官勲爵】天地中间莫不顺序幽恒青魏【或作魏幽恒青】东尽海浦南至徐蔡【魏谓魏博节度幽谓幽州卢龙节度恒谓成德军节度青谓淄青平卢节度徐谓武宁军节度蔡谓彰义军节度】区外杂虏【区外方外也杂虏藩镇也按唐地理志魏州魏郡今大名府幽州范阳郡今燕山府镇州常山县今真定府青州北海郡也魏则田季安幽则刘济恒则王士真青则李师道徐则张愔蔡则吴少诚此皆一时藩镇之国也】恒威赧德【诸本恒作烜赧作赫又作服或以文録定烜作恒以唐阁蜀本定赫作赧云公上尊号表有恒威愧德意与此同】蹶蹈蹈舞掉弃兵革私习簋簠来请来覲十百其耦【或作数】皇帝曰吁伯父叔舅【谓当时藩镇诸帅也礼记曰天子之吏天子同姓谓之伯父异姓谓之伯舅九州之牧天子同姓谓之叔父异姓谓之叔舅】各安尔位训厥眈眈【眈或作田】正月元日初见宗祖躬执百礼登降拜俯荐于新宫【新宫顺宗室于或作飨新或作闕非是】视瞻梁杞戚见容色泪落入俎侍祠之臣助我惻楚乃以上辛【哀元年穀梁传曰郊自正月至于三月郊之时也我以十二月下辛卜正月上辛如不从则以正月下辛卜二月上辛如不从则以二月下辛卜三月上辛如不从则不郊矣礼记郊特牲郊之用辛也注云用辛曰者凡为人君当斋戒自新耳】于郊用牡除于国南鳞笋毛簠【笋簠所以垂钟磬也横曰笋饰以鳞属植曰簠饰以羸属周礼梓人为笋簠

笋思尹切亦作簠簠国许切又音巨】庠幕周施开揭磊砢【选金玉磊砢揭音羯又桀揭二

音磊音儻何鲁可切】兽盾腾拏【盾以木为之而画龙文相合载之以蔽马诗龙盾之合拏说文云牵引也楚词穀乱兮纷拏 盾顺允切拏女加切】圆坛帖妥【礼圆丘象天圆丘即圆坛也贺循上郊坛制度曰汉旧仪南郊圆坛八陛於宫南七里】天兵四罗旗常婀娜【旗或作旗曹植曰华容婀娜 婀娜可切娜奴可切】驾龙十二【周礼马八尺以上为龙天子之驾马十有二闲】鱼鱼雅雅【雅雅字见晋史刘惔传洛中雅雅有三馲鱼字未详要亦车驾整肃之意】宵昇于丘【圆丘也昇或作升楚词升皆作昇他準此】奠璧献斚【奠荐也斚玉爵也礼记夏后氏以醴商以斚周以爵】衆乐惊作轰厖融冶【轰羣车声选轰轰闐闐厖相击也选磊匍匐而相厖融冶乐声轰呼宏切厖音灰】紫焰嘘呵【紫或作柴】高灵下堕羣星从坐【从去声】错落侈哆【西都赋隋侯明月错落其间说文哆张口也诗哆兮侈兮注大貌 哆丁可切又昌者切】日君月妃【礼记君之与后犹日之与月前汉李寻传日者衆阳之宗辉光所烛万物同晷人君之表也唐杨炯浑天仪赋月也者羣阴之纪上天之使异姓之王后妃之事】焕赫嫫?【嫫?身弱好貌乐府珠佩嫫?戏金阙焕赫谓日君嫫?谓月妃 嫫乌果切?五果切】渎鬼蒙鸿【渎鬼四渎之神选蒙鸿沆茫 蒙莫孔切鸿胡孔切】岳只嶭峩【岳只四岳之神嶭峩山高貌後汉增盘嶭峩 嶭音业峩音我】沃沃羶芎【沃羶或作羶燎 今按沃沃之义未详或云当沃沃亦未有所据也羶芎字见礼记云】产祥降馭凤皇应奏舒翼自拊赤麟黄龙透陀结纠【麟或作麟透或作頽透於为切陀徒何切】卿士庶人黄童白叟踊跃欢呀失喜噎欧【欢或作叹欧或作呕 呕俗字也】乾清坤夷境落褰举【褰或作褰】帝车回来日正当午【校本作日始东吐盖疑郊祀回车不应至午也然诸本皆同姑从之】幸丹凤门大赦天下涤濯剗磔【诗勿剗勿败磔瓦石洗物选飞滂相磔剗楚简切磔初两切又此两切剗一作刺磔一作攘】磨灭瑕垢续功臣嗣拔贤任耆孩养无告仁滂施厚皇帝神圣通达今古【今或作先或作通今达古】听聪视明【或作视听聪明】一似尧禹【盖取礼记一似重有忧者鲁直云退之文老杜诗无一字无来处後人读书少故谓韩杜自作此语耳】生知法式动得理所天锡皇帝为天下主并包畜养无异细钜亿载万年敢有违者皇帝俭勤盥濯陶瓦斥遣浮华好此绋紵勅戒四方侈则有咎天锡皇帝多麦与黍无召水旱耗于雀鼠【耗于或作无耗】亿载万年有富无窳【或作富有无窳或作富有贫窳或作无有贫窳皆非是】皇帝正直别白善否擅命而狂既翦既去尽逐羣奸靡有遗侣天锡皇帝彫臣硕辅博问遐观以置左右亿载万年无敢余侮【余或作有非是】皇帝大孝慈祥悌友怡怡愉愉奉太皇后【宪宗母昭宪皇太后王氏】浹于族亲濡及九有天子皇帝与天齐壽登兹太平无怠永久亿载万年为父为母博士臣愈职是训诂作为歌诗以配吉甫【诗之嵩高烝民韩奕江汉皆尹吉甫美宣王作今为此诗亦以吉甫自比也】

琴操十首【按琴操凡十有二公取其十如下所作是也惟水僊怀陵操乃伯牙所作公削之 为之词者十事各注于下唐子西云琴操非古诗非骚词惟退之为得体退之琴操柳子厚不能作也】

将归操 孔子之赵闻杀鸣犊作【史记孔子既不用于卫将西见赵简子至于河西闻窦鸣犊 舜华之死也临河而叹曰美哉水洋洋乎丘之不济此命也夫 按窦鸣犊孔丛子作鸣犊犇 战国策作鸣犊铎犇新序作犊犇铎鸣或又作鸣铎窦犇诸说不同未知孰是 诸本题义下皆有

子注阁本只存题义唐本注与题义皆不出蜀本於注云上增又曰二字与题义皆夹注写以此见虽题义亦後人以琴操续补也欧宋荆公皆用阁本
今按欧本云此效蔡邕作十操事迹皆出蔡邕琴操云】

狄之水兮其色幽幽【狄蜀本作秋 今按水经河水至东阿茌平等县东北流四渎津注云津西有四渎祠东对四渎口河水东分济水受河盖茌口水断不通始自是出与清水合沛瀆自河入济水径周通故有四渎之名昔赵杀鸣犊孔子临河叹而作歌曰狄之水兮风扬波舟楫颠倒更相加归来归来胡为斯案临济故狄也是济所逕得其通称也又云济水逕临济县南详此则是济水自茌泽之下潜流至此四渎津口而後复出河又东分一支与之合流以过临济而为狄水故孔子临河不济而歌咏狄水即此东分之河复出之济也然此皆齐地今在济郛之间史记以为孔子自卫将西见赵简子则其道不当出此此又不可晓者今姑阙之以俟深于地理者正之】 我将济兮不得其由涉其浅兮石啮我足乘其深兮龙入我舟我济而悔兮将安归尤归兮归兮无与石鬪兮无应龙求【归兮归兮诸本兮作乎】

猗兰操 孔子伤不逢时作【猗兰操者孔子所作也孔子历聘诸侯莫能用自卫反鲁隐谷之中见香兰独茂喟然叹曰夫兰当为王者香今乃独茂与衆草为伍乃止车援琴鼓之自伤不逢时托辞於香兰云 古琴操云习习谷风以阴以雨之子于归远送于野何彼苍天不得其所逍遥九州无有定处世人闇蔽不知贤者年纪逝迈一身将老】

兰之猗猗【班固西都赋兰茝发色晔晔猗猗】扬扬其香不采而佩於兰何伤【文子曰兰芷不为莫服而不芳君子行道不为莫知而止此公所为不采而佩何伤于兰之意也】今天之旋其曷为然我行四方以日以年雪霜贸贸【礼记贸贸然来贸音茂】荠麦之茂【麦秋生夏死荠冬生中夏死西京杂记曰建亥之月阴气之极荠麦始生由阳升也】子如不伤我不尔覲荠麦之茂荠麦之有君子之伤君子之守

龟山操

孔子以季桓子受齐女乐谏不从望龟山而作【龟山鲁山也诗奄有龟蒙在泰山博县 史记季氏受齐女乐三日不听政郊又不致燔俎於大夫孔子时为鲁大司寇遂行宿于屯而师已送曰夫子则非罪孔子曰吾歌可夫曰彼妇之口可以出走彼妇之谒可以死败盖优哉游哉维以卒岁师已反季子曰孔子亦何言师已以实告季氏喟然叹曰夫子罪我以羣婢也又古操云予欲望鲁兮龟山蔽之手无斧柯奈龟山何譬季氏於龟山托势利於斧柯也】

龟之氛兮不能云雨【春秋元命苞曰山者气之包含所含精藏云故触石布山言龟山不能然也 一作为雨氛或作气云或作为或云上有为字】 龟之枿兮【枿伐木之余前汉三枿之起李巡曰槁木之余 枿牙葛切亦作蘖】 不中梁柱【不下或有能字非是或云太玄经梁不中柱不隆大厦中作平声读 今按此但言其木不堪作梁柱耳与太玄中字意异当只作去声读文意乃协】 龟之大兮只以奄鲁知将隳兮【知或作如将隳盖取左氏仲尼将隳三都 隳许规切】 哀莫余伍周公有鬼兮嗟余归辅【盖言周公如有神其使余归辅其君也鬼或作思余归方作归余皆非是大抵方意尚异不问文义之如何惟作倒语者则必取之如下文我

于家莫尔余追皆此类也】

越裳操 周公作【越裳在交趾国之南韩诗外传曰周成王之时越裳氏重九译而至献白雉於周公曰吾受命国之黄发言曰久矣天不迅雷疾雨也海不波溢三年于兹矣意者中国有圣人乎盍往朝之于是乃来韩本注引後汉南蛮志事同而文少异古琴操曰於戏嗟嗟非旦之力乃文王之德】

雨之施物以孳【或作滋】我何意於彼为自周之先其艰其勤以有疆宇私我後人我祖在上四方在下厥临孔威敢戏以侮孰荒于门孰治于田四海既均越裳是臣拘幽操

文王羑里作【羑里在河内荡阴县亦作牖里 史记周文王笃仁敬老礼下贤者崇侯虎譖之于纣曰将不利于帝纣囚文王羑里琴録曰文王见拘羑里忧愁无聊援琴而鼓之号曰幽拘操词曰殷道溷溷浸浊烦兮朱紫相合不别分兮迷乱声色信谗言兮炎炎之虐使我愆兮幽闭牢穽由其言兮遘我四人忧动勤兮 羑音酉】

目窈窕兮其凝其盲【目窈窕或作窈揜揜或作目揜揜今按下文有耳字正与目字相对窈窕二字比之揜揜似亦差胜】耳肃肃兮听不闻声朝不日出兮夜不见月与星【日上或有见字】有知无知兮为死为生呜呼臣罪当诛兮天王圣明【伊川曰退之作琴操有曰臣罪当诛兮天王圣明道文王意中事前後之人道不到此徐仲车言退之拘幽操谓文王囚羑里作乃云臣罪当诛兮天王圣明可谓知文王之用心矣凯风七子之母犹不能安其室而云母氏圣善我无令人重自责也】

岐山操 周公为太王作【岐山在岐州今有岐山县诗居岐之阳大王古公亶父也 孟子曰大王居 狄人侵之事之以皮币不得免焉云云乃属其耆老而告之曰狄人之所欲吾土地也我将去之去 踰梁山邑于岐山之下居焉此岐山操而曰周公为大王作思乃祖也】

我家于 【杜预云 在新平漆县东北今邠州是也邠与 同或作我 于家非是】自我先公伊我承序敢有不同【诸本序作绪或云商书丕承基绪然国语亦有奔走承序注谓承受事业次第也 今按序谓传授次第汉书多云朕承天序是也绪犹言统系方引商书之言是也二字义虽不同然用之于此似亦两通但国语承序乃谓承受政役之次第与汉书字同而意异方作序而引以为说则误矣】今狄之人将土我疆民为我战谁使死伤彼岐有岨【岨与阻同楚词汉书多用岨字今以平声读之非也】我往独处尔莫余追【尔或作人尔莫或作莫尔非是】无思我悲

履霜操 尹吉甫子伯奇无罪为後母譖而见逐自伤作【履霜操者尹吉甫之子伯奇所作也吉甫听其後妻之言逐之伯奇编水荷而衣采芰花而食清朝履霜而自伤无罪见放逐乃援琴而鼓之见古乐府题解其词曰朝履霜兮采晨寒考不明其心兮信谗言孤恩别离兮摧肺肝何辜皇天兮遭斯愆痛歿不同兮恩有偏谁说硕兮知此冤】

父兮儿寒母兮儿饥儿罪当答逐儿何为儿在中野以宿以处四无人声谁与儿语儿寒何衣

儿饥何食儿行于野履霜以足母生衆儿有母怜之独无母怜儿宁不悲【儿宁或作母宁非是】

雉朝飞操 牧犊子七十无妻见雉双飞感之而作【牧犊或作沐渎 吴兢乐府古题解云旧说齐宣王时木犊子所作也木犊子年七十无妻出薪于野见雉雌雄相随意动心怨乃仰天叹曰圣王在上恩及草木鸟兽而我独不获因援琴而歌以自伤其声中絶崔豹古今注述其词曰雉朝飞兮鸣相和雌雄羣游於山阿我独何命兮未有家时将暮兮可奈何嗟嗟暮兮可奈何】

雉之飞于朝日羣雌孤雄意气横出【或无气字】当东而西当啄而飞随飞随啄羣雌粥粥【粥粥或谓字当作𪔐音祝说文呼鸡重言之杜诗难话𪔐鸡翁】嗟我虽人曾不如彼雉鸡生身七十年无一妾与妃【马大年云别本彼作此无鸡字而下语妃音嬾与雉协】

别鹤操 商陵穆子娶妻五年无子父母欲其改娶其妻闻之中夜悲啸穆子感之而作【崔豹古今注曰商陵牧子娶妻五年无子父兄欲其改娶妻闻之中夜起倚户而悲啸穆子闻之怆然而悲乃援琴而歌为别鹤操亦曰别鹤操词曰将乖比翼隔天端山川悠远路漫漫揽衾不寐食忘殮後遂为夫妻】

雄鹄衔枝来雌鹄啄泥归巢成不生子大义当乖离江汉水之大鹄身鸟之微更无相逢日且可绕树相随飞【且或作安又无绕树二字皆非是李陵诗长当为此别且复立斯须又古乐府与子如黄鹄将别复徘徊亦此意也】

残形操 曾子梦见一狸不见其首作【残形操事出琴录其详未闻曾子一作鲁子】

有兽维狸兮我梦得之其身孔明兮而头不知【按大周正乐记曾子鼓琴崔子立户外而听之曲终入曰善哉鼓琴乎身已成矣而惜未得其首也曾子曰吾昼卧梦见一狸但见其身不见其头起而为之弦歌也】吉凶何为兮觉坐而思巫咸上天兮【古神巫也】识者其谁

南山诗【或无诗字 此诗似上林子虚赋才力小者不可到也潜溪诗眼云孙莘老尝谓老杜北征胜退之南山诗王平甫以谓南山胜北征终不能相服时山谷尚少乃曰若论工巧则北征不及南山若书一代之事以与国风雅颂相为表里则北征不可无而南山虽不作未害也二公之论遂定 按长安志终南山在万年县南五十里】

吾闻京城南兹惟羣山囿东西两际海【方云史记春申君上秦昭王书王之地一经两海太康地记曰河北得水为河塞外得水为海 今按此与史记但皆极言其广耳不必曲引塞外之说也】巨细难悉究山经及地志茫昧非受授團辞试提挈挂一念万漏【挂一念或作一念挂非是】欲休谅不能粗叙所经覩尝昇崇丘望【尝或作常】戢戢见相凑晴明出棱角缕脉碎分绣蒸岚相瀕洞【瀕或作鸿淮南子瀕蒙鸿洞王褒箫赋扬雄羽猎赋所用皆同唐人始兼用之杜诗鸿洞半炎方瀕洞不可掇是也】表里忽通透无风自飘簸融液煦柔茂横云

时平凝点点露数岫天空浮修眉【选洛神赋修眉联娟空或作宇】浓绿画新就孤櫂有巉
絶【杜诗巉絶华岳赤南史刘孝标广絶交论太行孟门岂云巉絶
巉仕檻仕衫二切】海浴褰鹏噀【史记中行人面鸟噀音昼
已上总叙南山大槩】春阳潜沮洳【沮洳陷湿地诗彼汾沮洳沮洳犹言润泽也沮子鱼切
洳音如又一音皆去声】濯濯吐深秀【吐深或作深吐】岩岵虽嶭峵【史记隆崇嶭峵杜
诗高岳前嶭峵嶭音律峵昨没切又慈恤切】輭弱类含酎【輭与软同而究切酎音宙】夏
炎百木盛荫郁增埋覆神灵日歔歔【歔音朽歔休居切】云气争结构秋霜喜刻铄【或作
铄史记酷吏传刻铄宗室】磔卓立癯瘦【磔音窄】参差相叠重刚耿陵宇宙冬行虽幽墨
冰雪工琢镂【雪或作路】新曦照危峨亿丈恒高袤【东西曰广南北曰袤前汉延袤百丈
莫候切危或作崕恒居邓切或作亘】明昏无停态顷刻异状候【已上叙四时变态】西南
雄太白突起莫闲箴【左传僖子使助箴氏之箴注箴副倅也嵇康曰承闻箴乏箴初救切】
藩都配德运【太白山为帝都藩垣唐土德太白在西南坤位故云配德运】分宅占丁戊【
丁戊亦谓西南西字恐当作东】逍遥越坤位【逍遥谷名坤或作地】诋讦陷乾窞【言太
白非特占西南坤位而已又侵及东北乾位故云陷乾窞也按藩都至乾窞四句未详其义】
空虚寒兢兢风气较搜漱朱维方烧日阴霰纵腾糅【如救切】昆明大池北【昆明池在长
安西南周回四十里汉武元狩二年作以习水战】去觐偶晴昼縣聯穷俯视倒侧困清沔【
乌候切】微澜动水面踊跃躁猱狖【猱猴属诗无教猱升木猱鼠属善旋一云兽名似猿楚
词猱猱杂处兮虎豹嗥猱奴刀切猱音柚躁一作蹂】惊呼惜破碎仰喜呀不仆【已上言南
山方隅连亘之所】前寻径杜墅坱蔽毕原陋【径或作经当如夜径泽中之径杜或作杜非
是杜墅即杜陵也本周之杜伯国在长安万年县东南坱或作忿毕原周文武葬处在今咸
阳县西北或曰文王子封于毕此其地也坱蒲闷切】崎岖上轩昂始得观览富行行将遂穷岭
陆烦互走【音奏】勃然思坼裂拥掩难恕宥巨灵与夸蛾【西京赋巨灵鼉肩高掌远跼郭
缘生述征记曰华山对河东首阳山黄河流于二山之间古语云此本一山当河河水过之而
曲行河神巨灵以手擘开其上以足蹈离其下中分为两以通河流蛾或作娥考列子北山愚
公欲平太行王屋二山帝感其诚命夸蛾氏二子负二山一厝朔东一厝雍南自冀之南汉之
东无陇断焉则娥当作蛾夸苦瓜切】远贾期必售【贾或作雇诗贾用不售贾音古】还疑
造物意固护蓄精佑力虽能排斡雷电怯呵詬攀缘脱手足蹭蹬抵积磬茫如试矫首塉塞生
恂愁【塉音幅土块也尔雅云块塉也楚词宋玉九辨云直恂瞽而自若音寇茂按集韵通作
𡵚𡵚鄙吝心不明也】威容丧萧爽近新迷远旧拘官计日月欲进不可又因缘窥其湫凝湛
閼阴罍【礼运龙以为罍谓湫中蛟也罍音嗅亦作畜或作兽】鱼虾可俯掇神物安敢寇林
柯有脱叶欲堕鸟惊救争衔弯环飞投弃急哺𡵚【鸟生须哺曰𡵚自食曰雏尔雅生哺𡵚生
𡵚雏𡵚音寇】旋归道回睨达枿壮复奏【达或作远卢仝月蚀诗头戴弁冠高达枿】吁

嗟信奇怪峙质能化贸【音茂】前年遭遣谪【谓贞元十九年十二月自监察御史谪连州
阳山令】探历得邂逅初从蓝田入【蓝田县名今在雍州有关】顾眄劳颈脰【公羊传絶
其脰音豆】时天晦大雪【公两谪南方皆由蓝关又皆遇冰雪其谪阳山以十二月江陵途
中寄三学士诗云商山冬季月冰冻絶行輶其谪潮州虽以正月然亦遇雪蓝田驿诗云雪拥
蓝关马不前是也】泪目苦蒙瞶【庄子子适有瞶病注风眩冒乱瞶音茂】峻涂拖长冰直
上若悬溜褰衣步推马【推音摧】颠蹶退且复【扶富切】苍黄忘遐睎所矚才左右杉篁

咤蒲苏【咤音姹】杲耀攢介胄专心忆平道脱险逾避臭【逾或作迓非是】昨来逢清霁宿愿忻始副【始或作所非是自前年遭谴谪以後读之可见】峥嵘跻豕顶【峥音枳嵘音宏】倏闪杂鼯鼯【尔雅云鼯鼯夷由注谓之飞生又曰鼯鼠注鼯以鼯赤黄色大尾啖鼠鼯音吾鼯音又】前低划开阔【划音画又忽麦切】烂漫堆衆皱【方从蜀人韩仲韶本作云石□也二韵皆取喻谓高而羣峯飞驰如鼯鼯之奔低而堆阜分布如衆之列於义为近今按此蜀本之误沈元用本亦然皆非是盖此但言登山之时丛薄蔽翳方与虫兽羣行而忽至上顶则豁然见前山之低虽有高陵深谷但如皱物微有蹙摺之文耳此最为善形容者非登高山临旷野不知此语之为工也况此句衆皱为下文诸或之纲领而诸或乃衆皱之条目其语意接连文势开阖有不可以豪厘差者若如方说则不唯失其统纪乱其行列而鼯鼯动物山体常静絶无相似之理石墓之与堆阜虽略相似然自高顶下视犹若成堆则亦不为甚小而未足见南山之极高矣其与下文诸或疎密工拙又有迥然不侔者未论古人但使今时举子稍能布置者已不为此又况韩子文气笔力之盛关键纪律之严乎大抵今人於公之文知其力去陈言之为工而不知其文从字顺之为贵故其好怪失常类多如此今既定从诸本而复备论其说以晓观者云】或连若相从或蹙若相鬬或妥若弭伏或竦若惊雉或散若瓦解或赴若辐凑【辐或作轮今按轮者毂辐之通名其凑於毂者辐而已当作辐】或翩若船游【翩或作泛】或决若马骤或背若相恶或向若相佑或乱若抽笋或嶭若注灸【嶭音臬灸音疚】或错若绘画或缭若篆籀或罗若星离或蓊若云逗或浮若波涛或碎若锄耨或如贲育伦【夏育孟贲秦之勇力者贲音奔】赌胜勇前购先强势已出後钝嗔?譟【玉篇?譟诂説也诂説言不正也上音鬬下音耨】或如帝王尊丛集朝贱幼虽亲不?狎虽远不悖谬

【晁说之语録云韩文公诗号状体谓铺叙而无含蓄也若虽亲不?狎虽远不悖谬该于理多矣】或如临食案肴核纷飮飮【纷或作分】又如游九原坟墓包棹枢或累若盆甕或揭若?椴【或作登豆】或覆若曝鼈或颓若寝兽【寝或作穷非是又或作偃】或蜿若藏龙或翼若搏鹫【音就】或齐若友朋或随若先後【友朋或作迎随随或作差方言曰先後犹娣姒也释名曰以来先後言也校本不详此义而以先後为虚字遂改友朋为迎随以偶之又避重复而改随字为差字其误甚矣今按史记见神於先後宛若即谓娣姒也】或迸若流落或顾若宿留【史记宿留之数日无所见又武帝宿留海上宿音秀留音溜】或戾若仇雠或密若?媾或俨若峨冠或翻若舞袖【舞或作举】或屹若战阵或围若蒐狩或靡然东注或偃然北首或如火熺焰【或作烟】或若气饘饘【尔雅云饘稔也注?饭为饘饘熟为饘上音分又扶文切下音溜】或行而不辍或遗而不收【易井收勿幕音狩】或斜而不倚或弛而不馵或赤若秃鬣【鬣说文云鬣秃也丘闲切】或燠若柴爇【余救切】或如龟坼兆或若卦分繇【音宙】或前横若剥【易剥坤下艮上象曰剥剥也】或後断若姤【易姤巽下乾上象曰姤遇也】延延离又属夬夬叛还遘喁喁鱼闯萍【喁喁鱼口也吴越春秋云天下喁喁闯马出门貌公羊开之则闯然注出头貌喁音顒闯丑禁切】落落月经宿闇闇树墙垣巘巘架库厩【巘山形如甑也姚令威云恐当作??魏都赋四门??】参参削剑戟焕焕衔莹琇【上音营下音秀】敷敷花披萼闐闐屋摧溜【闐闐或作闐闐闐音翕】悠悠舒而安兀兀狂以狃超超出犹奔蠹蠹骇不懋【已上并叙其经历所见之状】大哉立天地经纪肖营腴厥初孰开张僊僊谁劝侑创兹朴而巧戮力忍劳疚得非施斧斤无乃假诅呪鸿荒竟无传功大莫酬儗【无或作谁又作莫莫或作岂】尝闻於祠官芬苾降歆嗅【或作依字当作】斐然作歌诗惟用赞报酺【音又 是诗凡百有二韵始总叙四时之变次叙南山连亘之所止其

末则叙其经历之所见焉】谢自然诗【果州谢真人上昇在金泉山贞元十年十一月十二日辰时白昼轻举时郡守李坚以闻上赐诏褒谕谓所部之中灵仙表异元风益振至道弥彰其诏今尚有石刻在焉公排释老斥异端故诗有所不取】

果州南充县寒女谢自然童騃无所识【騃痴愚也】但闻有神仙轻生学其术乃在金泉山繁华荣慕絶父母慈爱捐凝心感魑魅【上抽知切下明秘切】恍惚难具言【慌音愧惚呼骨切】一朝坐空室云雾生其间如聆笙竽韵来自冥冥天白日变幽晦萧萧风景寒檐楹黠明灭【黠或作气】五色光属联观者徒倾骇踟蹰讵敢前【踟蹰不进貌楚词待天明兮立踟蹰鲍昭行路难云吞声踟蹰不敢言上直炙切下?玉切】须臾自轻举飘若风中烟茫茫八紘大【淮南子九州之外有八裔八裔之外有八紘列子八紘九野之水注八极也紘音宏】影响无由缘里胥上其事郡守惊且叹【或作观或作欢】驱车领官吏毗俗争相先入门无所见冠屨同蛻蝉【楚词济江海兮蛻蝉夏侯湛作东方朔画赞曰蝉蛻龙变弃俗登仙音税】皆云神仙事灼灼信可传余闻古夏后象物知神奸山林民可入【民或作人公文石本用民字多只为字不成不尽避唐讳】魑魅莫逢旃【左传宣公三年楚子问鼎之大小轻重王孙满对曰在德不在鼎昔夏之方有德也云云铸鼎象物而为之备使民知神奸故民入川泽山林魑魅魍魎莫能逢之此曰莫逢旃旃之也选西京赋魑魅魍魎莫能逢旃】逶迤不复振後世恣欺漫幽明纷杂乱人鬼更相残秦皇虽笃好汉武洪其源自从二主来此祸竟连连【庄骈拇篇又奚连连如胶漆纒纠】木石生怪变狐狸骋妖患莫能尽性命安得更长延【尽或作保嵇康养生论导养得理以尽性命】人生处万类知识最为贤奈何不自信反欲从物迁【书君陈曰惟民生厚因物有迁】往者不可悔孤魂抱深冤来者犹可诫余言岂空文【空或作虚】人生有常理男女各有伦寒衣及饥食在纺绩耕耘【纺或作蚕】下以保子孙上以奉君亲苟异於此道皆为弃其身噫乎彼寒女永托异物羣感伤遂成诗【或作咏】昧者宜书绅

秋怀诗十一首【秋怀诗十一首文选诗体也唐人最重文选学公以六经之文为诸儒唱文选弗论也独於李邢墓志之曰能暗记论语尚书毛诗左氏文选而公诗如自许连城价傍砌看红药眼穿长讶双鱼断之句皆取诸文选故此诗往往有其体多自感其趋尚不与世合故末章有避语弄触心兵之句继又以霜菊自叹可见一时直道之不容也】

牕前两好树衆叶光薿薿【诗黍稷薿薿】秋风一披拂策策鸣不已微灯照空牀夜半偏入耳愁忧无端来感叹成坐起天明视顔色与故不相似羲和驱日月【或作白日广雅云羲和日御也杜诗云羲和鞭白日】疾急不可恃浮生虽多涂【虽或作每】趋死惟一轨胡为浪自苦得酒且欢喜

白露下百草萧兰共雕悴【雕或作憔或作凋荀子劳苦雕悴】青青四墙下已复生满地【後山诗墙根霜下草又作一番新意本于此】寒蝉暂寂寞蟋蟀鸣自恣运行无穷期稟受气苦异适时各得所松柏不必贵

彼时何卒卒【孟子卒然问曰音苍没切前汉司马相如传卒卒无须臾之间顔师古曰卒卒

促遽之意也】我志何曼曼【音万】犀首空好饮【史记犀首者魏人也名衍姓公孙氏司马彪曰犀首魏官名楚使陈轸使秦过梁见之曰公何好饮也曰无事也】廉颇尚能饭【廉颇赵将以谗奔魏其後赵王使使者视颇尚可用否颇为之一饭斗米肉十斤被甲上马以示可用使者还报曰廉将军虽老尚善饭】学堂日无事驱马适所愿茫茫出门路欲去聊自劝【或作叹】归还閱书史【或作简书】文字浩千万陈迹竟谁寻【陈或作尘庄子六经者先王之陈迹谁或作难】贱嗜非贵献【负日之暄而欲献君食芹之美而欲进御贵贱固有差矣诗意大抵以其所嗜不与时偶焉】丈夫意有在【或作存】女子乃多怨

秋气日恻恻秋空日凌凌上无枝上蜩【蜩大蝉也诗五月鸣蜩音条】下无盘中蝇岂不感时节耳目去所憎【去或作无】清晓卷书坐南山见高棱其下澄湫水【澄或作通或作有或作古或作石】有蛟寒可瞽惜哉不得往岂谓吾无能

离离挂空悲戚戚抱虚警露泫秋树高【泫或作滴或作啼或作泣谢灵运诗花上露犹泫谢惠连泫泫露盈条王僧达诗秋还露泫柯古诗於露用泫字非一今按檀弓孔子泫然流涕则泫为流涕之貌于下句虫吊对偶尤切】虫吊寒夜永敛退就新懦趋营悼前猛归愚识夷涂【愚或作儒】汲古得修绠【绠绳也左氏具绠缶注汲索荀子短绠不可以汲深井之泉音梗】名浮犹有耻味薄真自幸庶几遗悔尤即此是幽屏【选张衡曰杂捶幽屏屏必郢切葛立方曰此则陶潜归去来辞觉今是昨非之意似有所悟也】

今晨不成起端坐尽日景虫鸣室幽幽【方作幽室中今按当作室幽幽乃与下句相偶】月吐牕冏冏【吐一作照冏音憬】丧怀若迷方浮念剧含梗尘埃慵伺候文字浪驰骋尚须勉其顽王事有朝请【前汉吴王濞使人为秋请孟康曰律春曰朝秋曰请】

秋夜不可晨秋日苦易暗我无汲汲志何以有此憾寒鸡空在栖缺月烦屡瞰【苦滥切】有琴具徽弦再鼓听愈淡古声久埋灭无由见真滥【礼记古乐和正以广新乐奸声以滥】低心逐时趋【低或作吾盖草书之误而失其半】苦勉只能暂有如乘风船一纵不可缆不如覩文字【後山诗云早年着眼覩文字盖仿公语覩七虑切】丹铅事点勘【选范始兴立太宰碑表人蓄油素家怀铅笔注铅粉笔也王充论衡扬雄采集异国殊语常把三寸弱翰齎油素四尺以问其异语以铅摘之於槧】岂必求赢余所要石与甌【甌小甕也齐东北海岱之间谓之甌西汉扬雄传家无甌石之储列子状若甌甄都滥切甌通作儋蒯通传守儋石之禄】卷卷落地叶随风走前轩鸣声若有意颠倒相追奔空堂黄昏暮我坐默不言童子自外至吹灯当我前问我我不应馈我我不餐退坐西壁下【坐或作下】读诗尽数编作者非今士相去时已千其言有感触使我复凄酸顾谓汝童子置书且安眠丈夫属有念【夫或作人今按宋本亦作人说者谓丈人者尊长之称古乐府所谓丈人且安坐是也此为荅童子而自称故其言如此更详之】事业无穷年

霜风侵梧桐衆叶着树乾空堦一片下琤若摧琅玕【琤或作璫】谓是夜气灭望舒實其團【淮南子月御曰望舒离骚前望舒使先驱實坠也公羊夜中星實如雨张载曰望舒四五團闻叶声琤然误谓望舒之實其團也實于敏切】青冥无依倚飞辙危难安惊起出户视倚檻

久丸澜【选欧阳坚石诗挥笔涕丸澜注涕流貌也 丸音丸】忧愁费晷景日月如跳丸【庄子东西跳梁杜牧之诗日月两跳丸取此意也】迷复不计远【计或作记】为君驻尘鞍

暮暗来客去羣蹕各收声悠悠偃宵寂亶亶抱秋明世累忽进虑【进或作连】外忧遂侵诚强怀张不满弱念缺已盈【已或作易】诘屈避语穽冥茫触心兵败虞千金弃【庄子林回弃千金之璧负赤子而趋或曰为其布与赤子之布寡矣为其累与赤子之累多矣弃千金之璧负赤子而趋何也林回曰彼以利合此以天属也夫以利合者迫穷祸患害相弃也以天属者迫穷祸患害相报也】得比寸草荣知耻足为勇晏然谁汝令【谁一作惟】

鲜鲜霜中菊既晚何用好扬扬弄芳蝶【扬扬或作阳阳】尔生还不早【东坡诗云勿讶昌黎公恨尔生不早谓此语也】运穷两值遇婉变死相保【诗婉兮变兮注婉少貌变好貌上音宛下力充切】西风蛰龙蛇衆木日凋槁由来命分尔泯灭岂足道

赴江陵途中寄赠王二十补阙李十一拾遗李二十六员外翰林三学士【或作寄三学士题下注王二十补阙李十一拾遗李二十六员外蜀本无翰林字王二十补阙名涯李十一拾遗名建李二十六员外名程按公传自四门博士转监察御史上章数千言极论宫市德宗怒贬为阳山令量移江陵府法曹参军唯皇甫持正神道碑云贞元十九年关中旱饥公列言天下根本专政者恶之出为阳山令则非为言宫市出也故公此诗自阳山赴江陵因诗序其得罪之由端坐言旱饥则与持正之言合诗永贞元年秋作】

孤臣昔放逐血泣追愆尤【血泣或作泣血或作血沚】汗漫不省识【淮南子徙倚于汗漫之宇注汗漫无生形又曰吾与汗漫期于九垓之外注汗漫不可知之也 汗音扞漫音□】恍如乘桴浮【恍音晃】或自疑上疏上疏岂其由【或云自疑当作疑自谓疑由上疏也故下文云上疏岂其由也】是年京师旱田亩少所收上怜民无食征赋半已休【征或作兵】有司恤经费未免烦徵求富者既云急贫者固已流闻闾里间赤子弃渠沟持男易斗粟掉臂莫肯酬【史记冯驩曰朝趋市者平旦侧肩争门而入日暮之後掉臂不顾所期物忘其中掉徒吊切】我时出衢路饿者何其稠【其或作为】亲逢道边死【方云阁本作道边死而从杭蜀作道死者 今按古人谓尸为死左传生拘石乞而问白公之死汉书何处求子死且古语又有直如弦死道边之说韩公盖兼用之此乃阁本之善而方反不从殊不可晓】伫立久咿嚶【上音伊下音忧伫立或作停马】归舍不能食有如鱼中钩【中或作挂或从蜀本作出云选文赋若游鱼衔钩而出重渊之深公语原此 今按韩公未必用选语况其语乃鱼出渊非鱼出钩也不若作挂为近然第五卷送刘师服诗有鱼中钩之语则此出字乃是中字之误而尚存其彷彿耳今定作中读作去声】适会除御史诚当得言秋拜疏移合门为忠宁自谋上陈人疾苦无令絶其喉【或作喉】下陈畿甸内【陈或作言内或作事】根本理宜优积雪验丰熟幸寛待蚕麤天子惻然感司空叹绸缪【杜佑检校司空同中书门下平章事 绸直留切缪莫彪切】谓言即施設乃反迁炎州【反或作返州本又作洲古本只作州】同官尽才俊偏善柳与刘【柳宗元刘梦得时同为监察御史】或虑语言泄传之落冤讎二子不宜尔将疑断还不【蔡寛夫诗话云退之阳山之贬以诗考之亦为王叔文韦执谊等所排耳子厚禹锡于退之最善然至是不能无疑故云同官尽才俊偏善柳与刘云云苕溪渔隐曰余閱洪

氏年谱然後知寬夫为误年谱云贞元十九年公与张署李方叔上疏言关中民急为幸臣所
谗幸臣者李实也祝曰不者未定之辞前汉知捕儿不 不方鳩切】中使临门遣顷刻不得留
病妹卧牀褥【妹或作姝】分知隔明幽悲啼乞就别百请不颌头【颌点头也後汉操颌之
户感切】弱妻抱稚子出拜忘慙羞僂偻不回顾行行诣连州朝为青云士暮作白首囚商山
季冬月冰冻絕行轉春风洞庭浪出没惊孤舟逾岭到所任低顏奉君侯酸寒何足道随事生
疮疣远地触途异吏民似猿猴生狞多忿很【狞尼耕切恶犬也很下垦切】辞舌纷嘲啁【
礼记小者至於燕雀犹有啁噍之顷焉 嘲陟交切啁张留切】白日屋檐下双鸣鬪鸂鶒【江
东呼为鶒 岭表録异鸂鶒即鸂也又曰训狐 鸂虚尤切鸂力求切】有蛇类两首有蛊羣飞
游【蛊或作虫鲍明远诗吹蛊病行晖李善曰吹蛊飞蛊也】穷冬或摇扇盛夏或重裘颺起
最可畏【岭南録异云岭峽夏秋雄风曰颺 颺音具】訇哮簸陵丘【訇音轰哮虚交切】雷
霆助光怪气象难比侔疔疫忽潜遘十家无一瘳猜嫌动置毒对案辄怀愁前日遇恩赦【贞
元二十一年正月乙巳顺宗即位二月甲子大赦天下公量移江陵掾】私心喜还忧【公集
又有诗云伾文未揃崖州炽虽得赦宥常愁猜意与此类】果然又羈縻不得归勑纓此府雄
且大騰凌尽戈矛栖栖法曹掾何处事卑陬生平企仁义所学皆孔周早知大理官不列三后
俦【东汉杨赐为廷尉自以世非法家书曰乃命三后恤功于民伯夷禹稷三君耳士皐陶不
在焉盖吝之也笔墨间録曰此等语可谓怨诽而不乱矣】何况亲犴狱【犴亦狱也汉书义
曰乡亭狱曰犴杨子狴犴使人多礼乎诗宜岸宜狱犴与岸同】敲撈发奸偷【撈音彭】悬
知失事势恐自罹置罟【置罟兔网礼记田猎置罟罗罟毕翳 置音嗟罟音浮】湘水清且急
凉风日修修胡为首归路【首音狩】旅泊尚夷犹【楚词君不行兮夷犹】昨者京师至【
者或作日】嗣皇传冕旒【嗣皇谓宪宗即位贞元二十一年八月也】赫然下明诏首罪诛
共叟【或作兜叟古文兜字 八月壬寅贬王伾开州司马王叔文渝州司户二人之罪如共工
驩兜也】复闻颠夭辈【谓当时杜黄裳郑余庆之徒为相如太颠閼夭为周文王之佐也】
峨冠进鸿畴【鸿大也畴谋也鸿畴谓国论】班行再肃穆璜佩鸣琅璆【周礼以玄璜礼北
方璜半璧也书厥贡惟璆琳琅玕 璆音求】伫继贞观烈边封脱兜鍪三贤推侍从【三贤即
涯建程也】卓犖倾枚邹【选圣贤卓犖左思曰卓犖观羣书枚谓枚乘邹谓邹阳 犖吕角切
】高议参造化【或作物非是】清文焕皇猷协心辅齐圣政理同毛輶【理治也唐人避高
宗讳故治字皆作理诗德輶如毛】小雅咏鸣鹿食苹贵呦呦【诗呦呦鹿鸣食野之苹苹萍
也】遗风邈不嗣岂忆尝同裾【尝或作常裾与袴同或作俦或作稠皆非是诗抱衾与裾注
云裾禅被也同裾者取诗同袍之义】矢志早衰换前期拟蜉蝣自从齿牙缺始慕舌为柔【
淮南子曰老子学商容见舌而知柔注云商吐舌示老子老子知舌柔齿刚刘向说苑常縱有
疾老子往问焉张其口而示老子曰吾舌存乎老子曰然吾齿存乎老子曰亡子知之乎老子
曰舌之存也岂非以其柔乎夫齿之亡也岂非以其刚乎曰嘻是已】因疾鼻又塞渐能等薰
莸【薰香草莸臭草左僖四年一薰一莸十年尚犹有臭诗意谓不分善恶也】深思罢官去
毕命依松楸空怀焉能果但见岁已適殷汤閼禽兽解网祝蛛蝥【贾谊新书汤见设网者四
面乃去其三面】雷焕掘宝剑冤氛销斗牛【氛或作气晋书吴之未灭也斗牛之间常有紫
气张华以雷焕为丰城令使寻之焕至县掘狱屋基入地四尺余得一石函中有双剑并有题
刻一曰龙泉一曰太阿其夕斗牛间气不复见】兹道诚可尚谁能借前筹殷勤谢吾友【吾
或作朋】明月非暗投【邹阳书曰明月之珠夜光之璧以暗投入於道衆莫不按剑相眄者
无因而至前也公意以汤譬宪宗以剑譬已以借前筹属三贤者明月之珠非投暗矣】

暮行河堤上

暮行河堤上四顾不见人衰草际黄云感叹愁我神夜归孤舟卧展转空及晨谋计竟何就嗟嗟世与身夜歌【此歌及前暮行河堤上诗皆作於德宗贞元中时强藩悍将可为朝廷忧公方叹计谋之未就虽欲忧之非所力也】

静夜有清光闲堂仍独息念身幸无恨志气方自得乐哉何所忧所忧非我力【或作可悲我才力】

重云李观疾赠之【观字元宾陇西人与公同举贞元八年进士以十年死於京师当其疾时以诗赠云】

天行失其度【方作天行令失度云公诗语多用此一体今按诸本皆作天行失其度文意自通公诗虽间有如方说者然亦不专以此为奇也】阴气来干阳重云闭白日【或作日夜非是】炎燠成寒凉小人但咨怨君子惟忧伤饮食为减少【或作尚为减非是】身体岂宁康此志诚足贵惧非职所当【职或作识张衡同声歌贱妾职所当】藜羹尚如此【庄子藜藿不糝】肉食安可尝【左氏庄十年肉食者鄙未能远谋】穷冬百草死幽桂乃芬芳且况天地间大运自有常劝君善饮食鸾凤本高翔

江汉答孟郊

江汉虽云广乘舟渡无艰【或作难】流沙信难行马足常往还凄风结冲波狐裘能御寒终宵处幽室华烛光灿灿【或作炎炎楚词烂字叶平声九章曰曾枝剌棘圆果搏兮青黄杂揉文章烂兮】苟能行忠信【行或作存】可以居夷蛮嗟余与夫子此义每所敦何为复见赠繾綣在不谖【繾音遣綣苦远切諠音喧繾綣不相离貌诗以谨繾綣】

长安交游者赠孟郊【长安交游者马厌穀出门其意大率相类皆公未得志之所为也】

长安交游者贫富各有徒亲朋相过时【过或作遇】亦各有以娱【或作亦有以欢娱】陋室有文史高门有笙竽何能辨荣悴且欲分贤愚

岐山下二首【诸本只作一首自日暮边火惊以上为第一篇世有灌畦暇语一书谓子齐初应举韩公赏之为作丹穴五色羽子齐姓程字昔范尝着中謏三卷见因话錄则下诗似当为别篇第前诗题以岐山下此必游凤翔日作然四语亦不成篇此诗载之卷未疑有脱误】

谁谓我有耳不闻凤皇鸣謁来岐山下【前汉回车謁来謁丘杰切又去謁切】日暮边鸿惊【鸿或作火今按上文言不闻凤鸣则此当作鸿】丹穴五色羽其名为凤皇【山海经丹穴之山有鸟状如鹤五色而文名曰凤是鸟也见则天下大安宁】昔周有盛德此鸟鸣高冈【诗卷阿凤凰鸣矣于彼高冈】和声随祥风窅窅相飘扬【窅窅或作窅窅或作窈窕或作

窅窅而举正改窅为窈按窅即窈字既连用之不应异体或是窅字一作窈耳 窅乌皎切窅徒了切】闻者亦何事但知时俗康自从公旦死【公或作姬】千载閼其光【即杜子美凤凰台诗所谓西伯今寂寞凤声亦悠悠也】吾君亦勤理迟尔一来翔【易迟归有时汉书侧席迟士迟待也音穉】

东雅堂昌黎集注卷一

卷二

<集部,别集类,汉至五代,东雅堂昌黎集注>

钦定四库全书

东雅堂昌黎集注卷二

古诗

北极赠李观【观字元宾其先陇西人贞元八年与公同举进士】

北极有羈羽南溟有沈鳞【南溟见庄子逍遥篇鲲鹏之说羈羽谓鹏沈鳞谓鯢也以喻已与观相遇之意】川原浩浩隔影响两无因风云一朝会变化成一身谁言道里远【里或作理非是陶诗云不怨道里长正作里】感激疾如神我年二十五【时贞元八年也岁在壬申按李汉集序公生於大历之戊申三年自壬申逆数至戊申公时年二十五矣】求友昧其人哀歌西京市乃与夫子亲【夫子谓观】所尚苟同趋【尚或作向趋孟子云三子者不同道其趋一也注趋读如趣】贤愚岂异伦方为金石姿万世无缁磷无为儿女态【儿女或作女儿非是】憔悴悲贱贫

此日足可惜赠张籍【籍字文昌吴郡人尝为公所荐送贞元十五年公时在徐籍往谒公未几辞去公惜别故作是诗以送之诗中杂用韵又叠用韵张籍祭公诗用此格欧阳公云退之工於用韵得寛韵则波澜横溢泛入傍韵如此日足可惜之类是也得窄韵则不复旁出困难见巧如病中赠张十八之类是也按此诗与元和圣德诗多从古韵读之者当始终以协声求之非所谓杂用韵也】

此日足可惜此酒不足尝【不足或作不可】舍酒去相语【去一作须今按须字无理或是复字传写误尔】共分一日光念昔未知子孟君自南方【孟郊也】自矜有所得言子有文章我名属相府【公仕董晋幕府】欲往不得行【或作骧】思之不可见百端在中肠【谓怀思也】维时月魄死【汉律历志死魄朔也生魄望也】冬日朝在房【月令孟冬之月日在房】驱驰公事退闻子适及城【或作墙此诗视古用韵不入今韵者多为後学以意妄改吴才老云诗人用行字韵二十有五无叶今读者此诗後用东去趋彭城谅知有所成皆庚韵也何独於此疑之】命车载之至引坐於中堂开怀听其说往往副所望孔丘歿已远仁义路久荒纷纷百家起诡怪相披猖长老守所闻後生习为常少知诚难得纯粹古已亡【古一作固】譬彼植园木有根易为长留之不遣去馆置城西旁岁时未云几浩浩观湖江【未或作来江或作湘非是植园木以喻籍之始从学也观湖江以喻其成也】衆夫指之笑谓我知不明儿童畏雷电鱼鼈惊夜光州家举进士选试繆所当【汴州举进士公为考官试反舌无声

诗籍中等】驰辞对我策章句何炜煌相公朝服立工席歌鹿鸣礼终乐亦阕相拜送於庭之子去须臾赫赫流盛名窃喜复窃叹【窃喜复或作慷慨仍】谅知有所成人事安可恒奄忽令我伤闻子高第日正从相公丧【贞元十五年高郢知举籍登第是岁二月晋卒公护其丧行】哀情逢吉语恂恂难为双【恂或作 楚词远游作恂恂相如传作敞恂 恂音敞恂许昉切】暮宿偃师西【偃师县名今在洛州】徒展转在牀【诸本作展转在空牀 今按或当以诸本】夜闻汴州乱【二月乙酉宣武军乱杀留後陆长源】遶壁行傍徨我时留妻子【时留或作乃弃】仓卒不及将相见不复期零落甘所丁骄女未絶乳念之不能忘忽如在我所【或作其侧所或作前或作侧】耳若闻啼声中途安得返一日不可更俄有东来说我家免罹殃乘船下汴水东去趋彭城【公妻子先往徐州唐地理志徐州彭城郡】从丧朝至洛【方无朝字洛下有阳字 今按朝至洛盖用洛诰语又下文云日西入军门则此当作朝至洛明矣】还走不及停【还或作旋】假道经盟津【即孟津也】出入行涧冈日西入军门羸马颠且僵主人愿少留【时李元为河阳节度主人谓元也】延入陈壶觞卑贱不敢辞忽忽心如狂饮食岂知味丝竹徒轰轰【呼宏切】平明脱身去决若惊鳬翔黄昏次汜水【汜水在河南成皋县诗江有汜 汜音似】欲过无舟航【过或作济】号呼久乃至夜济十里黄【前汉地理志陈留郡外黄县有黄沟】中流上滩潭【滩方作沙潭或作泽郭璞曰江东人呼水中沙堆为潭潭即滩也音但 今按下句便有沙字恐只当作滩二字复出如上句言舟航之类】沙水不可详惊波暗合杳星宿争翻芒辕马蹢躅鸣【诸本或作马乏复悲鸣或作马蹢躅鸣悲】左右泣仆童甲午憩时门临泉窥鬬龙东西出陈许陂泽平茫茫【方作茫茫平云用古韵今按此诗固用古韵然皆因其语势之自然未尝作意舍此而用彼也诸本只作陂泽平茫茫韵谐语协本无不可若作陂泽茫茫平却觉不响不应以欲用古韵之故牵挽而强就之也又按别本平或作路而或作何者语意尤胜读者详之】道边草木花红紫相低昂百里不逢人角角雄雉鸣【角音谷见集韵雄雉或作雉雉】行行二月暮乃及徐南疆下马步堤岸上船拜吾兄【公有三兄皆早世见於集中者云卿之子俞绅卿之子岌皆公从兄或曰吾兄谓张籍非也】谁云经艰难【艰或作险】百口无夭殇【夭或作横楚辞强死者为国殇三字全语亦见列子】仆射南阳公【张建封也】宅我睢水阳【二月末公至徐州徐泗濠节度使张建封以公为节度推官睢水名在徐州公与孟东野书云主人与余有故居余符离睢水上即此也】篋中有余衣盎中有余粮闭门读书史【读或作阅】窗户忽已凉【诸本多作清风窗户凉或作窗户风已凉或作窗户清风凉 今按公以二月末到徐不知此诗何时作若夏即当作清风窗户凉若秋即当作窗户风已凉】日念子来游子岂知我情别离未为久辛苦多所经对食每不饱共言无倦听连延三十日晨坐达五更我友二三子【友或作有】宦游在西京东野窥禹穴【禹穴在会稽】李翱观涛江【李翱字习之公兄弇之壻也李习之论性末云南观涛江入于越而吴郡陆惨存焉与之言惨曰尼父之心也翱观涛江岂此时乎】萧条千万里会合安可逢淮之水舒舒楚山直丛丛子又舍我去我怀焉所穷【焉作作安】男儿不再壮百岁如风狂【方作狂风 今按方亦强用古韵之过不如只作风狂语势尤健】高爵尚可求无为守一乡【按此篇押二光字二鸣字二更字二狂字胡仔谓退之好重叠用韵以尽已之意盖不恤其为病也】

幽怀

幽怀不能写【能或作可】行此春江浥适与佳节会士女竞光陰凝耀洲渚繁吹荡人心【礼记命乐师大合吹吹尺伪切人或作神非是】间关林中鸟亦知和为音【诸本作知时为和音非是然今本疑亦有误或恐为是其字】岂无一樽酒自酌还自吟但悲时易失【西汉蒯通传时者难值而易失】四序迭相侵我歌君子行【古乐府有君子行】视古犹视今【列子杨朱篇杨子曰世事苦乐古犹今也】

君子法天运

君子法天运四时可前知【可或作每】小人惟所遇寒暑不可期利害有常势取舍无定姿焉能使我心皎皎远忧疑

落叶送陈羽【或作叶落篇首同非是羽与公同登第】

落叶不更息断蓬无复归飘飏终自异邂逅暂相依悄悄深夜语悠悠寒月辉谁云少年别流泪各沾衣归彭城【彭城徐也公作欧阳詹哀词云贞元十五年冬某为徐州从事朝正于京师而此诗曰归彭城明年自京归徐也天下兵又动谓十五年秋起诸道兵讨吴少诚前年关中旱谓十四年冬京师饥去岁东郡水谓十五年秋郑滑水事见龔龔诗东郡或作东洛非也】

天下兵又动太平竟何时訐谏者谁子无乃失所宜前年关中旱闾井多死饥【或作饥】去岁东郡水【郡或作洛非也旧纪贞元十五年秋郑滑大水】生民为流屍上天不虚应祸福各有随我欲进短策无由至彤墀【彤或作丹】刳肝以为纸沥血以书辞上言陈尧舜下言引龙夔言词多感激文字少葳蕤【葳或作萎纷葳蕤以駟逯见陆机文赋今按葳蕤已见楚词葳音透蕤音綏】一读已自怪再寻良自疑食芹虽云美献御固已痴【说文芹楚葵也列子宋有田夫喜食芹者对乡豪称之乡豪取而尝之蜚於口惨於腹衆哂而怨之其人大慙晋嵇康与山涛书曰野人有快炙背而美芹子欲献之至尊虽有区区之意亦已踈矣】緘封在骨髓耿耿空自奇昨者到京师屡陪高车驰周行多俊异【行胡郎切】议论无瑕疵见待颇异礼未能去毛皮到口不敢吐徐徐俟其巇【杨子曰巇可抵乎巇罅也巇虚宜切】归来戎马间惊顾似羈雌【枚乘曰日暮则迷鸟羈雌宿焉选晚出西射堂诗羈雌恋旧侣迷鸟怀故林注羈无偶也】连日或不语终朝见相欺【相方作我见相或作相见今按此三字三本疑皆有误】乘闲辄骑马茫茫诣空陂遇酒即酩酊君知我为谁【晋书山简出为征南将军镇襄阳时有童子歌曰山公出何许往至高阳池日夕倒载归酩酊无所知时时能骑马倒着白接篱举鞭问葛疆何如并州儿】

醉後【一作醉客】

煌煌东方星【魏道辅云夏英公竦评老杜初秋月云微升紫塞外已隐暮云端意主肃宗也吾观退之煌煌东方星其顺宗时作乎东方谓宪宗在储宫也按史贞元二十一年正月顺宗即位三月立广陵王纯为皇太子八月立为皇帝是为宪宗】奈此衆客醉初喧或忿争【一

作纷争或作争忿】中静杂嘲戏【杂或作惟杂以嘲戏选典论全语】淋漓身上衣【漓或作浪】颠倒笔下字人生如此少酒贱且勤置

醉赠张秘书【今本下或注彻字彻元和四年进士此诗元和初作彻犹未第公五六年间皆在东都此诗盖在长安日作非彻也】

人皆劝我酒我若耳不闻今日到君家呼酒持劝君为此座上客【方作士非是後汉孔融传融字文举性寛容少忌好士喜诱益後进及退闲职宾客日盈其门常叹曰座上客常满樽中酒不空吾无忧矣】及余各能文君诗多态度蔼蔼春空云东野动惊俗天葩吐奇芬张籍学古淡轩鹤避鸡羣【晋书嵇绍始入洛或谓王戎曰昨於稠人中见嵇绍昂昂然如野鹤之在鸡羣鹤方及诸本皆作昂今按此言张籍学古淡而不鹜於绮靡如以乘轩之鹤而反避鸡羣也又轩鹤乃与天葩之句相偶】阿买不识字【赵尧夫曰或问阿买是退之何人答云退之侄必有所据而云此必其子侄小字】颇知书八分【秦壤古文有公体其一隶书今八分也书苑云八分者秦羽人上谷王次仲饰隶书为之鍾繇为之章程书汉蔡邕以隶作八分体盖八分之後又分此法谓之八分杜甫八分歌云陈仓石鼓今已讹大小二篆生八分】诗成使之写亦足张吾军【左传桓公六年楚鬬伯比曰我张吾三军张猪亮切】所以欲得酒为文俟其醺酒味既泠冽酒气又氛氲【泠或作冷气或作烟氛或作氲氛氲盛兒字见选雪赋】性情渐浩浩谐笑方云云此诚得酒意余外徒缤纷长安衆富儿盘饌罗羶荤不解文字饮惟能醉红裙虽得一饷乐有如聚飞蚊今我及数子固无莠与薰【左氏僖公四年一薰一莠十年尚犹有臭】险语破鬼胆高词媲皇坟【书序伏羲神农皇帝之书谓之三坟皇坟三皇坟书也媲或作动】至宝不雕琢【或作琢】神功谢锄耜方今向泰平元凯承华勋【八元八凯名氏见左传文十八年时宪宗即位杜黄裳郑余庆李吉甫裴垕李藩之徒相继为相故云】吾徒幸无事庶以穷朝曛

同冠峡【集有同冠峡二诗皆贞元十九年贬阳山後作】

南方二月半春物亦已少维舟山水间晨坐听百鸟宿云尚含姿朝日忽升晓羈旅感和鸣【和鸣或作阳和】囚拘念轻矫【和鸣轻矫皆指百鸟而言也】潺湲泪久迸【久或作交楚词横流涕兮潺湲】诘曲思增绕行矣且无然盖棺事乃了【刘毅云丈夫儿踪迹不可寻常便混羣小中盖棺事方定矣】

送惠师【诗云自来连州寺当在阳山时作阳山连属邑也惠名元惠公为王弘中作宴喜亭记谓其在连州与学佛之人景常元惠者游即惠师也】

惠师浮屠者乃是不羈人【不羈者以马为喻言不受羈?也邹阳上吴王书使不羈之士与牛马同皂】十五爱山水超然谢朋亲【或作同隐沦】脱冠翦头髮【头或作短按下对踪尘当作头髮】飞步遗踪尘【飞或作孤】发迹入四明【四明山名在明州】梯空上秋旻遂登天台望【天台山名在台州】衆壑皆嶙峋【上音隣下音询】夜宿最高顶举头看星辰光芒相照烛南北争罗陈兹地絶翔走自然严且神微风吹木石澎湃闻韶钧【澎音彭湃普

拜切】夜半起下视【夜半或作半夜或作中夜】溟波衔日轮鱼龙惊踊跃叫啸成悲辛【
啸或作笑选海赋及鲍谢诗多用叫啸字】怪气或紫赤敲磨共轮困金鸚既腾翥【隋康孟
咏日诗金乌升晓气玉监漾晨曦楚词鸾鸟轩翥而翔飞】六合俄清新常闻禹穴奇东去窥
瓠闽越俗不好古流传失其真幽踪邈难得圣路嗟长堙【圣路谓舜禹南巡之路】回临淞
江涛屹起高峨岷壮志死不息【越絶书子胥死捐於大江发愤驰腾气若奔马乃归神大海
水经云钱塘江涛二月八月最高峨峨二丈有余吴越春秋以为子胥文种之神谓此也】千
年如隔晨是非竟何有弃去非吾伦凌江诣庐岳【庐山在江州】浩荡极游巡崔嵬没云表
陂陀浸湖沦是时雨初霁悬瀑垂天绅【天或作大宋之问诗雨霰天作带云壑树披衣孟东
野诗亦尝用天绅字】前年往罗浮【罗浮山名在今广州曾城博罗二县之境】步戛南海
濬大哉阳德盛荣茂恒留春鹏骞堕长翮【骞或作蹇蹇以鸟虚言切飞举也从马者起?切亏
也今字多误用故详之】鲸戏侧修鳞自来连州寺曾未造城闉日携青云客【云或作春李
白诗多用青云客字】探胜穷崖滨太守邀不去【或作往或作得】羣官请徒频【或作其
志信不羣】囊无一金资翻谓富者贫【谓或作为】昨日忽不见我令访其邻奔波自追及
【波或作走】把手问所因顾我却兴叹【我却或作却我】君宁异於民离合自古然辞别
安足珍吾闻九疑好【皇览曰九疑在零陵营道县其山九疑相似故名九疑舜葬於此】夙
志今欲伸【欲或作愿】斑竹啼舜妇【博物志洞庭之山帝之二女以涕挥竹竹尽斑】清
湘沈楚臣【史记屈原仕楚为上大夫所谗怀石投汨罗而死即清湘也】衡山与洞庭【
衡山在衡州洞庭在岳州】此固道所循寻嵩方抵洛【嵩高在洛】历华遂之秦【太华山
在华州】浮游靡定处偶往即通津吾言子当去子道非吾遵江鱼不池活野鸟难笼驯【鸟
或作鹭】吾非西方教怜子狂且醇吾嫉惰游者怜子愚且淳去矣各异趣何为浪沾巾【浪
或作泪】

送灵师【此诗贞元十九年复在连州阳山作也云王员外者仲舒也仲舒时亦謫连州司户
见宴喜亭记】

佛法入中国尔来六百年【按後汉明帝梦见金人问羣臣或曰西方有神名曰佛其形长丈
六尺而金色於是遣使天竺问佛道法图画形象以归其教因流入中国此诗据汉明帝时言
之尔故其佛骨表云自後汉时流入中国又云汉明帝时始有佛法也汉武故事昆邪王杀休
屠王来降得其金人之神置之甘泉宫则是佛入中国始自汉武至成哀间已有经矣杜致行
守约编亦曰汉武作昆明池掘地得黑灰东方朔云可问西域道人西域道人佛之徒也又开
皇历代三宝记云刘向称予覽典籍已见有经将知周时久流释典秦虽蕪除汉兴复出则先
汉之前逆至于周有佛有经其来也远范晔胡为以谓明帝之时佛始入中国耶退之一世大
儒非承袭谬误者将由心恶其教不复详考其源流所自耳】齐【平也】民逃赋役高士着
幽禅官吏不之制【或作禁】纷纷听其然【纷纷或作纷纭】耕桑日失隶朝署时遗贤灵
师皇甫姓胤胄本蝉联少小涉书史早能缀文篇中间不得意失迹成延迁逸志不拘教轩
腾断牵挛围碁鬪白黑生死随机权六博在一掷【楚词宋玉招魂崑蔽象碁有六博】梟
卢叱回旋【梟或作呼或作 宋刘毅与刘裕樗蒲毅以为不能裕恶之因按五木既而四子俱黑
其一子转跃未定裕厉声喝之即成卢毅意殊不快也宋玉招魂有成梟而牟呼五白梟胜也
杜诗袒跣不肯成梟卢

梟古尧切广韵 了樛蒲采名唐李文公集五木经毗采六开塞搭秃櫪 则梟宜从 居言切】战诗谁与敌浩汗横戈鋌【战诗或作争战或作文战或作诗战战诗战文唐人语也白乐天战文重掉鞅刘梦得战文矛戟深谁与方作与谁非是鋌小矛也方言五湖之间谓矛为鋌选戈鋌彗云 鋌一音蟬又音延】饮酒尽百 【 或作醖或作琰】嘲谐思逾鲜【逾或作愈】有时醉花月高唱清且絃【高唱清或作清唱高】四座咸寂默杳如奏湘弦寻胜不憚险黔江屡洄沿【黔州有黔江县尔雅逆流而上曰汭洄诗遡洄从之书沿于江海注云顺流而下曰沿选水涉尽洄沿 洄音回沿音绿】瞿塘五六月【瞿塘三峡也荆州记灩澦如马瞿塘莫下灩澦如象瞿塘莫上杜诗好过瞿塘灩澦堆 瞿音衢】惊电让归船【让或作攘非是姚令威云让责怒也此只谓归舟急於惊电耳让如厥大谁与让之让】怒水忽中裂千寻堕幽泉【寻或作浔今按浔与寻同】环回势益急仰见团团天【下团字一作圆】投身岂得

计性命甘徒捐浪沫蹙翻涌漂浮再生全同行二十人【二诸本作三】?骨俱坑填灵师不挂怀冒涉道转延开忠二州牧【魏道辅谓二牧韦处厚白居易也二公出守在元和末此诗作於贞元二十年间考其时非也】诗赋时多传失职不把笔珠玑为君编强留费日月密席罗婵娟昨者至林邑【林邑今驩州地】使君数开筵逐客三四公盈怀赠兰荃湖游泛潯沅【湖或作湘此言在林邑日非湘地也 今按湖游对溪宴乃切】溪宴驻潺湲别语不许出行裾动遭牵邻州竞招请书札何翩翩十月下桂岭【桂岭县在贺州】乘寒恣窥缘落落王员外【谓王仲舒自户部员外郎贬为连州司户】争迎获其先自从入宾馆占恹久能专吾徒颇携被【颇或作或被或作之】接宿穷欢妍听说两京事分明皆眼前纵横杂谣俗琐屑咸罗穿材调真可惜朱丹在磨研方将敛之道且欲冠其颠韶阳李太守【李一作季】高步陵云烟得客辄忘食开囊乞缙钱【缙或作缙】手持南曹叙【谓王员外仲舒也墓志云所为文章无世俗气】字重青瑶鑪古气参彖系【方作象 今按杜诗前哲垂彖系】高标摧太玄维舟事干谒披读头风痊【庄子今予病少痊典略曰魏太祖以陈琳管记室作诸书及檄草成呈太祖太祖先苦头风是日疾发读琳所作翕然起曰此愈我病 痊音詮又张缘切】还如旧相识【还如或作颇似】倾壶畅幽悃以此复留滞归骖几时鞭

县斋有怀【此诗阳山县斋作贞元十九年公以言事出至是二十一年顺宗即位而作是诗嗣皇新继明谓顺宗也】

少小尚奇伟平生足悲咤【选郭景纯游仙诗抚心独悲咤杜诗令人几悲咤 咤陟驾切】犹嫌子夏儒肯学樊迟稼事业窥臯稷【或作稷禹】文章蔑曹谢濯纓起江湖缀佩杂兰麝悠悠指长道去去策高驾谁为倾国媒【李延年传汉武歌曰北方有佳人絶世而独立一顾倾人城再顾倾人国】自许连城价【史记赵王得楚和氏璧秦昭王闻之愿以十五城价请易璧】初随计吏贡【汉武帝元光六年徵吏民有明当世之务令与计偕计谓上计吏簿也郡国每岁遣诣京师上之贡士偕焉】屡入泽宫射【礼记诸侯岁贡士于天子天子试之於射宫又曰天子将祭必先习射於泽泽者所以择士已射於泽而後射於射宫注泽宫名】虽免十上劳【战国策苏秦说秦惠王书十上而说不行】何能一战霸【僖二十七:left氏曰一战而霸文之教也公自贞元八年中进士第贡于京师至贞元十年屡试博学宏词不中 能一

作曾】人情忌殊异世路多权诈【多或作重】蹉跎顔遂低摧折气愈下治长信非罪【论语子谓公冶长可妻也虽在縲紲之中非其罪也】侯生或遭骂【史记魏有隐士曰侯嬴公子无忌虚左迎之嬴有客在市屠中引车入市下见其客朱亥睥睨久立与其客语从骑皆窃骂侯生】怀书出皇都【贞元十一年公东归河阳皇都京师也】衔泪渡清灞【灞水出蓝田谷西北而入渭】身将老寂寞志欲死闲暇朝食不盈肠冬衣才掩骼【骼腰骨前汉折肋拉骼 骼枯驾切】军书既频召戎马乃连跨大梁从相公【贞元十二年公从汴州董晋幕】彭城赴仆射【贞元十五年公从徐州张建封幕】弓箭围狐兔丝竹罗酒?【之夜切即炙字】两府变荒凉【荒或作炎此言董晋张建封贞元十五年十六年相继殂谢也】三年就休假求官去东洛【去或作来或作去官来东洛 公自贞元十六年张建封薨归洛阳至十九年始除监察御史】犯雪过西华尘埃紫陌春风雨灵台夜名声荷朋友援引乏姻娅虽陪彤庭臣【虽或作偶或作仰陪或作偶皆非是】诘纵青冥靶【冥或作云】寒空耸危阙晓色曜修架捐躯辰在丁【贞元十九年十二月公以监察御史上天旱人饥疏贬阳山令辰在丁谓上疏之日也曹子建三良诗谁言捐躯易杀身诚独难】铄翮时方?【铄鸟羽病选鸾翮有时铄?年终祭名广雅夏日清祀商曰嘉平周曰大?秦曰腊公之贬阳山令其出以十二月故时方?也 铄所介切?音乍】投荒诚职分领邑幸宽赦湖波翻日车岭石坼天罅毒雾恒熏书炎风每烧夏雷威固已加颶势仍相借【颶风已上江陵途中寄三学士诗注 颶音巨】气象杳难测声音吁可怕夷言听未惯越俗循犹乍【循或作修非是】指摘两憎嫌睚眦互猜訝【列子老子而睚眦而眦眦而谁与居 睚音隳眦音吁】祗缘恩未报岂谓生足藉嗣皇新继明【永贞元年顺宗即位新方作帝非是】率土日流化惟思涤瑕垢长去事桑柘斲嵩开云局压颖抗风榭禾麦种满地梨枣栽繚舍儿童稍长成雀鼠得驱吓【庄子鵩得腐鼠鵩雏过之仰而视之曰吓注怒而拒物声吓音罅】官租日输纳村酒时邀迓闲爱老农愚归弄小女姪【後汉姪女工数钱 姪陟驾切】如今便可尔何用毕?嫁【後汉向平字子平隐居不仕建武中男女娶嫁既毕敕家事勿相关当如我死也齐萧惠基常谓所亲曰须?嫁毕当归老旧庐公反之尔】

合江亭【诸本作题合江亭寄刺史邹君今从阁杭蜀本篇内三处注文亦用蜀本 邹君逸其名亭故相齐映所作故曰维昔经营初拜君寔王佐前刺史元澄无政廉使中丞杨公凭奏黜之遂用邹公其曰中丞黜凶邪指此意也公永贞元年七月初自阳山量移江陵道衡山诗所以作此亭在衡州负郭今之石鼓头即其地也地形特异岿然崛起於二水之间旁有朱陵洞亦谓之朱陵仙府唐人题刻散满巖上】

红亭枕湘江【红或作江方作洪 今按欧本作红鲍云当作红其作洪者声存而字讹也】蒸水会其左【蒸湘二水名即青草湖】瞰临眇空阔绿净不可唾维昔经营初邦君实王佐翦林迁神祠买地费家货【费或作匱】梁栋宏可爱【宏或作横】结构丽匪过伊人去轩腾兹宇遂颓挫老郎来何暮高唱久乃和树兰盈九畹栽竹逾万个【或作个史记货殖传竹竿万个古书皆用个字汉功臣表始出个字】长细汲沧浪幽蹊下坎坷波涛夜俯听云树朝对卧初如遗宦情终乃最郡课人生诚无几【诚或作成非是】事往悲岂奈【或作那】萧条縣岁时契阔继庸懦【诗死生契阔注勤苦也契音挈懦乃卧切】胜事谁复论丑声日已播中丞黜凶邪天子闵穷饿君侯至之初闾里自相贺淹滞乐闲旷勤苦劝慵惰为余扫尘阶【

尘或作东非是】命乐醉衆座穷秋感平分新月怜半破愿书岩上石勿使泥尘浣【泥尘或作尘泥】

陪杜侍御游湘西两寺独宿有题因献杨常侍【诸本无两字及因字 此自阳山北还过潭作永贞元年秋也湘西寺在潭州杨常侍凭也时为潭州刺史湘西观察使云】

长沙千里平【长沙即潭州也】胜地犹在险况当江濶处斗起势匪渐【斗顿也匪一作非】深林高玲珑青山上琬琰【上或作生】路穷台殿辟佛事焕且俨剖竹走泉源开廊架崖广【说文唐因岩为屋廊一作廊】是时秋之残【之或作初】暑气尚未斂羣行忘後先朋息弃拘检【朋或作困】客堂喜空凉【空或作风】华榻有清簟涧蔬煮蒿芹水果剥菱芡【音俭】伊余夙所慕陪赏亦云忝幸逢车马归独宿门不掩山楼黑无月渔火灿星点夜风一何喧杉桧屡磨飐【磨或作摩古磨摩通】犹疑在波涛?惕梦成魘静思屈原沈【楚词屈原沈於汨罗】远忆贾谊贬【贾谊为长沙王太傅公自御史贬阳山至是量移江陵掾过长沙故引此二人以自比】椒兰争妬忌【离骚经曰余以兰为可恃兮羌无实而容长椒专佞以慢慝兮椒又欲充夫佩帋王逸注兰楚怀王弟司马子兰也椒楚大夫子椒也】绦灌共谗谄【西汉贾谊传文帝议以谊任公卿之位绦灌乃毁谊曰洛阳人年少初学专欲擅权纷乱诸事於是天子以为长沙王太傅顔师古注绦绦侯周勃灌灌婴也】谁令悲生肠坐使泪盈脸翻飞乏羽翼【乏或作摧】指摘困瑕玷【困或作因非是】珥貂藩维重【应劭汉官仪曰侍中冠金蝉有貂貂取其内劲扞而外温润曹植戴蝉珥貂 珥音耳貂丁聊切】政化类分陕【汉弘农县周之二伯分陕之地公羊曰自陕而东周公主之自陕而西召公主之分陕亦见史记世家珥貂分陕谓凭以常侍镇长沙也

陕音闪】礼贤道何优奉已事苦俭大厦栋方隆巨川楫行剡【行或作初 易大过栋隆吉系辞剡木为楫】经营诚少暇游宴固已歉【欧本云歉俗字当作慊古书欢欣之类或从心或从欠多通用】旅程愧淹留徂岁嗟荏苒平生每多感柔翰遇频染【选弱冠弄柔翰】展转岭猿鸣曙灯青睒睒【灯方作光睒睒或作焰焰今按晓光不青作灯是也】岳阳楼别窦司直【窦司直名庠字胃卿韩臯镇武昌辟庠幕府陟大理司直权领岳州公自阳山移江陵法曹道出岳阳楼作此诗永贞元年冬十月也刘禹锡有和篇足成六十韵见刘集】

洞庭九州闲厥大谁与让南汇羣崖水【汇或作维】北注何奔放瀦为七百里吞纳各殊状自古澄不清环混无归向炎风日搜搅幽怪多冗长【选陆机曰故无取於冗长 长音仗】轩然大波起宇宙隘而妨【音访一作放】巍峩拔嵩华腾蹕较健壮【蹕或作跃选吴都赋腾蹕飞超】声音一何宏轰轳车万两【轳诸本作 或作揭方定作轳云邱葛切车声也杨雄羽猎赋所谓皇车幽轳是也杭蜀本作渴卢仝月蚀诗亦有推荡轰渴不知唐人何以讹轳为渴也今本多作磕砰磅轰磕上林赋语磕与轳音义一也】犹疑帝轩辕张乐就空旷【庄子黄帝张咸池之乐於洞庭之野】蛟螭露笋簴【选或藏蛟螭笋簴以悬钟磬详见元和圣德诗】编练吹组帟【组或作祖 今按鲍昭诗组帟扬春风】鬼神非人世节奏颇跌踢【上徒结切下徒浪切】阳施见夸丽陰闭感凄怆【感或作咸】朝过宜春口【过或作回宜春即袁州也】极北缺堤障【北或作地】夜?巴陵洲【巴陵郡即岳州】丛芮才可傍星河尽涵泳俯仰迷下上余澜怒不已喧聒鸣瓮盎明登岳阳楼辉焕朝日亮飞廉戢其威【离骚後飞

廉使奔属王逸注风伯也】清晏息纖纓【息或作自按海赋轻尘不飞纖罗不动息字为胜】泓澄湛凝綠物影巧相况江豚时出戏惊波忽荡瀟【波或作没】时当冬之孟【公永贞元年十月至岳州】隙窈缩寒涨前临指近岸侧坐眇难望滌濯神?醒幽怀舒以畅主人孩童旧【孩童一作童孩】握手乍忻怅怜我窜逐归相见得无恙【风俗通曰恙毒虫也喜伤人古人草居露宿故相劳问必曰无恙李陵曰霍与上官无恙乎又後汉苏竟传君执事无恙恙病也】开筵交履舄【史滑稽传履舄交错】烂漫倒家酿【刘恢曰见何次道饮令人欲倾家酿酿醞也】盃行无留停【或作停留】高柱送清唱中盘进橙栗投掷倾脯酱欢穷悲心生婉变不能忘【诗婉兮变兮】念昔始读书志欲干霸王【去声】屠龙破千金【庄子朱萍漫学屠龙於支离益殫千金之家三年技成而无所用其巧】为艺亦云亢爱才不择行触事得谗谤前年出官由【或作日以前卷上疏岂其由之语推之作由者是但恐此与彼语意不同则只作日亦通】此祸最无妄公卿采虚名擢拜识天仗奸猜畏弹射斥逐恣欺诳新恩移府庭【移或作趋】逼侧厠诸将【子虚赋逼侧泌节注云相迫也】于嗟苦弩缓但惧失宜当追思南渡时鱼腹甘所葬【史记屈原曰宁赴常流而葬乎江鱼腹中】严程迫风帆劈箭入高浪颠沈在须臾忠鯁谁复谅生还真可喜克已自惩创【克或作刻】庶从今日後粗识得与丧事多改前好趣有获新尚誓耕十亩田不取万乘相细君知蚕织稚子已能饷【东方朔曰归遗细君说者云细君朔妻之名又云细小也朔自比於诸侯谓其妻曰小君孙芸铭石庵稚子拾薪老夫汲涧细君缉紵】行当挂其冠生死君一访

送文畅师北游【公贞元十九年为四门博士有送文畅师序今诗亦多序意然公是诗自阳山回为国子博士在京师时作也】

昔在四门馆【後魏太和中立学于四门因以为名隋始隶国子公时为四门国子博士】晨有僧来谒【闻见录云欧阳公於诗主退之不主子美刘仲原父每不然之公曰子美老夫清晨梳白头玄都道士来相访有俗气退之决不道也仲原父曰亦退之昔在四门馆晨有僧来谒之句之类耳公赏其辩】自言本吴人少小学城阙【诗挑兮达兮在城阙兮城阙谓城郭也】已穷佛根源粗识事輶輶【语大车无輶小车无軌注輶者辕端横木以缚輶輶者辕端上曲钩衡輶五鸡切軌鱼骨切】挛拘屈吾真【或作身 汉邹阳上书能越挛拘之语】戒辖思远发荐绅秉笔徒声誉耀前闕从求送行诗【求或作来】屡造忍颠蹶今成十余卷浩汗罗斧钺先生閤穷巷未得窥剗剗【淮南子剗剗无迹人巧之妙 剗居绮切剗音厥 或云剗作剖字见傅毅琴赋当考】又闻识大道何路补剗剗【庄子庸詎知造物者不息我剗而补我剗公诗意谓文畅既祝髮为僧欲补其剗剗而反之初可得乎剗与黥同并音渠京切一作?音几】出其囊中文满听实清越谓僧当少安草序颇排诋上论古之初所以施赏罚下开迷惑胷寥豁斷株檠【何逊诗寥豁下崑呀寥音哮气上蒸也校本一用西京赋作廖豁恐非 今按一本作廖豁注云开达貌西京赋李善无注而篇韵以为宫殿貌祝氏音义作廖豁开达貌潘岳登虎牢赋幽谷豁以寥寥今亦未详孰是且从方氏作寥列子吾处也若檠株拘注断木也】僧时不昕莹【庄子是黄帝之所昕莹也疏昕莹疑惑貌】若饮水救渴【或作渴方云公诗用今韵者未尝逾韵此诗三十二韵不应独旁取此一韵 今按方说不知何以见此诗用今韵当考】风尘一出门时日多如髮三年窜荒岭守县坐深樾【此言出为阳山令 楚谓两木交陰之下曰樾】徵租聚异物【或作物异非是】诡制怛巾幘【制或作制怛或作恒怛惊

也】幽穷共谁语【共或作与】思想甚含嘞【嘞逆气礼记不敢嘞噫 咳 嘞於月切】昨来得京官【元和元年六月自江陵召还为国子博士】照壁喜见蝎【酉阳杂俎江南旧无蝎开元初有一主簿竹筒盛过江今江南往往有之俗呼为主簿虫杜诗每愁夜中自足蝎苏内翰闻骡驮试笔余谪居黄州五年今日离泗州北行岸上骡驮声空笼意亦欣然盖不闻此声久矣退之照壁喜见蝎不虚语也又岭南归云已脱问鵬之变行有见蝎之喜皆取诸此蝎音歇】况逢旧亲识【或作识知亲或作相】无不比鹑鵒【尔雅陆德明音义云鹑鵒鸟有目一翅相得乃飞故曰兼兼孔丛子北方有兽名曰鵒爱蛰蛰駘駘食得甘草必啮以遗蛰蛰駘駘见人将来必负鵒以走鵒非爱蛰蛰駘駘也为其假足也二兽亦非爱鵒也为其得甘草而遗之也夫禽兽犹知比假而相报也况士君子欲名利者乎 鹑古恬切鵒音厥】长安多门户吊庆少休歇而能勤来过重惠安可揭【重惠或作惠重母邱俭诗忧责重山岳谁能为我担与此义同】当今圣政初【谓宪宗初即位也】恩泽完?狨【完或作寬礼记凤以为畜故鸟不狨麟以为畜故兽不狨?许出切狨许月切】胡为不自暇飘戾逐鹑鵒【鹑鵒属鵒似鹰尾上白善捕鼠】

【鵒一名鵒尔雅鵒白鵒鹑之然切鵒音厥】仆射领北门【谓田季安为魏博节度使】威德压胡羯相公镇幽都【谓刘济为幽州节度】竹帛烂勲伐酒场舞闺姝【诗彼姝者子姝昌株切】猎骑围边月开张篋中宝自可得津筏【吴志束縛作大筏 筏音伐】从兹富裘马宁复茹藜蕨余期报恩後谢病老耕垆庇身指蓬茅逞志纵狺獫【尔雅长喙曰狺短喙曰獫诗曰载狺獫獫虚捡切獫许竭切】僧还相访来山药煮可掘

答张彻【公为国子博士时作张彻公门下士又公之从子壻详见醉赠张秘书注笔墨闲录曰刘侗云答张彻一诗尤奇丽】

辱赠不知报我歌尔其聆首叙始识面【北史齐神武自太原来朝见宋游曰尝闻其名今日始识其面】次言後分形【曹子建求自试表诚与国分形同气忧患共之也借用以言离别】道途绵万里日月垂十龄【谓自贞元十二年丙子至是元和改元丙戌十年也】浚郊避兵乱【贞元十五年二月汴州乱】睢岸连门停【诸本作庭阁本作停而方从诸本 按停犹居也上对乱字宜用停字乃的後又有洞庭字或未必重押也】肝胆一古劒波涛两浮萍渍墨窜旧史磨丹注前经义苑手秘宝文堂耳惊霆暄晨蹶露烏暑夕眠风棹结友子让抗【晋阳秋曰陆抗羊祜为边将推侨札之好抗尝遗祜酒祜亦馈抗药各推心服之】请师我慙丁【左氏襄十四年尹公佗学射於庾公差庾公差学射於公孙丁二子追公公孙丁御尹公佗曰子为师我则远矣】初味犹噉蔗【晋史顾恺之啖蔗自尾至本云渐入佳境 噉徒敢切与啖同】遂通斯建瓴【汉高纪云譬犹居高屋之上而建瓴水也】搜奇日有富嗜善心无宁石梁平挺挺【音挺说文挺挺长貌】沙水光泠泠乘枯摘野艳沈细抽潜腥游寺去陟巘【诗陟则在巘 巘语偃切陟或作登】寻径返穿汀【径或作巫非是】缘云竹竦竦失路麻冥冥淫潦忽翻野平芜眇开溟防泄堑夜塞惧冲城昼扃【自肝胆一古劒以下至此皆言十五年睢岸连居与彻相从之乐】及去事戎轡【公先居睢水久之建封以为节度推官】相逢宴军伶觥秋纵兀兀猎旦驰駟駟【诗駟駟牡马 駟音局旦或作晏】从赋始分手【谓彻赴举试也】朝京忽同舲【是年冬公以徐州从事朝于京师又与彻同行 楚词櫓舲船余上沅

齡音零】急时促暗棹恋月留虚亭毕事驱传马【谓十六年春公朝正事毕归彭城也传若今之驿 传除恋切】安居守牕萤梅花灞水别宫烛骊山醒【杜诗军吏回宫烛骊山在昭应 笔墨闲录曰刘儗云此对极有风味 骊力驰切宫一作官】省选逮投足乡宾尚摧翎【谓彻 下第也彻後元和四年始登第】尘祛又一掺【诗掺执子之祛兮掺攀祛执袂而别也 掺所 减切】泪毗还双荧【列子拂?扬眉而望之自毕事驱传马至此皆言十六年朝正毕反与彻 相别时事?音渍又在计切】洛邑得休告华山穷絶陉【尔雅山絶陉音形】倚岩睨海浪 引袖拂天星日驾此回辖金神所司刑【华山西岳其神少昊为金神西方主刑也】泉绅拖 修白石劒攢高青磴薛濳拳局【选石磴泻红泉字林云濳滑也拳局薛滑之貌楚词拳局顾 而不行磴都邓切濳音闕局音局】梯飈飈伶俜【楚词忽飈腾兮浮云伶俜行不正貌选少 伶俜而偏】

【孤又选古猛行云少年惶且布伶俜到他乡
飈卑遥切伶音零俜普丁切】悔狂已咋指【咋啮也大声也又多声选譊譊喧咋 咋音责狂 一作往】垂诚仍镌铭【公尝过华山登絶顶发狂恸哭遗书为诚见国史补】峨豸忝备列
【前汉陂池獬豸与廌同说文獬廌兽似牛而一角古者决讼令触不直今日峨豸以御史 冠用之故耳法冠一名柱後惠文冠或谓獬豸冠凡执法官皆服之异物志北荒中有兽名獬 豸性别曲直见人鬪触不直者闻人争咋不正者楚王尝获此兽因象其形以制衣冠十九年 公为御史故云峨豸也 豸宅买切】伏蒲愧分泾【汉元帝寝疾数问尚书以景帝时立胶东 王故事史丹候上独寝时直入卧内伏青蒲上泣涕谏帝帝由是不废太子分泾分别泾渭以 明清浊也】微诚慕横草【终军云军无横草之功】琐力摧撞筵【说苑子路对赵襄子曰 建天下之钟而撞之以筵岂能发其声乎哉 筵音廷诸本筵从𠂔方云当从竹羅丝筵也见东 方朔客难】叠雪走商岭飞波航洞庭下险疑堕井守官类拘圉【官或作官】荒餐茹獠蛊
【獠夷别名後汉大诏獠者獠南夷蛊虫毒自峨冠忝备列已下皆言贞元十九年冬自监察 御史言事贬阳山时也 獠音老】幽梦感湘灵【楚词使湘灵鼓瑟兮令海若舞冯夷】刺史 肃著蔡【三国名臣赞思同著蔡运用无方蔡龟也家语臧文仲有守龟焉名曰蔡著蔡著龟 也言刺史为人所信如著蔡】吏人沸蝗螟点缀簿上字趋踰合前铃【东汉周纡传又问铃 下注汉官仪曰铃下侍合辟车此皆以名自定者也晋羊祜出镇南夏铃合之下侍卫不过数 十人 铃音苓】赖其饱山水得以娱瞻听紫树雕斐亶【雕一作杂】碧流滴珑玲映波铺远 锦插地列长屏愁狄酸骨死【或作怨 狄余救切】怪花醉?馨潜苞绛实坼幽乳翠毛零【 乳或作孔】赦行五百里【二十一年正月顺宗即位二月大赦公自阳山量移江陵法曹】 月变三十莢【帝王世纪曰尧时有草夹阶而生每月朔日生一莢至望日则落一莢月小则 余一莢月变三十莢言及一月也 莢音冥】渐阶羣振鹭【诗振鹭于飞有駉振振鹭并兴洁 白之士羣集于朝】入学诲螟蛉【扬子螟蛉之子殪而逢蜾蠃祝之曰类我类我久则肖之 矣螟蛉桑上青虫蜾蠃细腰蜂也元和元年六月公自江陵法曹召为国子博士故云 蛉音苓】苹甘谢鸣鹿【诗呦呦鹿鸣食野之苹鹿得苹则鸣相呼诗意谓朋友也】疊满慙罄餠【 诗餠之罄矣维疊之耻餠小而尽疊大而盈疊耻者刺不能使富分贫衆恤寡也】罔罔抱瑚 琏【选罔罔秋月明语曰何器也曰瑚琏也瑚琏宗庙之器以喻彻 罔居永切】飞飞联鹄鹄
【诗鹄鹄在原兄弟急难尔雅鹄鹄雛渠属也飞则鸣行则摇鹄鹄诗以况兄弟张彻弟复亦 举进士故云鹄资昔切鹄郎丁切】鱼鬣欲脱背【鬣须鬣山海经鯪鱼赤目赤鬣欲脱背言

将化为龙也 鬣音猎】虬光先照硯【光先或作精光庄子刀刃若新发硯硯砥石也】岂独出丑类方当动朝廷勤来得晤语勿惮宿寒厅荐士【孟东野贞元十一年进士为漂阳尉时郑余庆尹河南公作是诗以荐之郑辟为水陆运从事此诗作於郊为尉後辟从事前欽观公铭郊墓谓郑公尹河南既辟从事後以节领兴元复奏为参谋皆公一时之荐也】

周诗三百篇雅丽理训诰【雅丽或作丽雅理或作埋今按二字皆未安恐必有误】曾经圣人手议论安敢到五言出汉时苏李首更号【选李陵与苏武诗注云五言诗自陵始也】东都渐弥漫派别百川导建安能者七【建安谓魏之文人也典论云今之文人鲁国孔融广陵陈琳山阳王粲北海徐干陈留阮瑀汝南应瑒东平刘公干斯七子也 瑒徒哽切一音畅又音阳】卓犖变风操逶迤抵晋宋气象日凋耗中间数鲍谢【鲍照谢朓也或曰谢灵运盖二谢通称】比近最清奥齐梁及陈隋衆作等蝉 搜春摘花卉沿袭伤剽盗国朝盛文章子昂始高蹈【笔墨闲录曰荐士诗与送孟东野序盛言子昂李杜余皆不在其列唐诗由子昂始唱之也子昂姓陈梓州射洪人唐高宗时有文章盛名】勃兴得李杜万类困陵暴後來相继生亦各臻闾奥【或作隩旧本作奥今本以重韵误刊也班固传究先圣之壺奥】有穷者孟郊【东野窥禹穴东野动惊俗公平日以朋友处之字而不名独此诗曰有穷者孟郊盖荐之於王公大人不得不名也】受材实雄骜冥观洞古今象外逐幽好横空盘硬语【横空或作纵横】妥帖力排奡【论语奡荡舟寒浞杀有穷后羿因其室而生奡多力能陆地行舟为少康所杀临川云吟诗各有所得清水出芙蓉天然去雕饰此李白所得也或看翡翠兰苕上未掣鲸鲵碧海中此杜甫所得也横空盘硬语妥帖力排奡此韩愈所得也奡鱼到切】敷柔肆纤余奋猛卷海潦荣华肖天秀捷疾逾响报【捷或作健逾或作愈】行身践规矩甘辱耻媚竈【媚竈见论语八佾】孟轲分邪正眸子看了眊【眸子了眊见孟子离娄上了音了眊音毫】杳然粹而清【或作精】可以镇浮躁酸寒溧阳尉【溧阳即今昇州县名贞元十二年吕渭知贡举郊年四十有六中进士第间四年调溧阳尉 溧音栗】五十几何毫【八十九曰毫】孜孜营甘旨【礼记内则昧爽而朝慈以甘旨】辛苦久所冒俗流知者谁指注竞嘲傲圣皇索遗逸髦士日登造庙堂有贤相【谓郑余庆】受遇均覆焘【公有与余庆书云再奉示问皆缘孟家事郊死於元和九年时余庆为兴元尹韦庄云东野佐徐州幕卒使下廷评以墓志考之余庆在兴元奏郊为参谋未至而卒庄说非也覆方又切】况承归与张【谓郊尝为归登张建封所知】二公迭嗟悼青冥送吹嘘强箭射鲁縞【前汉韩安国传强弩之末力不能穿鲁縞】胡为久无成使以归期告【贞元十九年建封死久矣公犹且云尔者盖言东野素为建封所知胡为久无成以归期告也】霜风破佳菊嘉节迫吹帽【晋孟嘉在征西将军幕中九日宴龙山风吹嘉帽落】念将决焉去感物增恋嫪【嫪恹物也声韵云姻嫪恋惜也说文云固也 嫪卢到切】彼微水中荇尚烦左右芼【诗参差荇菜左右芼之芼择也芼音冒】鲁侯国至小庙鼎犹纳郛【春秋桓二年取郛大鼎于宋戊申纳于太庙郛地名郛音告】幸当择珉玉宁有弃珪璋【周礼天子执珪四寸以朝诸侯珪天子圭也 珪音冒】悠悠我之思扰扰风中纛【纛以鼂牛尾为之大如斗系於左駟马轡上选黄屋左纛楚王曰寡人之心摇摇然如悬旌诗意取此 纛音道】上言愧无路日夜惟心祷鹤翎不天生变化在啄菹【鸟伏卵谓之菹菹薄报切】通波非难图尺地易可漕善善不汲汲後时徒悔懊救死具八珍【周礼膳夫珍用八物又食医掌八珍之齐礼记内则八珍谓淳熬淳母炮豚炮?搗珍渍熬肝膋也】不如一簞犒【楚与晋战或人进王一簞酒王倾酒於水上与士共饮

筆音单不或作无】微诗公勿【微或作数】恺悌神所劳【诗恺悌君子神所劳矣
劳郎到切】

喜侯喜至赠张籍张彻【公初谪阳山令元和改元六月自江陵掾召为国子博士其从游如
喜如籍如彻皆会于都下诗以是作】

昔我在南时【谓贵阳山时也】数君长在念摇摇不可止讽咏日喁喁【喁喁鱼口动貌选
张衡曰喁喁沈浮喁音顒喁音验】如以膏濯衣每渍垢逾染又如心中疾箴石非所砭常思
得游处至死无倦厌【无或作不】地遐物奇怪水镜涵石劒【水镜一名域陆玑疏云一名
射影江淮水皆有之人在岸上影见水中投人影则杀之】荒花穷漫乱幽兽工腾闪碍目不
忍窥忽忽坐昏垫【书下民昏垫注昏瞽垫溺垫都念切】逢神多所祝岂忘灵即验依依梦
归路历历想行店今者诚自幸所怀无一欠孟生去虽索【孟生孟郊索离也东野其年十一
月从河南尹郑余庆奏为水陆运从事索悉各切】侯氏来还歉【说已见上】欹眠听新诗
屋角月艳艳【眠或作枕月或作日】杂作承闲骋【杂方作新按上句已云听新诗不应此
句便重出新字当作杂作承间骋盖谓间出他文也】交惊舌?譖【交或作文?或作牙皆误?
俗互字也说文譖吐舌貌譖他念切】缤纷指瑕疵拒扞阻城塹【阻城或作城阻非是】以
余经摧挫固请发铅槩【王充论衡断木为槩西京杂记扬子云好事常怀铅提槩从诸计吏
访殊方絶域之语铅墨槩牒也槩七艳切】居然妄推让见谓熬天焰【天或作黔非是】比
疎语徒妍慄息不敢占呼奴具盘飧【或作餐】飮餽鱼菜贍人生但如此朱紫安足僭

古风【蜀本作二首观诗意当在德宗之世与烽火诗意相表里盖自安史乱後方镇相望於
内地兵骄则遂帅帅强则叛上不廷不贡故托古风以寓意谓当时之民疲於赋役无可逃之
地譬如一邑之水尚可违而天下汤汤则无所可归好衣甘食以苟一日安则可见当时之不
自聊如此】

今日曷不乐幸时不用兵无日既蹙矣【日或作日】乃尚可以生【以或作劳非是】彼州
之赋去汝不顾此州之役去我奚适【去我方作我去奚或作爰皆非是】一邑之水可走而
违天下汤汤曷其而归【汤音伤】好我衣服甘我饮食无念百年聊乐一日骛骥【唐本有
赠欧阳詹字或作骛骥吟示欧阳詹詹集有答韩十八骛骥吟唐本云赠欧阳詹詹字行周泉
州晋江人贞元八年与公同中进士第公贞元十五年冬以徐州从事朝正于京詹时为国子
监四门助教将率其徒伏阙下举公为博士此诗□斯时所作欤】

骛骥诚齷齪【选小人自齷齪骛音台齷音渥齪音渚】市者何其稠力小苦易制价微良易
酬【苦或作良良或作诚】渴饮一斗水饥食一束刍嘶鸣当大路志气若有余骛骥生絶域
自矜无匹俦牵驱入市门行者不为留借问价几何黄金比嵩邱【老杜驄马行未觉千金满
高价】借问行几何咫尺视九州饥食玉山禾【玉山山名周穆王访西王母所经之处】
渴饮醴泉流【礼运地出醴泉】问谁能为御【诸本作借问谁能御方从杭蜀本及欧阳詹
集如此】旷世不可求惟昔穆天子乘之极遐游【史记穆王得温骊赤兔骅骝騄耳之驷西
巡狩至崑仑山见西王母乐而忘归】王良执其轡【王良古之善御者事见孟子良赵简子

时善御者左氏号卹无恤】造父挟其輶【史记造父以善御幸於周穆王穆王封之赵城輶车輶也挟诸本作夹此从詹集今按左传颖考叔挟輶以走当作挟輶张留切】因言天外事【穆王时西极有化人来王敬事之遂肆意远游驾八骏之乘主车则】

【造父为御宿于崑仑之阿赤水之阳别日升崑仑之上以观黄帝之宫遂宾于西王母公曰天外事即论崑仑池之事非中国所见者也】茫惚使人愁【茫或作恍或作荒詹集作慌古慌与茫通恍许往切惚呼骨切】驺骝谓骐驎饿死余尔羞【饿或作饥】有能必见用有德必见收孰云时与命通塞皆自由骐驎不敢言低徊但垂头人皆劣骐驎共以驺骝优喟余独兴叹才命不同谋寄诗同心子为我商声讴【诗或作言商或作高】

马馱谷【刘向新序燕相得罪将出召门下诸大夫曰有能从我出者乎大夫有进者曰凶年饥岁士糟粕不厌而君之犬马有余谷粟隆冬烈寒士短褐不全而君之台观帟帘锦绣飘飘而弊财者君之所轻死者士之所重君不能施君之所轻而求得士之所重不亦难乎燕相慙公名篇意出此公年十九举进士京师二十五登第春官二十九始佐汴幕此诗及其下出门皆未得志之辞其三上光范书时作乎】

马馱谷兮士不馱糠粃【杜诗黎民糠粃窄史记陈平食糠核晋灼云京师谓麤屑为纈头字与粃同粃胡骨切又音纈】土被文绣兮【汉贾谊传民墙屋被文绣】士无短褐【短或作短前汉货殖传实用短字董彦远洪庆善皆尝辨古无短褐字按短褐字两汉如贾谊贡禹货殖传班彪刘平张衡传凡六见无有作短字者班彪王命论短褐之裘汉书作短文选则用丁管切是唐儒方两用之故少陵诗赐浴皆长纓与宴非短褐又云短褐风霜入还丹日月迟皆作长短之短而史记孟尝君传与战国策墨子语盖皆传写之讹公好古最深当以短为正今按战国策邻有短褐一作短史记士不得短褐司马贞曰短亦音豎班彪王命论短褐之裘韦昭曰短当作短短襦也字皆正作短注中乃云短字豎音又淮南子亦云巫马期才衣短褐而高诱无说则亦未必皆传写之误也又柳子厚亦尝用之则安知韩公之必不然乎今两存之以俟知者】彼其得志兮不我虞一朝失志兮其何如已焉哉嗟嗟乎鄙夫

出门

长安百万家出门无所之岂敢尚幽独与世实参差古人虽已死书上有其辞【其或作遗】开卷读且想千载若相期出门各有道我道方未夷且於此中息天命不吾欺【命或作诚】

嗟哉董生行【董召南壽州安丰人公尝有送董生游河北序且曰董生举进士连不得志於有司而此诗叙其孝且慈如此苏翰林尝作苏州姚氏三瑞堂诗云君不见董召南隐居行义孝且慈天公亦恐无人知故令鸡狗相哺儿义令韩老为作诗尔来三百年名与淮水驰】

淮水出桐栢【禹贡导淮自桐栢桐栢山名今在唐州界淮水所出】山东驰遥遥【一作悠悠】千里不能休淝水出其侧【淝水在庐江晋史列阵临淝水淝音肥】不能千里【句絕】百里入淮流【百上或无里字不能千里者以兴董生居下其可以施於人者不遐也按水

经淝水出九江北入于淮故云】壽州属县有安丰唐贞元时【元下或有年字】县人董生召南【召或作邵】隐居行义於其中【论语隐居以求其志行义以达其道】刺史不能荐天子不闻名声【句絶】爵禄不及门门外惟有吏日来徵租更索钱【方无更字非是】嗟哉董生朝出耕夜归读古人书尽日不得息或山而樵或水而渔【而方并作於非是】入厨具甘旨上堂问起居父母不戚戚妻子不咨咨【方从阁杭蜀本作羞羞云此诗以三嗟哉易韵以羞叶居视古用韵也今按咨字自与居叶方於毛穎传资字论之矣何独於此而疑之邪羞羞韵虽可叶然殊无理而可笑方之主此又其酷信三本之误也或恐本是嗟字叶音子余反而误作羞字耳然亦不如且作咨字之见成稳当也】嗟哉董生孝且慈人不识【句絶】惟有天翁知【方无有字非是】生祥下瑞无时期家有狗乳出求食鸡来哺其儿啄啄庭中拾虫蚁哺之不食鸣声悲傍徨蹢躅久不去【蹢直炙切蹢厨玉切】以翼来覆待狗归【覆去声】嗟哉董生谁将与俦时之人夫妻相虐兄弟为讎食君之禄而令父母愁亦独何心嗟哉董生无与俦【或作谁将与俦或作将无与俦或作谁与俦】今按上句谁将与俦疑而问之之词也此云无与俦答而决之之词也】

烽火【周幽王为烽燧寇至则举以招兵诸侯患之公感时而有取云时吴少诚败韩全义两都甚扰扰公诗以此作】

登高望烽火谁谓塞尘飞王城富且乐曷不事光辉勿言日已暮相见恐行稀愿君熟念此秉烛夜中归我歌宁自感乃独泪沾衣

汴州乱二首【汴州自大历後多兵刘元佐死子士宁代之无度其将李万荣逐而代之万荣死董晋寔代之晋卒陆长源总留後八日而军乱长源死公是时已从晋丧出汴四日寔贞元十五年二诗之作盖讥德宗姑息之政云】

汴州城门朝不开天狗堕地声如雷【天官书天狗状如犬奔有声其下止地类狗汉吴楚七国反天狗过梁野及兵起遂伏尸流血其下】健儿争夸杀留後【夸或作诱留後陆长源也】连屋累栋烧成灰【累栋或作累累】诸侯咫尺不能救

孤士何者自兴衰

母从子走者为谁大夫夫人留後儿【谓长源之妻子】昨日乘车骑大马坐者起趋乘者下庙堂不肯用干戈【肯或作敢】呜呼奈汝母子何

利劍【此诗次汴州乱後不平之气略见于此】

利劍光耿耿佩之使我无邪心故人念我寡徒侶【寡或作无徒或作俦】持用赠我比知音我心如冰劍如雪不能刺谗夫使我心腐劍锋折决云中断开青天噫劍与我俱变化归黄泉【晋雷焕得酆城宝劍一与张华一自佩华诛劍失所在焕死其子持过延平津忽於腰闲跃出堕水化为两龙而去】

齷齪【贞元十五年郑滑大水公十六年自京师归彭城诗云去岁东郡水而此诗亦云河堤决东郡老弱随惊湍诗意皆相似大抵言当世士齷齪无能为国虑者】

齷齪当世士所忧在饥寒但见贱者悲不闻贵者叹【音滩】大贤事业异远抱非俗观报国心皎洁念时涕丸澜【选欧阳坚石诗挥笔涕丸澜】妖姬坐左右柔指发哀弹【潘安仁笙赋辍张女之哀弹弹音坛】酒肴虽日陈感激宁为欢秋陰欺白日【欺方作蔽今按作蔽固古语然作欺尤有味也】泥潦不少乾河堤决东郡【滑州也】老弱随惊湍天意固有属谁能诘其端【属或作谓或作以诘方作语 今按谓以语不若作属诘为?切】愿辱太守荐得充谏诤官【谏诤方作争臣今按争臣下更着官字语复非是】排云叶闾阖披腹呈琅玕致君岂无术自进诚独难

东雅堂昌黎集注卷二

卷三

<集部,别集类,汉至五代,东雅堂昌黎集注>

钦定四库全书

东雅堂昌黎集注卷三

古诗

河之水二首寄子侄老成【老成公兄介之子贞元十三年来省公於汴州明年归取其孥十五年董晋薨公去汴州不果来公佐徐州未几而罢又不果来十七年公有此诗观公祭老成文则知公眷眷之情与此诗一也】

河之水去悠悠我不如水东流我有孤侄在海陬【或作隅古音隅将侯切亦与流通】三年不见兮使我生忧日复日夜复夜三年不见汝使我鬓髮未老而先化

河之水悠悠去我不如水东注我有孤侄在海浦三年不见兮使我心苦采蕨于山【诗草虫陟彼南山言采其蕨】缙鱼于渊【诗其钓维河维丝伊缙渊或作泉】今按以渊为泉避唐讳也依例当作渊】我徂京师不远其还【其或作而】

山石【此诗编次於河之水後当是去徐即洛时作故其後有人生如此自可乐岂必局束为人羈之句苏内翰尝与客游南溪醉後相与解衣濯足因咏公此篇慨然知其所以乐而忘其在数百年之外因次其韵见坡集】

山石荦确行径微【荦吕角切确音觉】黄昏到寺蝙蝠飞【说文蝙蝠服翼崔豹占今注一名仙鼠蝙蝠音边蝠音福】升堂坐阶新雨足【或作定非是】芭蕉叶大支子肥【支子即梔子】僧言古壁佛画好以火来照所见稀【所见或作见所非是】铺牀拂席置羹饭踈粝亦足饱我饥【列子食则粢粝兰末切】夜深静卧百虫絶清月出岭光入扉天明独去

无道路出入高下穷烟霏山红涧碧纷烂漫【东坡诗云荦确何人似退之意行无路欲从谁宿云解駁晨光漏独见山红涧碧时皆采公此篇中语也】时见松栢皆十围【栢音历或作栌选南都赋枫桺栌栢李善曰栢与栌同】当流赤足蹋涧石水声激激风吹衣【吹或作生】人生如此自可乐【或作可自得自可或作自得或作可自皆非是】岂必局束为人羈【前汉灌夫传廷论局趣效辕下驹羈马络楚辞余虽好修姱以鞿羈兮注縲在口曰鞿前汉是犹以鞿而御驛突言为人所鞿繫也鞿音几】嗟哉吾党二三子安得至老不更归

天星送杨凝郎中贺正【此诗贞元十二年作时杨凝以户部郎中为宣武军判官公时与同佐董晋幕凝自汴朝正于京以诗送之】

天星牢落鸡喔咿【後汉王延壽王孙赋声嘶 而喔咿楚词吾将喔咿嚅唳以事妇人乎喔音渥咿音伊】仆夫起餐车载脂【诗载脂载辖还车言迈】正当穷冬寒未已【时贞元十四年之十二月】借问君子行安之会朝元正无不至受命上宰须及期侍从近臣有虚位公今此去归何时【或作何时归】

汴泗交流赠张仆射【贞元十五年公在徐州张建封幕汴水徐之西泗水徐之南故以名篇公集有谏张仆射击球书此诗言此诚习战非为剧岂若安坐行良图盖亦以讥之也】

汴泗交流郡城角筑场千步平如削【筑或作廝诗九月筑场圃谓筑坚以为场也】短垣三面缭逶迤击鼓腾腾树赤旗新秋朝凉未见日【秋或作雨】公早结束来何为分曹决胜约前定百马攒蹄近相映球惊杖奋合且离红牛缨绂黄金羁【选白马饰金羁梁吴筠曰白马黄金羁牛一作犛】侧身转臂着马腹霹雳应手神珠驰超遥散漫两闲暇挥霍纷纭争变化【枚乘曰蛺蝶挥霍】发难得巧意气麤【前汉项羽围汉王於荥阳酈食其谋挠楚权欲立六国张良发八难】謹声四合壮士呼此诚习战非为剧岂若安坐行良图当今忠臣不可得公马莫走须杀贼

忽忽【贞元十五年董晋薨公去汴後依张建封于徐此诗当在徐州作】

忽忽乎余未知生之为乐也【生之为方作为生之非是前汉王褒传太子苦忽忽善忘不乐名篇意或出此】愿脱去而无因安得长翮大翼如云生我身乘风振奋去六合絕浮尘死生哀乐两相弃是非得失付闲人

鸣鴈【与前诗同时公盖托鴈以自喻也】

嗷嗷鸣鴈鸣且飞【上鸣字或作鸿诗曰鸿鴈于飞哀鸣嗷嗷】穷秋南去春北归【管子桓公曰鸿鴈春北而秋南不失其时】去寒就暖识所依【或作处非是】天长地阔栖息稀风霜酸苦稻粱微【鸿鴈前辈多用稻粱事盖出战国策广絶交论云分鴈鹜之稻粱又杜甫鴈诗自古稻粱多不足】毛羽摧落身不肥【毛羽或作羽毛】徘徊反顾羣侣违哀鸣欲下洲渚非江南水阔朝云多【朝方作朔 今按既云江南则不应言朔云矣兼作朝云语亦差响】草长沙软无网罗闲飞静集鸣相和违忧怀惠性匪他【惠一作息】凌风一举君谓何龙移【此诗谓南山湫也湫初在平地一日风雷移居山上其山下湫遂化为土长安人至今谓之乾湫公题炭谷诗云厌处平地土巢居插天山其此之意欤】

天昏地黑蛟龙移雷惊电激雄雌随【激或作击雷奔电激班固西都赋语雄雌或作雌雄】清泉百丈化为土鱼鼈枯死吁可悲

雉带箭【此诗公佐张仆射于徐从猎而作也读之其状如在目前盖写物之妙者】

原头火烧静兀兀【唐太宗出猎诗平原烧火红晋顾恺之传火烧平原无遗燎
烧去声读】野雉畏鹰出复没【出复方作伏欲今按雉出复没而射者弯弓不肯轻发正是
形容持满命中之巧毫厘不差处改作伏欲神采索然矣】将军欲以巧伏人盘马弯弓惜不
发地形渐窄观者多雉惊弓满劲箭加冲人决起百余尺红翎白镞随倾斜【列子善射者能
令後镞中前栝】将军仰笑军吏贺五色离披马前堕【尔雅雉五色备曰翬】

条山苍【欧本注云中条山在黄河之曲今蒲中也】

条山苍河水黄浪波沄沄去【浪波或作波浪】松柏在山冈【山或作高】赠郑兵曹【郑
或以为郑通诚张建封节度武宁时通诚为副使公为其军从事樽酒相从在其时欬白乐天
哀二良云祠部员外郎郑通诚此云兵曹所未详也】

樽酒相逢十载前君为壮夫我少年罇酒相逢十载後我为壮夫君白首【公贞元十五年去
汴即徐为军从事时年三十有二故云】我材与世不相当戢鳞委翅无复望当今贤俊皆周
行君何为乎亦遑遑【亦或作独】盃行到君莫停手破除万事无过酒桃源图【陶渊明集
晋太元中武陵人捕鱼沿溪行忘路远近忽逢桃林夹岸数百步前得一山山有小口便舍船
从口入其中土地平旷往来种作悉如外人自云避秦来此乃不知有汉无论魏晋也荆公桃
源行东坡和桃源诗皆得之王摩诘退之刘梦得诸人以为神仙皆非是诗中云武陵太守好
事者题封远寄南宫下南宫先生忻得之波涛入笔驱文辞必与一礼部郎賡和不复详其名
氏矣武陵即今之鼎州也】

神仙有无何眇芒【或作渺茫】桃源之说诚荒唐流水盘回山百转生绡数幅垂中堂武陵
太守好事者题封远寄南宫下南宫先生忻得之波涛入笔驱文辞文工画妙各臻极异境恍
惚移於斯【恍许往切惚吁骨切】架岩凿谷开宫室接屋连墙千万日羸颠刘蹶了不闻【
羸颠刘蹶谓秦汉之亡】地坼天分非所恤【地坼天分谓晋魏之乱】种桃处处惟开花川
原近远蒸红霞【近远或作远近】初来犹自念乡邑岁久此地还成家渔舟之子来何所物
色相猜更问语大蛇中断丧前王【汉书高祖为亭长夜径泽中前有大蛇乃拔劒斩之蛇分
为两道开盖白帝子化为蛇当道而高祖以赤帝子斩之也】羣马南渡开新主【晋太安之
际童谣曰五马浮渡江一马化为龙立马谓琅邪西阳汝南南顿彭城五王琅邪竟登大位是
化为龙也按晋元帝姓司马氏太兴元年即位都於金陵】听终辞絶共凄然自说经今六百年
当时万事皆眼见不知几许犹流传争持酒食来相馈礼数不同罇俎异月明伴宿玉堂空
骨冷?清无梦寐夜半金鷄啁哳鸣【楚词鷄鷄啁哳而悲鸣啁音嘲哳陟谔切】火轮飞出
客心惊人间有累不可住依然离别难为情船开棹进一回顾万里苍苍烟水暮世俗宁知伪
与真至今传者武陵人

东方半明【此诗与煌煌东方星兴寄颇同盖指顺宗即位不能亲政而宪宗在东宫之时也
时贾耽郑珣瑜二相皆天下重望王叔文用事相继引去此诗所以喻东方半明大星没也执

谊叔文初相汲引此诗所以喻独有太白配残月也顺宗已厌机政执谊叔文尚以私意更相猜忌此诗所以有嗟尔残月勿相疑同光共影须臾期也及宪宗立而叔文执谊窜犹东方明而残月太白灭此诗所以喻残月晖晖太白睽睽鸡三号更五点也意微而显诚得诗人之旨】

东方半明大星没【太白长庚西方星故云配月又太白主大臣其号为上公故公有取焉半或作未方从阁本云按旧本作半明今蜀本题语亦作半明既云大星没则不应未明也传本多习於诗人成语而不考其意义故也】独有太白配残月嗟尔残月勿相疑同光共影须臾期残月晖晖太白睽睽【或作睽睽义当从目太元经明复睽天中独烂也睽音闪】

鸡三号【史记鸡三号卒明杜诗初鸣度必三 号音豪】更五点赠唐衢【唐史衢附公传後应进士久而不第能为歌诗意多感激见人文章有所伤叹者读讫必哭涕泗不能已故世称唐衢善哭乐天尝有诗谓贾谊哭时事阮籍哭路岐唐生今亦哭异代同其悲者也此诗贞元末作】

虎有爪兮牛有角虎可搏兮牛可触奈何君独抱奇才手把锄犁饿空谷当今天子急贤良匭函朝出开明光【唐垂拱二年命铸铜为匭置之朝堂以受天下表疏明光殿名也匭音轨】胡不上书自荐达坐令四海如虞唐【尧封於唐舜封於虞故尧舜号唐虞氏】

贞女峡【在连州桂阳县贞元十九年冬公自监察御史谪连州阳山令有此诗荆州记秦时有女子化入石在东岸穴中】

江盘峡束春湍豪雷风战鬪鱼龙逃悬流轰轰射水府一泻百里翻云涛漂船摆石万瓦裂咫尺性命轻鸿毛【鸿或作於或作如】

赠侯喜【洛水在河南县北易乾凿度曰王者有盛德之应则洛水先温故号温洛公贞元十七年七月二十二日与李景兴侯喜尉迟汾同渔于洛有石刻在焉诗必是时作反复其意大抵谓沮洳不能得大鱼兴寄远矣】

吾党侯生字叔?【或作起起之古文也】呼我持竿钓温水水平明鞭马出都门尽日行行荆棘里温水微茫絶又流深如车辙阔容輶虾蟆跳过雀儿浴此纵有鱼何足求我为侯生不能已盘针擘粒投泥滓【列子詹何以芒针为钩剖粒为饵皆言其小也 滓阻史切】晡时坚坐到黄昏【到或作至】手倦目劳方一起暂动还休未可期虾行蛭渡似皆疑【蛭水虫博物志水蛭三段而成三物前汉夫岂从虾与蛭螾

蛭音质虾一作鰕】举竿引线忽有得一寸才分鳞与髻【或作鳍

今按髻马鬣也当作鳍然仪礼鱼进髻注脊也庄子外物篇亦作髻皆可通用 髻音析】是日侯生与韩子良久叹息相看悲我今行事尽如此此事正好为吾规半世遑遑就举选一名始得红颜衰【续仙传蓝采和者常於市中歌曰红颜一春树流年一掷梭始或作已非是】人间事势岂不见徒自辛苦终何为便当提携妻与子南入箕颍无还时【箕山名颍水名地理志颍水出阳城汉有颍阳临颍二县高士传许由隐于箕山】叔?君今气方鋭我言至切君勿

嗤君欲钓鱼须远去大鱼岂肯居沮洳【诗有汾沮洳沮洳渐湿也苏东坡记儋耳上元放杖而笑过问何笑曰自笑也然亦笑韩退之钓鱼无所得更欲远去不知走海者未必得大鱼也盖公作此诗时年三十四去徐居洛方有求官来东洛之语而东坡则晚岁儋耳发於忧患之余览者无以为异沮洳将预切洳人怨切肯或作有非是】

古意【华山记云山顶有池生千叶莲花服之羽化然观公诗意与前诗皆有兴寄其曰古意其旨深矣公县斋有怀曰求官来东洛犯雪过西华答张彻曰洛邑得休告华山穷绝怪李肇国史补言愈好奇登华山绝峯度不可反发狂恸哭县令百计取之乃下而沈颜作登华旨略曰仲尼悲麟悲不在麟墨翟泣丝泣不在丝也且阮籍纵车於途途穷辄恸岂始虑不至耶盖假事讽时致意於此尔文公愤趋荣贪位者若陟悬崖险不能止至颠危踣蹶然後叹不知税驾之所焉可及矣悲夫文公之旨微沈子几晦哉】

太华峯头玉井莲【山海经曰华山一名太华】开花十丈藕如船冷比雪霜甘比蜜一片入口沉痾痊【晋史乐广传沉痾顿愈又潘岳闲居赋尝膳载加旧痾有痊痾於何切痊音詮】我欲求之不惮远青壁无路难夤缘【选琴赋丹崖?巘青壁万寻方从唐本作五月壁路难攀缘云鲍溶集有陪公登华山诗盖五月也夤或作攀今按公此诗本以古意名篇非登山纪事之诗也且太华之险千古屹立所谓削成五千仞者岂独五月然】

【後难攀缘哉若以句法言之则五月壁路之与青壁无路意象工拙又大不侔亦不待识者而知其得失矣方氏泥於古本牵於旁证而不寻其文理乃去此而取彼其亦误矣原其所以盖缘五月本是青字唐本误分为二而读者不晓因复削去无字遂成此缪今以诸本为正】安得长梯上摘实下种七泽根株连【司马相如子虚赋楚有七泽其小者名云梦方九百里】

八月十五夜赠张功曹【张功曹署也公与张以贞元二十一年二月二十四日赦自南方俱徙掾江陵至是俟命於郴而作是诗公在江陵祭郴州李使君云辍行谋於俄顷见秋月之三叠逮天书之下降犹低回以宿留此其证也诗怨而不乱有小雅之风】

纖云四卷天无河清风吹空月舒波沙平水息声影绝【沙平或作平沙非是】一盃相属君当歌【汉灌夫传夫迎田蚡过宴及饮酒酣夫起舞属蚡顔师古曰属付也犹今之舞讌相劝也属之欲切】君歌声酸辞且苦不能听终泪如雨【选古诗泣涕零如雨】洞庭连天九疑高【洞庭九疑详见一卷复志赋二卷送惠师诗注】蛟龙出没猩鼯号十生九死到官所【官所临武】幽居默默如藏逃下牀畏蛇食畏药海气湿蛰熏腥臊【湿或作温非是】昨者州前槌大鼓嗣皇继圣登夔臯【贞元二十一年正月顺宗即位】赦书一日行万里【是年二月甲子大赦天下】罪从大辟皆除死【荆公与谢本作除徙下文已有迁者追回流者还则除死为当】迁者追回流者还涤瑕荡垢朝清班【朝清或作清朝唐本作朝清盖言追还之人皆得涤瑕垢而朝清班惟已为使家所抑故只量移江陵也】州家申名使家抑【使家谓湖南观察使】坎轲祇得移荆蛮【祇或作只他诗皆然荆蛮江陵也】判司卑官不堪说【卑官一作官卑】未免捶楚尘埃闲【老杜送高书记诗脱身簿尉中始与捶楚辞按唐

制参军簿尉有过即受笞杖之刑杜牧诗云参军与簿尉尘土惊匡勳一语不中治鞭笞身满疮】同时辈流多上道天路幽险难追攀君歌且休听我歌我歌今与君殊科【杭本如此言张之歌词酸苦而已直归之於命盖反骚之意而其词气抑扬顿挫正一篇转换用力处也方从诸本我下去歌字而君下着岂字全失诗意使一篇首尾不相运掉无复精神又不着杭本之异盖考之亦未详耶】一年明月今宵多【明月一作月明】人生由命非由他有酒不饮奈明何谒衡岳庙遂宿岳寺题门楼【或无庙字 尔雅霍山为南岳一名衡山公前後两谪南方初自阳山北还过衡在八月至潭适当残秋诗云我来正逢秋雨节故知此诗自阳山还时永贞元年秋作也後自潮州移刺袁州则元和十五年十月非秋雨节时也东坡潮州庙碑云公之精诚能开衡山之云即此诗意】

五岳祭秩皆三公【礼记天子祭天下名山大川五岳视三公秩次也皆或作比非是】四方环镇嵩当中【白虎通曰嵩山夹居四方之中故曰嵩】火维地荒足妖怪天假神柄专其雄喷云泄雾藏半腹虽有絶顶谁能穷【老杜望岳诗云会当凌絶顶一览衆山小】我来正逢秋雨节陰气晦昧无清风【清方作晴 今按清风兴羣陰伏无清风则雨意未已也晴字非是】潜心默祷若有应岂非正直能感通【诗神之听之正直是与非方作即非是能感方作感能 今按若从方读则此句为吃羌语矣】须臾静扫衆峯出仰见突兀撑青空紫盖连延接天柱石廩腾掷堆祝融【衡山有五峯紫盖天柱石廩祝融芙蓉石廩一名石困 东坡登州观海市诗云潮阳太守南迁归喜见石廩堆祝融过太行诗序云予南迁其必返乎此退之登衡山之祥也意皆本此】森然魄动下马拜松柏一迳趋灵宫【栢或作桂】粉墙丹柱动光彩鬼物图画填青红升阶伛僂荐脯酒【伛於武切倭音缕】欲以菲薄明其衷庙令老人识神意【令或作内】睢盱伺能鞠躬【列子老子而睢睢而盱盱仰视貌睢许佳切盱香于切伱丑郑切】手持盃琬导我掷【琬方从唐本作校云广韵作琬谓古者以玉为之也朝野僉载作角角与校音义皆相近魏野有咏竹校子诗只作校字荆楚岁时记又作教 今按当从广韵及衆本】云此最吉余难同窜逐蛮荒幸不死衣食才足甘长终【扁鹊传长终而不得返】侯王将相望久絶神纵欲福难为功夜投佛寺上高阁星月揜映云瞳眈【选秋兴赋月瞳眈而含光从日者非 今按广韵瞳字只有从日无从月者瞳眈本日出貌然前辈月诗多用之如梁孝绰月诗瞳眈入牀簾之类也更当考】猿鸣钟动不知曙杲杲寒日生於东【诗杲杲出日】

岫嵎山【山海经云衡山一名岫嵎山与前诗同时作东坡中隐堂诗云岫嵎何须到韩公浪自悲谓此诗也岫音矩嵎音缕】

岫嵎山尖神禹碑【盛洪之荆州记曰南岳周回数百里昔禹登而祭之因梦玄夷使者遂获金简玉字之书徐灵期南岳记曰夏禹导水通渚刻石书名山之高】字青石赤形摹奇科斗拳身薤倒披【书序云鲁共王得孔子所藏古文皆科斗文字科斗古篆也以其头麤尾细类水虫之科斗焉 倒或作叶方从蜀本云衡阳旧刻亦然魏都赋云华莲重葩而倒披 今按岫嵎者衡山南麓别峯之名薤倒披者古有倒薤书见欧公集古录目唐玄度十体书方得之矣然今衡山实无此碑此诗所记盖当时传闻之误故其卒章自为疑词以见微意刘禹锡寄吕衡州温亦云尝闻祝融峯上有神禹铭古石琅玕姿秘文螭虎形盖亦得於传闻也】鸾飘凤泊

拏虎螭事严迹秘鬼莫窥道人独上偶见之我来咨嗟涕涟漉千搜万索何处有森森绿树猿
猱悲【猱或作啼猱奴力切】

永贞行【贞元廿一年正月德宗崩顺宗即位病不能视朝王伾王叔文用事四月册皇太子
八月立为皇帝是为宪宗顺宗为太上皇改元永贞此诗所以具载太皇谓顺宗小人谓叔文
元臣故老谓杜佑高郢郑珣瑜等嗣皇谓宪宗郎官荒郡意指刘禹锡坐叔文党贬连州也公
方量移江陵而梦得出为连州邂逅荆蛮故作此诗观终篇之意可见其为梦得作也此诗或
云自四门肃穆贤俊登下为别篇非是】

君不见太皇亮陰未出令【太皇谓顺宗天子居丧曰谅陰谅信陰默谓信默不言亦作亮陰
书说命亮陰三祀论语宪问谅陰三年不言】小人乘时偷国柄【小人谓叔文】北军百万
虎与貔【书牧誓如虎如貔 貔音毗】天子自将非他师【或作时】一朝夺印付私党【是
岁五月王叔文等以金吾大将军范希朝为左右神策京西诸城镇行营节度使以度支郎中
韩泰为其行军司马叔文欲夺取宦官兵权以自固藉希朝老将使主其名而实以泰专其事
人情不侧其所为益疑惧私党即泰也】懔懔朝士何能为狐鸣梟噪争署置【楚词梟羣
而制之皆以喻小人谗佞也

梟坚尧切】?睽跳踉相妩媚【?睽或作睽闪?睽兽狂视貌字见吴都赋 跳音迢踉音梁妩音
武媚音眉】夜作诏书朝拜官超资越序曾无难公然白日受贿赂火齐磊落堆金盘【选班
固西都赋翡翠火齐流耀含英注珠也 齐音剂磊鲁猥切】元臣故老不敢语【元臣故老谓
杜佑高郢郑珣瑜等】昼卧涕泣何丸澜【王叔文用事一日诸相会食叔文至中书欲与韦
执谊计事执谊起迎诸相停筯以待有顷报叔文索饭已与韦相同餐阁中矣杜佑高郢惧不
敢言郑珣瑜独叹曰吾岂可复居此位索马径归卧不起】董贤三公谁复惜【前汉董贤传
哀帝元壽元年帝重贤封贤为高安侯欲极其位遂以贤为大司马卫将军是时贤年二十二
为三公 三或作一非是】侯景九锡行可叹【南史侯景传景矫萧栋诏自加九锡九锡一曰
车马二曰衣服三曰乐则四曰朱户五曰纳陛六曰虎贲七曰斧钺八曰弓矢九曰钁鬯也 叹
音滩】国家功高德且厚天位未许庸夫干嗣皇卓犖信英主【谓宪宗】文如太宗武高祖
膺图受禅登明堂共流幽州鯨死羽【鯨与鯨同禹父名楚词鯨婞直以忘身书流共工於幽
州殛鯨于羽山以喻伾叔文也】四门肃穆贤俊登【书宾于四门四门穆穆贤俊谓用杜黄
裳郑余庆为宰相】数君匪亲岂其朋【谓柳宗元刘禹锡之属】郎官清要为世称荒郡迫
野嗟可矜【九月贬韩泰抚州司封郎中韩晔池州礼部员外郎柳宗元邵州屯田员外郎刘
禹锡连州刺史皆自郎官迁谪禹锡至荆南改武陵司马此诗未改武陵前作也】湖波连天
日相腾蛮俗生梗瘴疠烝江氛岭祲昏若凝一蛇两头见未曾怪鸟鸣唤令人憎【鸣唤或作
争鸣】蛊虫羣飞夜扑灯雄虺毒螫堕股肱【楚词雄虺九首史记草无毒螫螫虫行毒也 螫
音释字亦作 𧈧】食中置药肝心崩左右使令诈难凭慎勿浪信常兢兢吾尝同僚情可胜【
公尝与梦得同为御史尝或作常非是 蔡寛夫诗话云子厚禹锡於退之最厚善然退之贬阳
山不能无疑赴江陵途中寄三学士云同官尽才俊扁善柳与刘或虑语言泄传之落?雖云云
及其为永贞行愤疾至云数君匪亲岂其朋又曰吾尝同僚情可胜则亦见其坦夷尚义待朋
友始终也】具书目见非妄徵嗟尔既往宜为惩

洞庭湖阻风赠张十一署【自阳山徙掾江陵永贞元年十月过洞庭作也】

十月陰气盛北风无时休苍茫洞庭岸与子维双舟雾雨晦争泄波涛怒相投犬鸡断四听【断方从杭蜀本作絕 今按此句既有絕字则下一句不应便复出方为杭蜀所误此比多矣】
粮絕谁与谋相去不容步险如碍山邱清谈可以饱梦想接无由男女喧左右饥啼但啾啾非
怀北归兴何用胜羈愁云外有白日寒光自悠悠能令暂开霁过是吾无求

李花赠张十一署【或作李有花 元和元年二月江陵作】

江陵城西二月尾花不见桃惟见李风揉雨练雪羞比【揉或作柔非是揉而由切】波涛翻
空杳无涘【翻空或作相翻非是】君知此处花何似白花倒烛天夜明羣鸡惊鸣官吏起金
乌海底初飞来【隋孟康咏日诗金乌升晓气】朱辉散射青霞开【选恨赋郁青霞之奇意】
迷魂乱眼看不得【迷?乱眼或作迷乱入眼入又作人皆非是】照耀万树繁如堆念昔少
年着游燕对花岂省曾辞盃【省曾辞或作曾辞酒非是】自从流落忧感集欲去未到先思
回祗今四十已如此【公时年三十九】後日更老谁论哉力携一罇独就醉【独或作共非
是】不忍虚掷委黄埃【委或作随】

杏花【与前篇同时作】

居邻北郭古寺空杏花两株能白红曲江满园不可到【唐剧谭录曲江池本秦隍州开元中
疏凿遂为妙境杜甫哀江头诗春日潜行曲江曲细柳新蒲为谁綠者是也】看此宁避雨与
风二年流窜出岭外【公贞元十九年冬出为阳山凡二年至是始为掾江陵】所见草木多
异同冬寒不严地恒泄阳气发乱无全功【无全阁本作全无非是】浮花浪蘂镇长有才开
还落瘴雾中山榴踯躅少意思【本草注踯躅树生高三四尺花似山石榴或云一名山石榴
踯躅直炙切躅厨玉切】照耀黄紫徒为丛鸛鹄鉤輶猿叫歇【岭表记鸛鹄自呼云钩輶李羣
玉诗又听钩輶格磔声 輶张流切】杳杳深谷攢青枫【杳杳或作杳蔼】岂如此树一来翫
若在京国情何穷今旦胡为忽惆怅【惆或作怊後放此】万片飘泊随西东明年更发应更
好【更发一作花发】道人莫忘邻家翁

感春四首【元和元年春掾江陵时作】

我所思兮在何所情多地遐兮徧处处东西南北皆欲往千江隔兮万山阻【张衡四愁诗我
所思兮在太山欲往从之梁甫艰我所思兮在桂林欲往从之湘水深云云公句意盖取此】
春风吹园杂花开朝日照屋百鸟语三盃取醉不复论一生长恨奈何许【诸本奈作春今从
杭蜀本云古乐府奈何许石阙生口中衔碑不得语】

皇天平分成四时【宋玉九辯曰皇天平分四时兮】春气漫诞最可悲【气或作风】杂花
糝林草盖地白日座上倾天维【西京赋振天维衍地络】蜂喧鸟咽留不得红萼万片从风
吹岂如秋霜虽惨冽【惨或作凜以西京赋冰霜惨冽定作惨】摧落老物谁惜之【晋宣帝

尝疾张皇后往省帝曰老物可憎又曰老物不足惜】为此径须沽酒饮自外天地弃不疑近怜李杜无检束烂漫长醉多文辞屈原离骚二十五【前汉艺文志屈原赋二十五篇盖离骚经一九歌十一天问一九章九远游卜居渔父各一凡二十五篇也】不肯餽啜糟与醢【渔父篇何不餽糟而歠醢餽奔谩切醢吕支切】惜哉此子巧言语不到圣处宁非痴【先儒云公以原词介於庄周司马迁之间其感春诗云云盖与屈原之怨於讽谏而伤其违圣之达节也】幸逢尧舜明四目条理品彙皆得宜平明出门暮归舍酩酊马上知为谁【酩酊注见二卷归彭城诗阁杭蜀本为谁作谁为方从诸本云按公後诗有遇酒即酩酊公知我为谁即此义也今按方氏此论最公使他处皆如此则无可议矣】

朝骑一马出暝就一牀卧诗书渐欲抛节行久已慵冠欹感髮秃语误悲齿堕孤负平生心【孤或作辜】已矣知何奈【诸本皆同无可疑者荆公本奈作那李本知作如亦无大异独方从阁本作已知无可奈乃不成文理故今定从诸本】我恨不如江头人【我恨方从杭本作奈我阁本无奈字亦无恨字蜀作我奈今案杭蜀本盖因前篇之末有奈字而误也阁本亦少一字皆非是今从监本】长网横

江遮紫鳞独宿荒陂射鳬鴈卖纳租赋官不嗔归来欢笑对妻子衣食自给宁羞贫今者无端读书史智慧只足劳精神【阁本如此为当方乃不从而以足为是又不可晓也】画蛇着足无处用【史记楚惠王使柱国昭阳将兵攻齐陈轸谓昭阳曰昔人有遗其舍人一卮酒者舍人相谓曰数人饮此不足以徧请有画地为蛇蛇先成者饮之一人曰吾蛇先成举酒而起曰吾能为之足者及为足而後成人夺其酒而饮之或曰蛇固无足今为之足非蛇也着陟略切】两鬓雪白趋埃尘乾愁漫解坐自累与衆异趣谁相亲数盃浇肠虽暂醉皎皎万虑醒还新百年未滿不得死且可勤买抛青春【买或作置东坡云国史补酒有富平之石冻春劔南之烧春杜子美诗有麴米春裴鉞作传奇亦有松醪春唐人名酒多以春抛青春亦必酒名按此诗在江陵作盖江陵酒名也】

寒食日出游【张十一院长见示病中忆花九篇寒食日出游夜归因以投赠张十一即功曹署公与张同自御史贬官又同为江陵掾公法曹参军张功曹参军元和元年时也】

李花初发君始病我往看君花转盛走马城西惆怅归不忍千株雪相映迺来又见桃与梨交开红白如争竞可怜物色阻携手空展霜缣吟九咏纷纷落尽泥与尘不共新糝比端正桐华最晚今已繁【礼记月令季春之月桐始华】君不强起时难更关山远别固其理寸步难见始知命忆昔与君同贬官夜渡洞庭看斗柄岂料生还得一处引袖拭泪悲且庆各言生死两追随【生死或作死生】直置心亲无貌敬念君又署南荒吏【张在江陵未几邕管经略使路恕署为判官】路指鬼门幽且复【容州北流县南三十里有两石相对门阔三十步俗号鬼门关谚曰鬼门关十人九不还】三公尽是知音人曷不荐贤陛下圣【蔡邕独断云谓陛下者羣臣不敢指斥天子故呼在陛下者因卑达尊之义也】囊空甌倒谁救之【杜诗囊空恐羞澁留得一钱看又郭林宗传孟敏客太原荷甌堕地不顾而去】我今一食日还并【礼记儒行儒有并日而食】自然忧气损天和安得康强保天性断鹤两翅鸣何哀繄驥四足气空横【繄陟立切横户孟切】今朝寒食行野外绿杨币岸蒲生迸【生或作芽】宋玉庭边

不见人【杜诗曾闻?玉宅每欲到荆州荆州即江陵也】轻浪参差鱼动镜自嗟孤贱足瑕疵特见放纵荷寛政饮酒宁嫌底深【桑父在江总席上曰虽深盞百罚吾亦不辞也】题诗尚倚笔锋劲【鲍明远拟古诗两说穷舌端五车推笔锋】明宵故欲相就醉【故或作固】有月莫愁当火令【洪庆善云此时春末夏初故云火令方云非也此谓寒食禁火耳火令字见周礼魏武帝亦有寒食禁火令但东坡尝为李公择书此诗作灯火冷又不知其所据何本也今按方说是也此言夜行有月故不忧当寒食禁火之令耳坡读亦误】

忆昨行和张十一【或作和张十一忆昨行与前诗同时在江陵作】

忆昨夹鍾之吕初吹灰【月令仲春之月律中夹鍾二月之吕也续汉书以葶灰实律之端按历而候之其月气至则灰飞而律通】上公礼罢元侯回【上洪作杜云杜佑自淮南入朝也方作杜云此为荆帅裴均罢社而享客也今按方说是也但以上为社则未然左传云五行之官封为上公祀为贵神其土正曰后土在家则祀中溜在野则为社故杜注用币于社云以请于上公则上公即社神也况此句内又自以元侯为对耶】车载牲牢瓮舁酒并召宾客延邹枚【邹阳枚乘汉梁孝王客】腰金首翠光照耀丝竹迴发清以哀青天白日花草丽玉笋屡举倾金罍【诗我姑酌彼金罍】张君名声座所属【朱六切】起舞先醉长松摧宿醒未解旧店作【刘伶五斗解醒左传店作而伏旧店方作店旧

今按此句内上有宿醒字则此当为旧店明矣方误店失廉切】深室静卧闻风雷自期殒命在春序屈指数日怜婴孩危辞苦语感我耳泪落不揜何濯濯【集韵云濯雪霜积聚貌选指季豹而濯焉注濯涕泣垂貌

濯七回切】念昔从君渡湘水【湘或作湖】大帆夜划穷高桅【玉篇云帆船上檣竿划忽麦切桅五回切】阳山鸟路出临武【公责连之阳山今张为彬之临武郴在江南连则广南也】驿马拒地驱频隤【三馆本作槌方云博雅槌□也亦有义今按方义暗僻不可晓此但言当谪官时驰驿发遣而山路险恶故羸马拒地不进被驱而屡至倾隤耳隤或取诗我马虺隤字然其义但为不能升高之病又似未必然也隤杜回切】践蛇茹蛊不择死忽有飞诏从天来伾文未揃崖州炽【伾王伾文王叔文崖州韦执谊也揃或作剪谢校从剪说文揃灭也史记西南夷赞有揃剽字伾音丕揃子践切】虽得赦宥恒愁猜近者三奸悉破碎【三奸谓贬王伾王叔文韦执谊也】羽窟无底幽黄能【能有两音奴来切者三足鼈也奴登切者熊属足似鹿者也左传殛鲛于羽山其神化为黄熊以入于羽渊国语作黄能当音贤能之能然说者谓能既熊属又为鼈类东海人祭禹庙不用熊白及鼈为饌疑鲛化为二物则两音亦可通用也】眼中了了见乡国知有归日眉方开今君纵署天涯吏【纵或作从今按张署墓志邕管奏署为判官也】投檄北去何难哉无妄之忧勿药喜一善自足禳千灾头轻目朗肌骨健古劒新斲磨尘埃殃消祸散百福并从此直至耆与鲐【诗閼宫俾尔耆而艾耆老也鲐鱼名诗行苇黄耆台背郑氏笺云台之言鲐也大老则背有鲐文鲐音台者或作耆】嵩山东头伊洛岸胜事不假须穿栽【或作栽】君当先行我待满【张先迁京兆府司录】沮溺可继穷年推【沮溺人名语长沮桀溺耦而耕公家河南而嵩山伊水洛水并隶焉诗意欲与张耦耕於嵩山下也推字取礼记月令三推九推之意沮子鱼切推他回切或作催】

卷四

钦定四库全书

东雅堂昌黎集注卷四

古诗

刘生诗【或无诗字 贞元二十一年刘师命访公于阳山断章似有送行之意集中有因梨花为生作二诗岂前此之作耶】

生名师命其姓刘自少轩轻非常俦【诗戎车既安如轻如轩又马援传居前不能令人轻居後不能令人轩轻或作轶 轻竹二切】弃家如遗来远游东走梁宋暨扬州【暨或作堕】遂凌大江极东陬【东陬东隅即谓越也 陬将侯切】洪涛春天禹穴幽【禹穴在会稽】越女一笑三年留南逾横岭入炎州【或作洲】青鲸高磨波山浮【鲸或作鲜 今按青义未详疑是长字之误】怪魅炫曜堆蛟虬【魅或作媚堆或作推非是】山?譟噪猩猩游【?或作獠非是?苏遭切神异经西方深山有人长尺余袒身捕虾蟹以食名曰山?国语注作?公联句亦有中矢类妖?游或作愁此诗二州字二游字视古用韵後人误改也】毒气烁体黄膏流问胡不归良有由美酒倾水?肥牛【?音蔗与炙同又侧吏切】妖歌慢舞烂不收倒心回肠为青眸【司马迁答任少卿书肠九回阮籍见佳客为青眼】千金邀顾不可酬乃独遇之尽绸缪【绸音筹缪莫彪切】瞥然一饷成千秋【楚词目瞥瞥兮西没饷或作爨非是 瞥匹箴切】昔须未生今白头五管历徧无贤侯【唐永徽後以广桂容邕安南皆隶广府谓之五府节度使名岭南五管见旧书地理志】回望万里还家羞阳山穷邑惟猿猴手持钓竿远相投我为罗列陈前修【前修字见离骚谓前世修能之士】芟蒿斩蓬利锄耰天星回环数才周文学穰穰困仓稠【史记五谷蕃熟穰穰满家】车轻御良马力优咄哉识路行勿休往取将相酬恩讎郑羣赠簪【羣尝以侍御史佐裴均江陵公自阳山量移江陵法曹与羣同僚唐孔戣私记云退之丰肥善睡每来吾家必命枕簪而沈存中笔谈亦云世画韩退之小面而美髯着纱帽此乃江南韩熙载尔熙载謚文靖江南人谓之韩文公因此遂误以为退之退之肥而少髯此诗有腰腹空大及慢肤多汗之语二说信然】

蕲州笛竹天下知【蕲州在今淮南其地出竹笛或作簞】郑君所宝尤瓌奇携来当昼不得卧一府传看黄瑠璃【东坡寄簞与蒲传正诗云愧此八尺黄瑠璃祖此诗也】体坚色净又藏节尽眼凝滑无瑕疵【尽或作满】法曹贫贱衆所易腰腹空大何能为自从五月困暑湿如坐深甑遭烝炊手磨袖拂心语口慢肤多汗真相宜【楚辞天问平胁慢肤何以肥之】日暮归来独惆怅有卖直欲倾冢资谁谓故人知我意卷送八尺含风漪呼奴扫地铺未了光彩照耀惊童儿青蝇侧翅 蝨避【诗营营青蝇止于樊抱朴子曰 蝨攻君卧不获安 音早】肃肃疑有清飈吹倒身甘寝百疾愈却愿天日恒炎曦明珠青玉不足报【选张衡四愁诗】

美人贈我貂襜褕何以報之明月珠美人贈我錦綉段何以報之青玉案】贈子相好無時衰
【閣本無時作時無非是】

丰陵行【順宗陵也按長安志順宗丰陵在富平縣東北三十五里瓮金山順宗以元和元年七月葬公是年六月方自江陵召入為博士必當是時作終篇言三代旧制存諸書當時之禮必有不合於古者故云】

羽衛煌煌一百里【一或作三以長安志考之非是】曉出都門葬天子【順宗也】羣臣杂沓馳後先宮官穰穰來不已是時新秋七月初金神按節炎氣除清風飄飄輕雨洒【風伯清塵雨師洒道見文選】偃蹇旗旆卷以舒逾梁下坂笳鼓咽【方作沸今按作咽乃响又見悲切之意也】嶓嶭遂走玄宮間【嶓嶭山小而不安貌選注天子后妃所葬墓曰玄宮玄宮間謂玄宮前之寓間也間或作虛非是嶓音經嶭音臬】哭聲旬天百鳥噪【旬音轰】幽坎昼閉空靈輿皇帝孝心深且遠資送禮備無贏余設官置衛鎖嫔妓【唐制諸陵皆置宮殿列官曹設嫔妓侍衛如平生杜甫橋陵詩宮女晚知曙祠臣朝見星】供養朝夕象平居【養或作送】臣聞神道尚清淨三代旧制存諸書墓藏廟祭不可亂欲言非職知何如

游青龍寺贈崔大補闕【諸本大作羣崔羣字敦詩公同年進士也公元和元年在京師為國子博士時作詳詩意可見寺在京城南門之東洪慶善云詩中正值萬株紅葉滿謂柿也靈液屢進頗黎盃謂食柿也】

秋灰初吹季月管【吹灰者謂作十二律管於室中四時位上埋之取芦葶燒之作灰實之管中以羅縠覆之氣至則吹灰動縠律即候氣之管以銅為之詳見漢律歷志】日出卯南暉景短【月令季秋之月昏虛中旦柳中】友生招我佛寺行正值萬株紅葉滿光華閃壁見神鬼【壁或作璧】赫赫炎官張火傘然云燒樹大實駢金烏下啄蜺虬卵【蜺音怪】魂翻眼倒忘處所【倒或作暈】赤氣冲融無閑斷有如流傳上古時九輪照燭乾坤早【淮南子曰堯時十目并出草木焦枯堯命羿仰射十日中其九九輪謂九日車輪也】二三道士席其間靈液屢進頗黎盃【頗黎出西域亦作玻瓈】忽驚顏色變韶稚【忽或作勿非是韶或作韶韶有美義不必易字】却信靈仙非怪誕桃源迷路竟茫茫棗下悲歌徒纂纂【潘岳笙賦曰歌棗下之纂纂】前年嶺隅鄉思發【謂貞元二十年春在陽山】蹢躅成山開不筭【蹢躅花名見杏花詩注蹢直炙切躅厨玉切】去歲羈帆湘水明【謂永貞元年自陽山移掾江陵】霜楓千里隨歸伴猿呼鼯嘯鸕鷀啼【嘯或作笑非是】惻耳酸腸難濯澣【惻或作側非是】思君携手安能得今者相從敢辭懶由來鈍駮寡參尋【駮或作駭非是駮語駭切】況是儒官飽閑散惟君與我同懷抱鋤去陵谷置平坦年少得途未要忙時清諫疏尤宜罕何人有酒身無事誰家多竹門可欵須知節候即風寒幸及亭午猶妍暖南山逼冬轉清瘦刻画圭角出崖巖【巖空也莊子導大巖巖音欵】當憂復被冰雪埋汲汲來窺誠遲緩

贈崔立之評事【立之名斯立博陵人元和初為大理評事以言事黜官為藍田丞見公藍田丞廳記元和元年六月公召拜國子博士作此詩詳味詩意當是崔頻有詩望公推引故公有頻蒙怨句刺奔遺豈有閑官敢推引之語云】

崔侯文章苦捷敏【老杜不见敏捷诗千首】高浪驾天输不尽曾从关外来上都【外或作内非是】随身卷轴车连轸朝为百赋犹郁怒暮作千诗转遒紧摇毫掷简自不供顷刻青红浮海蜃【史记天官书海旁蜃气象楼台蜃音肾】才豪气猛易语言往往蛟螭杂蝼蚓【蛟螭杂蝼蚓言其小大不齐也苕溪渔隐丛话云立之诗有不工处故退之以此讥之螭抽知切蝼音娄蚓音引】知音自古称难遇世俗乍见那妨哂勿嫌法官未登朝【法官谓大理评事】犹胜赤尉长趋尹【斯立初为尹阳尉唐州县有畿赤紧望之等】时命虽乖心转壮技能虚富家逾窘念昔尘埃两相逢争名龃齬持矛楯子时专场夸觜距【选张衡东都赋秦政利觜长距终得擅场注擅专也专或作擅觜即委切距旧杵切】余始张军严鞬靽【左传僖二十八年晋楚战于城濮晋车七百乘鞬靽鞅靽杜预注在背曰鞬在胷曰靽在腹曰鞅在後曰靽言驾乘修备鞬晓见切靽以忍切】尔来但欲保封疆莫学龐涓怯孙臆【史记孙臆】

【尝与龐涓俱学兵法事魏为惠王将以能不及臆陰召臆至则以法断其两足而黥之】窜逐新归厌闻閤【公时方自江陵法曹召为国子博士】齿髮早衰嗟可闵频蒙怨句刺弃遗岂有闲官敢推引深藏篋笥时一发戢戢已多如束笋可怜无益费精神有似黄金掷虚牝【牝谿谷也古诗云哀壑叩虚牝】当今圣人求侍从【圣人谓宪宗也】拔擢杞梓收楛箛【襄二十六年左氏晋大夫如杞梓皮革焉书惟箛箛楛箛美竹可以为矢楛木名可以为矢箛楛音户箛音窘】东马严徐已奋飞【东方朔司马相如严助严安徐乐等】枚臯即召穷且忍【枚臯枚乘子字少儒】复闻王师西讨蜀【元和元年正月命长武城使高崇文等伐蜀讨刘辟】霜风冽冽摧朝菌【庄子朝菌不知晦朔菌地蕈也菌音窘】走章驰檄在得贤【说文曰檄二尺书也有急事则插以鸟羽号为羽檄西京杂记杨子云曰汉武帝戎马之间飞书驰檄用枚臯廊庙之上高文典册用相如檄刑狄切】燕雀纷拏要鹰隼【礼记鹰隼蚤拏女加切又女书切隼息尹切要一作恶】窃料二涂必处一岂比恒人长蠢蠢劝君韬养待徵招不用雕琢愁肝肾墙根菊花好沽酒钱帛纵空衣可準晖晖檐日暖且鲜摵摵井梧疎更殒【苕溪渔隐云摵音索殒落貌文选卢子谅诗摵摵芳叶零又潘岳秋思赋庭树摵以洒落】高士例须怜麴蘖丈夫终莫生畦畛能来取醉任喧呼死後贤愚俱泯泯

送区弘南归【区弘尝从公於江陵召拜国子博士又从之至京此诗有从我荆州来京畿之句弘将归公以诗送之张籍孟郊亦皆有诗元和元年也区或作欧归或作征区乌侯切唐韵区治子之後汉王莽传有中郎区博】

穆昔南征军不归虫沙猿鹤伏以飞【抱朴子云周穆王南征三军之衆一朝尽化君子为猿为鹤小人为虫为沙造化权輿作周昭王南征皆未详本何据也】汹汹洞庭莽翠微【或作江汹洞庭宿莽微楚词波逢汹涌瀆滂沛兮又夕擎中洲之宿莽王逸注云草经冬不死者楚人名曰宿莽汹许拱切又音凶莽莫补切】九疑鑱天荒是非【选登巉岩而下望湘中记零陵营道九山相似行者疑惑故名九疑荒是非岂以此耶鑱或作巉九疑言鑱天洪涛言春天皆奇语也巉仕檻切又鋤咸切】野有象犀水贝玕分散百宝人士稀【士或作事非是】我迁于南日周围【贞元十九年冬公谪阳山明年冬弘来故云日周围】来见者衆莫依稀爰有区子荧荧晖【区子或作子区】观以彛训或从违我念前人譬葑菲【诗采葑采菲无以下体】落以斧引以纆徽【引以或作斧引洪庆善纆作墨方从唐閻杭本亡张文潜云古人

作七言诗其句脉多上四字而下以三字成之退之乃变句脉以上三下四如落以斧引以纆徽虽欲悔舌不可扞是也 今按此言纆徽谓木工所用之绳墨也然周易作徽纆乃为黑索所以拘罪人者恐公所用别有据也 纆音墨徽音晖】 虽有不逮驱駉駉【诗四牡駉駉音霏】或采于薄渔于矶服役不辱言不讥从我荆州来京畿【元和元年六月公自江陵召为国子博士弘与公俱至京师】 离其母妻絶因依嗟我道不能自肥【道不或作不道非是】 子虽勤苦终何希王都观阙双巍巍腾蹋衆骏事鞍鞿佩服上色紫与绯独子之节可嗟唏【香衣切字与歛同或作歛】 母附书至妻寄衣开书拆衣淚痕曦【开书拆衣或作开緘发封泪痕作痕泪非是】 虽不勅还情庶几朝暮盘羞恻庭闱幽房无人感伊威【潘安仁哀永逝文抚灵榭兮诀幽房蚺蜺尔雅委黍也注旧说鼠妇诗伊威在室陆德明云或傍加虫者後人增耳郑氏笺云家无人恻然令人感伤】 人生此难余可祈子去矣时若发机【矣或作吴非是句法见上张文潜说】 蜃沈海底气昇霏【史记天官书凡海旁蜃气象楼台】 彩雉野伏朝扇翬【尔雅雉五彩皆备曰翬扇或作羽非是盖宫扇以雉尾为之翬文采貌】 此言雉伏於野而其羽可用为朝廷之仪与上下二句为一类也 翬音挥】 处子窃窈王所妃【庄子绰约若处子诗曰窈窕淑女】 苟有令德隐不腓【诗百卉具腓腓病也】 况今天子铺德威【铺或作辅非是】 蔽能者诛荐受襍【汉书进贤受上赏蔽贤蒙显戮此用其意史记因载其襍祥度制 襍音几】 出送抚背我涕挥行行正直慎脂韦【楚词如脂如韦以洁楹乎注脂韦柔弱貌也】 业成志树来颀颀【诗硕人其颀注言仪表长丽绞好颀颀然颀音祈】 我当为子言天扉

三星行【三星谓箕斗牛也公自悯其生多訾毁如此详诗意可见苏内翰云吾生遭口语无数盖生时与退之相似吾命在斗牛间而身官亦复在焉意亦耻此也】

我生之辰【方从阁本之下有三字云谓斗牛与箕也今按辰时也诗云我辰安在方说非是】 月宿南斗牛奋其角箕张其口【牛箕二十八宿中之二宿也】 牛不见服箱【诗皖彼牵牛不以服箱言有牛之名而无其实不可以服箱服载也】 斗不挹酒浆【诗维北有斗不可以挹酒浆言亦有斗名而无其实不可以挹酒也】 箕独有神灵无时停簸扬【书星有好风星有好雨孔安国云箕星好风毕星好雨又诗维南有箕不可以簸扬无时停簸扬者言牛斗皆不可用惟箕独能簸扬所谓有神灵也 簸音播】 无善名已闻无恶声已讙【诸本已竝作以今从唐阁本云讙如诸将尽讙之讙此诗叶余於除叶讙於闻今本易讙为攘以求叶扬韵非是】 名声相乘除【历家有增减率迟速积故有乘除之法 乘音绳】 得少失有余三星各在天【诗三星在天】 什伍东西陈【什伍犹纵横也南斗六星牵牛六星箕四星】 嗟汝牛与斗汝独不能神

剥啄行【元和元年自江陵召入为国子博士作也公被谗出为阳山至是召还又有谤之者故三星行云名声相乘除得少失有余剥啄行云我不厌客困于语言欲不出纳以堙其源各有所激云尔欧阳文忠拟剥啄行寄赵少师云剥剥复啄啄柴门惊鸟雀故人千里驾信士百金诺云云公远谗避谤欲谢客以堙其源故深其堑坚其墉要为不可干者而欧阳则归老故乡欣然喜客之至是以其辞不同如此】

剥剥啄啄有客至门我不出应客去而嗔从者语我子胡为然我不厌客困于语言【诸本此下有我嗟子诚一语阁本同今从唐杭蜀本删云阁本衍盖下语误入】欲不出纳以堙其源空堂幽幽有结有莞【书三百里纳结服诗下莞上簟结音戛莞者丸又九还切】门以两版丛书於间窅窅深堑【窅音窵】其墉甚完【墉或作容非是】彼宁可隳此不可干从者语我嗟子诚难子虽云尔其口益蕃【益或作实口益或作益实】我为子谋有万其全凡今之人急名与官子不引去与为波澜【与方作以云韩文与多作以他文见者非一诗之子归不我以注以犹与也今按陆宣公奏议亦然如云未审云云以否之类是也然当作与为正】虽不开口虽不开关变化咀嚼有鬼有神今去不勇其如後艰我谢再拜汝无复云往追不及来不有年【诸本作来可待焉今以阁杭蜀本云公祭十二兄文其不有年以补我愆同此义也】

青青水中蒲三首【诸本作一首今从阁本按乐府亦作三首诗盖兴寄也当是妇人思夫之意文选古乐府饮马长城窟行有青青河畔草长歌行有青青园中葵其大意与此相类】

青青水中蒲下有一双鱼君今上陇去我在与谁居青青水中蒲长在水中居寄语浮萍草相随我不如青青水中蒲叶短不出水妇人不下堂行子在万里孟东野失子【并序东野为郑余庆留府宾佐在元和二三年此诗当是时作也据郊集有哀幼子及杏阳诗其词甚悲石君美有子年少而失鲁直尝书此诗遗之云时以观览可用乱思而纾哀?观物理其实如此大盖因果耳退之救世弊故并因黑不言然此一段文意乃是涅槃经中佛语退之尝言不能无所不读未有能为大儒者其弗信矣乎鲁直所云如此】

东野连产三子不数日辄失之几老念无後以悲其友人昌黎韩愈惧其伤也推天假其命以喻之

失子将何尤吾将上尤天女实主下人与夺一何偏【何或作以庄子夺彼与此一何偏也】彼於女何有乃令蕃且延【蕃或作繁】此独何罪辜生死旬日间上呼无时闻滴地泪到泉地只为之悲瑟缩久不安乃呼大灵龟骑云欵天门问天主下人薄厚胡不均天曰天地人由来不相关吾悬日与月吾系星与辰日月相噬啗星辰踣而颠吾不女之罪知非女由因【因或作缘此诗如因与鰥今本皆以韵不叶而误刊也今按作缘亦通未必误改也】且物各有分孰能使之然有子与无子祸福未可原鱼子满母腹【或作肚】一一欲谁怜细腰不自乳【博物志细腰无雌雄之类取桑虫或阜螽子抱而成已子诗所谓螟蛉有子果羸负之者也】举族长孤鰥【或作悬】鸱枭啄母脑母死子始翻【或作蕃尔雅释鸟云鸱鸢说文云不孝鸟也张奐曰鸱鸢食母

鸱处脂切枭坚尧切】蝮蛇生子时【玉篇蝮螫手则断楚词蝮蛇蓁蓁蝮音覆一作虺】坼裂肠与肝好子虽云好未还恩与勤恶子不可说鸱枭蝮蛇然有子且勿喜无子固勿叹【音滩】上圣不待教贤闻语而迁下愚闻语惑虽教无由俊大灵顿头受即日以命还地祇谓大灵女往告其人东野夜得梦有夫玄衣巾【崔豹古今注曰龟一名玄衣督邮邵氏闻见录云史记江使神龟使於河渔者得之龟梦於宋元王梦见一大夫延颈而长头衣玄绣之衣而乘輜车见史记龟策传】闯然入其户【闯出头儿】三称天之言再拜谢玄夫收悲以欢忻

陆浑山火和皇甫湜用其韵【诸本作次韵和皇甫湜陆浑山火今从阁杭蜀本皇甫湜字持正睦州新安人元和元年擢进士第为陆浑尉县本周之畿内地秦晋迁陆浑之戎於伊川汉立为陆浑县唐隶河南府公诗云时当大冬泽乾源其分司东都冬所作次前诗当在元和三年矣此诗一本作次韵非是刘贡父云唐人赧和诗有次韵依其次用韵有依韵同在一韵中有用韵用彼之韵不必次之公和陆浑山火是也然持正诗不传於世矣】

皇甫补官古贲浑【贲或作陆今从杭蜀本云贲音陆字本公羊传】时当玄冬泽乾源【玄或作大】山狂谷很相吐吞风怒不休何轩轩摆磨出火以自燔【摆音捩】有声夜中惊莫原天跳地踔颠乾坤【後汉踔宇宙而遗俗注犹越也】赫赫上照穷崖垠【音银】截然高周烧四垣神焦鬼烂无逃门三光弛隳不复暾【楚词暾将出兮东方复或作暇暾他昆切】虎熊麋猪逮猴猿水龙鼉龟鱼与鼃鴉鵙鵙鵙雉鵙鵙【鵙雉或作鴈鵙】燔炰煨 孰飞奔【笔墨闲录无逸云上句正栢梁体後山作七字诗上东坡袭此体燔汤中燔肉也仪礼惟燔者有肤庖含毛炙物诗毛炰膋羹 广韵云埋物灰中令熟也方作燔非是孰一作熟 燔徐廉切炰音庖煨乌回切 於刀切】祝融告休酌卑尊【左昭二十九年颛顼氏有子曰黎为祝融为高辛火正火行於冬犹祝融告休而归也】错陈齐玫辟华园【玫音梅一或作牧非谓火齐玫瑰也辟或作阨】芙蓉披猖塞鲜繁千钟万鼓咽耳喧攢杂嗽嚙沸簾幄【广韵嗽唧小声嚙喷大唤自山狂谷很以下言火之盛如此沸或作沸非是 嗽即由切嚙胡伯切簾音池幄音喧】彤幢绛旒紫纛旛【周礼通帛为旒纛左纛以犛牛尾为之系左駟马轡上旒旗曲柄旛或作番 幢宅江切纛音导】炎官热属朱冠禪【前汉相如自着犛鼻禪 禪音昆】髹其肉皮通?臀【选列髹彤之绣捩关东俗器物一再漆者谓之髹漆祝季宾谓?当作?按?从肉从骨一也刘备髹中肉消亦通用 髹音休?音陞臀音屯】頽胷垤腹车掀轘【或作轘掀】缙顔赭股豹两鞬【周礼赤缙用羊赭赤韦也诗赭鞬有爽两鞬说文所以戢弓矢後汉董卓臂力过人双带两鞬左右驰射左氏右属橐鞬豹两鞬者以豹皮为之 缙音提赭莫拜切又莫佩切鞬居言切】霞车虹靷日毂幡【靷引车索也史记凭轼结靷前汉令长吏二千石朱两幡虹或作红非是 靷以忍切又羊晋切幡音番】丹蕤縹盖緋繡?【尔雅一染谓之縹繡广韵风吹旗貌?说文幡也

縹七绢切繡音翻?音鸳】红帷赤幕罗茀茀【周礼以茀茀之礼亲兄弟之国茀祭肉也 茀音 茀符爰切】 池波风肉陵屯【左氏士刲羊亦无 也 音荒陵或作凌洪庆善曰陵屯字见庄子当从陵樊泽之曰 若池波若风肉若陵屯方云 如池而波风肉如陵之屯聚也今按列子生於陵屯注谓高处庄子音义云阜也洪说得之樊说 池肉陵屯方说波风皆得之而樊说波如风方说肉如陵之屯聚则误矣合二说而言之曰如 池之波风肉之陵屯乃为善耳】谿呀钜壑颇黎盆【谿或作豁大貌字见上林赋少陵诗亦有余光散谿呀颇黎西国赤玉名云 今按汉书注谿呀涧谷形容也呀虚加切】豆登五山?四罇【尔雅木豆谓之豆瓦豆谓之登豆登五山者以五岳为豆登瀛四罇者以四海为酒罇也自彤幢绛旗以下皆言祝融御火其车御饮食之盛如此】熙熙醕醕笑语言【饮尽谓之醕礼记长者举未醕少者不敢饮醕与酬同注人进客曰醕 醕子肖切】雷公擘山海水翻齿牙嚼啮舌腭反【腭或作齶齶口中 也出字统反前汉有所平反 腭音骂反音番】电光?磳楨目?【大目也晋王嘉拾遗记月支献猛兽令作两目如天?磳之炎光也?先念切磳徒念切?音喧】瑱冥收威避玄根【月令冬其帝颛顼其神玄冥水神也】斥弃輿马背厥孙【水生木木生火火之

於火犹祖视孙也】缩身潜喘拳肩跟【音根】君臣相怜加爱恩命黑螭侦焚其元【螭音
擒侦音怪又丑郑切】天关悠悠不可援【音袁】梦通上帝血面论【诗意谓火既用事则
琐冥黑精之君玄冥水官之神当缩身潜喘而君臣乃命黑螭问其事於祝融而火焚其首黑
螭所以血面而论於帝也】侧身欲进叱於阍帝赐九河湔涕痕【涕或作泪湔音箭】又诏
巫阳反其【宋玉招云帝告巫阳曰有人在下我欲辅之魂魄离散汝筮与之注巫阳天帝
女也】徐命之前问何冤火行於冬古所存我如禁之絕其殄【一作餐】女丁妇壬传世婚
【杭本女作夫董彦远曰当作女丁夫壬引东山小连曰玄冥之子曰壬夫安祝融氏之女曰
丁芊俱学水仙是为温泉之神洪庆善曰丁火也壬水也火女也水男也丁女而为妇於壬故
曰女丁妇壬一作夫丁妇壬亦通夫丁者壬也言壬为丁夫也妇壬者丁也言丁为壬妇也今
按丁为阳中之陰壬为陰中之阳故言女之丁者为妇於壬以见水火之相配今术家亦言丁
与壬合洪氏二说皆是】一朝结讎奈後昆时行当反慎藏蹲视桃着花可小骞【一作骞汉
书来春桃花水盛谓二月雨水盛也 着直略切骞音愆】月及申酉利复怨【水生於申火死
於酉故水至申而利火至酉而怨】助汝五龙从九鯤溺厥邑囚之崑仑【之或作出】皇甫
作诗止睡昏辞夸出真遂上焚要余和增怪又烦虽欲悔舌不可扞【悔一作晦
扞音门诗莫扞朕舌

详此诗始则言火势之盛次则言祝融之御火其下则水火相克相济之说也】

县斋读书【贞元二十年在阳山县斋作】

出宰山水县读书松桂林【桂或作竹旧本多作竹桂】萧条捐末事邂逅得初心哀狔醒俗
耳【狔兽名如猿音柚】清泉洁尘襟诗成有共赋【共方作与非是】酒熟无孤斟青竹时
默钓白云日幽寻南方本多毒北客恒惧侵謫遣甘自守滞留愧难任投章类缟带【襄二十
九左氏吴季札聘於郑见子产与之缟带 缟音杲】伫答逾兼金【答或作益非是其价倍
於常者故谓之兼金孟子前日於齐王馈兼金百镒而不受是也此诗当是赠与交朋望其报
章也选杂体诗承荣重兼金】

新竹【此诗同下晚菊意皆在阳山作】

笋添南堦竹日日成清閤缥节已储霜【储或作除】黄苞犹揜翠出栏抽五六当户罗三四
高标陵秋严贞色夺春媚稀生巧补林并出疑争地【疑争或作全遮】纵横乍依行【胡郎
切】烂漫忽无次风枝未飘吹露粉先涵泪【露或作雾】何人可携玩清景空瞪视【选偃
仰瞪眊 瞪澄应切又宅耕切】

晚菊

少年饮酒时踊跃见菊花今来不复饮每见恒咨嗟伫立摘满手行行把归家此时无与语弃
置奈悲何【奈悲或作悲奈】

落齿【公尝与老成书云吾年末四十齿牙动摇贞元十八年与崔羣书云近者左车第二牙

无故动摇脱去今此诗又云去年落一牙今年落一齿其在贞元十九年作欤】

去年落一牙今年落一齿俄然落六七落势殊未已余存皆动摇【存或作在】尽落应始止忆初落一时但念豁可耻及至落二三始忧衰即死每一将落时懔懔恒在已义牙妨食物颠倒怯漱水终焉舍我落意与崩山比【与或作欲】今来落既熟见落空相似余存二十余次第知落矣恍常岁落一【或作一落】自足支两纪如其落併空与渐亦同指人言齿之落寿命理难恃我言生有涯长短俱死尔人言齿之豁左右惊谛视我言庄周云木鴈各有喜【庄子曰山中木以不材得终其天年今主人之鴈以不鸣死】语訛默固好嚼废輒还美因歌遂成诗持用詫妻子【庄子踵门而詫子詫丑亚切夸也】

哭杨兵部【凝】陆歙州【参 部或作曹 凝字懋功为兵部郎中参字公佐自祠部员外郎出知歙州凝守兵部郎中而云兵曹者隋尝改兵部为兵曹礼部为仪曹柳子厚作凝墓碣云贞元十九年正月卒李习之陆歙州述言云贞元十八年四月卒参先凝一年而卒公乃同时哭之盖参佐主司时公尝以书荐侯喜等及出刺歙亦有序送又尝有行难一篇为参设也凝则与公尝佐董晋汴州皆知已者去年参死今年凝又死此公所以因凝而併哭之】

人皆期七十【皆或作生】才半岂蹉跎【公生大历戊申至是贞元十九年癸未则年三十有六矣岂非七十之半年】併出知己泪【併或作数】自然白髮多晨兴为谁恸【语非夫人之为恸而谁为】还坐久滂沱论文与晤语【或作新坟与宿草】已矣可如何【可或作两或作复】

苦寒【公此诗意盖有所讽犹讼风伯之吹云而雨不得作也谓隆寒夺春序而肆其寒犹权臣之用事太昊之畏避则犹当国者畏权臣取充位而已其下反覆所言无易此意其末谓天子哀无辜则望人主进贤退不肖使恩泽下流施及草木其爱君忧民之意具见於此按韦渠牟传自陆贄免德宗不复委权于下宰相充位行文书而已所倚信者裴延龄李齐运王绍李实韦执谊与渠牟等其权侔人主此诗所以讽也时贾耽齐抗之徒当国公为四门博士贞元十九年春作】

四时各平分【楚词皇天平分四时兮】一气不可兼隆寒夺春序颛顼固不廉太昊弛维纲【或作施纲维非是】畏避但守谦遂令黄泉下萌芽夭勾尖草木不复抽百味失苦甜凶飈搅宇宙【搅或作扰】鋌刃甚割砭【悲廉切】日月虽云尊不能活乌蟾【五经通义日中有三足乌月中有兔与蟾】羲和送日出【山海经云东南海之外甘泉之间有羲和国有女子曰羲和为帝悦之妻是生十日常浴日於甘泉云】恇怯频窥觜【频或作烦恇音匡觜痴廉切】炎帝持祝融【月令孟夏之月其帝炎帝其神祝融昭二十九年左氏云颛顼氏有子曰黎为祝融】呵嘘不相炎而我当此时恩光何由沾肌肤生鳞甲衣被如刀【列子拥?带索音廉】气寒鼻莫鼾【前汉不鼾骄君之饵 鼾喜宥切】血冻指不拈浊醪沸入喉【选魏都赋浊醪如河】口角如衔箝【箝马口中铁前汉箝语烧书其廉切】将持匕箸食触指如排籤侵鑪不觉暖炽炭屡已添【已或作以】探汤无所益【语见不善如探汤 探他南切】何况纆与縶虎豹僵穴中蛟螭死幽潜荧惑丧躔次六龙冰脱髯【晋傅玄诗愿得并天馭六

龙说文髯颊须髯如占切】芒砀大包内【砀或作踢非是】生类恐尽歼啾啾窻间雀不知已微纤举头仰天鸣所愿晷刻淹不如弹射死却得亲炰煨鸾皇苟不存尔固不在占其余蠢动俦俱死谁恩嫌【恩或作思】伊我称最灵不能女覆苫【女覆诸本皆作安寝今从唐本及蔡谢校本云韩文古本汝皆作女杭本尚作女今讹自阁本也女指上文禽雀而言苫盖也言我最灵而不能汝覆苫也义为是】悲哀激愤叹五藏难安恬【难或作谁非是】中宵倚墙立淫泪何渐渐【楚词涕渐渐其若屑渐将廉切】天王哀无辜【王或作子或作公】惠我下顾瞻褰旒去耳纒【礼纬曰旒垂目纒塞耳褰旒去纒谓明日达聪也纒者以黄绵为之】调和进梅盐【书高宗命传说曰若作和羹尔为盐梅言进传说之徒於左右也】贤能日登御黜彼傲与憊【七廉切諛也】生风吹死气豁達如褰帘悬乳零落堕晨光入前檐雪霜顿销释土脉膏且黏岂徒兰蕙荣施及艾与蒹日萼行铄铄风条坐檐檐【相如曰举帷幄之檐檐荀子是檐檐者何也楚辞张绛帷以檐檐处占切】天乎苟其能吾死意亦厌

和虞部卢四【汀】酬翰林钱七【徽】赤藤杖歌【元和四年分司东都官员外郎作诸本无四七字今从阁蜀本仍侧注二名汀字云夫为虞部员外郎徽字蔚章元和初为翰林学士】

赤藤为杖世未窥台郎始携自滇池【台郎尚书郎也前汉西南夷传夜郎最大其西滇池方三百里滇音颠】滇王扫宫避使者【避或作迎或作邀当如避道之避今按上言扫宫则当为避舍之避】跪进再拜语嘽嘽【嘽嘽夷语也嘽说文咽也嘽字林内悲也嘽乙骨切嘽音伊】绳桥挂过免倾堕【以竹索为桥也竹索曰竿西南夷寻之以渡水挂冢庾切】性命造次蒙扶持途经百国皆莫识君臣聚观

逐旌麾共传滇神出水献赤龙拔须血淋漓又云羲和操火鞭【羲和日御也】暝到西极睡所遗几重包裹自题署不以珍怪夸荒夷归来捧赠同舍子浮光照手欲把疑【诸本同方独从蜀本作照把欲手疑云檀弓有手弓列子有手劒史记有手旗义同此诸本多误今按方说手义固为有据然诸本云照手欲把则是未把之时光已照手故欲把而疑之也今云照把则是已把之矣又欲手之而复疑之何耶况公之诗冲口而出自然奇伟岂必崎岖偻仄假此一字而后为工乎大氏方意专主奇澁故其所取多类此】空堂昼眠倚牖户飞电着壁搜蛟螭【苕溪渔隐曰退之赤藤杖诗云云故东坡铁拄杖诗云倚壁蛟龙护昼眠山谷筇竹杖赞云苍龙挂壁皆用此诗也电一作雷着直略切】南宫清深禁闱密【闱或作围南宫指卢禁闱指钱也白乐天诗遽列谏垣升】

【禁闱洪庆善引繚绕宫墙围禁林以释此误矣阁本密作客亦非是】唱和有类吹埙篪【诗伯氏吹埙仲氏吹篪】妍辞丽句不可继见寄聊且慰分司【公时分司东都】崔十六少府摄伊阳以诗及书见投因酬三十韵【酬下或无三十韵字而有之字崔摄伊阳乃洛之属邑也观诗意初与崔相识於赤县尉时乃元和元年公自江陵入为国子博士日也又云府公旧同袍拔擢宰山涧乃留守郑余庆擢崔摄伊阳令也又云三年国子师况住洛之涯则以国子博士分司也又云冬裘竟未擢岁穷寒气骄则是元和三年冬作也】

崔君初来时相识颇未惯但闻赤县尉不比博士慢赁屋得连墙【得或作住】往来忻莫间我时亦新居触事苦难办蔬飧要同吃【诸本飧多作餐方从蜀本云此诗用蔬飧朝餐字多相乱他诗亦然说文飧谓晡时食餐吞也飧或作飧餐或作飧故字多相乱汉高后纪赐餐钱王莽传设飧粥顔师古曰古餐飧一字也又曰飧古飧字而皆以干安切读之则非诗不素飧兮郑玄读如鱼飧之飧音孙当以此为正

今按飧或当作餐说见平淮西碑】破袄请来绽【古乐府新衣谁当补故衣谁当绽 绽丈莧切】谓言安堵後贷借更何患不知孤遗多举族仰薄宦有时未朝餐得米日已晏隔墙闻讙呼衆口极鴈鴈前计顿乖张居然见真贋【贋伪物字亦作鴈韩非子说林齐伐鲁索谗鼎鲁以其鴈往齐人曰鴈也鲁人曰真也】娇儿好眉眼袴脚冻两骭【尔雅骭为微注骭脚胫也 骭下晏切】捧书随诸兄累累两角巾【累累史记作累累巾束髮貌诗总角巾兮两角或作角尚或作角两 累力迫切巾占患切】冬惟茹寒皐秋始识瓜瓣问之不言饥饫若厌刍豢【孟子理义之悦我心犹刍豢之悦我口】才名三十年久合居给諫白头趋走里闭口絶谤讪府公旧同袍【府公河南尹见题注诗岂曰无衣与子同袍】拔擢宰山涧寄诗杂诙俳有类说鹏鷖【鹏鷖字用庄子事见逍遥游篇】上言酒味酸冬衣竟未纈【左氏躬纈甲冑音患衣或作裘】下言人吏稀惟足彪与𦏧【尔雅虎窃毛谓之𦏧注窃浅也

彪悲蚪切𦏧音栈】又言致猪鹿此语乃善幻【善方作是 今按汉书西域传有善眩之语顔注云眩读与幻同眩相诈惑也即今吞刀吐火植瓜种树屠人截马之术韩公盖用此语方从阁本误矣】三年国子师肠肚习藜藿【习或作集非是】况住洛之涯魴鱖可罩汕【诗九罭之鱼魴魴言大鱼也尔雅巢谓之汕筐谓之罩诗南有嘉鱼烝然罩罩烝然汕汕毛注罩罩筐取鱼之器汕汕櫟今之撩罟也 魴音房鱖才本切罩都教切汕音汕】肯效屠门嚼【桓谭新论曰人闻长安乐则出门西向而笑知肉味美则对屠门而大嚼又曹子建书曰过屠门而大嚼虽不得肉贵且快意】久嫌弋者篡【篡或作纂非是篡见扬子鸿飞冥冥弋人何篡焉古本及後汉书皆然盖篡取之义也然今本扬子亦作纂非也 篡初患切】谋拙日焦拳活计似鋤耨【或作铲谓削斗之也选海赋铲临崖之阜公此诗用今韵耨属上声疑当以铲为正】男寒澁诗书妻瘦剩腰襻【妻或作女襻衣系也周庾信监赋裙斜假襻 襻普患切】为官不事职厥罪在欺谩【或作慢字见贡禹传汉书面谩亦皆音慢】行当自劾去渔钓老菡萏【尔雅菡萏菰也菡萏注云菡萏苇也菡萏似苇而小菱也

菡五患切】岁穷寒气骄冰雪滑磴栈【前汉良因说汉王烧栈道 栈士谏切】音问难屡通何由覩清盼【或作盼李太白诗君子枉清盼诗美目盼兮以目美言也左顾右盼以盼视言也盼本作盼眄通作盼今四字多不分当以蜀本为正 今按盼匹莧切目黑白分也眄莫见切从省作?眄睐顾视也盼五礼切见孟子恨视也此诗当作眄然作盼亦通犹言青眼也】

送侯参谋赴河中幕【侯继时从王谔辟继与公同举贞元八年进士元和四年又同官学省公博士继助教六月公分司东都而继参河中幕此诗是年冬作也】

忆昔初及第各以少年称君颐始生须我齿清如冰尔时心气壮百事谓已能【用中庸人一能之已百之之语别本作已者非】一别讵几何【讵或作遽或作距字林曰讵未知词也潘岳悼亡诗尔祭讵几时】忽如隔晨兴我齿豁可鄙君颜老可憎相逢风尘中相视迭嗟矜幸同学省官【公元和四年後三月祭薛公达文云朝议郎守国子博士公太学助教侯继】末

路再得朋东司绝教授游宴以为恒【胡登切】秋渔?密树夜博然明灯雪迳抵樵叟【抵或作诋樵或作讲皆非是此但言偶逢之耳】风廊折谈僧陆浑桃花间【陆浑河南属县名上陆浑山火注详】有汤沸如烝三月崧少步【崧一作嵩戴延之西征记嵩山东为大室西为少室相去十七里嵩其总名也谓之室者以其下有石室焉】踟躅红千层【踟躅花名崔豹古今注羊踟躅羊食之则死羊见之则踟躅分散故名羊踟躅余见上杏花诗注】洲沙仄晚坐【洲沙或作沙洲】岭壁穷晨昇【晨或作朝】沈冥不计日【扬子蜀庄沈冥】为乐不可胜迁满一已异【作毕非是】乖离坐难凭【公其年六月迁都官郎分司东都已而继亦参谋河中乖离坐难凭矣】行行事结束人马何蹢躅【诗泮水其马蹢躅马逝也蹢躅略切】感激生胆勇从军岂尝曾洸洸司徒公【诗武夫洸洸洸洸壮也元和三年九月以淮南节度使王谔检校司徒为河中尹河中晋绛慈隰节度使司徒公王谔也四年冬辟继为府从事洸音光】天子爪与肱【爪一作股】提师十万余四海钦风棱河北兵未进【未或作始时讨王承宗而吐突承璀督师逗留不进作始者非】蔡州帅新薨【是年十一月已巳吴少诚卒弟少阳自称留後】曷不请扫除活彼黎与烝鄙夫诚怯弱受恩愧徒弘犹思脱儒冠弃死取先登又欲面言事上书求诏徵侵官固非是【左氏侵官冒也】妄作谴可惩惟当待责免耕斲归沟塍【班固西都赋沟塍刻镂斲斫也斲音竹塍音乘】今君得所附【或作行得所非是】势若脱鞬鹰【选鲍明远诗昔如鞬上鹰鞬音钩】檄笔无与让幕谋职其膺【职或作识非是】收绩开史牒翰飞逐溟鸿【庄子北溟有鱼其名为鲲化而为鸟其名曰鹏翰音寒】男儿贵立事流景不可乘岁老陰沴作【庄子陰阳之气有沴注陰阳二气陵乱不调沴音戾又音殄】云颓雪翻崩别袖拂洛水征车转崤陵【僖三十年左氏崤有二陵焉崤音爻】勤勤酒不进勉勉恨已仍送君出门归愁肠若牵绳默坐念语笑痴如遇寒蝇策马谁可适晤言谁为应【诗可与晤言晤对也应当也选晤言莫余应音膺】席尘惜不扫【或作扫】残罇对空凝【对或作醕非是】信知後会时日月屡环紉【居登切】生期理行役欢绪絶难承寄书惟在频无恹简与缙

东都遇春【东都河南也唐都长安显庆二年以洛阳宫为东都次前後诗当在元和五年春作】

少年气真狂【真方作直】有意与春竞行逢二三月九州花相映川原晓服鲜桃李晨粧靚【靚或作靚靚青黑色靚粧字见上林赋郭璞曰粉白黛黑也靚疾政切】荒乘不知疲醉死岂辞病饮噉惟所便【噉或作噉噉徒感切便平声】文章倚豪横【户孟切】尔来曾几时白髮忽满镜

旧游喜乖张新辈足嘲评【音病】心肠一变化【肠或作腹】羞见时节盛得闲无所作贵欲辞视听深居疑避仇默卧如当暝朝曦入牖来鸟唤昏不醒【鸟一作乌选悦尔而醒醒苏佞切】为生鄙计筭盐米告屡罄【告屡或作屡告】坐疲都忘起【忘音妄】冠侧懒复正幸蒙东都官获离机与辇【公时分教东都生李习之状公行云自江陵掾入为国子博士宰相有爱公文者将以文学职处公有争先者潜公公恐及难遂求分司东都此公所以有获离机辇之语离力智切】乖慵遭傲僻渐染生弊性既去焉能追有来犹莫聘有船魏王池【河南志云洛水经尚善旌盖二坊之北南溢为池深处至数顷水鸟洋泳荷芰翻覆为都城之胜

贞观中以赐魏王泰故号魏王池】往往纵孤泳【纵或作从或作泛】水容与天色此处皆绿净【此或作比】岸树共纷披渚牙相经纬【音径】怀归苦不果即事取幽进【取或作最】贪求匪名利所得亦已併【已或作以】悠悠度朝昏落落捐季孟【落落或作落魄非是语齐景公待孔子曰若季氏则吾不能以季孟之间待之季氏为鲁上卿孟氏下卿】羣公一何贤上戴天子圣谋谟收禹绩【或作迹左氏茫茫禹迹画为九州作绩恐非】四面出雄劲转输非不勤稽逋有军令在庭百执事奉职各祇敬我独胡为哉【胡一作何】坐与亿兆庆譬如笼中鸟仰给活性命为诗告友生负愧终究竟

感春五首【元和五年春分司东都作】

辛夷高花最先开【辛夷高数丈江南地暖正月开北地寒二月开初发如笔北人呼为木笔其花最早南人呼为迎春苕溪渔隐曰木笔迎春自是两种木笔色紫丛生二月方开迎春白色高树立春已开然则辛夷乃此花耳高花或作花高以末章辛夷花房忽全开言之则此为高处之花先开矣何逊诗有岩树落高花】青天露坐始此回已呼孺人戛鸣瑟【礼记大夫妻曰孺人又书戛击鸣球戛鼓也 戛音结】更遣稚子传清盃【选恨赋左对孺人右顾稚子杜诗传盃莫放盃】选壮军兴不为用坐狂朝论无由陪【宪宗即位五年平夏平蜀军江东赫然中兴而公年踰强仕投闲分司故有此言】如今到死得闲处还有诗赋歌康哉【书皋陶歌曰庶事康哉】

洛阳东风几时来川波岸柳春全回宫门一锁不复啓【唐都长安以洛阳为东都故有宫门一锁之句若有感云】虽有九陌无尘埃策马上桥朝日出楼阙赤白正崔嵬孤吟屡阕莫与和寸恨至短谁能裁

春田可耕时已催王师北讨何当回【元和四年讨成德节度使王承宗】放车载草农事济【车或作军非是】战马苦饥谁念哉蔡州纳节旧将死【是年彰义军节度使吴少诚卒】起居谏议联翩来【裴度以河南府功曹召为起居舍人孟简孔戣皆为谏议大夫联翩相继也】朝廷未省有遗策肯不垂意饼与糒

前随杜尹拜表回【杜尹谓杜兼也】笑言溢口何欢哈【楚词衆共所哈哈笑也 哈呼来切】孔丞别我适临汝【孔丞谓孔戣也】风骨峭峻遗尘埃【峭峻或作峭峭】音容不接祇隔夜凶讎讎可相寻来【元和四年杜兼为河南尹十一月无疾暴卒孔戣以卫尉寺丞分司东都五年正月将浴临汝之汤泉至其县遂卒凶讎相寻谓此讎音赴】天公高居鬼神恶欲保性命诚难哉

辛夷花房忽全开将衰正盛须频来【须频或作频频非是】清晨辉辉烛霞日薄暮耿耿和烟埃朝明夕暗已足叹况乃满地成摧颓迎繁送谢别有意谁肯留念少环回【此篇言辛夷花之盛如此元微之有问韩员外辛夷花云韩员外家好辛夷开时乞取两三枝折枝为赠君莫惜纵君不折风亦吹岂此耶】

酬裴十六功曹巡府西驿涂中见寄【或无涂字裴十六度也旧云裴谔非度时为河南府功曹公时分司东都作】

相公罢论道【相公郑余庆也元和元年罢相出为河南尹书三公论道经邦】聿至活东人【至或作来活或作治非是】御史坐言事作吏府中尘【御史裴度也元和初度密疏论权幸忤旨出为河南府功曹】遂令河南治今古无俦伦四海日富庶道途隘蹄轮府西三百里候馆同鱼鳞【周礼五十里有市市有候馆所以候宾客之馆也】相公谓御史劳子去自巡是时山水秋光景何鲜新哀鸿鸣清耳宿雾褰高旻【尔雅秋曰旻天褰或作浥非是】遗我行旅诗轩轩有风神譬如黄金盘照耀荆璞真我来亦已幸事贤友其仁【论语事其大夫之贤者友其士之仁者事贤谓余庆友仁谓度】持竿洛水侧孤坐屡穷辰多才自劳苦【方作苦劳云苦劳语见吕强传今按语势当作劳苦大抵公诗多自胷襟流出未必故用古人语也】无用祗因循辞免期匪远行行及山春

燕河南府秀才【得生字据诗云元和五年冬房公尹东京房公者房式也时为河南尹公时为河南令故曰忝县尹权德舆时为宰相故曰作邦桢云】

吾皇绍祖烈【吾皇宪宗也】天下再太平诏下诸郡国岁贡乡曲英元和五年冬房公尹东京【元和四年以房武为河南尹】功曹上言公【或作上其言】是月当登名【月或作日非是】乃选二十县试官得鸿生【硕儒也】羣儒负已材相贺简择精怒起簸羽翮引吭吐铿轰【选引圆吭之纤婉礼记钟声铿铿轰鸣声也吭下浪切又音刚铿邱耕切轰呼宏切】此都自周公【周公成洛邑尝居之】文章继名声【章一作物】自非殊絶尤难使耳目惊今者遭震薄不能出声鸣鄙夫忝县尹愧栗难为情惟求文章写不敢妬与争还家勅妻儿具此煎炰烹柿红蒲萄紫肴果相扶擎【或作擎】芳茶出蜀门【诸本茶多作茶方从潮馆本云尔雅曰檟苦茶音徒郭璞注木小似梔子早取者为茶晚取者为茗唐韵茶宅加反俗作茶大抵茶与荼古音相近如今言搽与涂亦通用也今按茶与荼今人语不相近而方云相近者莆田语音然也虽出俚俗亦由音本相近故与古暗合耳今建人谓口为苦走为祖亦此类方言多如此云】好酒浓且清何能充欢燕庶以露厥诚昨闻诏书下【或作来】权公作邦桢【杜春陵行云结也实国桢桢音贞】文人得其职【文一作大一作文】文道当大行陰风搅短日冷雨澁不晴勉哉戒徒驭家国迟子荣【迟直利切汉书侧席迟士注待也】

送李翱【翱字习之陇西人贞元十六年娶公兄弇之女元和三年四月乙亥户部侍郎杨於陵出为广州刺史岭南节度使表翱佐其府四年正月己酉翱自东都旌善坊以妻子上船於漕乙未去东都公与石洪假舟送之丁酉同登嵩山题姓名纪别故有此诗】

广州万里途山重江逶迤【上於危切下余支切】行行何时到谁能定归期揖我出门去颜色异恒时虽云有追送【或作迎送诗有客薄言追之郑云追送也】足迹绝自兹人生一世间不自张与施譬如浮江木纵横岂自知宁怀别时苦勿作别後思送石处士赴河阳幕【或注得起字石洪也元和五年乌重裔为河阳节度使辟置幕府公尝有序送诗亦是时作】

长把种树书【种树书见史记秦始皇纪】人云避世士【论语且而与其从辟人之士也岂若从辟世之士哉】忽骑将军马自号报恩子风云入壮怀【云入或作雷开】泉石别幽耳
钜鹿师欲老【邢州钜鹿郡】常山险犹恃【常山镇州今为真定府元和四年节度使王承宗反诏中人吐突承璀以兵讨之无功遂赦王承宗】岂惟彼相忧固是吾徒耻去去事方急
酒行可以起

送湖南李正字归【或作送李正字归湖南或作李判官李础其父仁钧时为亲王府长史础自湖南从事请告来省公尝有序送焉元和五年分司东都作】

长沙入楚深洞庭值秋晚人随鸿鴈少江共蒹葭远历历余所经【公贞元十九年出为阳山已而徙掾江陵入为国子博士湖南之地盖尝经行矣】悠悠子当返孤游怀耿介旅宿梦婉婉【上音宛下音免媚也】风土稍殊音鱼虾日异饭亲交俱在此谁与同息偃

东雅堂昌黎集注卷四

卷五

<集部,别集类,汉至五代,东雅堂昌黎集注>

钦定四库全书

东雅堂昌黎集注卷五

古诗

辛卯年雪【公时为河南令作】

元和六年春寒气不肯归河南二月末雪花一尺围【此即白乐天诗所谓元和岁在卯六年春二月月晦寒食天天陰夜飞雪】崩腾相排拶【子達切又子末切】龙凤交横飞波涛何飘扬天风吹旛旗白帝盛羽卫髣髴振裳衣【髣或作𦇧选绿苔髣髴乎研上上音参下音沙】白霓先启涂【楚词曰白蜺婴茀胡为此堂蜺与霓同】从以万玉妃【从去声】翛翛凌厚载譁譁弄陰机生平未曾见何暇议是非或云丰年祥【诗传丰年之冬必有积雪】饱食可庶几善祷吾所慕谁言寸诚微

醉留东野【元和六年公为河南令作】

昔年因读李白杜甫诗长恨二人不相从吾与东野生竝世如何复蹶二子踪东野不得官【东野前一年方罢河南水陆转运从事故云】白首夸龙种【依字当作躡踵卢仝诗卢子躡踵也贤愚總莫惊苏鹗演义龙鍾不翹举之貌如髣拉搭之类】韩子稍奸黠自慙青蒿倚长松低头拜东野愿得终始如駘蛩【孔丛子曰北方有兽名曰𧈧爱蛩蛩駘𧈧食得甘草必啗以遗蛩蛩駘𧈧见人将来必负𧈧以走𧈧非爱駘蛩也为其假足二兽亦非心爱𧈧也为其得甘草而遗之也夫禽兽犹知比假而相报也况士君子之欲名利者乎 駘音巨蛩音叩】东野不回头有如寸筵撞钜钟【筵字见二卷答张彻】吾愿身为云东野变为龙四方上下逐东野虽有离别无由逢【离别或作别离】

李花二首【诸本作一首此二诗也自当春天地争奢华以下分焉意义甚明编者误合之公元和初在江陵有李花赠张十一又有寒食日夜归酬张十一李花之什所谓不忍千株雪相映是也至是元和六年为县河南而作此诗自夜领张彻投卢仝而下其所以状李花之妙者至矣苏内翰梅诗举此云缟裙练帨玉川家肝胆清新冷不邪穠李争春犹辨此更教踏雪看梅花亦奇也】

平旦入西园梨花数株若矜夸旁有一株李颜色惨惨似含嗟问之不肯道所以【此暗使桃

李不言下自成蹊事见汉李广赞老杜哀王孙诗问之不肯道姓名】独绕百币至日斜忽忆前时经此树正见芳意初萌芽【或作芽汉传如朱草萌芽事有萌芽无用芽字】奈何趣酒不省録不见玉枝攢霜葩【枝或作杖】泫然为汝下雨泪【礼记夫子泫然流涕 泫胡犬切】无由反旆羲和车东风来吹不解顔苍茫夜气生相遮冰盘夏荐碧实脆斥去不御慙其花【斥去或作片云或作云去或作斥逐张衡思玄赋斥西施而不御韩语原此或本皆误也】

当春天地争奢华洛阳园苑尤纷拏【女加切或作拏董彦远云拏从如今人从拏唐韵以拏为或体非也考相如子虚赋王逸九思皆只作拏 按说文拏从奴牵引也拏从如持也古书作拏盖通用】谁将平地万堆雪【将一作堆】剪刻作此连天花日光赤色照未好明月暂入都交加夜领张彻投卢仝【公寄卢仝诗云偶逢明月曜桃李想此时也】乘云共至玉皇家长姬香御四罗列缟裙练帨无等差静濯明粧有所奉顾我未肯置齿牙清寒莹骨肝胆醒一生思虑无由邪

招扬之罍一首【之罍元和十一年进士阁本作之罍或作录之字讹也
公为河阳令之罍自中山来从公问学公惜其归以诗招之罍音浮】

柏生两石间万岁终不大野马不识人难以驾车盖柏移就平地马羈入廐中【时之罍犹未第故公以诗招之为柏马之喻而後之工画者遂作为柏石圆陈季常豕藏之苏内翰为之铭云柏生两石间天命本如此又云韩子俯仰人但爱平地美又云□看此槎牙岂有可移理原公诗意盖以喻之罍游从问学以成其才故其下有独学陋不远复之语非谓以利迁也若既槎牙而後移则所谓时过然後学矣覽者无以为异】马思自由悲柏有伤根容伤根柏不死千丈日以至【千或作百日以或作不难以或作已】马悲罢还乐【罢音疲】振迅矜鞍轡【迅或作顿振迅字见七月诗传鲍昭鹤赋】之罍南山来文字得我惊馆置使读书日有求归声我令之罍归失得柏与马【失得方作失待或作实待或作实失 今按三本皆无理唯嘉佑杭本作失得似颇有理而举正不收盖其意曰失得之计观于柏马可见云尔】之罍别我去计出柏马下我自之罍归入门思而悲之罍别我去能不思我为洒埽县中居引水经竹间蹢躅所不及何异山中闲前陈百家书食有肉与鱼【史记孟尝君传冯驩迁之幸舍食有鱼矣左传肉食者鄙】先王遗文章缀缉实在余礼称独学陋【礼记独学而无友则孤陋而寡闻】易贵不远复【易不远复无只悔】作诗招之罍晨夕抱饥渴寄卢仝【元和六年春公为河南令作仝闭门不出时洛阳有留守郑余庆有尹李素仝皆不见水北谓石洪水南谓温造皆继往河阳幕少室谓李渤三人者皆仝所不为也】

玉川先生洛城里【仝居洛阳自号玉川子选放歌行鷄鸣洛城里】破屋数间而已矣一奴长须不裹头一婢赤脚老无齿辛勤奉养十余人上有?亲下妻子先生结髮憎俗徒【结髮谓少年时犹李广言结髮与匈奴战也】闭门不出动一纪至令邻僧乞米送【令或作今非是】仆忝县尹能不耻【尹一作令】俸钱供给公私余时致薄少助祭祀劝参留守谒大尹言语才及辄掩耳水北山人得名声去年去作幕下士水南山人又继往【谓洛水之南北也在洛阳城中水北石洪水南温造元和五年乌重胤为河阳二城节度使辟石洪温造为从事】鞍马仆从塞闾里【从或作夫】少室山人索价高【少去声】两以谏官徵不起【李渤字

濬之刻志於学与仲兄涉偕隐庐山久之徙少室山元和元年以左拾遗召不至四年河阳尹遣吏持诏敦促又不赴公为河南令遗渤海书譬说渤海善公言始出家东都】彼皆刺口论世事有力未免?驱使先生事业不可量惟用法律自绳已春秋三传束高阁【三方作五或作左今按邹夹春秋世已无传而当世见行三传作五左皆非也晋杜乂殷洪并才名冠世庾翼弗之重语人曰此辈宜束高阁】独抱遗经究终始【抱方作把非是】往年弄笔嘲同异【全与马异结交诗云全不同异不异是谓大同而小异全自同异自异是谓全不往?异不至】怪辞惊衆谤不已【怪一作谤谤一作怪】近来自说寻坦途犹上虚空跨绿駟【虚空或作青云绿駟今本二字皆从马按穆天子传荀列史汉皆作绿耳郭璞注穆传犹魏时鲜卑献黄耳马是以耳色言也此诗岂以重韵妄刊耶】去岁生儿名添丁【全有添丁诗】意令与国充耘耔【诗或耘或耔耔拥苗本音子】国家丁口连四海【唐制男子二十一为丁】岂无农夫亲耒耜先生抱才终大用宰相未许终不仕假如不在陈力列【陈力就列见论语】立言垂范亦足恃苗裔当蒙十世宥【左襄二十一年犹将十世宥之】岂谓贻厥无基址【诗贻厥孙谋址或作址址字见汉疏广传】故知忠孝生天性洁身乱伦安足拟【论语欲洁其身而乱大伦】昨晚长须来下状隔墙恶少恶难似【荀子无廉耻而嗜乎饮食可谓恶少者也】每骑屋山下窥阍【或作瞰苦滥切】浑舍惊怕走折趾凭依婚媾欺官吏不信令行能禁止先生受屈未曾语忽此来告良有以【魏志文帝与吴质书云秉烛夜游良有以也】嗟我身为赤县令操权不用欲何俟立召贼曹呼伍伯【汉郡国有贼曹主盗贼事张敞为京兆尹有贼曹掾伍伯或作五百今按伍伯见古今注什伍之长也东汉祢衡传令五百将出欲加箠注云五百犹今之问事者】尽取鼠辈尸诸市先生又遣长须来如此处置非所喜况又时当长养节都邑未可猛政理先生固是余所畏度量不敢窥涯涘放纵是谁之过欤效尤戮仆愧前史【襄三年左氏晋侯之弟杨干乱行於曲梁魏绛戮其仆二十一年晋栾盈过周周西鄙掠之王曰尤而效之其又甚焉】买羊沽酒谢不敏偶逢明月曜桃李先生有意许降临更遣长须致双鲤【古乐府云客从远方来赠我双鲤鱼】

酬司门卢四兄云夫院长望秋作【卢四名汀公诗有和虞部卢四汀酬翰林钱七徵赤藤杖歌又有和卢郎中寄示送盘谷子诗又有和库部卢四兄元日朝回又有早赴行香赠卢李二中舍又有酬卢给事曲江荷花行云夫贞元元年进士新旧史无传以此数诗考之历虞部司门库部郎曹迁中书舍人为给事中其後莫知所终矣此诗元和六年秋所作时公自河南令入为职方员外郎作】

长安雨洗新秋出极目寒镜开尘函终南晓望蹋龙尾【终南长安南山贾公谈录唐龙尾道在含元殿侧白居易诗云步登龙尾道却望终南山】倚天更觉青巉巖【徂衔切】自知短浅无所补【汉孔光传智谋短浅】从事久此穿朝衫归来得便即游覧暂似壮马脱重衔【杜诗将军昔着从事衫铁马驰突重两衔】曲江荷花盖十里江湖生日思莫减【目思或作思自或作思目非是】乐游下瞩无远近【汉宣帝神爵三年起乐游苑在杜陵西北今呼为乐游庙瞩音烛】绿槐萍合不可芟白首寓居谁借问平地寸步局云岩【局或作局一作屈】云夫吾兄有狂气嗜好与俗殊酸咸日来省我不肯去论诗说赋相諠諠【女咸切】望秋一章已惊絶犹言低抑避谤讪【抑或作徊】若使乘酣骋雄怪造化何以当镌劖【徂衔切】嗟我小生值强伴怯胆变勇神明鉴【商颂天命降监元微之诗洞照失明鉴皆作平声】

驰坑跨谷终未悔为利而止真贪饕【利为利禄言拘于利禄而不游此山是为贪饕之人矣饕音□】高揖羣公谢名誉远追甫白感至誠【书至誠感神】楼头完月不共宿【完或作见或作皎今按月蚀诗有完完上天东之句言月圆也此亦同意以下句就缺推之可见】其奈就缺行攢攢【或作纖纖?蜀音所咸切诗掺掺女手说文与石经皆作??】

谁氏子【吕氏子灵河南人元和中弃其妻着道士服谢母曰当学仙王屋山去数月复出见河南少尹李素素立之府门使吏卒脱道士服给冠带送付其母公时为河南令作此诗有愿往教诲不从而诛之语至是素始归之事见李素墓志】

非痴非狂谁氏子去入王屋称道士白头老母遮门啼挽断衫?留不止翠眉新妇年二十载送还家哭穿市或云欲学吹凤笙【方作皇非是】所慕灵妃嬋萧史【列仙传秦穆公时有萧史善吹箫公女弄玉好之公以妻焉遂教弄玉作凤鸣居数十年吹似凤声凤凰来止其屋公为作凤凰台夫妻止其上一旦皆随凤凰飞去嬋匹诣切】又云时俗轻寻常力行险怪取贵仕神仙虽然有传说知者尽知其妄矣圣君贤相安可欺乾死穷山竟何俟【太白诗乾死明月魂无复玻瓈魄】呜呼余心诚岂弟愿往教诲?终始【海方作悔今按作悔非是大氏方意以奇为主此类可见】罚一劝百政之经【中说杜如晦问政子曰赏一以劝百罚一以惩衆】不从而诛未晚耳谁其友亲能哀怜写吾此诗持送似【或作以非是】

河南令舍池台【元和六年公为令时作】

灌池才盈五六丈筑台不过七八尺【七八或作六七】欲将层级压篱落未许波澜量斗硕规摹虽巧何足夸景趣不远真可惜【景或作指】长令人吏远趋走已有蛙黾助狼藉【藉从艹说文曰草不编狼藉今本从竹汉陆贾传名声籍甚孟康曰狼籍甚盛盖古字如藉田皆只作藉而从艹从竹则沿义以生此当以藉为正】

送无本师归范阳【即贾岛也刘公嘉话云岛初赴举京师一日于马上得句云乌宿池中树僧敲月下门初欲作推字练之未定不觉冲尹时韩吏部权京尹左右拥至前岛具告所以韩立马良久曰作敲字佳矣遂与为布衣交有诗曰孟郊死葬北邙山日月风云?觉闲天恐文章还断絶再生贾岛在人间又摭言云岛尝骑驴天衢时秋风正厉黄叶可扫岛忽吟曰落叶满长安卒求一联不可得因唐突京尹刘栖楚被系一夕而释新史云岛字浪仙范阳人初为浮屠名无本来东都愈教其为文遂去浮屠举进士当其苦吟及值公卿大夫不知觉也一日见京兆尹跨驴尹诘责之久乃得释其意与摭言合而嘉话等集所云公与岛诗东坡云世俗无知者所托非退之语洪氏亦云按送无本时退之为河南令不应至是方相知又岛初为浮屠後乃举进士此云後改名无本乃传者之误也按此诗元和六年冬作而是年秋东野亦有诗与无本云长安秋声乾木叶相号悲云云东野尚无恙何以云死葬北邙山耶若以为公为京尹始识岛故云则公为尹在长庆三年而是年何以有此作也】

无本於为文身大不及胆吾尝示之难勇往无不敢蛟龙弄角牙造次欲手揽衆鬼囚大幽下覩褒玄窟【说文窟坎中小坎也徒感切】天阳熙四海注视首不颌【李本颌作鎮说文鎮

低头也列子巧夫鎖其頤 今按说文鎖五感切引卫献公鎖之而已为证则与颌字自不同也然左传今本只作颌未详其说或疑下有頤颌字此不当重押则作鎖为是然頤颌字见楚词?虎感古湛二切颌户感鱼检二切食不饱面黄貌则亦与不颌义不同也】鲸鹏相摩宰【苏骨切】两举快一噉【徒敢切】夫岂能必然固已谢黯黯【楚词尚黯黯而有瑕黯乌减切黯徒感切】狂词肆滂葩低昂见舒惨奸穷怪变得往往造平澹蜂蝉碎锦纈【蜂蝉或作风蝉或作蝉翼 今按此与下句不对未详其说】緑池披菡萏【尔雅荷芙蕖其花曰菡萏披用荆公本定或作埳或作低方从阁本作坏皆非是唯披坏声相近耳 菡户感切萏徒感切】芝英擢荒蓁【或作榛】孤翮起连茝【尔雅茝薺郭璞注云似苇而小连茝丛苇也茝吐敢切】家住幽都远未识气先感来寻吾何能无殊嗜昌歜【昌蒲菹也文王嗜昌歜孔子闻而食之见吕氏春秋又左氏享有昌歜 歜徂感切】始见洛阳春【元和六年春公为河南令始识岛洛阳】桃枝缀红糝遂来长安里时卦转习坎【公是年秋迁职方员外郎遂来长安里与之别十一月矣坎十一月卦也】老懒无鬪心久不事铅槩【铅槩事出西京杂记详见上赠张籍张彻诗 槩在敢切】欲以金帛酬举室常頤颌【音见本篇不颌下注离骚长頤颌亦何伤王逸注不饱貌】念当委我去雪霜刻以懔【七感切】狞飈搅空衢【搅一作摺狞犬恶也】天地与?撼勉率吐歌诗尉女别後覽

石鼓歌【欧阳文忠集古録云石鼓久在岐阳初不见称于世至唐人始盛称之而韦应物以为周文王之鼓至宣王刻诗尔韩退之直以为宣王之鼓在今凤翔孔子庙鼓有十先时散弃于野郑余庆始置于庙而亡其一皇佑四年向傳师求于民间得之十鼓乃足其文可见者四百六十五磨灭不可识者过半然其可疑者四退之好古不妄者予姑取以为信耳至于字画亦非史籀不能作也文忠所跋如此此歌元和六年作石鼓文可见者其畧曰我车既攻我马既同又曰我车既好我马既駒君子员猎员猎员游麋鹿速速君子之求又左骖旛旛右骖騣騣秀弓时射麋豕孔庶又曰其鱼维何维鰋维鲤何以?之维杨与柳橐符霄切说文曰囊也笔墨闲録云此歌全仰止杜子美李潮八分小篆歌才薄将奈石鼓何即子美云潮乎潮乎奈尔何快劔斫断生蛟鼉即子美云快劔长戟森相向】

张生手持石鼓文【张生即张籍】劝我试作石鼓歌少陵无人谪仙死才薄将奈石鼓何周纲陵迟四海沸宣王愤起挥天戈大开明堂受朝贺诸侯劔佩鸣相磨蒐于岐阳骋雄俊【蒐狩也今岐山县旧曰岐阳左氏成有岐阳之蒐左氏言成王公今言宣王未详】万里禽兽皆遮罗【万或作百】镌功勒成告万世【成或作盛封岱勒成东都赋语】凿石作鼓隳嵯峨从臣才艺咸第一拣选撰刻留山阿【?或作简撰或作譌】雨淋日炙野火燎鬼物守护烦撝呵【或作诃】公从何处得纸本【处或作土】毫髮尽备无差讹辞严义密读难晓字体不类隶与科【隶书始皇时程邈所定也科谓科斗书鲁共王坏孔子宅得书论语孝经人不复知有古文谓之科斗文字也科字诸本皆同方从蜀本作蝌 今按蝌乃科之俗体後人以重韵而误改耳方知韩公不避重韵乃疑於此何耶】年深岂免有缺画【或作划】快劔斫断生蛟鼉【礼记伐蛟取鼉此下皆状石鼓文如此 鼉唐何切】鸾翔凤翥衆仙下【选凤翥翥飞翥章恕切】珊瑚碧树交枝柯【班固西都赋珊瑚碧树周阿而生碧树或作幽碧】金绳铁索鎖纽壮古鼎跃水龙腾梭【史记宋大丘社亡鼎沦于泗水彭城下秦始皇二十八年过彭城欲出鼎使千人没水求之弗得汉武帝得鼎于汾水晋陶侃少时渔于雷泽网得一梭挂于

壁有顷雷雨化为龙而去龙腾一作腾龙】陋儒编诗不收入【收一作得】二雅褊迫无委蛇【上於为切下音移毛诗协韵补音蛇唐何切行貌扬雄反离骚驾八龙之委蛇今协歌字韵当从补音蛇或作佗】孔子西行不到秦拈星宿遗羲娥【拈或作拾选刘季绪好拈捥利病拈音奇又举绮切捥之石切宿音秀】嗟余好古生苦晚【苏内翰凤翔八观诗其一曰石鼓其曰韩公好古生已迟我今况又百年後则此歌所谓好古生苦晚也】对此涕泪双滂沱【诗涕泗滂沱】忆昔初蒙博士徵其年始改称元和【元和元年公自江陵召为国子博士】故人从军在右辅【右辅谓右扶风即凤翔府也】为我量度掘臼科【谓安石鼓处】濯冠沐浴告祭酒如此至宝存岂多氍毹席裹可立致十鼓只载数骆驼【骆或作駝依字当作橐汉书匈奴传注橐驼言能负囊而驼物也】荐诸太庙比郤鼎【春秋桓二年取郤大鼎于宋戊申纳于太庙郤音告】光价岂止百倍过圣恩若许留太学诸生讲解得切磋【诗如切如磋】观经鸿都尚填咽【汉灵帝光和元年二月始置鸿都门学生熹平四年三月诏诸儒正五经文字命议郎蔡邕为古文篆隶三体书之刻石于太学门外使後生晚学咸取正焉碑始立其覲见及摹写者车乘日千两填塞街陌鸿都与观经盖二事公并用之】坐见举国来奔波剜苔剔藓露节角安置妥帖平不颇【普禾切】大厦深檐与盖覆经历久远期无佗中朝大官老于事【官或作夫】诘肯感激徒媿媿【上音庵下音阿不决之貌】牧童敲火牛砺角谁复着手为摩挲【後汉蓟子训至长安摩挲铜人挲音娑】日销月铄就埋没六年西顾空吟哦羲之俗书趁姿媚【王得臣麈史云王右军书多不讲偏旁此退之所谓羲之俗书趁姿媚者也】数纸尚可博白鹅【晋王羲之传山陰道士爱养鹅羲之求市之曰为写道德经当举羣相赠羲之写毕笼鹅而去】继周八代争战罢【八代谓汉魏晋宋齐梁陈隋自周而下不啻八代论其正统又颇多说今以石鼓所在言之其秦汉魏晋元魏齐周隋八代与】无人收拾理则那【左氏宣二年犀兕尚多弃甲则那】方今太平日无事柄任儒术崇丘轲【任或作用】安能以此上论列愿借辩口如悬河【晋王衍曰听郭象语如悬河泻水注而不竭】石鼓之歌止于此呜呼吾意其蹉跎

双鸟诗【苏内翰作李太白画像诗有曰化为二鸟鸣相酬一鸣一止三千秋或者遂谓此诗为李杜作非也按柳仲涂双鸟诗解云韩之为心忧夫道也履行非孔氏者异端矣故垂言以刺之释老说异而教殊故曰双鸟又石林诗话云双鸟诗殆不可晓尝以苏丞相子容云意以是指佛老二学以其终篇本末考之或然又笔墨闲录云刘涓言双鸟诗为二氏作予尝言其然以其中有云不停两鸟鸣大法失九畴周公不为公孔丘不为丘遂以为二氏之言乱周孔之教耳而朱文公谓公为已与孟郊说见篇末考异注】

双鸟海外来飞飞到中州【来飞飞或作飞飞来】一鸟落城市一鸟集岩幽【集或作巢】不得相伴鸣尔来三千秋两鸟各闭口万象衔口头春风卷地起百鸟皆飘浮两鸟忽相逢百日鸣不休有耳聒皆聋有口反自羞百舌旧饶声从此恒低头【恒或作且非是】得病不呻唤泯默至死休雷公告天公百物须膏油自从两鸟鸣【或作聒】聒乱雷声收【诸本同但蜀本声作光阁本作雷声三伏收皆误而方独从唐本作聒雷声伏收则不成文理矣】鬼神怕嘲咏造化皆停留【化或作作】草木有微情挑抉示九州虫鼠诚微物不堪苦诛求不停两鸟鸣百物皆生愁不停两鸟鸣自此无春秋不停两鸟鸣日月难旋斡不停两鸟鸣大法失九畴周公不为公孔丘不为丘天公怪两鸟各捉一处囚百虫与百鸟然後鸣啾啾【百鸟方

从阁杭蜀本作七鸟云柳谢荆公皆作七鸟谓月令七十二候之虫鸟也苏耆开谭錄亦见今按百虫即上文之虫鼠百鸟即上文所言皆飘浮者耳与七十二候初不相关也且使果为七十二候之鸟而但云七鸟则词既有所不备又鸟既为七而虫独为百於例亦有所不通今细考之岂以草书百字有似於七而致误耶初不必过为凿说也】两鸟既别处闭声省愆尤朝食千头龙暮食千头牛朝饮河生尘暮饮海絶流还当三千秋更起鸣相酬【柳仲涂有此诗解一篇传于世谓指释老也然以欧公感三子诗及东坡李太白画像赞考之盖专为李杜而作今按释老李杜之说恐亦未然旧尝窃意此但公为已孟郊作耳落城市者已也集岩幽者孟也初亦不能无疑而近见葛氏韵语阳秋已有此说矣读者详之】

赠刘师服【服或作命】

羨君齿牙牢且洁大肉硬饼如刀截我今呀豁落者多所存十余皆兀臲【或作 ？又作机隄臲音臲】匙抄烂饭稳送之合口软嚼如牛呵【呵说文云吐而噍尔雅牛曰齝羊曰齝牛食已久复出嚼之曰齝与呵同楞严经桥梵鉢提有牛呵病呵音痴】妻儿恐我生怅望盘中不釘栗与梨秣今年才四十五後日悬知渐莽卤【杭本作卤莽卤莽本庄子为政焉可莽卤然唐人多倒用之柳子厚沉昏莽卤又食货甘莽卤白乐天养生仍莽卤始觉琵琶弦莽卤所用同也莽莫补切卤音鲁】朱颜皓颈讶莫亲此外诸余谁更数忆昔太公仕进初口含两齿无羸余虞翻十三比岂少遂自惋恨形于书【比或作皆或作此今从蜀本云太公两齿事见古本荀子虞翻吴志只载其上书谓臣年耳顺髮白齿落岂在当时犹有可考也耶】丈夫命存百无害谁能检点形骸外【庄子申徒嘉谓郑子产曰子与我游于形骸之内而索我于形骸之外不亦过乎】巨缙东钓傥可期与子共饱鲸鱼脍【庄子任公子为大钓巨缙五十犗以为饵蹲乎会稽投竿东海广州记曰鲸鲵长百丈大亦称之东坡诗尝讥韩子隘且陋一饱鲸鱼何足脍】

题炭谷湫祠堂【欧本云在京兆之南终南之下祈雨之所也南山秋怀诗皆见之陆长源辨疑志云长安城南四十里有灵母谷俗呼为炭谷宋敏求长安志则云炭谷在万年县南六十里又云澄源夫人湫庙在终南山炭谷公所云炭谷湫不出此公南山诗有云因缘窥其湫即此公时在京师作湫龙居也】

万生都阳明幽暗鬼所寰嗟龙独何智出入人鬼间不知谁为助若执造化关厌处平地水巢居插天山【湫本在南山平地一日风雷移居于上或云公龙移诗天昏地黑蛟龙移云云即此也】列峯若攢指石盂仰环环【古乐府四角龙子幡环环当江柱】巨灵高其捧【薛综西京赋注云华山首阳本一山河神巨灵以手擘开其上巨灵神之有巨力者】保此一掬慳【诗采緑不盈一掬慳丘闲切】森沉固含蓄【鲍明远诗铜溪画森沉】本以储陰奸【陰奸谓龙犹南山诗所谓凝湛闭陰畧也】鱼鼈蒙拥护羣嬉傲天顽【扬子云羽猎赋羣嬉乎其間】翾翾栖托禽【扬子朱鸟翾翾翾许緑切】飞飞一何闲祠堂像侔真擢玉纤烟鬢羣怪俨伺候恩威在其顔我来日正中悚惕思先还寄立尺寸地敢言来途艰吁无吹毛刃【少陵诗匣里雄雌剑吹毛任选将又突骑劒吹毛鲁季钦引吴越春秋干将之剑能决吹毛游尘今吴越春秋无此语】血此牛蹄殷【淮南子牛蹄之涔左成二年左轮朱殷注血深也殷乌

闲切】至令乘水旱鼓舞寡与鰥林丛镇冥冥穷年无由删妍英杂艳实星琐黄朱班【妍或作研琐或作鎖】石级皆险滑顛踣莫牵攀危区维衆碎付与宿已颁弃去可奈何吾其死茅菅【诗露彼菅茅菅音奸】聽颖师弹琴【颖师若是道士则颖字是姓当从水是僧则颖字是名当从禾西清诗话云六一居士尝问东坡琴诗孰优坡荅以退之聽颖师琴公曰此祇是琵琶耳吴僧义海以琴名世或以六一语问海海曰欧阳公一代英伟然斯语误矣昵昵儿女语恩怨相尔汝言轻柔细屑真情出见也划然变轩昂勇士赴敌场精神余谨聳观听也浮云柳絮无根蒂天地阔远随飞扬纵横变态浩乎不失自然也喧啾百鸟羣忽见孤凤凰又见颖孤絶不同流俗下俚声也踣攀分寸不可上失势一落千丈强起伏抑扬不主故常也皆指下丝声妙处惟琴为然琵琶格上声乌能尔耶退之深得其趣未易讥评也洪庆善曰或云浮云柳絮无根蒂云云此泛声也谓轻非丝重非木也喧啾百鸟羣云云泛声中寄指声也踣攀分寸不可上吟绎声也失势一落千丈强厉声也善琴者云此数声最难工文忠公以为聽琵琶诗东坡作聽琴诗恨文忠公不及见二公之论似未必然方崧卿云李贺亦有聽□师琴歌】

昵昵儿女语【昵昵或作妮妮或作昵昵】恩怨相尔汝划然变轩昂勇士赴敌场浮云柳絮无根蒂天地濶远随飞扬喧啾百鸟群忽见孤凤凰踣攀分寸不可上失势一落千丈强【古木兰诗赐物百千强少陵诗四松初栽时大抵三尺强箏家以有余为强】嗟余有两耳未省聽丝篴自闻颖师弹起坐在一旁【或作傍或作牀】推手遽止之湿衣泪滂滂颖乎尔诚能【乎或作师】无以冰炭置我肠【郭象庄子注喜惧战于胷中固已结冰炭于五藏矣】

送陆畅归江南【畅字達夫尝着蜀道易诗元和元年进士董溪婿也溪丞相董晋第二子贬死湘中事见墓志公尝佐董晋幕】

举举江南子【唐人以举止端丽为举举】名以能诗闻【畅贡举年对雪落句云天人寧?巧剪水作花飞山斋玩月云来自擘书窗破恰漏清光落枕前经崔谏议林亭云 噪入云树风开无主花及登兰省遇云阳公主下降畅为摠相有咏帘咏行障催粧等作内人以畅吴音才思敏捷以诗嘲之畅酬曰粉面仙郎选圣朝偶逢秦女学吹箫须教翡翠闻王母不奈鸟鸛噪鹊桥观此可见其能诗矣】一来取高第官佐东宫军【畅举进士为皇太子僚属】迎妇丞相府夸映秀士羣【礼记王制命乡论秀士升之司徒曰选士】鸛鸣桂树间【鸛鸣或作鸣鸛】观者何缤纷人事喜顛倒旦夕异所云萧萧青云干遂逐荆棘焚岁晚鸿?过乡思见新文踐此秦关雪家彼吴洲云悲啼上车女骨肉不可分感慨都门别丈夫酒方醺我实门下士力薄蚋与蚊受恩不即报【不即或作即不】永负湘中坟【墓志云溪除名徙死湘中明年立皇太子有诏令许归葬元和八年葬河南此云湘中坟岂公作此诗时尚藁葬湘中耶】

送进士刘师服东归【元和七年夏在京师作】

猛虎落檻弃坐食如孤?【落一作知食或作贪荆公本如作茹?或作豚方从阁本此乃司马迁所谓猛虎在檻弃之中摇尾而求食也今按方说是也然则坐当作求矣但本皆作坐故未敢改耳】丈夫在富贵岂必守一门公心有勇气公口有直言奈何任埋没不自求腾轩仆本亦进士颇尝究根源由来骨鲠材喜被软弱吞低头受侮笑隐忍碑兀冤【侮笑或作笑侮碑

兀或作砮砮选江赋巨石砮砮而前却 砮音聿又勤没切兀五忽切】泥雨城东路夏槐作云屯【刘表传云屯田马】还家虽阙短【或作短阙】指日亲晨飧【束皙南陔诗馨尔膳洁尔晨飧】携持令名归【左氏令名载而行之】自足贻家尊【谢安问献之曰君书何如君家尊】时节不可翫亲交可攀援【音爰】勉来取金紫勿久休中园

嘲鲁连子【鲁连齐人太史公亦有取焉公嘲之之意不悉其安在意必有所讽于当时後世有不得而窥者】

鲁连细而黠【而方作儿】有似黄鹄子【鹄音曜】田巴兀老苍【齐之辩者曰田巴辩于狙丘而议于稷下毁五帝罪三王一日而服千人有徐刼弟子曰鲁连谓刼曰臣愿当田子使不得复说鲁连往见田巴云云巴于是杜口易业终身不谈 兀一作元陆机叹逝诗鸦髮成老苍】怜汝矜爪觜开端要惊人【淮阳王传既开端绪愿卒成之】雄跨吾厌矣高拱禅鸿声【禅音擅】若辍一盃水【辍或作啜】独称唐虞贤顾未知之耳

赠张籍【此诗大意以其子之慧为喜焉耳张籍後有祭公诗云坐令其子拜常呼幼时名与诗意合蔡寛大诗话云旧说退之子不慧读金根车改为金银然退之赠张籍诗所谓召令吐所记解摘了瑟僖则不应不识字也不知诗之所称乃此子乎】

吾老着读书【诸本着作嗜着如高士着幽禅少年着游宴之着】余事不挂眼有儿虽甚怜教示不免简君来好呼出踉蹌越门限【选潘岳射雉赋已踉蹌而徐来 踉音郎又音亮蹌音锵又七酱切】惧其无所知见则先愧赧【孟子观其色赧赧然 赧乃版切】昨因有缘事上马插手版【隋志曰笏晋宋以来谓之手版唐舆服杂事曰八座尚书执笏余执手版】留君住厅食使立侍盘 薄暮归见君迎我笑而莞【论语夫子莞尔而笑 莞胡版切】指渠相贺言此是万金产吾爱其风骨粹美无可拣试将诗义授如以肉贯鼎【初限切】开祛露毫末自得高蹇蹇【蹇或作 蹇或作产选连岗巘以 蹇屈原九章思蹇产而不释王逸曰蹇产诘屈也】我身蹈丘轲爵位不早绌固宜长有人文章绍编剡感荷君子德悦若乘朽栈【朽一作圯诗有栈之车毛曰役车也 悦许往切栈仕版切】召令吐所记解摘了瑟僖【诗瑟兮僖兮注矜庄寛大也 僖遐版切】顾视窗壁间亲戚竞觚觔【说文目觔觔也前汉觔龙虎之文旧矣 觔丑帘切觔武版切】喜气排寒冬逼耳鸣睨睨【诗睨睨黄鸟 睨胡显切睨户版切】如今更谁恨便可耕灞滻【灞滻长安二水名司马相如上林赋曰终始灞滻出入泾渭 滻音产】

调张籍【笔墨闲録曰退之参李杜透机关处于调张籍诗见之】

李杜文章在光焰万丈长【诸本焰作艷西京赋光□燭天庭】不知羣儿愚那用故谤伤【魏道辅云公作此诗为微之发盖元稹作李杜优劣论先杜後李故尔黄鲁直云吾友黄介读李杜优劣论曰论文正不当如此予以为知言】蚍蜉撼大树【蚍蜉音毗浮】可笑不自量伊我生其後举颈遥相望夜梦多见之昼思反微茫徒观斧凿?不瞩治水航想当施手时巨刃磨天扬垠崖划崩豁乾坤摆雷硠【垠方作根摆一作罢硠首郎切左思吴都赋曰菝擻雷硠

硠磕石声郭璞江赋巴东之峡夏禹疏凿絶岸万丈壁立霞駁又云黻如地裂豁若天开触曲崖以萦绕骇崩浪而相礪诗意谓李杜文章如禹疏凿江峡虽有迹可寻而当时运量之巧则今不可得而覩矣】惟此两夫子家居率荒凉帝欲长吟哦故遣起且僵剪翎送笼中【祢衡鹦鹉赋闭以雕笼剪其翅羽】使看百鸟翔平生千万篇金薤垂琳琅【书厥贡惟球琳琅玕萧子良古今篆隶书体有金错书倒薤书详见岫嶠山诗】仙官勅六丁【道书阳官六甲陰官六丁谓六甲中丁神也】雷雷卞取将【异人记云上元中台州道士王远知善易知人死生祸福作易總十五卷一日雷雨云雾中一老人语远知曰所泄者书何在上帝命吾摄六丁雷电追取】流落人间者【流或作留孔毅夫尝曰汉霍去病传诸将留落不偶今世俗皆作流落如江總诗流落今如此少陵诗流落意无穷皆只作流落字盖留谓迟留流谓飘流自不可拘以一义也】太山一豪芒【豪方作毫云李本作豪按孟子庄子秋豪之末班固答宾戏銳思豪芒之内字皆作豪然楚词秋毫微而见容王逸曰锐毛为毫是毫字通今按毫俗字当作豪为正】我愿生两翅【一作愿生两翅翎】捕逐出八荒精诚忽交通百怪入我肠刺手拔鲸牙【刺刃之也】举瓢酌天浆【魏道辅云高至于酌天浆幽至于拔鲸牙其思蹟深远如此讎止于曹刘沈宋之间耶】腾身跨汗漫【淮南子若士与汗漫期于九垓之上】不着织女襄【诗跂彼织女终日七襄襄驾也或作相非是着陟畧切】愿语地上友经营无太忙乞君飞霞佩【乞音气後汉乞扬生师】与我高颡颡【诗颡之颡之飞而上曰颡下曰颡颡胡结切颡音航】

卢郎中云友寄示送盘谷子诗两章歌以和之【两或作二卢郎中汀也盘谷在孟州齐源县太行山之南李愿居之因号盘谷子贞元十七年公送李愿归盘谷有序此诗元和七年冬长安作详诗意可见又云十年蠢蠢随朝行盖自贞元十九年癸未为御史登朝至元和十年壬辰为十年矣东坡云退之寻常诗自谓不逮老杜此诗独不减子美】

昔寻李愿向盘谷正见高崖巨壁争开张是时新晴天井溢【天井关名在太行山上水经曰天井溪出天井关北流注白水世谓之北流泉】谁把长劒倚太行【水自天井倾泻而下如长劒之倚山宋玉曰长劒耿介倚天外行音航】冲风吹破落天外【破或作波非是楚词冲风起兮水扬波】飞雨白日洒洛阳东蹈燕川食旷野【燕川地名】有馈木蕨芽满筐马头溪深不可厉【诗邶风深则厉浅则揭注云以衣涉水为厉马头溪名】借车载过水入箱平沙緑浪榜方口【榜音谤进船楚词九怀榜舫兮不流方口与前所谓燕川皆盘谷旁近小地名公盆池诗恰如方口钓鱼时亦其地也】?鸭飞起穿垂杨穷探极覽颇恣横【探音贪】物外日月本不忙归来辛苦欲谁为坐令再往之计堕眇芒【或作渺茫】闭门长安三日雪推书扑笔歌慨慷【推或作堆魏武帝曰慨当以慷忧思难忘选中矫厉而慷慨注抑扬意气也推他回切扑弼角切慷音康】旁无壮士遣属和远忆卢老诗颠狂开缄忽覩送归作字向纸上皆轩昂又知李侯竟不顾方冬独入崔嵬藏【诗陟彼崔嵬】我今进退几时决十年蠢蠢随朝行家请官供不报答无异雀鼠偷太仓行抽手版付丞相【手版见前篇赠张籍诗注】不待弹劾还耕桑【还或作归】

寄皇甫湜【湜字持正睦州新安人诗故云睦州吏】

敲门惊昼睡问报睦州吏【睦或作乃】手把一封书上有皇甫字坼书放牀头涕与泪垂四
【或作泗今从唐本及范谢校本云董令升编严陵集亦定作四垂四盖以涕与泪分言之犹
石鼓歌所谓对此涕泪双滂沱也】昏昏还就枕惘惘梦相值悲哉无奇术安得生两翅

病中赠张十八【张十八籍也贞元十四年公佐汴州籍为公所荐送明年登第又明年居丧
服除补太常寺太祝此诗谓抱能未施邦岂籍未第时作或既第而未仕时乎欧阳尝评此诗
见此日足可惜注】

中虚得暴下避冷卧北窗不蹋晓鼓朝安眠听逢逢【诸本作逢逢蜀本音部江切字当作逢
今按潮本作逢盖逢以逢逢从夆音义各异然古书如逢蒙逢丑父阙龙逢字皆只作逢而音
蒲江反疑逢有蒲红一音也而音蒲江者由蒲红而孳也当考】籍也处间里抱能未施邦文
章自娱戏金石日击撞龙文百斛鼎笔力可独扛【史记秦武王与孟说举龙文之鼎扛音江
】谈舌久不掉【张仪掉三寸舌掉徒吊切】非君亮谁双【亮或作谅】扶几导之言【几
或作机】曲节初撝

撝【此字从手或作枏枏从木从手者博雅云撞也子虚赋撝金鼓以木者自木名也】半涂
喜开凿派别失大江吾欲盈其气不令见麾幢牛羊满田野解旆束空杠倾樽与斟酌四壁推
罍缸玄帷隔雪风照炉钉明釭【选西都赋金釭衔璧注谓灯也

钉音定又音订釭音江】夜阑纵捩闾【鬼谷子有捩闾篇捩音摆】哆口踈眉彪【哆昌者
切】势侔高阳翁坐约齐横降【酈食其高阳人田横立田广为齐王身相之以距汉高帝使
食其说横凭轼下齐七十余城降胡江切】连日挟所有形躯?降肛【上匹江切下许江切
】将归乃徐谓【将归方作归将云远于将之毛传将行也故古人以送将归为三事焉今按
楚词言秋之可悲如在远行之处而登山临水以送欲归之人愈觉羁旅之牢落故其意象惨
戚而无聊耳将字将诗文同字异安得强为一说而谓送将归为三事乎必为三事而可颠倒
言之则楚词之与此诗皆不复成文理矣】子言得无咙【管子四民杂处则其言咙注咙乱
也咙音彪】回军与角逐【军或作君非是】斫树收穷庞【史记孙臆困龐涓伏兵马陵道
左斫大树白而书之曰龐涓死于此树之下公始也扶机导籍使之言且匿其麾幢解旆束扛
而示之弱籍乃纵其捩闾如酈生之下齐既连日挟其所有至躬病语咙乃为公败是犹孙臆
之收龐涓也龐皮江切】雌声吐款要酒壶缀羊腔君乃崑仑渠籍乃岭头泷譬如蚁垤微詎
可陵崕?【或作?字见南都赋曰其山则崕?嶠嶠蜀本苦江五江二切今本作?字书未见
】幸愿终赐之【一作愿终赐之教】斩拔柅与桩【柅音蘖桩株江切】从此识归处东流
水淙淙【籍既为公所败乃自以为岭头之泷不足以方崑仑之渠蚁垤之微不足以陵崕?之
山愿终受教于公而公所以导其所归也淙土江切】

杂诗【文选王粲曹植皆有杂诗李善谓遇物即言不拘流例是也或作杂言非此诗乃离骚
经所谓离心远逝道夫崑仑已而临睨旧乡曰国无人莫我知兮又何怀乎故都盖此意云】

古史散左右诗书置後前岂殊蠹书虫【蠹书或作书蠹】生死文字间古道自愚憊【陟降
切或作憊或作蠹】古言自包纏当今固殊古谁与为欣欢独携无言子共昇崑仑顛长风飘

襟裾遂起飞高圆下视禹九州【禹或作?】一尘集毫端遨嬉未云几下已亿万年向者夸夸子万坟厌其巔惜哉抱所见白黑未及分慷慨为悲咤【陟驾切】泪如九河翻指摘相告语虽还今谁亲翩然下大荒被髮骑骐驎【或作麒麟古书如战国策多用骐驎字其义一也东坡为公潮州庙碑终篇实取此意】

寄崔二十六立之【贞元四年侍郎刘太真知举放进士三十六人立之中第公尝为立之作蓝田县丞壁记元和十年也记所载立之战艺出人及言事黜官皆与诗意合又有赠立之诗乃在元和元年而此云别来就十年盖自元年後方相别至是作诗为寄亦当在元和十年也】

西城员外丞【西城谓蓝田元和初立之以前大理评事言事黜官再转为蓝田县丞】心迹两屈奇【谢灵运诗心迹双寂寞屈或作崛或作倔淮南子圣人无屈奇之服高诱曰屈短奇长也言服之不中汉广川王扬雄传选西征赋皆只用屈奇字今按汉书注屈奇异也其勿反】往岁战词赋不将势力随下驴入省门【唐进士皆骑驴少陵诗有骑驴三十载旅食京华春公与孟东野诗亦曰骑驴到京国欲知薰风琴】左右惊纷披【纷或作分】傲兀坐试席【陶靖节诗兀傲差若颖王维诗兀傲迷东西惟公与李义山诗傲兀逐戎旃皆作傲兀字用】深丛见孤罍文如翻水成初不用意为四座各低面【一作回】不敢捫眼窥【捫音列拘也茗溪诗话云音丽瑟琶拨也谓左右窥】升阶揖侍郎归舍日未歇佳句喧衆口考官敢瑕疵【或作疵避重韵而误改也】连年收科第若摘颌?髭回首卿相位通途无佗岐【途或作逵或作達】岂论校书郎袍笏光参差童稚见称说祝身得如斯侪辈妬且热喘如竹筒吹老妇愿嫁女约不论财货【约不或作不约货或作资亦避重韵之误此诗用二疵字二斯字不独此也】老翁不量分累月答其儿搅搅争附托【搅搅或作扰扰】无人角雄雌由来人间事翻覆不可知安有巢中鷁【音寇选陈琳檄文譬犹鷁卵始生翰毛而便陆梁放肆】插翅飞天陲【陲边也左氏?刘我边陲音垂】驹麕着爪牙【麕音迷着音灼】猛虎借与皮汝头有縲系汝脚有索縻?身泥沟间谁复稟指撝不脱吏部选可见偶与奇【古人以遇合为耦不遇为奇偶与耦通用霍去病传诸将常留落不耦李广传卫青陰受上指以为李广数奇顔曰言广命只不耦合也奇居宜切】又作朝士贬得非命所施客居京城中十日营一炊逼迫走巴蛮【鲍明远诗逼迫聚离散】恩爱座上离昨来汉水头始得完孤羈桁挂新衣裳【周庾信对烛赋灯前桁衣凝不亮桁音行又下浪切】盎弃食残糜苟无饥寒苦那用分高卑怜我还好古宦途同嶮巇【虚宜切】每旬遗我书【遗以醉切】竟岁无差池【左传何敢差池差楚宜切】新篇奚其思风幡肆逶迤【幡或作旛】又论诸毛功劈水看蛟螭【劈或作擘】雷电生睒?【睒音闪?音释二字或从日说见永贞行】角鬣相櫜披【或作枝亦以重韵而误改也】属我感穷景抱华不能摘【蜀本作把笔不能摘不能或作能不方从杭本云班固答宾戏摘藻如春华盖公得崔诗正当冬月故感穷景而不能摘发其春华耳上文诸毛乃谓笔也既隐其词则此不应又直言之故作把笔者亦非也今按方本及说皆是但其词有未足者故今略为补之论诸毛功必是为毛颖传而发但蜀本之误不待以此为辨而自明耳】唱来和相报愧叹俾我疵又寄百尺彩绯红相盛衰巧能喻其诚【巧或作功方从唐蜀本云列子矜巧能修名誉今按巧能喻其诚言崔遗我书并新篇彩帛巧于能達其意犹言工于某事云尔非以巧能为二字相连如列子之意也方说误矣】深浅抽肝脾【鲍明远诗肝心

尽崩抽】开展放我侧方餐涕垂匙朋交日凋谢存者逐利移子寧独迷误缀缀意益弥举头庭树豁【头或作颈】狂飈卷寒曦迢逖山水隔何由应埧箴【诗何人斯伯氏吹埧仲氏吹箴注土曰埧竹曰箴】别来就十年君马记騊𧐤【诗騊𧐤是驂注云黄马黑喙曰騊说文云𧐤马深黑色 騊音瓜𧐤音离】长女当及事谁助出帨縗【帨音锐縗音离】诸男皆秀朗几能守家规文字銳气在辉辉见旌麾摧肠与戚容【或作居或作眉居当为容字之讹也眉特以意定耳戚作蹙亦通孟子其容有蹙】能复持酒卮我虽未耄老【僖公九年左氏伯舅耄老无下拜耄谓年七十也】髮秃骨力羸所余十九齿飘飏尽浮危玄花着两眼视物隔襜?【上所宜切下吕支切方云离襜毛羽初生貌字本海赋然离字书无从衣者惟王维诗有独立何?襜嵇康琴赋作离纚古乐府作离襜陆羽茶经作籬籬义皆通今此作襜?岂古连绵字或可倒用不然襜字自入韵岂传者误耶姚令威曰唐本作视物剧隔襜不知谢本何以不出今按所见谢本寔校作剧隔襜下注澄字然义亦未通恐当作视剧隔襜?物字乃剧字之误而又重出遂去?字以就五言耳然亦无据不如且从方说徐更参考】燕席谢不诣游鞍悬莫骑敦敦凭书案【敦敦或作孜孜今从阁杭本作敦音都回切】譬彼鸟黏𧄢【丑知切用以黏鸟宋幽明錄多买𧄢以涂壁】且吾闻之师不以物自隳【自一作相】孤豚眠粪壤【眠一作服或作伏】不慕太庙牺【庄子或聘于庄子应其使曰子见夫牺牛乎衣以文绮食以刍菽及其牵而入于太庙虽欲为孤豚其可得乎】君看一时人几辈先腾驰过半黑头死陰虫食枯骰【骰残骨音疵】欢华不满眼【欢或作权】咎责塞两仪【魏人章疏云福不盈眦祸将溢世退之则曰欢华不满眼咎责塞两仪盖工于前也】观名计之利【或作实今按此句难晓窃意计犹校也言观其所得之虚名而校之以实利不足相补也】诎足相陪裨仁者耻贪冒受禄量所宜无能食国惠岂异哀癘罢【史记臣不幸有罢癘之病上音隆下音皮】久欲辞谢去休令衆睢睢【说文睢仰视也汉五行志万衆睢睢惊怪连日】况又婴疹疾【又或作自选思百忧而自疹注疹疾也集韵疚疹????三字通用

丑刃切】寧保軀不貲【後汉书不足以偿不貲之身 貲即移切】不能前死罢内寔慙神只旧籍在东都茅屋枳棘篱还归非无指灞渭扬春澌【流水为澌从水非离骚九歌流澌纷兮将来下】生兮耕吾疆死也埋吾陂【也一作兮】文书自传道不仗史笔垂【不或作奚选典论古之作者寄身于翰墨见意于篇籍不假良史之辞】夫子固吾党新恩释衔羈去来伊洛上相待安笊筭【尔雅鱼罟谓之罟江东呼小笼为筭诗施罟濊濊鱼网也筭亦取鱼器上音孤下音卑】我有双饮 其银得朱提【朱提汉县名属犍为郡县有朱提山出银纲汉朱提银八两为一流直一千五百八十他银一流直一千是为银货二品 朱音殊提音时】黄金涂物象雕镌妙工倕【庄子工倕旋而盖?矩注云倕尧时巧人也音垂】乃令千里鲸么麼微蠹斯【班彪曰么麼不及数子诗蠹斯注蛭蝓也蝗类以股鸣言工人之巧能使千里鲸鱼小如蠹斯也 麼忙果切蠹之中切】犹能争明月摆掉出渺弥【渺弥大水貌选渺弥滌漫上弭沼切下音眉】野草花叶细不辨蕢荑施【离骚经蕢荑施以盈室王逸注资音咨蒺藜也荑音緑王刍也施音施臬耳也】縣縣相纠结状似环城陴【音脾城上垣也】四隅芙蓉树擢?皆猗猗鲸以兴君身【或作兴居状或作状兴居皆非是荆公本作状君身近之唐本作兴君身乃得其正盖兴犹比也君□崔立之而言】失所逢百罹【诗逢此百罹百忧也】月以喻夫道僂俛励莫亏【莫或作其】草木明覆载妍丑齐荣萎【丑或作臭】愿君恒御之行止杂燧觶【杂或作亲或作新皆非是但洪本云澄作杂燧觶见内则言当常御此 杂于所佩燧觶之间也此乃得之】异日期对举当如合分支【通监元魏熙平元年立法在军有功者

行台给券当中豎裂一支给勲人一支送门下以防伪巧今人亦谓析产符契为分支帐即此义也公以双 之一赠崔故末句如此】

月蚀诗效玉川子作【李本无诗字或谓館中本效作删汪彦章本同 陈齐之曰退之效玉川子月蚀诗乃删卢仝冗语耳非效玉川也韩虽法度森严便无卢仝豪放之气】

元和庚寅斗插子月十四日三更中【四或作五此元和五年十一月十四日夜也作五非是】森森万木夜僵立【森森或作临临殊无义理按卢诗乃作森森盖自森转而为林自林转而为临也今改作森】寒气冱燠顽无风【选西京赋巨灵鼉冱平秘切燠虚器切冱燠诸本作鼉冱或作冱鼉方云卢诗虽作鼉冱然公多不用卢本语鼉冱用力貌冱燠壮大貌诗传不醉而怒谓之燠其义尤长 今按诸本不同未知孰是姑两存之】月形如白盘【李白诗少时不识月唤作白玉盘】完完上天东【诸本作貌貌或作兒兒今从杭范荆公本作完 今按完字说见酬卢云夫望秋诗洪本亦云古书完多误作兒此又转兒为貌耳】忽然有物来噉之不知是何虫如何至神物遭此狼狽凶【神异经狽无前足附狼而行选亦狼狽而可噉 狽音贝】星如撒沙出攢集争强雄【撒方作掇云侧手擊也卢诗作撒今本从之非也 今按侧手擊沙于义不通公於卢语固有损益然改此字却无文理当只作撒】油灯不照席是夕吐焰如长虹【如长或作长如】玉川子涕泗下中庭独行【独下或有自字】念此日月者为天之眼睛此犹不自保吾道何由行尝闻古老言疑是虾蟆精径圆千里纳女腹【白虎通曰日月径千里】何处养女百丑形杷沙脚手钝【杷或作杷音义同】谁使女解缘青冥黄帝有四目【诸本黄作皇方从杭本云帝王世纪谓黄帝用力牧常先等分掌四方各如已视故号黄帝四目一曰李贤後汉注汉人书黄多作皇皇字亦通洪以黄帝为尧则非也】帝舜重其明【淮南子曰舜二瞳子是谓重明】今天只两目何故许食使偏盲尧呼大水浸十日【十日事见淮南子】不惜万国赤子鱼头生女于此时若食日虽食八九无噉名【噉或作馋】赤龙黑鸟烧口热【黑鸟未详或谓日中三足鸟也鸟一作乌】翎鬣倒侧相搪撑婪酣大肚遭一饱【楚辞衆皆竞进以贪婪注爱财曰贪爱食曰婪婪与恹同卢含切】饥肠彻死无由鸣後时食月罪当死天罗磕币何处逃女形【磕币或作□匝磕或作匄或作?或无女字】玉川子立于庭而言曰地行贱臣仝【或作今汪本云仝字当句断亦与卢诗合】再拜敢告上天公【上天或作天上】臣有一寸刃可剗凶蠹肠无梯可上天天阶无由有臣踪寄牋东南风天门西北祈风通丁寧附耳莫漏泄薄命正值飞廉慵【吕氏春秋云风师曰飞廉汉书音义云飞廉能致风】东方青色龙牙角何研研从官百余座【此下或有从应二字荆公删去】嚼啜烦官家月蚀汝不知安用为龙窟天河赤乌司南方尾秃翘觜沙【觜或作 陟加切角上张也字亦作????作 訛】月蚀於汝头汝口开呀呀【或作齟齬齿不正也音牙与开口义不合此当音呼加切唐韵啥呀张口貌也 今详或改此字亦避重韵而误也】虾蟆掠汝两吻过忍学省事不以汝 啄虾蟆於菟蹲于西【左氏楚人谓虎为於菟於音乌菟音徒蹲音存】旗旄卫旄?【上音参下音沙】既从白帝祠又食於?礼有加【礼记天子大蜡八迎虎谓其食田豕?助驾切亦作蜡】忍令月被恶物食在於汝口插齿牙乌龟怯奸怕寒缩颈以殼自遮终令夸娥扶女出【列子帝命夸娥氏二子负二山注夸娥盖有神力者也娥或作娥今从列子校扶或作扶非是】卜师烧锥鑽灼满板如星罗此外内外官【汉天文志经星常宿中外官百一十八名七百八十三星】琐细不足科臣请悉埽除慎勿许语令啾譁并

光全耀归我月盲眼镜净无纖瑕【全或作金瑕或作霞皆非是】弊蛙拘送主府官【弊或作毙今按弊蛙犹卓茂言敝人也不然则当改从毙字盖此时蛙虽未毙而其罪已当死矣】帝箸下腹尝其蟠【或作蹠蹠腹下白处也蹠足跖也当作蹠左氏宣公二年蹠其腹蹠音婆】依前使兔操杵臼玉塔桂树闲婆娑【酉阳杂俎月中有桂高五百丈】恒娥还宫室【方作堂】太阳有室家【礼记君之与后犹日之与月盖室家之义也】天虽高耳属地感臣赤心使臣知意【臣知或作知臣今按下文云虽无明言潜喻厥旨则此句乃谓天感悟臣心使臣默知天意耳诸本多作使知臣意非是其下所云有气有形以下即天意也】虽无明言潜喻厥旨【明或作口】有气有形皆吾赤子虽忿大伤忍杀孩稚【大或作天】还汝月明安行于次尽释衆罪以蛙磔死【磔音责方云卢诗新史以为讥元和逆党然稽之岁月不合盖元和初宦官已横恣故讥之非为逆党也今按卢韩二诗必有所为而作但未有以见其所指为何人何事耳新史固谬方说恐亦未必然也】

孟生诗【诸本孟下有先字此诗以篇首二字为题作孟先生非东野志云年几五十始以尊夫人命来京师从进士试而登科记东野及第在贞元十二年此诗未第前作以其下第送之谒张建封于徐也贞元四年建封镇徐州李习之常以书荐东野有曰郊将为人所得而大有立于世与其短命而死皆不可知二者将有一于郊他日为执事惜之其後韦庄请追赠不及第人郊在其中而摭言谓庄以郊为不第者为误且曰郊贞元十二年及第佐徐州幕卒则东野果为建封所用矣今考新旧史及公所志东野墓尝佐郑余庆于东都余庆镇兴元奏为从事辟书下而卒未尝佐徐也摭言误耶将用之未及而余庆所得耶卒如习之所料耶按史建封卒以贞元十六年而东野後建封十四年卒或者建封将用之未及而已卒亦未可知也时东野亦有答韩愈李观因献张徐州诗有富别愁在顔贫别愁销骨云云】

孟生江海士【生一作郊】古貌又古心尝读古人书谓言古犹今【尝或作常】作诗三百首宵默咸池音【庄子黄帝之乐曰咸池诸本宵作冥李习之与张建封书引公此语亦用宵字】骑驴作京国欲和薰风琴【家语曰舜弹五弦之琴曰南风之薰?】岂识天子居九重郁沉沉【王维哀词连金华与玉堂兮宫阁郁其沈沈】一门百夫守无籍不可寻【籍者为二尺竹牒记其年纪名字物色县之宫门按省相应乃得入也】晶光荡相射【前汉太阳之晶晶亦光也射食亦切】旗戟翩以森迁延乍却走【汉王商传单于仰视迁延却退】惊怪靡自任【如林切】举头看白日泣涕下沾襟竭来游公卿【竭音揭】莫肯低华簪谅非轩冕族应对多差参【艺苑雌黄云古诗押韵或有语顛倒而理无害者如退之以参差为差参以玲珑为珑玲是也汉皐诗话云韩愈孟郊辈才豪故有湖江白红慨慷之句後人亦难仿倣】萍蓬风波急桑榆日月侵奈何从进士此路转岖【王褒洞箫赋岖嶽岵崎音区钦】异质忌处羣孤芳难寄林【顔延年吊屈原文物忌坚芳人讳明洁太白诗羣沙秽明珠衆草凌孤芳】谁怜松桂性竞爱桃李陰朝悲辞树叶夕感归巢禽顾我多慷慨穷檐时见临【檐或作閤考荀子史记子贡传閤字为正】清宵静相对髮白聆苦吟【聆或作耻或作怜】采兰起幽念【束皙南陔诗言采其兰采兰言念亲思归也起或作赴】眇然望东南【望或作思】秦吴?且阻【秦长安吴东野所居】两地无数金我论徐方牧【张建封也方一作州】好古天下钦竹实凤所食【诗义疏曰凤非梧桐不栖非竹实不食】德馨神所歆【书黍稷非馨明德惟馨】求观衆丘小必上泰山岑【孟子孔子登太山而小天下岑锄簪切】求观衆流

细必泛沧溟深【孟子观水有术必观其澜竹实德馨秦山沧溟皆言建封也溟或作海】子其聽我言可以当所箴既获则思返无为久滞淫卞和试三献【琴操卞和得玉献楚怀王?刖献平王又刖平王之子立复献之中果有玉封陵阳侯】期子在秋砧

射训狐【唐五行志鸛鷖一名训狐或曰训狐其声因以名之此诗贞元中作时德宗以强明自任倚裴延龄韦渠牟等商天下事自谓明而卒陷不明士之浮躁干进者争出其门诗意端有所讽也梅圣俞集有拟韩吏部射训狐诗亦各有所寓意云耳】

有鸟夜飞名训狐【名或作呼】矜凶挟狡夸自呼乘时陰黑止我屋声势慷慨非常羸安然大唤谁畏忌【唤或作唳曹子建鷖雀赋不肯首服烈颈大唤】造作百怪非无须聚鬼徵妖自朋扇摆掉拱桷颓墜涂【桷或作角选栾拱夭矫而交结书惟其涂墜茨摆补买切掉徒吊切暨音泊】慈母抱儿怕入席那暇更护鸡窠雏我念乾坤德泰大卵此恶物常勤劬纵之岂即遽有害斗柄行拄西南隅谁谓停奸计尤剧【尤或作犹】意欲唐突羲和乌【羲和日御五经通义日中有三足乌】侵更历漏气弥厉何由侥幸休须臾咨余往射岂得已候女两眼张睢盱【列子而睢睢而盱盱上音虽下香于切】梟惊堕梁蛇走窦【梟音浇走一作入】一夫斩颈羣雏枯【夫馆本作矢方云或谓矢何以能斩颈也鲍明远诗黄间潜穀卢矢直刳绣颈碎锦翼诗人之语顾随所用耳今按方说虽有理然以诗考之似只是公亲往射而梟惊随梁故佐之者得以刃斩其颈耳不必改字强说也】

将归赠孟东野房蜀客【蜀客名次卿】

君门不可入势利互相推借问读书客胡为在京师举头未能对闭眼聊自思倏忽十六年终朝苦寒饥宦途竟寥落鬢髮坐差池【晋陶侃曰老子婆娑正坐君辈坐字原此也坐或作生】颍水清且寂箕山坦而夷【嵇康高士传曰许由字武仲尧舜欲让以天下由乃遯耕于中岳颍水之阳箕山之下此即公祭老成文云当求数顷之田于箕颖之上之义也】如今便当去咄咄无自疑【後汉咄咄子陵晋史殷浩为温所废终日书空作咄咄怪事四字疑或作痴亦通一作女无痴则误矣】

答孟郊【东野集有别公诗此篇疑公所以答也公贞元十二年七月佐董晋于汴州】

规模背时利【模或作谟或作谋】文字覩天巧【此效东野酬樊宗师云梁惟西南屏山厉水刻屈此效宗师鲁直云子瞻诗妙一世乃云效庭坚体盖退之戏效孟郊樊宗师之妙以文滑稽耳覩七虑切】人皆余酒肉子独不得饱才春思已乱始秋悲又搅【古巧切】朝餐动及午夜讽恒至卯名声暂羶腥肠肚镇煎燂【初爪切杭字燂作俗字也】古心虽自鞭【鞭字盖庄子从其後而鞭之者也】世路终难拗【张衡浑仪拗去其半於绞切】弱拒喜张臂猛挈闲缩爪见倒谁肯扶从嗔我须齧【选口齧霜刃此联即公志子厚墓所谓落?弃不一引手救反挤之又下石焉者是也齧五巧切】

从仕【贞元十七年公始从调京师】

居闲食不足从仕力难任两事皆害性一生恒苦心黄昏归私室惆怅起叹音【惆一作怊】
弃置人间世【或作事汉张子房愿弃人间事从赤松子游耳】古来非独今

短灯檠歌【本或作灯檠姚令威曰古诗灯檠昏鱼目读檠为去声集韵檠渠映切有足所以
几物又檠音平声榜也非灯檠字韩诗墙角君看短檠弃亦误也按灯檠昏鱼目乃唐彦谦诗
李商隐诗亦有九枝灯檠夜珠圆是唐人固以去声读也然白乐天诗有铁檠移灯背自注曰
檠去声读则知唐人本二声通用古檠只用檠字晋宋诸人集尚可考】

长檠八尺空自长短檠二尺便且光黄帘绿幕朱户闭风露气入秋堂凉裁衣寄远泪眼暗搔
首频挑移近牀太学儒生东鲁客二十辞家来射策夜书细字缀语言两目眊昏头雪白【眊
音蚩】此时提携当案前【携方作挈】看书到晓那能眠一朝富贵还自恣长檠高张照珠
翠【高张或作焰高珠或作朱】吁嗟世事无不然墙角君看短檠弃【苏诗有云免使韩公
悲世事白头还对短灯檠苏时谪于黄其侄安节下第远来故云】

送刘师服【公诗有赠刘师服至是又有送刘师服按石鼎联句元和七年十二月道士轩辕
弥明自衡山来旧与刘师服进士衡湘中相识将过太白知师服在京夜抵其居宿则此诗与
前送进士刘师服东归其八年夏作欬然考登科记无有刘师服集中又有刘师命者岂其兄
弟欬】

夏半阴气始淅然云景秋【淅或作晰亦作皙又作皙明也之世切高唐赋晰兮若姣姬扬袂
障日而望所思晰与皙同故今本讹为淅也今按淅为淅沥凄凉之义皙为明义此诗上云阴
气始下云云景秋则与皙义不相应而宜为淅□之意矣盖由淅而误为晰又因晰而转为皙
也】蝉声入客耳惊起不可留草草具盘饌不待酒献酬【待方作持】士生为名累有似鱼
中钩【中陟仲切见一卷赴江陆途中寄三学士诗】齎财入市卖贵者恒难售【汉宣帝每
买饼所从买家辄大雠雠与售同】岂不畏顛顛【选顾仆夫之顛顛
上音樵下音悴或作久憔悴】为功忌中休勉哉耘其业以待岁晚收

东雅堂昌黎集注卷五

卷六

钦定四库全书

东雅堂昌黎集注卷六

古诗

符读书城南【城南公别墅符公之子孟东野有喜符郎诗有游城南韩氏庄之作按公墓铭及登科记公之子曰昶登长庆四年进士第符岂昶之小字耶元和十一年秋作】

木之就规矩在梓匠轮舆【孟子尽心梓匠轮舆能与人规矩不能使人巧】人之能为人由腹有诗书诗书勤乃有不勤腹空虚欲知学之力贤愚同一初【同一或作一同非是】由其不能学所入遂异闻两家各生子提孩巧相如【提或作啼非是巧或作两】少长聚嬉戏【少读如多少之少汉贾谊匈奴东平王传三见公此诗与刘统军李虚中志亦三用】不殊同队鱼【山谷次韵高子勉有云忽作飞黄去顿超同队鱼皆用公语也】年至十二三头角稍相踈二十渐乖张清沟映污渠三十骨骼成【骼音格记掩骼埋胔】乃一龙一猪飞黄腾踏去【选张景阳七命整云轂驂飞黄】不能顾蟾蜍一为马前卒鞭背生虫蛆【鞭背或作背上非是】一为公与相潭潭府中居【陆唐老曰退之不絶吟六艺之文不停披百家之编招诸生立馆舍勉励其行业之未至而深戒其责望于有司此岂有利心于吾道者佛骨一疏议论奋激曾不以去就祸福回其操原道一书累千百言攘斥异端用力殆与孟轲氏等退之所学所行亦无愧矣惟符读书城南一诗乃骇目潭潭之居揜鼻虫蛆之背切切然饵其幼子以富贵利達之美若有戾于向之所得者矣】问之何因尔【或作耳】学与不学与金璧虽重宝费用难贮储学问藏之身身在则有余【则或作即】君子与小人不系父母且【诗巧言悠悠昊天曰父母且且语助也且子鱼切】不见公与相起身自犁鉏【阁本作不见公与汝幸免自犁鉏今按阁本之谬有如此者它可尽信耶】不见三公後寒饥出无驴【荀子虽王公大夫之子孙也不能属于礼义则归之庶人庶人之子孙也积文学正身行能属于礼义则归之卿相士大夫】文章岂不贵经训乃菑畬【易不菑畬尔雅田一岁曰菑三岁曰畬吕原明杂记云少陵诗云文章一小技于道未为尊文者载道之器安得谓之小技顾所用如何耳韩退之诗曰文章岂不贵经训乃菑畬此说有可取焉菑畬音淄于】潢潦无根源【左氏潢污行潦之水潢胡光切潦音老】朝满夕已除人不通古今【或作今古】马牛而襟裾行身陷不义况望多名誉【音欬】时秋积雨霁【方作霁】新凉入郊墟灯火稍可亲简编可卷舒岂不旦夕念为尔惜居诸【居诸谓日月诗日居月诸】恩义有相夺作诗劝踌躇【鲁直尝书此诗跋其後曰或谓韩公当开後生以性命之学不当诱之以富贵荣显涪翁曰熙寧元丰间大儒之过也又何学焉孔子曰齐景公有马千驷死之日民无得而称焉伯夷叔齐饿于首阳之下民到于今称之韩公之言其于劝獎之功异趣而同归也】

示爽【谱系公子侄无名爽者疑为韩湘小字湘登长庆三年进士第】

宣城去京国里数逾三千念汝欲别我解装具盘筵日昏不能散起坐相引牵冬夜岂不长達旦灯烛然座中悉亲故谁肯舍汝眠念汝将一身西来曾几年名科擢衆俊【名科或作科名】州考居吏前今从府公召府公又时贤时辈千百人孰不谓汝妍汝来江南近里间故依然【汝来或作此来故或作固】昔日同戏儿看汝立路边人生但如此【但或作得】其实亦可怜吾老世味薄因循致留连强顏班行内【行胡郎切此诗当是知制誥时作】何实非罪愆才短难自力惧终莫洗前【音箋】临分不汝诳有路即归田

人日城南登高【荆楚岁时记正月七日为入日董勋问礼俗正月一日为鷄二日为狗三日为猪四日为羊五日为牛六日为马七日为入城南公别墅所在以故亲交子侄来为人日之集也】

初正候才兆涉七气已弄霭霭野浮阳晖晖水披冻圣朝身不废佳节古所用亲交既许来子姝亦可从【姝一作侄】盘蔬冬春杂罇酒清浊共令徵前事为【东汉贾景伯有酒令九篇今不传刘贡父云唐人饮酒喜以令为罚今人以丝管讴歌为令即白傅所谓醉翻欄衫抛小令是也其举故事物色为令即所谓令徵前事为是也 令去声】觴咏新诗送扶杖凌圯址【或作址】刺船犯枯葑【庄子渔父言吾去子矣乃刺船而去葑菰根江东有葑田梁庾肩吾诗黑米生菰葑刺七亦切葑方用切】恋池羣鸭回释峤孤云纵人生本坦荡【论语】

【君子坦荡荡】谁使妄恠恠【楚辞愁恠恠于山陆注恠恠犹困苦也上音控下音粽】直指桃李阑幽寻寧止重【幽寻犹作寻幽】

病?【说文?鸢也鸟之贪恶者其性好攫而善飞公意盖有所讥也】

屋东恶水沟有?堕鸣悲青泥揜两翅【揜或作淹又作滄】拍拍不得离【东方朔传擊之拍拍】羣童叫相召瓦砾争先之计校生平事杀却理亦宜夺攘不愧耻饱满盘天嬉晴日占光景高风送追随【或作恣追飞】遂凌紫凤羣肯顾鸿鹄卑【遂或作拟紫或作鸢鸿鹄或作鹄鴈今按紫鸿是假对】今者运命穷?逢巧丸儿中汝要害处汝能不得施於吾乃何有不忍乘其危丐汝将死命【丐或作救又作与丐兄弟死命寇恂传语】浴以清水池朝餐辍鱼肉暝宿防狐狸自知无以致蒙德久犹疑饱入深竹丛饥来傍阶基亮无责报心【亮或作谅】固以聽所为昨日有气力飞跳弄藩篱今晨忽径去【径或作劲】曾不报我知侥幸非汝福天衢汝休窥京城事弹射豎子岂易欺勿讳泥坑辱泥坑乃良规【良或作汝非是】

华山女

街东街西讲佛经撞钟吹螺鬧宫庭广张罪福资诱脇听衆狎恰排浮萍【资或作恣狎恰唐人语白乐天樱桃诗恰恰举头千万颗或作恰似非是】黄衣道士亦讲说座下寥落如明星华山女儿家奉道欲驱异教归仙灵洗粧拭面着冠帔白咽红颊长眉青遂来昇座演真诀观

门不许人开局不知谁人暗相报訇然振动如雷霆

【訇音轰】扫除衆寺人迹絶骝騄塞路连鞢鞢【後汉□鞢耀日 音菑萍】观中人满坐观外後至无地无由聽抽钗脱钿解环佩堆金叠玉光青荧【诸本青作晶字本西都赋】天门贵人传诏召六宫愿识师顔形玉皇颔首许归去乘龙驾鹤来青冥豪家少年岂知道来绕百币脚不停云窗雾阁事恍惚重重翠幔深金屏仙梯难攀俗缘重浪凭青鸟通丁宁【汉武帝故事七月七日上于承华殿齐正中忽有一青鸟从西方来集上问东方朔朔曰此西方母欲来有顷王母至有三青鸟如乌夹侍王母旁诗意盖取此青或作三云三鸟王母使见山海经楚词九叹江文通杂诗 今按陶诗云三青鸟则青字亦未为无据也或怪公排斥佛老不遗余力而於华山女独假借如此非也此正讥其衒姿色假仙灵以惑衆又讥时君不察使失行妇人得入宫禁耳观其卒章豪家少年云窗雾阁翠幔金屏青鸟丁宁等语?慢甚矣岂真以神仙处之哉】

读皇甫湜公安园池诗书其後【公集有和湜陆浑山火及书公安园池诗後今考持正集二诗皆亡其他诗亦未尝有一传世者偶然逸耶抑皆不足以传世也刘贡父云持正不能诗倚摭粪壤间公所以讥之岂或然欤湜尝为陆浑尉仕至工部郎中分司东都留守裴度辟为判官此诗当在陆浑尉後为郎中前作】

晋人目二子其犹吹一吷【庄子惠子曰吹劒首者吷而已尧舜人之所誉也道尧舜于戴晋人之前譬犹一吷也注疏戴晋人梁之贤者姓戴字晋人 吷音血】区区自其下顾肯挂牙舌春秋书王法不诛其人身尔雅注虫鱼定非磊落人湜也困公安【公安县属江陵】不自闲穷年枉智思倚摭粪壤污秽岂有臧【古本只如此一本不自闲下有其闲字粪壤下有闲字蜀本闲字下有粪壤多字岂字下有必字有字下有否字又一本无必字否字而臧字下有不臧字谢本穷年作至闲而注云近本增足八字不知所校之自语浅俗非韩文胡元任云我有一池已下当为别篇恐或然也 今按此诗多不可晓当□或云世有石本与今本同知旧本脱误明矣谓有所增八字也然诸公校本皆不言不知果然否也】诚不如两忘但以一槃量我有一池水蒲苇生其间虫鱼沸相嚼日夜不得闲我初往观之其後益不观观之乱我意不如不观完用将济诸人舍得业孔顔百年诂几时君子不可闲

路傍堠【元和十四年春出为潮州作】

堆堆路傍堠【堆堆或作拆拆唐本作堠堠皆非是】一双复一只迎我出秦关送我入楚泽千以高山遮万以远水隔【远或作大】吾君勤聽治照与日月敌臣愚幸可哀臣罪庶可释何当迎送归缘路高历历

食曲河驿【驿在商邓之间公之潮州自蓝田关入商陵将过邓州而作】

晨及曲河驿凄然自伤情【凄或作淒】羣鸟巢庭树【鸟或作乌】乳雀飞檐楹而我抱重罪子子万里程亲戚顿乖角【或作樵】图史弃纵横下负明义重【明或作朋 按杜诗於公负明义作朋非是】上孤朝命荣杀身谅无补何用答生成【用或作由】

过南阳【南阳邓州公赴潮州日作】

南阳郭门外桑下麦青青行子去未已春鸠鸣不停秦商邈既远湖海浩将经孰忍生以戚吾其寄余龄【戚或作蹙】

泷吏【元和十四年赴潮州作】

南行逾六旬始下昌乐泷【昌乐泷溪名水湍浚为泷昌乐诸本作乐昌今从杭蜀本云欧公尝以刘仲章言考归旧本蒋颖叔云李君谓乐昌五里有昌山有乐石泷在县上五里今按欧云县名乐昌泷名昌乐也泷闾江切又音双】险恶不可状【唐本作乐昌险恶状非是】船石相舂撞往问泷头吏潮州尚几里行当何时到土风复何似泷吏垂手笑【东坡诗泷吏无言只笑依】官何问之愚譬官居京邑【或作譬如官居北一本作牧郡邑】何由知东吴【一作京都】东吴游宦乡官知自有由潮州?处所有罪乃窜流依幸无负犯【吴人称我曰依音农】何由到而知官今行自到那遽妄问为【妄或作妾非是】不虞卒见困汗出愧且骇吏曰聊戏官依尝使往罢岭南大抵同官去道苦辽下此三千里有州始名潮恶溪瘴毒聚雷电常汹汹【楚辞听波声之汹汹 汹汹音胥】鳄鱼大於船【永州记曰鳄鱼大者凡数丈善食人一生百卵及成形则有为蛇为龟为蛟者甚灵公有祭鳄鱼文 鳄五各切】牙眼怖杀依州南数十里【数十诸本作十数谢本作数十方从阁本作斗数云杭斗作?义同史记书盛山斗入海斗絶也今以地里考之谢本为是此句舆斗入海文意絶不同方说误矣】有海无天地【海或作水】飓风有时作【飓风见一卷赴江陵途中寄三学士诗注

飓音具】掀簸真差事【差音詫】圣人於天下於物无不容比闻此州囚亦有生还依官无嫌此州固罪人所徙【阁本作官嫌此州恶固人之所徙】官当明时来事不待说委【李本作官当来时事不待说而委】官不自谨慎宜即引分往胡为此水边神色久慊慊【楚辞心慊慊而不我与】慌【上他朗切下胡晃切】?大餅豐小所任自有宜【?居郎切又或作瓶音仿周礼有瓶人义不相近】官何不自量满溢以取斯工农虽小人事业各有守不知官在朝有益国家不得无虱其间【诸本虱作风今从唐杭荆公洪谢本云商君二十六篇大抵以仁义礼乐为虱官曰六虱成俗兵必大败洪庆善引阮籍语亦非也】不武亦不文仁义饰其躬【饰或作飭躬或作奸】巧奸败羣伦【杭蜀本如此奸或作躬羣或作其羣伦方从阁本作伦羣云谓败其伦败其羣也羣伦谓无义今按伦羣不词而冠乎羣伦乃扬子云语又正与其躬为对不可谓之无义】叩头谢吏言始慙今更羞历官二十余国恩竝未酬凡吏之所诃嗟实颇有之不即金木诛【庄子为外刑者金与木也】敢不识恩私潮州虽云远虽恶不可过【虽恶方作惟今据洪谢本皆作虽下注澄字其义差长盖再叠上句虽远又接下文而言也二字或又作惟思虽亦可通然与下文不相应】於身实已多敢不持自贺【持或作特】赠别元十八协律六首【或无别字元十八于诗不见其名柳子厚集有送元十八山人南游序亦不着其名樊泽之谓元十八集虚见乐天集游大林寺序桂林伯裴行立也此诗赴潮州道中元和十四年作】

知识久去眼【去或作絶】吾行其既远瞢瞢莫訾省【阁蜀本作毁史记胶西王传遂为无訾省苏林谓为无訾録无所省録也今按苏注不可晓而顔注又以为不省訾则亦非是礼记

不訾重器母訾金玉成器注皆云思也详此盖以訾为思虑计度之意云 曹莫东眉登母亘三切訾音紫】默默但寝饭子兮何为者冠佩立宪宪【诗显显令德礼作宪宪校本多读宪为显诗又云无然宪宪传曰犹欣欣也】何氏之从学兰蕙已满畹【已或作以】於可翫其光以至岁向晚治惟尚和同【老子和其光同其尘治惟或作时治】无俟於謇謇【楚辞余固知謇謇之为患注忠正貌音蹇】或师絶学贤不以艺自挽【周礼辇车组挽注人挽之以行挽音挽】子兮独如何能自媚婉婉【上於阮切下无远切一本作媚婉婉】金石出声音【庄子曾子居卫緼袍无表曳紵而歌商颂声满天地若出金石】宫室发关键【老子善闭者无关键而不可开】何人识章甫【庄子宋人有资章甫而适越越人断髮文身无所用之】而知骏蹄踠【选东都赋马踠余足踠跌也於阮切】惜乎吾无居不得留息偃临当背面时【公祭张员外文亦曰解手背面遂十一年】裁诗示缱绻【上音遣下苦远切】

英英桂林伯【裴行立元和十二年以御史中丞为桂管观察使伯侯伯也】实维文武特【诗百夫之特】远劳从事贤来吊逐臣色南裔多山海道里屡纡直风波无程期所忧动不测子行诚艰难【行一作往难一作险】我去未穷极临别且何言有泪不可拭【何或作无】

吾友柳子厚其人艺且贤吾未识子时已览赠子篇【子厚集有送元十八南游序公尝有书与子厚谓见送元生序已览赠子篇盖谓是也】寤寐想风采【汉霍光传天下想闻其风采】於今已三年不意流窜路旬日同食眠【旬日或作兼旬】所闻昔已多所得今过前如何又须别使我抱悁悁【诗中心悁悁於缘切】

势要情所重排斥则埃尘骨肉未免然又况四海人【又况或作况又】嶷嶷桂林伯【史记其德嶷嶷嶷鱼力切】矫矫义勇身【诗矫矫武臣矫居夭切】生平所未识待我逾交亲【逾或作如】遗我数幅书继以药物珍药物防瘴厉书劝养形神【形一作精】不知四罪地【书四罪而天下咸服】岂有再起辰穷途致感激肝胆还轮囷【前汉邹阳传蟠木根柢轮囷离奇 困去轮切】

读书患不多思义患不明患足已不学【已或作以足已而不学史记周亚夫赞论】既学患不行子今四美具实大华亦荣王官不可阙未宜後诸生嗟我摈南海无由助飞鸣【南海一作海南】寄书龙城守【柳子厚时守柳州龙城柳州也】君骥何时秣峡山逢颶风【峡山山名颶海风名见第一卷将赴江陵途中寄赠翰林三学士诗注颶音具】雷电助撞摔【庄子齐人之井饮者相摔也 撞宅江切摔昨没切】乘潮簸扶胥【南海神庙碑曰扶胥之口黄木之湾】近岸指一髮两岩虽云牢木石?飞发屯门虽云高亦映波浪没余罪不足惜子生未宜忽胡为不忍别感谢情至骨

初南食貽元十八协律【元和十四年抵潮州後作】

蜃实如惠文骨眼相负行【惠或作车山海经云蜃形如车文见玉篇骨李本云疑当作背岭表録异蜃眼在背上雌负雄而行地里志云交址有蜃形如惠文冠】蚝相黏为山百十各自生【岭表録异云蚝即牡蛎也初生海边如拳石四面渐长高一二丈者巉岩如山 蚝音豪字

书无蚝字董彦远云五代潘崇彻败王逵兵于蚝石亦地名不应不见字书盖阙误】蒲鱼尾如蛇【蒲鱼即?鱼也】口眼不相营【方作紫】蛤即是虾蟆【本草注云青蛙鼃蛤长脚蠓子皆虾蟆之类】同实浪异名章举马甲柱【释音云章举有八脚身上有肉如白亦曰章鱼马甲柱今江瑶也即郭璞江赋所谓玉珧】鬬以怪自呈其余数十种莫不可叹惊我来御魑魅【左氏传云流四凶投诸四裔以御魑魅公言其贬斥也】自宜味南烹调以咸与酸【以或作之】笔以椒与橙【诗左右芼之芼亦调也张协曰燂以秋橙芼音冒橙除更切】腥臊始发越咀吞面汗骍【思营切赤色】惟蛇旧所识实憚口眼狞【尼更切】开笼听其去郁屈尚不平卖尔非我罪不屠岂非情不祈灵珠报【搜神记隋侯行见有大蛇伤者救而活之其後蛇衔珠以报淮南子所谓隋侯之珠者是也】幸无嫌怨并【无或作不】聊歌以记之又以告同行【记或作寄】

宿曾江口示侄孙湘二首【湘字北渚老成之子公兄弇之孙元和十四年赴潮州作】

云昏水奔流天水潏相围三江灭无口其谁识涯圻暮宿投民村高处水半扉犬鸡俱上屋不复走与飞篙舟入其家暝闻屋中啼【音希哀而不泣曰啼】问知岁常然【知或作之选陆机叹逝赋经终古而常然】哀此为生微海风吹寒晴波扬衆星辉仰视北斗高不知路所归

舟行亡故道【亡或作止】屈曲高林间林间无所有奔流但潺潺嗟我亦拙谋致身落南蛮茫然失所诣无路何能还答柳柳州食虾蟆【公在潮州子厚在柳州时元和十四年也】

虾蟆虽水居水特变形貌【下水字或作未方作水云言于水族之中特异其形貌也今按此字此说皆不成文理阙之可也】强号为蛙蛤於实无所校【或作较或作效】

虽然两股长【然一作云】其奈脊皴疱【脊皴一作背脊疱匹豹切】跳踯虽云高意不离泞淖【左氏晋戎马还泞而止又有淖于前意或作竟】今按文义作意为是下文又有竟不字不应复出泞音佞淖音闇】鸣声相呼和【胡过切】无理只取闇周公所不堪洒灰垂典教【周官蝓氏掌去鼃龟焚牡鞠以灰洒之则死洒与洒同】我弃愁海滨【方作渚】恒愿眠不觉【古孝切】叵堪朋类多【叵或作颇】沸耳作惊瀑【音豹】端能败笙磬【一作磬钟】仍工乱学校虽蒙句践礼【韩子越王伐吴欲人之轻死出见怒鼃乃为之轼从者曰奚敬于此王曰为其有气故也】竟不闻报效大战元鼎年【汉武帝纪元鼎五年秋鼃虾蟆鬬】孰强孰败桡【或作挠字从木左传畏君之震师徒挠败杜云挠曲也】居然当鼎味岂不辱钓罩余初不下喉近亦能稍稍常惧染蛮夷失平生好乐【方从唐本如此诸本或作平生性不乐阁本作不好今按此句未详当阙礼有所好乐好呼报切乐五教切】而君复何为甘食此豢豹猎较务同俗【孟子鲁人猎较孔子亦猎较较音角】全身斯为孝【礼曰父母全而生之子全而归之可谓孝矣】哀哉思虑深未见许回櫂

别赵子【赵子名德公为潮州刺史时摄海阳尉督州生徒者东坡所谓潮人初未知学公命赵德为之师即其人也公自潮移袁诗以别之德潮人公欲与俱而不可耳】

我迁於揭阳【揭阳汉县属南海郡至唐为潮州治广州记云大庾始安临贺桂阳揭阳为五岭韦昭音曰揭其逝切师古曰揭音竭】君先揭阳居揭阳去京华其里万有余【万有余庄子语】不谓小郭中有子可与娱【诗郑风聊可与娱】心平而行高【汉宣元六王传韦元成经明行高】两通诗与书婆娑海水南【晋陶侃为荆州刺史将归顾谓王衍曰老子婆娑正坐诸君辈】簸弄明月珠及我迁宜春【元和十四年七月己丑宪宗上尊号大赦天下十二月二十四日公自潮州量移袁州郡即宜春郡也】意欲携以俱摆头笑且言【一作不可】我岂不足欤又奚为於北往来以纷如【北或作此非是以或作各】海中诸山中幽子颇不无相期风涛观已久不可渝又尝疑龙鰕果谁雄牙须蚌羸鱼鼃虫

【蚌音棒羸卢戈切与螺同】瞿瞿以狙狙【诗狂夫瞿瞿注无守貌瞿音衢又音屨】识一已忘十【已一作以山谷谢本以皆作已今从黄谢】大同细自殊欲一穷究之时岁屡谢除今子南且北岂非亦有图人心未尝同【左传人心之不同如其面焉】不可一理区【或作驱】宜各从所务未用相贤愚【务或作好或作胜相一作分】

除官赴阙至江州寄鄂岳李大夫【谓李程也公元和十五年九月公自袁州拜国子祭酒行次盆城作】

盆城去鄂渚【浔阳记盆水出青盆山因以为名离骚经曰乘鄂渚而久顾鄂渚今鄂州】风便一日耳不枉故人书无因帆江水【帆诸本作泛今从蜀本云帆去声少陵诗浦帆晨初发】故人辞礼闾旌节镇江圻【旧史程元和十三年四月拜礼部侍郎六月出为鄂州刺史鄂岳观察使程自礼闾出镇明矣】而我窜逐者龙鍾初得归别来已三岁望望长迢递咫尺不相闻平生那可计我齿落且尽君鬓白几何【鬓或作须】年皆过半百来日苦无多少年乐新知衰暮思故友【衰或作岁】譬如亲骨肉寧免相可不我昔实愚憊【或作憊愚憊见礼记汉书多用愚憊字今按说文憊丑江切憊陟绛切】不能降色辞子犯亦有言臣犹自知之【左僖二十四年子犯曰臣负羈紲从君巡于天下臣之罪多矣臣犹知之而况君乎】公其务贯过【贯始制切】我亦请改事【左氏宣十二年郑伯逆楚之辞曰使改事君夷于九县君之惠也孤之愿也】桑榆傥可收【汉光武劳冯异曰可谓失之东隅收之桑榆】愿寄相思字

南山有高树行赠李宗闵【?诗意凤凰谓裴度挟丸子谓李德裕李绅元稹也据宗闵传裴度伐蔡引为彰义观察判官蔡平知制造长庆初钱徽典贡举宗闵托所亲于徽李德裕李绅元稹共白徽取士不以实坐贬剑州刺史俄复为中书舍人由是嫌怨显结缙绅之祸四十余年不解此诗及下篇盖长庆初作也此诗当是宗闵初贬公为祭酒时作後篇当是宗闵复入後作也详诗意可见新史云宗闵初为裴度引用及度荐李德裕可为宰相宗闵遂与为怨韩愈作南山猛虎行?度荐德裕在公歿後五年史误矣苕溪渔隐诗话云退之宗闵俱裴晋公征淮西时幕客也退之作南山有高树及猛虎行赠宗闵皆略尽其终身所为然退之无恙时宗闵才为中书舍人所为尚未暴自钱徽贬後牛李之憾始结至其为相则退之死久矣遂有封川之行所谓前汝下视鸟各议汝瑕疵鸟鹄从噪之虎不知所归者何其明验也】

南山有高树花叶何衰衰【考张衡南都赋当作蓑蓑】上有凤皇巢凤皇乳且栖四旁多长

枝羣鸟所托依黄鹄?其高衆鸟接其卑【接或作栖】不知何山鸟羽毛有光辉飞飞择所处正得衆所希上承凤皇恩自期永不衰中与黄鹄羣不自隐其私下视衆鸟群汝徒竟何为【衆鸟方作羣鸟 今按下有羣字不当复出】不知挟丸子心默有所规【或作窥规图也东坡五禽言去年麦不熟挟弹规我肉本公语也】弹汝枝叶间汝翅不觉摧或言由黄鹄黄鹄岂有之慎勿猜衆鸟衆鸟不足猜【蜀本以猜不入韵校作疑按公此二诗皆视古用韵古音齐与灰皆通支用如诗维叶萋萋黄鸟于飞又则不我遗先祖于摧又天子是毗俾民不迷是也】无人语凤皇汝屈安得知黄鹄得汝去婆娑弄毛衣【方云阁本作婆娑 今按阁本之谬乃有如此之甚者方虽不从而亦不敢明言其谬也】前汝下视鸟各议汝瑕疵汝岂无朋匹有口莫肯开汝落蒿艾间几时复能飞哀哀故山友中夜思汝悲路远翅翎短不得持汝归【得或作能】

猛虎行【诸本有赠李宗闵字今从唐阁蔡李本云蜀本總题误以上题赠李宗闵四字缀猛虎行之上後人因之其实後诗不为宗闵作也猛虎行乐府旧题非前诗类也新史又谓裴度荐李德裕宗闵怨之为作此诗荐事在大和三年公没久矣不可据】

猛虎虽云恶亦各有匹侪羣行深谷间百兽望风低身食黄熊父【文王囚羑里散宜生得黄熊以献纣免西伯之难熊或作能奴来切非是下同】子食赤豹麋【楚辞乘赤豹从文狸 麋莫兮切】择肉於熊豹【或作罴】肯视兔与狸正画当谷眠眼有百步威自矜无当对气性纵以乖朝怒杀其子暮还食其妃匹侪四散走猛虎还孤栖狐鸣门两旁【雨或作四注云山谷本四作两 今按门只有两旁作两为是山谷盖以唐本定也】乌鹊从噪之出逐猴入居【诸本皆如此方从旧监本潮本倒此两句又从杭蜀本以猴为雅云居当音姬传本不考古音多以乌鹊从噪之一语易置于其上质之旧本非也雅音奎似猴而大 今按诗意盖谓狐鸣鹊噪于外虎出逐之猴乃入居其穴而虎不知所归耳狐鸣鹊噪能使虎出而不能使之失其归猴既入穴则又不待鹊噪而後虎失所归也方以旧本古韵之故必欲倒此二句而不顾其文理之不顺不若诸本之为当也又雅字本作雌字虽见于礼经然非常有之物亦不若作猴之为明白而易知也】虎不知所归谁云猛虎恶中路正悲啼豹来衔其尾熊来攫其颐猛虎死不辞但慙前所为虎坐无助死况如汝细微【坐或作咒如或作知皆非是】故当结以信亲当结以私亲故且不保人谁信汝为

东雅堂昌黎集注卷六

卷七

<集部,别集类,汉至五代,东雅堂昌黎集注>

钦定四库全书

东雅堂昌黎集注卷七

古诗

雪後寄崔二十六丞公【崔二十六斯立也斯立是时为蓝田县丞其曰蓝田十月元和十年十月也孟郊已死张籍病眼故有诗翁壮士之句有怀立之且念朋友之不振也】

蓝田十月雪塞关【蓝田关汉时峽关也斯立为丞于此】我兴南望愁羣山攒天嵬嵬冻相映【嵬嵬诸本作崔嵬】君乃寄命于其间秩卑俸薄食口衆岂有酒食开容顔殿前羣公赐食罢骅骝蹋路骄且闲【郭璞云骅骝色如华而赤骝赤也】称多量少鉴裁密【裁去声】岂念幽桂遗榛菅【榛或作蓁蓁侧洗切菅居顔切】几欲犯严出荐口气象硉兀未可攀【硉卢骨切崖兒】归来陨涕擗关卧心之纷乱谁能删诗翁憔悴鬪荒棘【诗翁谓孟郊憔悴音樵悴音萃鬪陟玉切】清玉刻佩联玦环【玦古穴切】脑脂遮眼卧壮士【壮士谓张籍】大弨挂壁无由弯【诗彤弓弨兮】

弨蚩招切挂或作擗云擗贯也言擗于壁而不用也】乾坤惠施万物遂【施音弛】独於数子怀偏悭朝欹暮喈不可解【楚辞长叹息而增欹後汉遥望见春陵郭喈曰气佳哉欹许既香衣二切喈子夜切】我心安得如石顽送僧澄观【澄观建僧伽塔于泗州诗语详之公贞元十六年秋在洛阳作】

浮屠西来何施为扰扰四海争奔驰构楼架阁切星汉夸雄鬪丽止者谁僧伽後出淮泗上【李邕泗州普光王寺碑僧伽者龙朔中西来尝纵观临淮发念置寺既成中宗赐名普光王以景龙四年三月二日示灭于京淮方作雄云雄言特出也今按上句已有夸雄字下句又云尤恢奇则此作雄非是】势到衆佛尤恢奇【恢或作魁方云恢奇字见史记公孙洪传此诗今本以恢为魁又恶上语意同遂易雄为淮非也今按作恢亦不免与上句相犯况淮之不可为雄自避上句夸雄字初不专为此也】越商胡贾脱身罪【或作献今从谢校本】珪壁满船寧计资清淮无波平如席栏柱倾扶半天赤【柱一作檻】火烧水转扫地空突兀便高三百尺影沉潭?龙惊遁当昼无云跨虚碧借问经营本何人道人澄观名籍籍愈昔从军大梁下【贞元十二年公佐宣武军幕】往来满屋贤豪者【屋或作目满屋字见世说】皆言澄观虽僧徒公才吏用当今无後从徐州辟书至【十五年公从事徐州节度张建封幕】纷纷过客何由记人言澄观乃诗人【人言或作又言】一座竞吟诗句新向风长叹不可见我欲收歛加冠巾洛阳穷秋厌穷独丁丁啄门疑啄木【诗伐木丁丁丁中茎切啄门或作打门疑或作】

如】有僧来访呼使前伏犀插脑高颊权【後汉李固顶角匿犀 颊古协切权或作颧选洛神赋张敏俳文高权长头高权古字只作权】惜哉已老无所及坐睨神骨空潜然【睨音诣】临淮太守初到郡远遣州民送音问好奇赏俊直难逢【直或作实】去去为致思从容

山南郑相公樊员外酬答为诗其末咸有见及语樊封以示愈依赋十四韵以献【郑余庆元和九年为山南西道节度使樊宗师以前检校水部员外郎为副志传不书而见于公荐状及此诗李肇国史补曰元和以後为文奇诡则学于韩愈苦澁则学於樊宗师公此诗及樊墓铭语奇而澁皆所以效其体也】

梁维西南屏【诗大邦维屏梁州在唐为山南西道治所德宗兴元元年改为兴元府维或作惟】山厉水刻屈稟生肖剿刚【剿音巢捷也荆公山谷本作劲】难谐在民物茱公鼎轴老【余庆封茱阳郡公作茱者非】烹斡力健屈【斡或作鲜非是烹取老氏治大国若烹小鲜之义斡谓斡旋犹言宰制也选云假倔强以攘臂 倔渠勿切】帝咨女予往【书云帝曰俞汝往哉予一作俞】牙纛前坰拂【或作拂拂 尘起貌字见楚辞九叹 纛音导坰蒲闷切弗音拂】威风挟惠气盖壤两鬬拂【鬬司马子虚赋上摩兰蕙下拂羽盖文选作靡贾山传赞自下鬬上序传只作摩古摩靡鬬字皆通用扬子鬬虎牙庄子喜则交颈相靡汉衡山王赞臣下渐靡使然今集韵摩下不出靡字非也拂诸本作荆】茫漫华黑间指画变悦歔【华黑或作笔墨非是华阳墨水惟梁州谓山南所领也】诚既富而美章彙霍炳蔚【易大人虎变其文炳也君子豹变其文蔚也】日延讲大训龟判错袞黻【定八年公羊传宝者何璋判白龟青纯何休注判半也半圭曰璋】樊子坐宾署演孔刮老佛【刮或作乱字见剧秦文】金舂撼玉应厥臭剧?郁【易其臭如兰?与郁金香皆香草】遗我一言重跼受惕斋栗【书夔夔斋栗跼巨已切】辞慳义卓濶呀豁疚掊掘【疚或作疾疚劳也呀虚加切掊普厚切掘渠勿切】如新去聵瞍【新或作初聵瞍耳垢也从目非】雷霆逼颺?【颺或作?或作??字书未见或与?同 颺音巨?越笔切】缀此岂为训【此或作作】俚言绍庄屈【庄周屈原也】

奉和武相公镇蜀时咏使宅韦太尉所养孔雀【武元衡韦臯也诸本无奉字元衡以八年三月召还秉政其诗镇蜀时作公诗则召还後追和也】

穆穆鸾凤友何年来止兹飘零失故态隔絶抱长思翠角高独耸金华焕相差坐蒙恩顾重毕命守阶墀

感春三首【元和十一年三月为中书舍人时作】

偶坐藤树下暮春下旬闲藤陰已可庇落蘂还漫漫蠢蠢新叶大珑珑晚花乾青天高寥寥两蝶飞翩翩【或作翩翩或作翩翩】时节适当尔怀悲自无端

黄黄芜菁花【即蔓菁也】桃李事已退狂风簸枯榆狼籍九衢内【狂一作强】春序一如此汝顔安足赖【汝或作去】谁能驾飞车【奇肱国人一臂取百禽作飞车从风远行见山海经】相从观海外

晨游百花林朱朱兼白白柳枝弱而细悬树垂百尺【树或作对】左右同来人金紫贵显剧
【或作极】娇童为我歌哀响跨箏笛【跨或作夸非是】艷姬蹋筵舞清眸刺剑戟【张文
潜云东坡言退之诗不解文字饮惟能醉红裙疑若清苦自饰者至云艷姬蹋筵舞清眸刺剑
戟则如此老子个中兴复不浅刺七亦切】心怀平生友莫一在燕席死者长眇芒生者困乖
隔【生者或作生存】少年真可喜老大百无益

早赴街西行香赠卢李二中舍人【卢汀李逢吉】

天街东西异只命遂成游月明御沟晓【御沟或作沟水】蝉吟堤树秋老僧情不薄僻寺境
还幽寂寥二三子【寥或作寞】归骑得相收

晚寄张十八助教周郎博士【张籍周况也籍字文昌时为国子助教况娶礼部侍郎韩云卿
之孙开封尉俞之女盖公之从婿时为四门博士或无郎字】

日薄风景旷【薄一作落方云薄迫也国语今会日薄矣恐事之不集今详语势但如白乐天
所谓旌旗无光日色薄耳方说非是】出归偃前檐晴云如擘絮新月似磨镰田野兴偶动衣
冠情久厌吾生可携手叹息岁将淹【方云淹当作殄残也淹延之义不可通用今人书歿作
没殂作徂多互用李白诗东溪卜筑岁将淹又远行岁已淹字皆讹
今按古字通用者多方何独知此独不可通用也】

题张十八所居【张籍居长安西街孟东野诗所谓西明寺後穷瞎张太祝也】

君居泥沟上沟浊萍青青【诸本上句作浊沟下句作泥浊】蛙讙桥未埽【讙或作喧】蝉
嘒门长扃【嘒音啾】名秩後千品诗文齐六经端来问奇字【汉书刘歆子棻尝从扬雄学
作奇字注云奇字古文之异者】为我讲声形【周礼保章氏掌教国子六书注云一曰指事
二曰象形三曰谐声四曰会意五曰转注六曰假借形声如江河之类】奉酬卢给事云夫四
兄曲江荷花行见寄并呈上钱七兄阁老张十八助教【卢四名汀字云夫钱七名徽字蔚章
张十八即籍也】

曲江千顷秋波净平铺红云盖明镜【秋波或作波秋云或作蕖红云明镜皆喻也公三堂诗
水上覓红云与此同义】大明宫中给事归【大明即含元宫也】走马来看立不正遗我明
珠九十六【汀诗九十六字】寒光映骨睡骊目【骊方从杭蜀本作离云光映骨而睡离目
言读卢诗之快也今按诸本盖用庄子列御寇篇取骊龙之珠者必遭其睡之语以目言之则
又不止其颌下之珠矣方说不成文理况上文初无欲睡之意耶】我今官闲得婆娑【公时
自中书舍人降太子右庶子】问言何处芙蓉多【离骚搴芙蓉兮木末广雅菡萏芙蓉】撑
舟昆明度云锦【汉武帝元狩三年穿昆明池在长安西南周回四十里】脚敲两舷叫吴歌
【晋夏统上已至浮桥太尉贾充令作其土地间曲统于是以足扣舷引声喉转清激慷慨东
坡诗脚扣两舷歌小海亦是引用统事 舷音贤】太白山高三百里【百或作十太白山名在
凤翔府郿县】负雪崑崙插花里玉山前却不复来【玉山亦山名】曲江汀滢水平盃【水

下或有不字非是 滢乌定切】我时相思不觉一回首天门九扇相当开上界真人足官府岂如散仙鞭笞鸾凤终日相追陪【或云仙下有无字分两句读至笞字句絶又本无鸾凤二字皆非是】

奉和钱七兄曹长盆池所植【钱徽】

翻翻江浦荷而今生在此【今生或作生今非是】擢擢菰叶长芳根复谁徙露涵两鲜翠【涵一作濡】风荡相磨倚但取主人知谁言盆盎是【谁或作詎】

记梦【此诗盖有托讽意公忤执政左迁为右庶子时作前酬卢公荷花诗末云岂如散仙鞭笞鸾凤终日相追陪而此诗末云我能屈曲自世间安能从女巢神山皆有不能俯仰随人之意故知其为左迁之时也】

夜梦神官与我言罗缕道妙角与根【束皙贫家赋且罗缕而自陈国语辰角见而雨毕天根见而水涸注辰角大星苍龙之角天根亢氏之间所谓角与根也】挈携陬维口澜翻【今按上句言角根即辰卯二位二十八宿所起也此句言陬维通谓寅申巳亥之四隅也挈此四隅则周乎十二辰二十八宿之位矣淮南子天文训云西南为背阳之维东南为常羊之维西北为蹏通之维东北为报德之维又地形训云河水出崑崙东北陬赤水出其东南陬洋水出其西北陬亦边隅之名也】百二十刻须臾间【方云董彦远云世间只有百刻百二十刻以星纪言也今按星纪之说未详其旨但汉哀帝尝用夏贺良说漏刻以百二十为度事见哀纪】我聽其言未云足舍我先度横山腹【先一作去】我徒三人共追之一人前度安不危我亦平行蹋【上丘召切下牛召切】神完骨蹠脚不掉侧身上视溪谷盲杖撞玉版声彭?神官见我开顔笑前对一人壮非少石坛坡陀可坐卧【坡陀与送惠师诗陂陀字同语见楚词招魂然唐人多通用坡陀字又郭璞子虚赋注音婆駝故蜀本作婆陀】我手承颞肘拄座

【颞音孩】隆楼杰阁磊嵬高【磊音儡嵬五罪切】天风飘飘吹我过壮非少者哦七言六字常语一字难【鲁直云只前句中哦字便是所难此乃为诗之法也】我以指撮白玉丹行且咀嚙行诘盘【嚙或作嚼字见大人赋与嚼音义通】口前截断第二句绰虐顾我顔不欢乃知仙人未贤圣护短凭愚邀我敬我能屈曲自世间【诸本能多作寧今从阁杭蜀本按此言我若能屈曲从人则自居世间徇流俗矣安能从女居山间而又不免于屈曲乎犹柳下惠所云枉道而事人何必去父母之邦云尔】安能从女巢神山【山或作仙非是苏内翰尝曰太白诗云遗我鸟迹书读之了不闲太白尚气乃自招不识字不如退之倔强云我能屈曲自世间安能随汝巢神山又尝曰退之有言我能屈曲自世间云云退之性气虽出世间人亦不能容也】

南内朝贺归呈同官【长安有三内皇城在西北隅谓西内東内曰大明宫在西内之东南内曰兴庆宫在东内之南此诗云罢贺南内衙即南内也奉酬卢给事诗云大明宫中给事归即东内也南内本元宗在藩时故宅高宗龙朔二年置】

薄云蔽秋曦【蔽或作庇】清雨不成泥罢贺南内衙归凉晓凄凄【内衙或作衙内非是晓

或作晚】綠槐十二街【中朝事迹曰天街兩畔樹槐俗號為槐街白樂天游園詩云下視十二街綠槐間紅塵即此也】渙散馳輪蹄余惟戀書生【戀音忝】孤身無所賣三黜竟不去【論語柳下惠為士師三黜皇甫持正志公墓云公為御史尚書郎中書舍人前後凡三貶及為刑部侍郎言憲宗迎佛骨貶潮州此詩所謂三黜則未貶潮州前為右庶子日作】致官九列齊豈惟一身榮佩玉冠簪犀滉蕩天門高【滉音晃】著籍朝厥妻【籍二尺竹牒記其年紀名字物色縣之宮門案省相應乃得入也公妻盧氏封高平縣君歲時入朝宮中】文才不如人行又無町畦【莊子彼且為無町畦町徒頂切畦戶圭切】問之朝廷事略不知東西況於經籍深豈

究端與倪君恩太山重不見酬稗穉【上蒲賣切下田黎切】所職事無多又不自提撕【自或作相】明庭集孔鸞曷取于鳬鷺樹以松與柏不宜閑蒿藜【間或作問非是】婉孌自媚好【詩婉兮孌兮】幾時不見擠貪食以忘軀黜不調鹽醢【黜音鮮】法吏多少年磨淬出角圭【淬音倅】將舉汝愆尤以為已階梯收身歸關東期不到死迷

朝歸【與前詩同時作】

峨峨進賢冠耿耿水蒼佩【唐志百官朝服皆進賢冠諸佩五品皆水蒼玉】服章豈不好不與德相對顧影聽其聲頽顏汗漸背【漸子廉切】進乏犬雞效【犬雞事取孟嘗君雞鳴狗盜之意】又不勇自退坐食取其肥無堪等聾聵長風吹天墟秋日萬里晒抵暮但昏眠不成歌慷慨【魏武帝短歌行慨當以慷憂思難忘】

雜詩四首【樊本作四首以義考之鵲鳴聲楂楂以下當為別篇公時為右庶子而皇甫鎔程昇之徒用事元和十一年也故此詩及讀東方朔雜事譴症?皆指事托物而作】

朝蠅不須驅暮蚊不可拍蠅蚊滿八區可盡與相格得時與幾時與汝恣啖咋【上徒敢切下音責】涼風九月到埽不見踪跡

鵲鳴聲楂楂烏噪聲攫攫【烏號切】爭鬪庭宇間持身博彈射【閑或作聞非是持或作將】黃鵲能忍飢兩翅久不擘【能忍或作忍長非是】蒼蒼云海路歲晚將無獲【歲晚或作晚歲】

截橈為櫓【楚辭桂棟兮蘭橈選擊櫓而將榮注枻也橈音老又音撩櫓音薄盧】斲楹以為楸束蒿以代之【或作芟】小大不相權雖無風雨災得不覆且顛解轡棄騏驥蹇馿鞭使前【北史陽休之曰將涉千里殺騏驥而策蹇馿】崑崙高萬里歲盡道苦遭停車卧輪下絕意於神仙

雀鳴朝營食鳩鳴暮覓羣【覓或作求】獨有知時鶴雖鳴不緣身暗蟬終不鳴有抱不列陳【暗或作瘖本草陶隱居曰啞蟬不能鳴者雌蟬也】蛙黽鳴無謂合合只亂人

读东方朔杂事【退之不喜神仙此诗讥弄权挟恩者耳】

严严王母宫下维万仙家【古岩严通诗维石岩岩陆德明云本或作严音同此云下维万仙家似当以岩岩为义】噫欠为飘风【噫音隘欠或作吹或云聚气为噫张口为欠说文欠张口气牾也宋孟顓以亢声大欠被劾旧本作噫歆噫歆警神声也见郑氏礼注音於其切者非】濯手大雨沱方朔乃竖子骄不加禁诃【加一作自】偷入雷电室【汉武帝内传西王母谓东方朔昔为太山上仙官今擅弄雷电遂谪人间】鞦韆掉狂车【鞦或作较鞦字见王褒箫赋又晋李颙雷赋鼓鞦鞦之逸韵鞦呼宏切与轰同鞦鲁登切】王母闻以笑卫官助呀呀【虚加切】不知万万人人生身埋泥沙簸顿五山踣【五山五岳也踣音匍】流漂八维蹉【流漂或作飘流维或作紖】曰吾儿可憎奈此狡狴何方朔闻不喜褫身络蛟蛇【褫音侈蛇唐何切】瞻相北斗柄两手自相按【按奴禾切与接同】羣仙急乃言百犯庸不科向观睥睨处【庄子虽羿逢蒙不能睥睨注犹斜视也睥匹诣切睨音诣】事在不可赦【音奢与去声同义】欲不布露言外口实諠譁【或作欲不布露之言外口实譁言或作官】王母不得已顔頰口齟嗟【齟或作咨嗟或作咨】颌头可其奏送以紫玉珂方朔不惩创挟恩更矜夸诋欺刘天子正昼溺殿衙【朔本传朔尝醉入殿中小遗殿上劾不敬免为庶人溺奴吊切】一旦不辞诀摄身凌苍霞【凌或作入今按此诗亦必有为而作朔本传不书所终而内传云一旦乘云龙飞去摄身凌苍霞殆谓此也】

谴疟鬼【汉旧仪颙项氏有三子生而亡去为疫鬼一居江水是为疟鬼此诗首云屑屑水帝魂谢谢无余辉末云湛湛江水清归居安汝妃者此也与前诗皆有所讽当是元和十三年为刑部侍郎时作】

屑屑水帝魂谢谢无余辉如何不肖子尚畜疟鬼威乘秋作寒热翁妪所骂讥求食欧泄间不知臭秽非【欧或作呕泄或作泄严助传夏时欧泄霍乱之病相属字正作欧泄】医时加百毒【周礼医师掌医之政令聚毒药以供医事】熏灌无停机灸师施艾炷【灸音疚】酷若猎火围诅师毒口牙舌作霹雳飞符师弄刀笔丹墨交横挥咨汝之胄出门户何巍巍祖轩而父颙未沫於前徽【沫或作昧或作法沫已也离骚经芬至今犹未沫又选刘孝标书音徽未沫】不修其操行贱薄似汝稀岂不忝厥祖【诗无忝尔祖】眴然不知归【诗有眴面日眴他典切】湛湛江水清归居安汝妃清波为裳衣白石为门畿呼吸明月光手掉芙蓉旗降集随九歌饮芳而食菲赠汝以好辞出汝去莫违

示儿【东坡云退之示儿诗云主妇治北堂膳服适戚疎恩封高平君子孙从朝裾开门问谁来无非卿大夫不知官高卑玉带悬金鱼又云凡此座中人十九持钧枢所示皆利禄事也至老杜则不然其示宗武云试吟青玉案莫羡紫香囊应须饱经术已自爱文章十五男儿志三千弟子行曾参与游夏達者得升堂所示皆圣贤事也】

始我来京师止携一束书辛勤三十年以有此屋庐【公第在长安靖安里】此屋岂为华於我自有余【为或作无非是】中堂高且新四时登牢蔬【登方作祭云中堂以供时祀而前荣以饌亲宾也今按公作袁氏先庙碑有亲登边鉶之语与登牢蔬语意正同不必须作祭字

乃为时祀也】前荣饌宾亲【沈氏笔谈云退之示儿诗云云屋翼为之荣东西则有之未知前荣安在艺苑雌黄以为不然其说云王元长曲水诗序云跨灵沼而浮荣五臣注则以荣为屋檐檐一名檐一名字即屋之四垂也又谓之楣又谓之栢集韵云屋栢之两头起者为荣故记言洗当东荣又升自东荣降自西北荣上林赋偃佺之徒暴于南荣则所谓荣者东西南北皆有之矣故李华含元殿赋又有风雨交四荣之说笔谈未为确论前荣者扬雄甘泉赋云列宿施于上荣是也】冠婚之所於【所或作依於或作依皆非是】庭内无所有高树八九株有藤娄络之【娄或作缕又作娄音缕庄子有卷娄者注卷娄犹拘挛也】春华夏陰敷东堂坐见山云风相吹嘘松果连南亭外有瓜芋区西偏屋不多槐榆翳空虚山鸟旦夕鸣有类涧谷居【涧或作礪义当作郭璞江赋幽积阻李善曰与涧同】主妇治北堂膳服适戚疎恩封高平君子孙从朝裾【或作车】开门问谁来无非卿大夫【无非或作非无非是】不知官高卑玉带悬金鱼问客之所为峩冠讲唐虞【峩或作巍】酒食罢无为棋檠以相娛【檠色角切唐人诗云星宿天围棋冢子地握檠棋奕也檠博也齐尔朱世隆与元世雋握檠忽闻局上訖然有声一局子尽倒立】凡此座中人十九持钩枢又问谁与频莫与张樊如【莫与或作莫若曾本作莫先谓张籍樊宗师也】来过亦无事考评道精粗跼蹐媚学子【跼音仙】墙屏日有徒【屏音饼】以能问不能其蔽岂可祛【丘鱼切】嗟我不修饰事与庸人俱【嗟我或作我如今按作我如即与下文安能如此及卒章无迷厥初者相应但作嗟我则语势差健而义亦自通盖我不修饰者非谦词乃谓向使我不修饰则不能致此爵位居室交游之盛耳然则我如者乃嗟我之注脚故今虽只作嗟我而我如二字亦读者所当知也】安能坐如此比肩於朝儒诗以示儿曹其无迷厥初【按此篇所夸乃感二鸟符读书之成效极致而上宰相书所谓行道忧世者则已不复言矣其本心何如哉】庭楸【诗意与前示儿诗所云庭内无所有高树八九株者相应又次其後盖同时作】

庭楸止五株【楸或作树以题语考之当作楸】共生十步间各有藤绕之上各相钩联下叶各垂地树颠各云连朝日出其东我常坐西偏【或作边】夕日在其西我常坐东边【或作偏】当昼日在上我在中央间【或作焉此诗二联字三间字诸本刊钩联作钩纏中央间作中间焉以求避重韵误矣】仰视何青青上不见纖穿朝暮无日时我且八九旋濯濯晨露香明珠何联联夜月来照之蓓蓓自生烟【晋湛方生稻苗讚蓓蓓嘉苗蓓此见切】我已自顽钝【或作滞又作惰】重?五楸牵客来尚不见肯到权门前【旧史云公少与孟郊张籍友善而观诸权门豪士如仆隶焉瞪然不顾即此诗所谓也】权门衆所趋有客动百千九牛亡一毛【司马迁答任安书曰若九牛亡一毛】未在多少间往既无可顾不往自可怜【顾或作颌或作得皆非是】

翫月喜张十八员外以王六秘书至【王六王建也以或作与以与义通已见前
今按以字或取能左右之之义
公长庆四年夏以病在告至八月满百日免吏部侍郎诗益此时作也】

前夕虽十五月长未满规君来晤我时【来一作未】风露渺无涯浮云散白石天宇开青池孤质不自憚中天为君施翫翫夜遂久亭亭曙将披况今夕圆又以嘉客随【嘉一作佳】惜无酒食乐但用歌嘲为

和李相公摄事南郊覽物兴怀呈一二知旧【李逢吉也当是长庆二年再相後作】

灿灿辰角曙亭亭寒露朝川原共澄映云日还浮飘上宰严祀事清途振华镳圆丘峻且坦前对南山标村树黄复緑中田稼何饶顾瞻想岩谷兴叹倦尘嚣【倦或作卷】惟彼顛瞑者【瞑从目古眠字徐锴曰今俗别作眠非也庄子曰顛冥于富贵之地司马彪曰冥音眠】去公岂不辽【去或作云非是】为仁朝自治用静兵以销勿憚吐捉勤【捉或作握字本史记鲁世家今人用吐握本韩诗外传也】可歌风雨调圣贤相遇少功德今宣昭

和裴仆射相公假山十一韵【裴谓裴度也假或作为裴度为李逢吉所间长庆二年六月罢相为尚书左仆射公有此和篇及感恩言志与朝回见寄之作】

公乎真爱山看山旦连夕犹嫌山在眼不得着脚历【着陟略切】枉语山中人句我涧侧石【枉或作往句或作与】有来应公须归必载金帛当轩乍骈罗随势忽开坼有洞若神剗【乌官切】有岩类天划【忽麦切又音画】终朝岩洞闲歌鼓燕宾戚孰谓衡霍期【衡山在今衡州霍山按周礼在冀州期或作奇选谢灵运诗游当罗浮行息必庐霍期】近在王侯宅傅氏筑已卑【书说筑傅岩之野】磻溪钓何激【选阮籍劝进表吕尚磻溪之渔者】逍遥功德下不与事相摭乐我盛明朝【或作时】於焉傲今昔【诗於焉逍遥】

与张十八同效阮步兵一日复一夕【夕或作日阮籍字嗣宗咏怀诗近百篇其一六韵一首云一日复一夕一朝复一朝顔色改平常情神自损消其一七韵一首云一日复一朝一昏复一晨容色改平常精魂自飘沦公诗效其体而又绎之曰一日复一日一朝复一朝然其题寔自效一日复一夕始也後人以诗语与题不相应并易作一日字寔非也】

一日复一日一朝复一朝祇见有不如不见有所超食作前日味事作前日调不知久不死惘惘尚谁要【於逍切】富贵自縶拘贫贱亦煎焦俯仰未得所一世已解镳譬如笼中鹤六翮无所摇譬如兔得蹄【或作迹系辞曰得兔而忘蹄】安用东西跳还看古人书复举前人瓢【前人或作前日】未知所究竟且作新诗謡

送诸葛觉往随州读书【李繁时为随州刺史宰相李泌之子也】

邺侯家多书【李泌封邺县侯】插架三万轴一一悬牙籤【唐经籍志甲乙丙丁四部书各一库为红緑碧白牙籤以别经史子集】新若手未触为人强记览过眼不再读伟哉群圣文磊落载其腹行年余五十出守数已六京邑有旧庐不容久食宿台阁多官员无地寄一足我虽官在朝气势日局缩屡为丞相言虽悬不见録送行过滻水【滻水出京兆蓝田谷北至灊陵入灊滻音产】东望不转目今子从之游学问得所欲入海观龙鱼矫翮逐黄鹄勉为新诗章月寄三四幅

南溪始泛三首【公此诗在告时作殆絶笔于此矣鲁直最爱公此诗以为有诗人句律之深意】

榜舟南山下【或作溪上 榜音谤刺也】上上不得返幽事随去多【或作幽寻事随去】孰
能量近远陰沉过连树藏昂抵横坂石轟肆磨砺波恶厌牵挽或倚偏岸渔竟就平洲饭点点
暮雨飘稍稍新月偃【稍稍或作稍稍广雅区区稍稍小也】余年懔无几【懔或作谅下
对怆字明是懔也】休日怆已晚自是病使然非由取高蹇【或作蹇】南溪亦清驶【或作
駛洪庆善云作駛误姑两存之 驶疏吏切】而无楫与舟山农惊见之随我观不休不惟儿童
辈或有杖白头馈我笼中瓜【笼或作篱】劝我此淹留我云以病归此已颇自由幸有用余
俸置居在西畴困仓米谷满未有旦夕忧上去无得得下来亦悠悠但恐烦里闾时有缓急投
愿为同社人鸡豚燕春秋

足弱不能步自宜收朝蹟羸形可輿致【輿或作与可又作事非是】佳观安可掷【史记秦
泰山刻石文从臣嘉观云云观去声】即此南坂下久闻有水石挖舟入其间【挖方作拖 今
按汉书挖舟而入水注云曳也音它】溪流正清澈随波吾未能峻濂乍可刺【七迹切峻濂
或作濂峻】鹭起若导吾前飞数十尺亭亭柳带沙团团松冠壁【柳带松冠一作带柳冠松
方从阁本作带柳松冠云此吉日辰良体也 今按亭亭带柳沙无义且此两句用对偶亦何害
方信阁本故曲为之说如此带柳冠松亦无义】归时还尽夜谁谓非事役

东雅堂昌黎集注卷七

卷八

钦定四库全书

东雅堂昌黎集注卷八

联句【诸联句多元和初作】

城南联句【或曰联句古无此法自退之始上则唐虞賡歌下则汉武柏梁皆联句之所起刘贡父云东野与退之联句宏壮辩博似若不出一手王深父云退之容有润色吕氏童蒙训徐师川问山谷曰人言东野联句即非平日所作恐是退之有所润色山谷云退之安能润色东野若东野润色退之却有此理城南长安城南也景物之所会故凡可以入吟咏者皆历言于诗蜀本作一百五十韵今本因之然此诗寔多三韵不可以为据】

竹影金琐碎【郊琐或作鑠非是沈存中云竹影金琐碎乃日光非竹影也洪庆善曰谓日光在其中不必道破若曰日影金琐碎则不可也】泉音玉琤琤【音一作声陆士衡诗云山溜何泠泠飞泉漱鸣玉後荆公诗云风泉隔屋撞哀玉竹月緑堦贴碎金语本此出淙方宗士江二切琤楚更切】琉璃翦木叶【愈】翡翠开园英流滑随仄步【郊】搜寻得深行遥岑出寸碧【愈】远日增双明乾稂纷挂地【郊纷或作丝或作红稂音遂挂冢庾切】化虫枯局茎【孙汝聽曰化虫虫之变化者如蟬蚁之类枯局茎者言化虫已枯尚局持于草木之茎也局居玉切】木腐或垂耳【愈】草珠竞骈睛【骈音蟠】浮虚有新劘【郊劘陟玉切】摧扞饶孤撑【扞动也字不当从木古乐府不见山顛树摧扞下为薪又扞音兀撑抽庚切】囚飞黏网动【愈】盗啁接弹惊【囚飞盗掉潮本作虫飞雀啁此诗一体六语皆赋物而不言其名旧本并同上杜诗啾啾黄雀啁啁鸟食也啁音卓】脱实自开坼【郊】牵柔谁绕紫礼鼠拱而立【愈陆机云河东有大鼠能人立交前二足于颈上跳舞善鸣】骇牛躅且鸣【骇或作駮音侯说文马行伋伋也诗儻儻侯侯韩诗作駮駮故西京赋云群兽駮駮此当从侯音则于躅且鸣义为合也今按駮躅二字于牛义无取疑当从蜀本作骇而躅当作触乃于牛有意又与上字相偶然无所据姑附于此骇下楷切躅直六切】蔬甲喜临社【郊】田毛乐寛征【周礼宅不毛者有里布是也寛征薄赋也】露萤不自煖【愈】冻蝶尚思轻宿羽有先晓【郊】食鳞时半横菱翻紫角利【愈

翻或作繁】荷折碧圆倾楚膩鱣鲋乱【郊诗鱣鲋发发鱣知连切鲋羽癸切】獠羞螺蚌并【獠张绞切又音老】桑螵见虚指【愈孙汝听曰螵桑上虫名虚指言空有迹耳螵乌郭切】穴狸闻鬪狞【尼更切】逗翳翅相筑【郊】摆幽尾交撈【薄庚切】蔓延角出缩【愈】树啄头敲铿【丘庚切】修箭裹金餌【郊】羣鲜沸池羹岸殼圻玄兆【愈】野蕘渐丰萌窰烟羃疏岛【郊窰或作瑶周礼羃人羃莫狄切】沙篆印回平【洪庆善曰华山有青柯平种药平因地之平处也】?肌遭蚝刺【愈?或作瘁说见鬪鸡篇蚝玉篇毛虫也蚝七吏切刺七亦切】啾耳闻鸡生奇虑恣回转【郊】遐睎纵逢迎【睎音希】巔林戢远睫【愈

睫音接】缥气夷空情【缥音瞞】归迹归不得【郊】舍心舍还争灵麻撮狗蝨【愈博雅云狗蝨胡麻也灵麻今胡麻状如狗蝨本草云一名狗蝨】村稚啼禽腥【孙汝听曰言小儿之啼如猩猩尔雅猩猩小而好啼】红皱晒檐瓦【郊孙汝听曰菓实皱而红说者曰乾枣檐或作檐】黄团系门衡【洪庆善曰黄团瓜蒌也一曰天瓜衡门上木】得隼蝇虎健【愈左氏得隼曰克崔豹古今注蝇豹即蝇虎】相残雀豹趋【玉篇?趋跟党也

趋音枲】束枯樵指秃【郊】刈熟担肩頰【音怪】澁旋皮卷裔【愈旋随恋切卷音卷裔力袞切】苦开腹彭亨【孙伯野谓此二语与上二语意属一曰澁旋乃旋果实之澁者苦开乃破瓜瓠之苦者也方言谓环而鐫之为旋卷裔见庄子彭亨毛诗传炁然犹彭亨是也】机春潺湲力【郊杜预作连机水碓

潺土山切又土连切湲音员又土顽切】吹簫飘飏精【庄子鼓箎播精簫音播】赛馐木盘簇【愈】鞞妖藤索綈【此句与下?覲娥嫫或疑为今之秋千已上泛言城南景物之盛鞞妖或作妖鞞綈或作𦉳或作𦉴又作并云今并字不入庚韵故学者疑之今按鞞广韵云苏合切小儿履也今犹以为浅面疏屨之名但用之于此句似无意义疑当作扱楚洽切收也取也获也妖谓狐狸之属能为妖媚者也綈当从系狱中以?索急缚罪人之名也言捕取妖狐而以藤索缚之也鞞悉合切綈北萌切】荒学五六卷【郊】古藏四三莹【四三或作三四】里儒拳足拜【愈】土怪闪侔侦【家语季桓子穿井得土缶孔子曰土之怪者𦉰羊缶也 侦丑贞切】蹄道补复破【郊】丝窠扫还成暮堂蝙蝠沸【愈蝙蝠见上山石诗注蝙音边幅音福】破竈伊威盈【伊威或作伊威详见上送区弘诗注】追此讯前主【郊】答云皆豕卿

【上卿也左襄十四年先君有豕卿】败壁剥寒月【愈】折篁啸遗笙桂熏霏霏在【郊】綦迹微微呈【桂或作桂綦或作綦皆非是桂音圭妇人上服也班婕妤赋俯视?丹墀思君兮履綦綦履下饰也在或作炷呈或作星皆非是】劒石犹竦檻【愈】兽材尚挈檻【孙汝听曰兽材谓柱上刻为兽形 挈女加切】宝唾拾未尽【郊】玉啼堕犹枪【唾或作碣啼或作题蜀都赋玉题相辉题椽上饰也故曰堕犹枪枪堕声本或作琤或云碣柱磬也与玉题意相类洪庆善云此以咳唾喻珠玑以啼泣喻玉筋也唾又作唾啼又作啼 今按上下文意皆妇女事洪说为是若作题即上句当作碣然非文意又磬乃柱础亦非可拾之物也】牕绡疑閼艳

【愈孙汝听曰言?纱中尚疑閼藏佳人也】糝烛已销繁绿髮抽珉螯【韩醇曰绿髮言细草也】青肤耸瑶桢【韩醇曰青肤苔藓也桢说文曰木也知京切】白蛾飞舞地【愈】幽蠹落书棚【此已上言郊墟宅墅之古废】惟昔集嘉咏【郊】吐芳类鸣嚶窥奇摘海异【愈】恣韵激天鲸肠胃绕万象【郊】精神驱五兵蜀雄李杜拔【愈李杜下对雷车未详其说】岳力雷车轰【呼宏切】大句斡玄造【郊玄或作元】高言轧霄峥【初耕切字或作琤非】芒端转寒燠【愈】神助溢盃觥巨细各乘运【郊】湍湍亦腾声【湍或作淖此已上言在昔诗人吟咏之工】凌花咀粉蕊【愈】削缕穿珠纓绮语洗晴雪【郊】娇辞哢雏鸞酣欢杂弁珥【愈欢或作劝杂或作新从阁本淳于髡所谓前有堕珥後有遗簪是也 今按劝为劝酒之意然此皆形容诗语之工不当作劝而作欢字则对价字为尤切】繁价流金琼菡萏写江调【郊江或作红选刘休玄诗悲发江南调谢灵运诗采菱调易急江南歌不缓李善皆引古江南词江南可采莲以释之东野本集亦喜用江调字】菱蕤缀蓝瑛【菱蕤青花圆寔亦名玉竹蓝瑛蓝田之玉也】庖霜脍玄鲫【愈】浙玉炊香粳【浙字从折之舌切魏文帝嘲王朗曰不能效君昔在会稽折粳米古浙作折其从析者星历切孟子所谓接浙而行是也本多作浙】朝饌已百态【郊】春醪又千名哀匏蹙驶景【愈蹙驶或作缺蹙或作蹙缺

】冽唱凝余晶解魄不自主【郊】痹肌坐空瞠【痹音庇说文湿病也瞠或作踉
今按庄子瞠若乎其後瞠丑庚切直视也言坐久而无所见也】扳援贱蹊絕【愈扳音攀】
炫曜仙选更藜巧竞采笑【郊藜或作丛唐人多书丛作藜楚辞及旧本韩柳集皆然今本尚
见一二姑存之】骈鲜互探婴【探音贪】桑变忽芜蔓【愈】樟裁浪登丁【中莖切斲木
声也】霞鬬讎能极【郊】风期谁复赓【晋习凿齿传风期超迈风期犹风标也谁复或作
复谁已上言京都人士繁华之习】臯区扶帝壤【愈】瓊蘊郁天京祥色被文彦【郊】良
才插杉桎【丑成切】隐伏饶气象【愈】兴潜示堆抗擘华露神物【郊见西京赋注河神
巨灵擘华山事】拥终储地桢【终终南山桢祥也】訏谟壮缔始【愈诗訏谟定命注訏大
也】辅弼登阶清【弼一作拂】全秀恣填塞【郊全蒲闷切】呀灵瀐渟澄【呀虚加切瀐
勅六切已上纪畿甸形胜】益大联汉魏【愈联或作连】肇初迈周嬴【史记昔周邑我先
秦嬴于後嬴余轻切】积照涵德镜【郊】传经俪金羸【汉书韦贤父子皆以明经故邹鲁
谚曰遗子黄金满羸不如一经羸竹器羸音盈】食家行鼎鼐【愈】宠族饫弓旌奕制尽从
赐【郊尽或作书此句未详】殊私得逾程飞桥上架汉【愈】縹岸俯规瀛【规或作窥非
是规度也东方朔传?以为苑】瀟碧远输委【郊】湖嵌费携擎【瀟碧竹也湖嵌石也】荀
苜从大漠【愈汉李广利伐大宛采蒲荀苜蓿种归种于离宫馆旁
荀音陶苜音目苜或作首汉或作苜非是】枫楮至南荆【选沙棠栌楮华枫枰栌楮音诸一
作楮】嘉植鲜危朽【郊】膏理易滋荣【理或作埋此以嘉植言也周礼其植物宜膏物郑
注云谓杨柳之属理致白如膏】悬长巧纽翠【愈纽或作细】象曲善攢珩【善或作盖】
鱼口星浮没【郊】马毛锦斑駮【赤也】五方乱风土【愈】百种分鉏耕葩蘖相妬出【
郊蘖或作孽非是】菲茸共舒晴类招臻倜诡【愈相如封禅书云奇物谲诡倜傥穷变倜他
历切诡过委切】翼萃伏衿纓危望跨飞动【郊】冥升蹶登閼【字见扬雄校猎赋蜀本登
作?竹盲切?宏屋响也】春游辄羸靡【愈楚辞苹草羸靡羸草随风貌辄音历羸音髓一音
霍】彩伴?嫔嫔【广韵嫔嫔新妇貌嫔音紫嫔音萌】遗灿飘的皪【郊】淑顔洞精诚娇应
如在寤【愈】颓意若含醒鵷毳翔衣带【郊】鹅肪截佩璜【王逸少玉部论白如截肪音
方又音房】文昇相照灼【愈】武胜屠揅抢【尔雅彗星为揅抢揅音谗抢楚庚切】割锦
不酬价【郊】构云有高营通波物鳞介【愈物或作仞相如赋充仞其中古字作仞今按诗
及孟子皆作物物音刃】疏畹富萧蘅【音行杜蘅香草大者曰杜若】买养驯孔翠【郊】
远苞树蕉栟【书曰厥包橘柚锡贡蕉栟皆果名广志曰芭蕉一名芭苴出交趾?一名栟榈其
子可食选栟榈枸榔栟音并】鸿头排刺芡【愈芡说文云鸡头也方言曰南楚谓之鷄头北
燕谓之?青徐淮泗之间谓之芡又云鷄头或谓之鸿头今公云鸿头鸿即?也芡巨险切】鹄
攢瓊橙【此已上言土地人物富华之盛诸本一作殼卵也纳凉联句盘肴饌禽今本
亦误苦角切又口本切橙除庚切】鸞广杂良牧【郊】蒙休赖先盟罢旄奉环卫【愈】
守封践忠贞战服脱明介【郊】朝冠飘彩紘爵勲逮僮隶【愈】簪笏自怀綳乳下秀嶷嶷
【郊】椒蕃泣啍啍【诗其泣啍啍啍音宏】貌监清溢匣【愈】眸光寒发硃馆儒养经史
【郊】缀戚觴孙甥考锺饌肴核【愈】戛鼓侑牢牲飞饕自北下【郊】函珍极东烹如瓜
煮大卵【愈】比线茹芳菁海岳错口腹【郊】赵燕锡媼姪【选诗燕赵多佳人方言自关
而东河济之间谓好为媼列子娥媼靡曼者秦晋谓好曰侄娥帝尧之女舜妻娥皇字娥媼
或作媼媼莫交切姪胡丁切又五耕切】一笑释仇恨【愈】百金交弟兄货至貊戎市【郊】
】呼传鸚鵡令【鸚或作鸛戎貊鸚鵡鸛鸛四物也或本非是】顺居无鬼瞰【愈扬雄传高

明之家鬼瞰其室 瞰音阌】抑横免官评【已上言门地簪纓之家】杀 肆凌翦【郊】笮原币置紃【紃网纲 币作答切置音嗟紃音宏】羽空顛雉鷄【愈】血路迸狐麋【麋音京一角牛尾其状似?】折足去蹠蹠【郊庄子吾以一足蹠蹠而行

蹠勑甚切蹠直角切】蹠髻怒?髻【?音彭髻乃庚切】跃犬疾翥鸟【愈】呀鹰甚饥?筭蹄记功赏【郊上林赋射?脚麟顔师古曰持引其脚计其所获也所谓筭蹄者如此】裂脑擒揜振【诸本脑作?擒作相揜作荡又作汤今从蜀本云?脑字之或体振揜也荡振踢揜之义监本作揜振揜拒也义亦通而擒作相则非 今按?别本作脇疑传写之误荡当作揜

揜音瞠振音枨】猛毙牛马乐【愈】妖残梟鵩悍【鵩或作鵩方云鵩音格今鵩鵩也 今按鵩音柯额切尔雅鵩鵩今鵩鵩也其音洛者乌□水鸟也】窟穷尚嗔视【郊】箭出方惊抨【普耕切】连箱载已实【愈】碍辙弃仍羸喘覿锋刃点【郊】困冲株栢盲【栢音藁】扫净豁旷旷【愈】骋遥略萃萃【选宋玉高唐赋驰萃萃五臣注草聚貌】馋 饱活齍

【郊】恶嚼?腥鯖【已上言射猎之壮观?说文云噉貌鯖广韵云煮鱼煎食曰五侯鯖?音博鯖音征】岁律及郊至【愈律谓黄鍾大吕之属及郊至谓十一月也】古音命韶讖【音英帝嘗乐曰六讖舜曰箫韶】旗旆流日月【郊】帐庐扶栋薨【莫耕切】磊落奠鸿璧【愈】参差席香蕙【尔雅蕙蕙茅注蕙蕙一种花有赤者为蕙楚词索蕙茅以廷蓐注灵草也香茅席铺也 蕙音琼】玄只祉兆姓【郊】黑柜饌丰盛【左传洁粢丰盛 柜音巨饌音蒙盛平声】庆流蠲瘥疔【愈】威畅捐?輶【後汉光武纪冲輶撞城注冲輶车也輶楼车也?尺容切輶音彭】灵燔望高罔【郊】龙驾闻敲?【音横驾相擊声或作?说见上】是惟礼之盛

【愈】永用表其宏德孕厚生植【郊】恩熙完刳剝【剝与黥同公文率用此剝字 此已上纪郊祀之礼】宅土尽华族【愈】运田闲强眈?庾森岭桧【郊】啄场翺翔?【博雅云鷖?凤也诸本多讹作鹏】畦肥翦韭薤【愈】陶固收盆豐利养积余健【郊】孝思事严祊【诗永言孝思又祝祭于祊祊庙门傍也 祊补彭切】掘云破嶧嶧【愈云或作灵 嶧嶧音迭啮】采月漉坳泓【坳不平也】寺砌上明镜【郊】僧盂敲晓铎泥像对骋怪【愈】铁钟孤舂鍠【音横】瘿颈鬧鳩鵲【郊

瘿上声】蛭垣乱蛭蝓【垣或作 谓蛭蜒于墙屋之间作 非蛭多足虫蝓蜥蜴 蛭音求蝓音荣】甚黑老蚕蠋【愈诗蛭蛭者蠋毛传曰桑虫也 蠋音烛又珠五切】麦黄韵鹑鷔【此已上言民居寺宇之美】韶曙迟胜赏【郊曙或作署迟音穉】贤朋戒先庚【朋或作明】驰门填偃仄【愈】竞墅辗砢砢【砢披冰切砢音絰】碎纈红满杏【郊碎纈或作醉结今以阁本云唐小说裴晋公午桥有文杏百株立碎锦坊少陵诗内纈繁于纈杜牧之诗花坞团宫纈或云当作醉纈李长吉诗醉纈抛红网】稠凝碧浮觴【徐盈切】?绳覲娥嫠

【愈?或作蹴覲或作观?子六切】鬬草擷玃琤【擷或作拈】粉汗泽广额【郊】金星堕连璿【於盈切】鼻偷困淑郁【愈】眼剽强盯 【上音枨下音盲玉篇视貌】是节饱顔色【郊】兹疆称都城书饶罄鱼蜃【愈国史补云纸之好者有鱼子纸晋王羲之用蜃纸】纪盛播琴箏【已上言里人游观之乐】奚必事远覲【郊】无端逐羈伧【晋史吴人谓中州人曰伧羈伧谓谪阳山江陵时也 助耕切】将身亲魍魅【愈】浮迹侶鸕鷀腥味空奠屈【郊屈屈原也】天年徒羨彭【天或作夭彭彭祖也】惊魂见蛇虺【愈】触嗅值虾蟇【上音遐下音彭虾蟇蟇蟇蟇也】幸得履中气【郊】忝从拂天枨【枨门两旁木礼记士介拂枨】归私暂休暇【愈】驱明出庠簪【明或作昵或作昵昵止轮木也时景元校作驱朋今按驱驰迟明而出太学也盖作此时公方为博士】鲜意竦轻畅【郊】连辉照琼莹

陶暄逐风乙【愈乙乌辖切玄鸟也齐鲁之间谓之乙风乙或作乙乙非是】跃视舞晴蜻【蜻蜻蜓也晴蜻或作蜻蜻者非是】足胜自多诣【郊】心贪敌无勅始知乐名教【愈晋书乐广曰名教自有乐地】何用苦拘儻【晋史不简蚩儻拘儻拘束也儻尼耕切】毕景任诗趣【郊】焉能守??【愈已上公自言窜谪而归复为博士字书无?字按盐铁论器多坚?又皇甫谧?劝篇龙潜九渊?然执高何令升晋书音义?口萌切不知字书何以逸之也】

会合联句【公召为国子博士与张籍张彻孟郊会京师而有此诗黄鲁直尝云退之会合联句四君子皆佳士意气相入杂之成文世之文章之士少联句盖笔力不能相追或成四公子碁耳】

离别言无期会合意弥重【籍】病添儿女恋老丧丈夫勇【愈】剑心知未死【或作谢】诗思犹孤耸【郊】愁去剧箭飞謹来若泉涌【彻】析言多新贯【析或作折】攄抱无昔壅【籍】念难须勤追悔易勿轻踵【愈】吟巴山萃罍【或作罍萃吕角切罍音学山多大石也】说楚波堆垄【郊】马辞虎豹怒舟出蛟鼉恐【彻】狂鲸时孤轩幽狖杂百种【愈狖音柚】瘴衣常腥腻蛮器多踈冗【籍】剥苔吊斑林【博物志曰洞庭之山帝之二女居之涕下挥竹竹尽斑魏道辅云湘中斑竹方生时每点上有苔钱封之甚固以草壤洗去之则紫晕斓斑可爱】角饭饵沉塚【愈续齐谐记曰屈原五月五日投汨罗而死楚人哀之至日以竹筒贮米投水祭之】忽尔衔远命归欤舞新宠【郊尔或作示非是欤或作还】鬼窟脱幽妖天居覩清拱【愈拱或作拱】京游步方振谪梦意犹恂【籍】诗书夸旧知酒食接新奉【愈】嘉言写清越瘵病失朏肿【郊瘵音庾】夏陰偶高庇宵魄接虚拥【愈魄或作魂今按宵魄谓月作魂非是】雪弦寂寂听茗盃纖纖捧【郊】驰辉烛浮萤幽响泄潜蛰【愈尔雅蟋蟀曰蛰注云今之促织蛰音拱】诗老独何心江疾有余燠【郊燠足病诗既微且燠燠音肿】我家本瀍谷【瀍水名在河南谷城也】有地介臯巩【臯巩皆河南地名史记韩献成臯巩】休迹忆沈冥峨冠慙闐【愈楚辞杂斑驳与闐茸前汉司焉迁云在闐茸之中皆以 为茸按集韵茸通作 闐音榻 音冗闐字或作偃 字或作 诸本此四句下无愈字今从唐蜀本增洪庆善云退之家在洛阳尝谪阳山今为博士则唐本为是】升朝高轡逸振物羣听悚【别本悚作竦嵇康琴赋竦衆听而骇神】徒言濯幽泌【泌音秘又薄必切徒一作待】谁与薙荒茸【籍荒或作芒此汉叙传所谓夷险芟荒是也芒字非】朝绅郁青緑马饰曜珪珙国讎未销铄我志荡叩隴【郊刘辟乱蜀王师出征故云荡叩隴】君才诚倜傥时论方汹涌【魏王粲浮淮赋滂沛汹涌 汹许洪切或作汹音凶溶音涌】格言多彪蔚悬解无桔拳【周礼上罪桔拳而桎桔古沃切拳音拱】张生得渊源家色拔山豕坚如撞羣金眇若抽独蛹【愈蛹蚕化为之言微而不絶也蛹音勇】伊余何所拟跛鼃詎能踊【荀子跛鼃千里】块然堕岳石飘尔冒巢鼯【郊冒音畎鼯音冗】龙旆垂天卫云韶凝禁甬【甬钟系也周礼钟舞上谓之甬祝充韩醇注皆以为甬道恐非】君胡眠安然【胡或作乎非是】朝鼓声汹汹【愈】

鬬鸡联句【公与东野联句词意雄浑极其情态间以人才为喻两皆杰作真欧阳文忠所谓韩孟於文词两雄力相当者也】

大鸡昂然来小鸡竦而待【愈】峥嵘颠盛气【礼记玉藻曰盛气颠实扬休注云颠读为闾峥嵘助庚切嵘音宏】洗刷凝鲜彩【郊】高行若矜豪侧睨如同殆【愈】精光目相射【食亦切】劔戟心独在【郊】既取冠为冑复以距为镢【音队或作铍一书钩戟长铍今按铍广韵所拜切於声不协然镢乃刃下之平?者与距不相似亦未详其说也】天时得清寒地利挟爽垲【愈 垲音凯】磔毛各噤?【或作瘁或作瘡或作痒今从杭本云瘁所锦切寒病也义训寒谓之? 皮日休诗枕下闻澎湃肌上生? 韩渥诗噤?余寒酒半醒 磔陟格切噤巨禁切】怒癭争硯磊【硯音猥磊鲁猥切】俄膺忽尔低植立警而改【郊 警匹蔑切】膈膊战声喧【古诗膈膊膊鸡初鸣 膈音愎膊音粕】缤翻落羽矐【七罪切广韵云矐霜雪白状】中休事未决小挫势益倍【愈】妬肠务生敌【肠或作腹敌或作欺】贼性专相醢裂血失鸣声啄殷甚饥馁【郊 殷鸟闲切义见五卷题炭谷秋】对起何急惊随旋诚巧给【音待谷梁恶公子之给列子予昔给若】毒手饱李阳【晋石勒尝谓李阳曰孤昔日厌卿老拳卿亦饱孤毒手杜子美义鹘行所谓巨颡折老拳亦此事也】神槌困朱亥【愈史记魏末亥为侯嬴荐于魏公子及公子行至邺矫魏王令代晋鄙晋鄙合符疑之亥?四十斤铁椎椎杀晋鄙槌或作椎或作鎚方云谢本云贞元本毒手作尊拳尊拳刘伶语也邵公济云善本神槌作?槌于史记本文为合然晋祖纳曰假有神锥必有神槌神槌尊拳岂皆借用字耶 今按毒手是李阳本事中语而神槌字则朱亥事有无之故邵欲改神作?以从本事然又属对不亲切故方又欲从谢本借刘伶之尊拳以附李阳借祖纳之神槌以附朱亥则两句皆为兼用两事而不偏枯耳然亦未敢遽改也今以其说未明复为详说如此以俟考焉】恻心我以仁碎首尔何罪独胜事有然旁惊汗流浼【郊】知雄欣动顔怯负愁看贿争观云填道助叫波翻海【愈】事爪深难解【事或作争今以唐本云舘本作俚李校同樊本作割皆侧吏切汉蒯通传事刃公之腹者考工记菑蚤不齟则轮虽敝不匡郑读蚤为爪谓辐入牙中者菑声如截泰山平原人谓树立物为菑公盖全用此二字也管子割戟十万又春有以割耜事割菑俚古音义同阁杭蜀本皆作争其讹久矣】嗔晴时未怠一喷一醒然【樊汝霖云鸡用水喷神气始醒】再接再砺乃【郊庄子曰是其所以乃公用乃字出此书砺乃锋刃或作再砺乃鍛乃砺又或作励皆非是樊汝霖曰接犹接战也争观云填道助叫波翻海则公诗之豪一喷一醒然再接再砺乃则东野工处】头垂碎丹砂翼搗拖锦彩【搗或作榻字当从手选陈琳檄垂头搗翼莫所凭恃五臣注搗斂也上猎切此当以摧搗为义音他蜡切】连轩尚贾余【左成二年欲勇者贾余余勇 贾音古】清厉比归凯【愈】选俊感收毛【赵使平原君合从于楚有毛遂者前自赞于平原君卒与毛遂偕定从】受恩慙始隗【史记郭隗谓燕昭王曰王欲致士先从隗始】英心甘鬪死义肉耻庖宰君看鬪鸡篇短韵有可采【郊有或作亦或作言皆非是】

纳凉联句【公元和改元六月自江陵掾召入为国子博士至是七月与东野会京师联句此诗叙久谪新召还为学官本末甚详】

递啸取遥风【魏刘桢大暑赋披襟领而长啸冀微风之来思】微微近秋朔【郊】金柔气尚低火老候愈浊【愈】熙熙炎光流竦竦高云擢【愈】闪红惊蚋虬【或作虬楚辞苍龙蚋虬于左骖蚋音忧又于纠反虬音求】凝赤耸山岳目林恐焚烧耳井忆灏灏【前汉相如上林赋灏灏灏坠 灏土咸切又土减切灏才溺切又食角切】仰惧失交泰非时结冰雹【大

戴礼曰阳之专气为霰陰之专气为雹盛阳之气在雨水则温暖而为霰陰气薄而胁之不相入则转为雹也此孟所以有失交泰之惧】化邓渴且多【列子夸父逐日影于隅谷之际道渴而死弃其杖尸膏肉所浸化为邓林】奔河诚已慙喝道者谁子【庄子云喝者反水乎冷风帝王世纪曰禹扇喝喝伤暑也喝音谒】叩商者何乐【列子师商弹琴当春而叩商弦以召南吕凉风忽至草木成实】洗矣得滂沱【洗或作浩古洗与洒通史记观范雎之见者羣臣莫不洒然变色易容徐广洗先典切洗矣犹洗然也】感然鸣鸛鸛【国语周之兴也鸛鸛鸣于岐山鸛音岳鸛土角切】嘉愿苟未从【嘉或作佳或作喜公後诗有嘉愿还中州佳喜皆字讹也】前心空缅邈【潘岳寡妇赋曰缅邈兮长乖】清砌千回坐冷环再三握烦怀却星星【或作醒醒刘梦得诗自羞不是高阳侣一夜星星骑马回唐人星醒通用】高意还卓卓【郊】龙沈剧煮鳞【剧或作极用左氏醢龙事】牛喘甚焚角【用田单火牛意】蝉烦鸣转喝【上林赋声流喝注云悲嘶也喝于迈切】乌躁饥不啄昼绳食案繁宵蚋肌血渥单絺厌已褫【论语当暑衿絺綌易终朝三褫之

褫敕里切】长?倦还促【?或作箠方言扇自阋而东谓之?自阋而西谓之扇选云屏轻箠?音霰】幸兹得佳朋于此?华桷青荧文簟施【青或作清】淡漱甘瓜濯【选枚乘七发淡漱手足注云犹洗涤也漱音敢】大壁旷凝净古画奇駁萃【壁或作壁画或作书駁北角切萃吕角切】凄如狽寒门【狽方云杭本作泐蜀本作泐今冯字徒涉也史记武纪所谓寒门者谷口也顔曰今冶谷去甘泉八十里盛夏凜然此纳凉诗也泐字自当又甘泉赋登椽栾而狽天门狽字音贡至也诸校本多用此定柳文狽亦作泐又淮南子北方北极之山曰寒门故离骚连絶垠乎寒门若以泐言则寒门当用此义然前义为优今按後说是盖谷口既非絶境未为极寒之地又不言有水则徒涉字亦无理当改作狽】皓若攢

玉璞扫寬延鲜飏汲冷漬香穈【楚词稻粱穈麦穈音卓】筐实摘林珍盘肴饌禽【?或作殼说已见上城南联句】空堂喜淹留贫饌羞齷齪【愈齷音渥齷侧角切】殷勤相劝勉左右加砻斲【加或作皆】贾勇发霜刃【贾勇见上注庄子刃若新发于刃刃砥石音刑】争前曜冰槩【风俗通矛长丈八者谓之槩音朔】微然草根响先被诗情觉感衰悲旧改工异逞新兒【一作貌音邈】谁言摠朋老犹自将心学危檐不敢凭朽机惧倾扑【机一作瓦扑音霰】青云路难近黄鹤足仍鉞【鉞玉篇云鎖足也

鉞土角切】未能饮渊泉立滯叫芳药【郊本草楚人谓白芷为药药音渥】与子昔睽离嗟余苦屯剥直道败邪径拙谋伤巧啄【楚词謡啄谓余以善淫注啄犹譖也

啄音啄】炎湖度氛氲【氛音分氲於云切】热石行羣砢

【羣力角切砢音确】瘠饥夏尤甚疟渴秋更数【周礼疾医春时有瘠首疾秋有疟寒疾疟逆约切数一音朔】君顔不可覩君手无由搦【女角切】今来沐新恩【元和元年六月召为国子博士】庶见返鸿朴儒庠恣游息【礼学记游焉息焉】圣籍饱商?【选商?万俗?音角】危行无低徊【楚词九歌心低徊兮顾怀】正言免咿喔【楚词卜居曰将喔咿嚅唅以事妇人乎咿音伊喔音渥】车马获同驱酒醪欣共款【广韵敕口噏说文款吮也

款音朔】惟忧弃营蒯【左氏传成公九年曰虽有丝麻无弃营蒯

营音奸蒯苦怪切】敢望侍帷幄此志且何如希君为追琢【愈诗追琢其章追音堆】

秋雨联句【按诗云儒宫烟火湿此公为学官在京师时也又云因思征蜀士盖宪宗元和初

命高崇文讨刘闻时故也】

万木声号呼百川气交会【郊左太冲蜀都赋兼六合而交会】庭翻树离合【离或作杂】
牖变景明蔼【愈】濛濛殊未终【说文小水入大水曰濛诗鳬鹭在濛濛职戎切又在冬切】
飞浮亦云泰【郊颜延年驾幸京口诗千翼泛飞浮】牵怀到

空山属聒还惊濑【愈】檐垂白练直【练或作龙】渠涨清湘犬【郊】甘津泽祥禾伏润
肥荒艾【愈禾或作木非是伏或作服】主人吟有欢客子歌无奈【郊】侵阳日沈玄剥节
风搜兑【愈】块圯游峡喧【块圯有三义贾谊鵬赋块圯无垠应劭曰其气块圯非有齐限
也郭璞注方言曰块圯云不测也左太冲吴都赋地势块圯刘逵曰高下不平兑也】飍飍卧
江汰【郊隋卢思道纳凉赋动扬飍于翠帐飍飍音菟流汰音太】微飘来枕前高洒自天外
【愈】蜚穴何迫迕【或作窄义训迫迕急也字见鸩羽诗笺

蜚音拱蟋蟀也】蟬枝扫鸣啾【郊诗鸾声啾啾扫鸣啾谓无声也啾音翩】援菊茂新芳【
援或作园】迳兰销晚馥【愈玉篇馥香也○馥音葛】地镜时昏晓池星竞漂沛【郊】謹
呶寻一声【诗载号载呶毛传曰謹呶也謹字读从喧呶尼交切】灌注咽羣籁【愈】儒宫
烟火湿市舍煎熬忤【郊忤奢也选心侈体忤音太】卧冷空避门衣寒屡循带【愈循或作
修非是李陵传数数自循其刀环又自循其髮顏注谓摩顺也梁范静妻诗循带易缓愁难却
心之忧矣亘销铄】水怒已倒流陰繁恐凝害【郊】忧鱼思舟楫【忧鱼乃左传所谓微禹
吾其鱼乎是也鱼或作虞非是】感禹勤畎浍【愈书禹濬畎浍距川孔安国云一亩之间广
尺深尺曰畎百里之间广二寻深二仞曰浍】怀襄信可畏【书荡荡怀山襄陵注云怀包裹
工也可畏或作不思非是】疏决须有赖【郊孟子禹疏九河决汝汉疏或作疎盖俗体也】
筮命或冯蓍卜晴将问蔡【愈晴或作情蓍为筮龟为卜蔡大龟也出蔡地因以为名】庭商
或惊舞【庭商商羊也家语曰齐有一足鸟名商羊童謡曰天将大雨商羊鼓舞】墉崇亦亲
酌【郊崇祭水旱也三礼义宗禁止雨之祭每祭于城门故蜡祭七曰水墉崇音荣又音咏酌
卢对切】氛醺稍踈映【氛或作气】零乱还拥荟【尔雅天气下地不应曰零注言蒙昧也
诗荟兮蔚兮注云兴貌零音谋又音茂又音蒙又莫贡武赋二切荟乌外切】陰旌时撈流【
扬雄反骚望崑仑以撈流顏师古曰撈流犹周流也撈居由切】帝鼓镇訇磕【选訇磕?嘈
訇呼庚切輿轰同】枣圃落青玠瓜畦烂文贝贫薪不烛竈富粟空填廩【愈史记天子遣使
者虚郡国仓廩廩古外切】秦俗动言利鲁儒欲何丐深路倒羸骖弱途拥行【博雅曰轮
也楚词齐玉?而并驰

?音大】毛羽皆遭冻离徒不能翩【离或本从竹非古乐府竹竿何嫋嫋鱼尾何离徒徒所
宜切翩呼外切】翻浪洗虚空倾涛败藏盖【郊】吾人犹在陈【论语卫灵公孔子在陈絶
粮】僮仆诚自郢【左襄二十九年自郢以下无讥焉郢音浚】因思征蜀士未免湿戎旆【
时蜀寇刘辟犹未授首】安得发商飍廓然吹宿霭白日悬大野幽泥化轻塏【班固西都赋
轶埃塏之混浊塏音霭】战场暂一乾贼肉行可脍【愈贼谓刘辟】搜心思有效抽策期称
最岂惟虑收获亦已救顛沛【郊】禽情初啸俦础色微收霈庶几谐我愿遂止无已太【愈
诗蟋蟀无已太康毛传曰已甚也古太从大】

征蜀联句【宪宗元和元年正月诏高崇文征蜀九月擒刘辟以献联句当是蜀平後作观篇

末献馘郊告等语与元和圣德诗所叙言异而意同二诗其相先後作欤】

日王忿违傲【日或作曰唐本阁本皆从日此语左传汉史屡见如左氏日卫不睦故取其地国语日君之使于楚也又曰蔡君日其过此也沿流至于迁固淮南厉王传日得幸上有子如此语未易一二考入诗则自庾信始日余滥推毂民愿始天从是也】有命事诛拔蜀险豁关防秦师纵横猾【愈】风旗币地扬【币音匪】雷鼓轰天杀【轰羣车声】竹兵彼皴脆

【皴音逡说文细皮起也】铁刃我枪【郊刃或作刀又作力初八切】刑神咤旄【刑神二字见国语虢公梦有神人立于西阿事旄牛之尾可以为旄】陰焰飈犀札【札甲也以犀为之夫差水犀之甲三千飈职琰切】翻霓纷偃蹇【枚乘七发曰旌旗纷偃蹇】塞野瀕块圯【愈瀕或作倾块圯见前诗注瀕胡孔切】生狞竞掣趺

【狞尼耕切掣昌列充世二切跌徒结切】痴突争填轧渴鬪信脰呶

【脰呼回切】噉奸何噢喟【郊噢音奥叫也喟字书饮声谓之喟於八切】更呼相簸荡【簸音播】交斫双缺齧【牛辖切】火发激铍腥血漂腾足滑【愈漂或作飘】飞揉无整阵

【猱猿属】翩鹞有邪戛江倒沸鲸鲲山摇溃猱【郊与猱同尔雅猱似狸猱与同尔雅猱类猱虎爪食人迅走敕俱切猱於点切】中离分二三外变迷七八逆颈尽徽索【

扬雄解嘲亡命免于徽索】仇头恣髡鬻【鬻音劬】怒须犹髣髴【上音峥下音狞】断臂仍【愈或作戢云苦果切擊也字书无戢字今按诸公所校本皆音蒲八切格八切与髣髴皆叠韵】石潜设奇伏穴覷骋精察【精或作幽】中矢类妖【所监切又音森】

跳锋状惊獬【獬蜀本音女滑切字当从豸猴属今本多从豸从简也】蹋翻聚林岭斗起成埃垓【郊垓音戛】旆亡多空杠【杠旌旗干也音江】轴折解联辖剝肤浹疮痍

【剝说文刊也史记张敖传贯高刺剝身无可擊者剝音辍】败面碎剝【剝与黥同音劬】浑奔肆狂勦【或云狂当作音匡或作匡匡勦遽也勦音穰故穰为行遽筐囊为髮乱皆以匡音为正

今按本或作狂穰楚词作狂穰】捷窜脱馿点【捷或作健馿音乔】岩钩踔狙猿

【踔音钏】水漉杂鱣蝟【鱣大鱼蝟蟛蛄也玉篇云似蟛而小漉或作小网也

今按上句钩字当读如钩致之钩蝟音滑】投命闹【命与礲同广韵军战石也命石声命音炮音穹音隆】填隍【愈隍或作湟乌归切又作蜀本作乌皆切当作威字不见字书埤苍威不平也吴都赋隐赉威五臣曰排积也于填隍之义亦合

今按隍湟通用易城复于隍一作湟莫八切偕呼八切】强睛死不闭犷眼困逾【

犷音矿莫八切】熬堞燄歔熺【熬音炳堞音牒燄呼木切父音壑歔许娇切熺音僖】

抉门呀拗【抉於决切呀音鰕拗於绞切乙辖切】天刀封未坼胆慑前握跽梁排

郁缩【排或作非跽庄缘切】闯窞揆窟窞【窞说文物在穴中窞穴中见也闯丑禁切揆音戛又音屑窟竹律切窞丁刮切又丁滑切】迫胁闻杂驱咿呦叫冤【郊蜀本五刮切与跽同樊本只作跽今字不入刮音非呦音幽】穷区指清夷凶部坐雕铎【漠贾谊过秦谕钩戟长铎音杀】

邛文裁斐亶【邛蜀地名文织之郁文者盖锦绮之类斐亶文章貌

亶音尾】巴艳收娉媵【巴亦蜀地巴艳蜀之美女娉媵小兒肥貌娉於八切媵女刮切】椎

肥牛呼牟【後汉征苏茂椎牛飡士牟说文日牛鸣也子厚牛赋日牟然而鸣黄钟满脰】载

实驼鸣【广韵云骆驼鸣也荆公诗云橐垂铃栈驼鸣盖用此事乙辖切】圣灵闵
顽罍【左氏僖公二十四年心不则德义之经为顽口不道忠信之言为罍】煮养均草【玉
篇草有毒用杀鱼音察】下书遏雄唬【呼交切】解罪吊挛瞎【愈】战恤时销洗劒霜
夜清刮汉栈罢器闾【汉栈汉中道也】獠江息澎湃【獠江蜀江也獠张绞切澎音彭汎普
八切】戍寒絶朝乘【乘犹乘塞乘障之乘守也或作来非是】刀暗歇宵簪【刀刀斗也昼
炊夜擊诸本多误又此二语诸本多缀于厚赭之下古本乃缀于息澎湃之下今从古本盖此
诗自施亡多空枉以下每人皆五韵亦可考也今按刀斗之刀与刀劒之刀古书盖一字但以
音别之耳】始去杏飞蜂【正月出师故云杏飞蜂】及归柳嘶【十月息师故云柳嘶尔
雅蜻似蝉而小音扎洪庆善日记时之语工矣诗云昔我往矣杨柳依依今我来思雨雪霏
霏二句盖本此意】庙献繁馘级【馘音幅】乐声洞控楫【郊控苦江切楫苦瞎切】台图
焕丹玄郊告俨饱稽【匏以为器稽以为席盖事天贵质素也前汉席用苴稽稽𪚩字同稽音
夏】念齿慰霉鰲【楚词顔霉鰲以沮败霉音眉鰲音梨】视伤悼癰疽【疽广韵云疮痛癰
音盘疽女点切】休输任讹寝【诗或寝或讹讹动也】报力厚赭栝【或作𪚩又或作秣户
括切说文曰舂粟不溃也今本多作𪚩𪚩与稽一物不当再出】公欢钟晨撞室晏丝晓拊【
宴或作晏拊音夏说文刮也】盃盃酬酒醪箱篋馈巾帑【莫辖切】小臣昧戎经维用赞勲
劼【愈书女劼恣商献臣劼桔八切勤也】

同宿联句【此诗召为国子博士後与东野同宿而作故叙南迁召还始末甚详】

自从别君来远出巧譖【愈】斑斑落春泪浩浩浮秋浸【郊】毛奇覩象犀羽怪见鵬鸪【
愈贾谊为长沙王傳有鵬飞入谊舍楚辞吾令鸪为媒注鸪羽可杀人鵬音服鸪直禁切】朝
行多危栈【一作桅或作輶今按上言朝行即桅字无理当作栈】夜卧饶惊枕【郊】王荣
今分踰死弃皆情任【愈】鵬行参绮陌鸡唱闻清禁【郊】山晴指高标槐密鸞长【愈】
直辞一以荐巧舌千皆【郊说文曰牛舌病也巨禁切】匡鼎惟说诗【张晏云衡少时
字鼎长乃易字稚圭】桓谭不读【愈後汉桓谭曰臣不读】逸韵何嘈噉高名俟沽赁【
郊】纷葩欢屡填旷朗忧早渗【愈朗或作亮张协七命野旷朗而无尘潘岳寡居赋愬空宇
兮旷朗渗所禁切】为君开酒肠颠倒舞相饮【郊】曦光霁曙物景曜铄宵侵【愈侵音浸】
儒门虽大启奸首不敢闯【丑禁切】义泉虽至近盗索不敢沁【沁诸字书皆曰水名出
上党外此无他义恐此沁字当读之犹汲也七鸪切】清琴试一挥白鹤叫相暗【或作相叫
吟吟去声读赵德麟本同暗合本作暗】欲知心同乐双蛩抽作絰【郊後汉女得织絰汝鸪
切】

莎栅联句【河南谷名按河南志莎栅谷水在永寧县西三十里出莎岭东流入昌谷莎栅盖
在东都也公与东野各一联遂及断肠之意必二公有所深感不得而详矣】

冰溪时咽絶风方轩举【愈】此处不断肠定知无断处【郊】

雨中寄孟刑部几道联句【孟刑部简也考之新传未尝为刑部但言为仓部员外以不附王
叔文徙他曹岂即刑部耶联句复与东野同作当亦在元和元年秋也】

秋潦掩辙迹【选顔延年诗周御穷辙迹淹或作无】高居限参拜【愈战国策?弱曰臣之义不参拜王能使臣无拜可矣】耿耿蓄良思遥遥仰嘉话【郊】一晨长隔岁百步远殊界【愈远或作还】商聽饶清聳闷怀空抑噫【郊商或作高闷或作閤非是 噫乌介切】美君知道腴【桓谭答扬雄书曰子云勤味道腴】逸步谢天械【愈天械爵位冠冕之属】吟馨铄纷杂抱照莹疑怪【郊江淹杂体诗开?莹所疑】撞宏声不掉【徒吊切】输邈澜逾杀【愈】檐泻碎江喧街流浅溪迈【郊】念初相遭逢幸免因媒介【孔丛子士无介不见女无媒不嫁】祛烦类决痛愜兴剧爬疥【爬或作爬今字书爬匏也无爬音然文选把搔无已把蒲庖切则知唐字今不出者多】研文较幽玄呼博骋雄快【博博塞之戏也】今君轺方驰【君或作春说文轺小车也史记乃乘轺车

轺音摇又音韶一作车】伊我羽已铄【选顔延之咏嵇康云鸾翮有时铄 铄所拜切已一作毛】温存感深惠琢切奉明诫【愈诫或作戒说文诫勅也戒警也汉谷永传犹严父之明诫後汉西域传蹙国减土经有明诫此语当用诫字至下文伸诫则当用戒字

今按谢本下文实作申戒】迨兹更凝情暂阻若婴瘵【瘵病诗无自瘵焉 瘵侧介切】欲知相从尽灵珀拾纖芥【灵珀琥珀也吴书虞翻曰琥珀不取腐芥拾或作舍昨是 珀音拍】欲知相益多【或作从益】神药销宿?【易有疾?也?蒲拜切】德符仙山岸永立难欹坏气涵秋天河有朗无惊湃【郊 湃普拜切】祥凤遗蒿鷄【蒿鷄意见庄子鷄与鷄同】云韶掩夷𨮒【周礼鞀鞀氏注东夷之乐曰𨮒𨮒莫拜切又亡達切与𨮒同】争名求鹄徒腾口甚蝉喝

【於迈切】未来声已赫始鼓敌前败鬪塲再鸣先【襄二十一年先二子鸣杜注云比於鸡鬪胜而先鸣今言再鸣先者盖取此事】遐路一飞届【遐或作霞】东野继奇躅修纶悬衆牯【庄子任公子为大钩巨緇五十牯以为饵牯𨮒牛也 牯音戒】穿空细丘垤照日陋营蒯【愈左氏虽有丝麻无弃营蒯】小生何足道积慎如触蛰【丑迈切】悵悵抱所诺【左氏曰祈招之悵悵杜注安和貌 悵揖淫切】翼翼自申戒【诗云小心翼翼恭敬貌也申一作伸戒说见上】圣书空勘读【勘或作甚】盗食敢求嘬【礼记无嘬炙嘬谓一举尽 嘬楚夬切】惟当骑款段【御款段马见後汉马少游谓马援语】岂望覲珪玠弱操愧筠杉微芳比萧薤何以验高明柔中有刚夬【郊】

远游联句【元和三年作远游送东野之江南也公尝有送东野序云东野之役于江南此所谓远游者亦其时欵公与东野共三十九韵李翱惟一联莫知其故也习之之诗见于世者此而已大率诗非其所长也刘贡父云唐时文人李习之不能为诗联句云云殊无可取远游名篇祖屈原也相如大人赋由远游发也自後刘向九叹曹子建乐府皆有远游篇然屈原相如则兼四方上下而言之公联此诗以送东野于南所序只江南事其间大抵事意与大人赋九叹相同读者宜详味之】

别肠车轮转一日一万周【郊】离思春冰泮澜漫不可收【愈】驰光忽以迫【鲍明远诗驰光不再中】飞轡谁能留【郊陆士衡拟古诗方驾振飞轡】取之诘灼灼此去信悠悠【翱取或作前】楚客宿江上夜魂栖浪头【栖或作捷】晓日生远岸水芳缀孤舟村饮泊好木【饮或作馆东野幽居诗有嘉木偶良酌芳陰庇清弹馆字非也】野蔬拾新柔独含凄凄别中结郁郁愁人忆旧行乐【汉杨惲人生行乐耳忆旧一作意忆非是】鸟吟新得俦【郊新或作忻非是】灵瑟时窅窅【楚词远游云使湘灵鼓瑟兮

宵音窈】露猿夜啾啾【露说文云覆日也谓猿在云间楚词山鬼云猿啾啾兮狢夜鸣 露于今切】愤涛气尚盛【吴越春秋子胥伏劒而死吴王取其尸投之江中乃随流扬波成涛激岸】恨竹泪空幽【博物志云舜死苍梧二妃从之不及泪下染竹竹为之斑】长怀絶无已多感良自尤即路涉猷岁归期眇凉秋两欢日牢落孤悲坐绸缪【愈】观怪忽荡漾叩奇独冥搜海鲸吞明月浪岛没大沔【或作浮】我有一寸钩欲钓千丈流良知忽然远壮志郁无抽【郊】魍魎暂出没【魅或作魍】蛟螭互蟠踞【力幽切】昌言拜舜禹【书禹拜昌言注云昌当也舜葬苍梧禹葬会稽皆在江南】举颿凌斗牛【选楼船举颿而过肆斗牛吴楚分野也颿与帆同音凡】怀精馈贤屈【续齐谐记屈原五月五日自投汨罗而死楚人哀之每至此日以竹筒贮米祭之精字语见离骚蜀本作精非是精音所又新於切】乘桴追圣丘【论语孔子曰道不行乘桴浮于海说文桴编木以渡也】飘然天外步岂肯区中囚【愈肯或作有】楚些待谁吊【楚些宋玉招魂也些语助 些苏个切】贾辞緘恨投【贾谊谪长沙及渡湘水为赋以吊屈原】翳明弗可晓【弗或作不】秘魂安所求气毒放逐域蓼杂芳菲畴当春忽凄凉不枯亦飏飏【上所鳩切下力鳩切】貉謡衆猥歛【貉或作貉歛或作谿方从杭蜀本歛乌来切楚词九章歛秋冬之绪风又扬子始皇方猎六国而翦牙歛王逸曰歛叹也方言曰歛然也南楚凡言然曰歛元次山有歛乃曲亦音霫今按方说是也歛说文亚改切又乌来切膺也史记项羽纪作唉亦音乌来切说文同黄鲁直读歛乃为祆霫误矣今或写作款字亦误乃却当音祆也】巴语相啣【字书无?字公寄三学士用啣嚙字征蜀联句用啣啣字考之字书啣嚙为正】默誓去外俗嘉愿还中州江生行既乐躬犇自相勦【选非余之所勦 勦音留】饮醇趣明代味腥谢荒陬【郊】驰深鼓利楫趋险惊蜚輶【蜚或作飞】系石沉靳尚【按楚词上官大夫靳尚楚之谗臣譖屈原于怀王者】开弓射鴈毳【史记鴈毳即驪兜字古文尚书亦作驪兜为鴈毳】路暗执屏翳【司马长卿大人赋时若暖暖将混浊兮召屏翳诛风伯刑雨师应劭曰屏翳天神使也 屏音萍】波惊戮阳侯【扬雄反离骚云陵阳侯之素波兮应劭曰阳侯古之诸侯有罪自投江其神为大波】广泛信缥缈高行恣浮游外患萧萧去中悵稍稍瘳【悵音邑】振衣造云阙跪坐陈清猷德风变谗巧仁气销戈矛【仁或作和仁气见礼记】名声照四海淑问无肯休【汉匡衡传淑问扬乎疆外读当如令问令望之问肯或作肯肯古时字作肯误矣】归哉孟夫子归去无夷犹【愈楚词君不行兮夷犹归去或作君归或作归兴】

晚秋鄮城夜会联句【元和十二年七月以裴度守门下侍郎同平章事充淮西宣慰处置使以韩愈兼御史中丞充行军司马以李正封兼侍御史为判官从度出征诏以鄮城为行蔡州治所此篇公与正封作于鄮城凡百余韵东野死後公所与联句者惟此可见耳洪庆善曰旧本注云正封上中丞中丞即退之愈奉院长院长即正封也其称王卢谬矣按鄮城今颖昌府鄮音偃】

从军古云乐【梁刘孝仪从军行云何谓从军乐】谈笑青油幕【宋刘瑀尝讥朱修之云一朝居青油幕下谓将幕也】灯明夜观棋【观音贯】月暗秋城柝【正封上中丞今从古本如此诸本无上中丞三字】羈客方寂历惊鸟时落泊语阑壮气衰酒醒寒砧作【愈奉院长今从古本如此诸本无奉院长三字】遇主贵陈力【论语陈力就列】夷凶匪兼弱【书兼弱攻昧】百牢犒輿师【左传哀七年公会吴于鄆吴来徵百牢成二年韩厥谓齐侯无令輿

师陷入君地舆衆也】千户购首恶【正封谷梁子曰诸侯不首恶】平生耻论兵未暮不轻诺【末或作未顏延年诗幼壮困孤介未暮谢幽贞】徒然感恩义谁复论勲爵【愈】多士被沾污小夷施毒蠹【小夷元济蠹螫也前汉不若蠹蚤之致蠹 蠹丑略切又音壑】何当铸劒戟【或作钜鉞】相与归台阁【正封】室妇叹鸣鸛【诗鸛鸣于垤妇叹于室】家人祝喜鵲【西京杂纪乾鵲噪而行人至】终朝考蓍龟何日亲烝祔【愈周礼春祠夏祔秋烝冬尝皆祭名祔音药】闲使断津梁【闲或作问闲使汉书蒯通张騫传屡见 闲音谏】潜军索林薄【左传曰郑人侵卫潜军军其後曹子建七啓搜林索险探薄穷阻索林薄句意本此 索所格切】红尘羽书靖【羽书羽檄也檄者以木简为书有急事则插鸡羽其上谓之羽檄】大水沙囊涸【正封楚龙且与韩信夹潍水阵信为万余囊盛沙以壅水 涸下各切】铭山子所工【东汉窦宪大破匈奴登燕然山刻石勒功班固作铭】插羽余何作【插羽见上羽书注李太白诗云插羽破天骄】未足烦刀俎【史记樊哙曰人方为刀俎我为鱼肉】只应输管钥【愈国语越王勾践使大夫种行成于吴曰请委管钥属国家以身随之】雨矢逐天狼【楚词举长矢兮射天狼天狼星在东井】电矛驱海若【矛或作刀老子海神曰海若】灵诛固无纵【选陈琳檄云江湖可以逃灵诛】力战谁敢却【正封霍去病传云力战一日余士不敢有二心】峨峨云梯翔赫赫火箭着【诸葛亮攻郝照於陈仓以云梯冲车临城中照以火箭射之 着直畧切】连空隳雉堞照夜焚城郭【愈】军门宣一令庙筭建三略雷鼓揭千枪【或作枪苍颉篇云刈木两头锐者是也枪字为正】浮桥交万笮【正封笮或作茆笮当从竹音昨说文曰笮也西南夷以竹索为桥寻以渡水是也少陵诗有连笮动嫋娜字亦作笮】蹂野马云腾映原旗火铄【校本铄当作烁】疲氓坠将拯残虏狂可缚【愈】摧锋若羆兕【梁简文诗畧地晓摧锋 羆勑居切】超乘如猱攫【左氏秦师过周北门超乘者三百乘 乘石证切攫音攫】逢掖服翻慙【礼记儒行儒有衣逢掖之衣逢大也掖袂也】漫胡纓可愕【正封庄子冠曼胡之纓只作曼魏都赋作纓 漫莫干切或作曼音同】星殒闻雉雉【唐景龙初有大星殒于西南声如雷野雉皆惊雉 雉古豆切鸣也】师兴随唳鹤【苻坚闻风声鹤唳以为晋师之至】虎豹贪犬羊【後汉郑太传驱虎兕而赴犬羊】鹰鸇憎鸟雀【愈憎或作鸇左氏传如鹰鸇之逐鸟雀】烧陂除积聚灌垒失依托【失或作去】凭轼谕昏迷【左僖二十八年君凭轼而观之】执殳征暴虐【正封诗卫风伯也执殳正封诗颇缉类事实然亦有取用未精处执殳乃卫人刺行役过时而不反不知正封何以用此】仓空战卒饥月黑探兵错【黑或作暗 探他南切】凶徒更蹈藉【更平声藉慈夜切】逆族相啗嚼【愈】轴轳亘淮泗旆旌连夏鄂大野纵氏羌【诗云自彼氏羌莫敢不来王氏西羌名也】长河浴骝骆【正封】东西竞角逐【左传晋人逐之左右角之】远近施矰缴【说文曰缴生丝缕也张 传虽有矰缴尚安所施谓箭上加缕而射 矰音增缴音勺】人怨童聚謡天殃鬼行疰【愈】汉刑支郡黜【晁错诸侯有罪削其支郡支郡在国之四边者如楚王削东海赵王削常山是也】周制闲田削【周制诸侯有功者闲田以禄之有削地者归之闲田】侯社退无功鬼薪惩不恪【正封文帝三岁刑曰鬼薪言取薪以给宗庙】余虽司斧鑕【音至】情本尚丘壑且待献俘囚【左传献俘授馘诗在泮献囚】终当返耕获【愈】藁街陈鉄钺【藁街汉时长安街名蛮夷邸在其中陈汤传斩郅支首及名王以下宜县头藁街蛮夷邸闲 鉄风无切】桃塞兴钱鑄【西京赋曰北有重险桃林之塞诗痔乃钱鑄注云田器也 钱音翦

鑄音博】地理画封疆天文扫寥廓【正封】天子悯疮痍将军禁卤掠策勲封龙额归兽获麟脚【愈获或作猎云龙额平原县名刘氏音额崔浩音洛汉卫青传韩说封龙额侯史或作龙额此诗用魏阙秦阙龙额麟脚皆借对也兽或作骑麟脚见子虚赋射麋脚麟韦昭曰持引其脚也家语谓鲁西狩子鉏商获麟折其前足载以归岂用此邪今按归兽用书序语对策勲为切但当解作狩义耳】诘诛敬王怒【月令诘诛暴慢诗王赫斯怒】给复哀人瘼【前汉民产子复注云不役使也复音福】泽髮解兜牟【或作鍔古通用】酖顔倾凿落【正封楚词美人既醉朱顔酖凿落饮器乐天诗银含凿落盏酖音佗】安存唯恐晚【安存或作存安後汉马融赞生厚故安存之念深】洗雪不论昨【後汉段熲传洗雪百年之逋负】暮鸟已安巢春蚕看满箔【愈】声明动朝阙光宠耀京洛旁午降丝纶【史有冠盖旁午吏卒旁午礼记王言如丝其出如纶】中坚拥鼓铎【正封汉光武与王寻战冲其中坚谓大将居中以坚鋭自辅】密坐列珠翠高门涂粉臆【屋郭切】跋朝贺书飞【跋朝犹言举朝也】塞路归鞍跃【愈】魏阙横云汉【周礼乃县治象之法于象魏郑司农云象魏阙也庄子心居魏阙之下】秦关束岩?【江淹诗岩?转奇秀

?音罽】拜迎罗囊鞬【左传晋重耳曰右属囊鞬囊弓服鞬矢服鞬居言切】问遗结囊橐【正封汉娄敬传以岁时数问遗诗于橐于囊说文曰橐囊之无?者】江淮永清晏宇宙重开拓【苗泰交广记汉武帝元鼎中开拓土境拓挹各切】是日号昇平【隋志昇平日行上道太平日行中道】此年名作噩【愈尔雅太岁在酉曰作噩元和二年岁在丁酉噩音罽】洪赦方下究【或作救鷩冠子上情不下究淮南子号令不能下究汉燕王旦传主恩不得下究作究为是】武鸢亦旁魄【封禅书曰旁魄四塞旁魄犹旁薄也魄他各切】南?定蛮陬【魏都赋蛮陬夷落译遣而通】北攫空朔漠【正封班孟坚叙传龙荒朔幕莫不来庭汉书漠皆作幕】儒生愜教化【愜或作怯】武士猛刺斫【孙登呼杨骏曰刺刺斫斫刺士亦切】吾相两优游他人双落寞【愈】印从负鼎佩【史记伊尹欲干汤而无由乃为有莘氏媵臣负鼎俎以滋味说汤】门为登坛凿【淮南子凡国有难君自宫中召将诏之凿凶门而出汉书高祖设坛拜韩信为大将】再入更显严【显或作深显严见吕氏春秋】九迁弥謇谤【正封车千秋论戾太子事一日超九级选任彦昇代范云让表云千秋之一日九迁】宾筵尽?赵【左昭十七年晋文公有士?偃赵衰】导骑多卫霍【卫霍谓卫青霍去病也】国史擅芬芳宫娃分绰约【愈宫或作官非是服?风俗通曰楚人谓美色为娃庄子绰约若处子娃於佳切】丹掖列鹄鹭洪鑪衣?貉摛文挥月毫讲剑淬霜铎【正封】命衣备藻火【命衣乃周礼所谓上公九命衣服藻火见书益稷】赐乐兼拊搏【书益稷搏拊琴瑟】两厢铺 毳【史记顔注正寝之东西堂皆号曰厢风俗通云织毛褥谓之 毳广韵作毳毼 音衢毳山于切】五鼎调勺药【愈勺药字子虚赋及文选凡四见皆音酌略姚令威曰後语有仍祈却老药此当异读或作芍药集韵芍药调和五味也】带垂苍玉佩轡蹙黄金络诱接谓登龙【谓或作谕登龙门见後汉李膺事】趋驰状倾藿【正封淮南子葵藿倾心向日】青娥翳长?【江淹神女赋青娥盖艳】红颊吹鸣翕【李太白昭君词昭君拂玉鞍上马啼红颊】傥不忍辛勤何由恣欢谑【愈】惟当早贵富岂得慙寂寞但掷雇笑金【鲍明远白紵曲千金雇笑买芳年】仍祈却老药【正封汉郊祀志李少君以祠竈谷道却老方见上】歿庙配鑄鼎生堂合馨鑄【尔雅大磬谓之馨大钟谓之镛注亦名鑄馨音乔鑄音博】安行庇松篁高卧枕莞蒹【愈莞或作菅】洗沐恣兰芷【楚词浴兰汤兮沐芳】割烹厌脾臄【诗行苇嘉肴脾臄说文臄口上也取脾肾寘肠炙之曰臄臄其虐切】喜顔非忸怩【书顔厚有忸怩】達志

无限获【正封陨或作殒见儒行篇】诙谐酒席展慷慨戎装着斩马祭旄纛炰羔礼芒屨【愈屨音脚】山多离隐豹【列女传云南山有玄豹隐雾而七日不下食】野有求伸蠖【易尺蠖之屈以求伸也蠖虫名蠖乌廓切】推选阅羣材荐延搜一鹗【正封後汉孔融曰鹗鸟累百不如一鹗】左右供諂誉亲交献谀嚙【说文大笑也选嚙嚙终日 嚙其虐切】名声载揄扬权势实熏灼【愈熏或作熏诗忧心如熏毛传熏灼也汉谷永传潘岳西征赋皆用无作薰者】道旧生感激【汉高纪道故旧为笑乐】当歌发酬酢羣孙轻绮纨下客丰醴酪【正封】穷天贡睪异【诗憬彼淮夷来献其琛琛与睪同丑林切】币海赐酺醑【汉律须有诏令乃许大酺酺醑会聚酒也 酺音蒲又音步醑其脚切】作乐鼓还槌从禽弓始彊【愈淮南子疾如彊弩汉书作彊国语补音曰彊郭霍二音】取欢移日饮【汉夏侯婴传与高祖语未尝不移日又田蚡传】求胜通宵博【北史李谧好学隆寒達曙盛暑通宵】五白气争呼【楚词招魂有成皋而牟呼五白注五白五木也详见二卷送灵师诗】六奇心运度【正封汉陈平六出奇计】恩泽诚布濩【林赋布濩闲泽 濩音获】囂顽已箫勺【诸本箫作萧汉房中歌箫勺羣愿晋灼曰箫舜乐勺】

【周乐言以乐征伐也顔师古曰教化行则逆乱之徒交欢也】告成上云亨【封禅书管仲曰无怀虞羲神农炎帝颡顓帝啻尧舜汤封泰山禅云云黄帝封泰山禅亭亭二山名也】考古垂矩矱【愈淮南子知矩矱之所周 矱忧缚切】前堂清夜吹东第良晨酌池莲折秋房院竹翻夏箴【正封】五狩朝恒岱【书五载一巡狩恒北岳岱东岳 恒胡登切】三畋宿杨柞【礼记天子无事则岁三畋一为乾豆二为宾客三为充君之庖长杨五柞汉二宫名在盩厔县 柞音昨】农书乍讨论【汉艺文志有农家书九百一十四篇】马法长悬格【愈马法谓司马法字见扬雄美新悬或作废 格音各】雪下收新息【收或作牧新息蔡州县名是岁十月李愬克蔡擒吴元济时夜半大雪】阳生过京索【京县名有大索小索亭在今郑州界汉高帝与楚战荥阳京索间汉书索皆音山客切惟文选功臣赞有桑各一音阳生谓冬至】尔牛时寝讹【诗无羊尔牛来思或寝或讹讹动也】我仆或歌号【正封诗行苇或歌或号尔雅徒擊鼓曰号五洛切】帝载弥天地【书熙帝之载】臣辞劣萤燿【劣或作勿燿爵醺二音】为诗安能详庶用存糟粕【愈存或作等庄子天道篇桓公读书于堂上轮扁斲轮于堂下曰君之所读古人之糟魄已夫庄子粕作魄】

东雅堂昌黎集注卷八

卷九

<集部,别集类,汉至五代,东雅堂昌黎集注>

钦定四库全书

东雅堂昌黎集注卷九

律诗

题楚昭王庙【公元和十四年有襄州宜城县驿记盖公赴潮日也记云东北有井传是昭王井东北数十步有昭王庙今唯草屋一区每岁十月民相率祭其前与此诗意合诗亦是时作欵昭王名轸楚平王子在位二十七年】

丘坟满目衣冠尽【坟或作园】城阙连云草树荒犹有国人怀旧德一间茅屋祭昭王

宿龙宫滩

浩浩复汤汤【黄鲁直云退之裁听水句尤见工所谓浩浩汤汤抑更扬者非谪客里夜卧饱闻此声安能周旋妙处如此耶 汤音商】滩声抑更扬奔流疑激电惊浪似浮霜梦觉灯生晕宵残雨送凉如何连晓语一半是思乡【或作祗是说家乡】

义鱼招张功曹【或无下四字周官以时簪鱼郑玄云以叉刺泥中取之张功曹署也俱自御史出为南方县公连州阳山署郴州临武以顺宗即位赦俱徙掾江陵公法曹署功曹公於是出岭至郴与署俱埃新命於郴而作当是贞元二十年後公在江陵祭李郴州有云投义鱼之短韵愧韬瑕而举秀埃新命於衡阳费薪刍於馆候此其证也】

义鱼春岸阔此兴在中宵大炬然如书长船缚似桥深窥沙可数静撈水无摇【撈进船也本音谤又北孟反义见第五卷】刃下那能脱【刃或作手】波间或自跳中鳞怜锦碎【怜或作疑中去声】当目讶珠销【当去声】星火逃翻近惊人去暂遥竞多心转细得隼语时嚣【左传得隼曰克嚣虚骄反】潭罄知存寡舷平觉获饶【舷或作船】交头疑凑饵骈首类同条濡沫情虽密【庄子泉涸鱼相与处於陆相响以湿相濡以沫】登门事已辽【事或作志辛氏三秦记曰河津一名龙门鱼不能上上则为龙登门谓此也】盈车欺故事【孔丛子卫人钓鱼於河得鱼焉其大盈车】饲犬验今朝【杜子美黄鱼诗脂膏兼饲犬饲音伺】血浪凝犹沸腥风远更飘盖江烟幂幂【莫狄切】拂棹影寥寥【拂或作回】獭去愁无食龙移惧见烧如棠名既误【左传隐公五年如棠观鱼】钓渭日徒消【史记吕尚年老鱼钓周西伯出猎遇於渭之阳】文客惊先赋篙工喜尽谣【左太冲吴都赋篙工楫师选自闽禺】

脍成思我友观乐忆吾僚【少陵尝有观打鱼诗云吾徒胡为纵此乐暴殄天物圣所哀与公所谓观乐忆吾僚者异矣】自可捐忧累何须强问鶖【贾谊鵬赋曰问於子鵬余去何之楚人命鶖曰鵬不祥鸟也 鶖音臬】

李员外寄纸笔【李伯康也伯康以贞元十九年为郴州刺史权德舆集有墓志

今按後卷祭文获纸笔之双贗即谓此事投叉鱼之短韵亦指前篇也】

题是临池後【张伯英善书草书临池学书池水尽黑】分从起草余【汉制尚书郎掌天子制诏起草禁中】兔尖针莫并茧淨雪难如【羲之制兰亭用蚕茧纸书之】莫怪殷勤谢虞卿正着书【虞卿着虞氏春秋太史公曰虞卿非穷愁亦不能着书】次同冠峡【公有同冠峡诗与此诗凡二章皆赴阳山时作冠或作弄或作巫】

今日是何朝天晴物色饶【晴或作清】落英千尺堕游丝百丈飘泄乳交岩脉悬流揭浪漂无心思岭北猿鸟莫相撩【荆公诗有物华撩我老盖本此也】

答张十一功曹【唐本有张署寄公诗】

山淨江空水见沙哀猿啼处两三家簔簩竞长纖纖笋【异物志曰簔簩生水边长数丈围一尺五六寸柳子厚记柳州山水谓其山多簔簩湘湖间多此竹也】踟躕闲开艳艳花【闲或作初羊踟躕花名注见三卷杏花诗】未报恩波知死所【左传狼曠云吾未获死所】莫令炎瘴送生涯【少陵诗应须美酒送生涯】吟君诗罢看双鬓斗觉霜毛一半加【任子渊云斗觉诗中健语也前辈多使退之诗有此句东坡诗黄昏斗觉罗裳薄後山诗斗觉文字生清新】

郴州祈雨【桂阳郡即今之郴州 郴音琛】

乞雨女郎魂無羞洁且繁庙廊鼯鼠叫【尔雅鼯鼠状如蝙蝠飞而且乳亦名飞生】神降越巫言【史记汉武帝令越巫立越祠祝越巫者越国之巫也】旱气期销荡陰官想骏奔【书骏奔走执豆笏】行看五马入【南史柳景元兄弟五人并为太守时人语曰柳氏门庭五马逶迤谢灵运为永嘉太守常以五马自随立五马坊五马亭载於图记】萧?已随轩【後汉郑巨君为淮陰太守政不烦苛天旱行春随车致雨】

湘中酬张十一功曹【湘中即谓郴州】

休垂絶徼千行泪【絶一作越汉节通传盗出徼外铸钱顔曰徼犹塞也东北谓之塞西南谓之徼】共泛清湘一叶舟今日岭猿兼越鸟可怜同听不知愁

郴口又赠二首

山作劒攢江写镜扁舟斗转疾於飞回头笑向张公子终日思归此日归

雪飈霜翻看不分【雪或作云】雷惊电激语难闻沿涯宛转到深处何限青天无片云【涯或作崖】

题木居士二首【张芸叟木居士诗序云耒阳县北沿流二三十里鰲口寺即退之所题木居士在焉元丰初以祷旱不应为邑令析而薪之今存者乃僧道符更刻】

火透波穿不计春根如头面干如身偶然题作木居士便有无穷求福人

为神讎比沟中断【庄子百年之木破为牺尊比沟中之断则美恶有闲矣其於失性一也】遇赏还同爨下余【後汉蔡邕在吴有烧桐以爨者闻火烈之声知其良木因裁为琴】朽蠹不胜刀锯力匠人虽巧欲何如

晚泊江口【据诗意及篇次亦自阳山还过湘中作下诗同】

郡城朝解?江岸暮依村二女竹上泪【张华博物志舜死二妃泪下染湘竹竹尽斑】孤臣水底魂【史记屈原仕楚为上官大夫所谗自投汨罗以死】双双归蛰燕一一叫羣猿回首那闻语空看别?翻【闻或作能】

湘中【公此诗谓屈原也】

猿愁鱼踊水翻波【踊或作跃】自古流传是汨罗【贾谊吊屈原赋云侧闻屈原兮自湛汨罗顔师古注汨水名在长沙罗县汨音覓】苹藻满盘无处奠【盘或作船】空闻渔父叩舷歌【舷或作船楚词渔父篇曰渔父莞尔而笑鼓枻而去为沧浪之歌王逸曰鼓泄叩船舷也舷音贤】

别盈上人【柳子厚集有诚盈住衡山中院】

山僧爱山出无期俗士牵俗来何时祝融峯下一回首即是此生长别离

喜雪献裴尚书【或无下四字尚书裴均也时为荆南节度使吏部尚书公为法曹参军作诗以献元和元年春也】

宿云寒不卷春雪堕如筛【或作筛筛所宜切】騁巧先投隙潜光半入池【半或作乱】喜深将策试惊密仰檐窥自下何曾污增高未觉危【觉或作见】比心明可烛拂面爱还吹妬舞时飘袖欺梅并压枝地空迷界限砌满接高卑浩荡乾坤合霏微物象移为祥矜大熟布泽荷平施【为或作验布或作市以上句为祥言之布泽为当】已分年华晚犹怜曙色随气严当酒换【或作暖】酒急听窗知【邵氏闻见録云荆公尝以力去陈言夸末俗可怜无补费

精神薄退之然其咏雪则云借问火城将策试何如云屋听窗知皆用退之句也去古人陈言以为非用古人陈言乃为是耶】照曜临初日玲珑滴晚澌【晚或作晓】聚庭看岳耸扫路见云披阵势鱼丽远【桓五年左氏郑人为鱼丽之阵 丽音离】书文鸟篆奇【索靖书状苍颉既王书契是为科斗鸟篆】纵欢罗艳黠列贺拥熊螭履弊行偏冷【史记东郭先生行雪中履有上无下足尽践地】门扃卧更羸【録异传时洛阳大雪袁安门无行路僵卧不出】悲嘶闻病马【或作鸟】浪走信娇儿竈静愁烟絶丝繁念鬓衰拟盐吟旧句【世说谢太傅内集雪诗撒盐空中差可拟】授简慕前规【谢灵运雪赋曰梁孝王授简於司马大夫曰为我赋之】捧赠同燕石【阌子曰宋之愚人得燕石藏之以为宝有客观之笑曰此燕石也】多慙失所宜

春雪

看雪乘清旦【看或作观】无人坐独謡【坐独或作独坐】拂花轻尚起落地暖初销已讶陵歌扇还来伴舞腰洒篁留密节【密或作半】着柳送长条入镜鸾窥沼行天马度桥【沈存中云杜子美诗红稻啄余鹦鹉粒碧梧栖老凤凰枝语相反而意新退之入镜鸾窥沼行天马渡桥盖仿此体】徧堦怜可掬满树戏成摇江浪迎涛日风毛纵猎朝弄闲时细转争急忽惊飘城险疑悬布【悬布字见左襄十年晋荀偃伐偃阳事】砧寒未捣销莫愁陰景促夜色自相饶【色或作月】

闻梨花发赠刘师命【此诗与後梨花下诗皆贞元二十一年正月阳山作也後诗谓今日相逢瘴海头是也公古诗亦有刘生诗可以兼考】

桃蹊惆怅不能过【蹊或作溪】红艳纷纷落地多闻道郭西千树雪欲将君去醉如何

春雪间早梅【间或作映元和元年春江陵作】

梅将雪共春彩艳不相因逐吹能争密排枝巧妬新谁令香满座独使净无尘芳意饶呈瑞寒光助照人玲珑开已徧点缀坐来频那是俱疑似须知两逼真荧煌初乱眼浩荡忽迷神未许琼华比从将玉树亲【从将或作将从】先期迎献岁更伴占兹辰【或作晨】愿得长辉映轻微敢自珍【微或作严】

早春雪中闻鶯【北地春晚方闻鶯此诗盖南迁时作也诸本或在入关咏马之後】

朝鶯雪里新雪树眼前春带澁先迎气侵寒已报人共矜初听早谁贵後闻频暂噤那成曲孤鸣岂及辰风霜徒自保桃李讵相亲寄谢幽栖友辛勤不为身

梨花下赠刘师命【苏魏公云当録於古诗中注见前闻梨花发诗题下】

洛阳城外清明节百花寥落梨花发今日相逢瘴海头共惊烂漫开正月

和归工部送僧约【工部归登也约荆州人详见刘梦得集】

早知皆是自拘囚不学因循到白头汝既出家还扰扰何人更得死前休【得或作向】

入关咏马【元和元年夏入江陵召拜国子博士入蓝关作】

岁老岂能充上驷【史记孙臆取君上驷】力微当自慎前程不知何故翻骧首牵过关门妄一鸣【妄或作忘顔延年赋望西极而骧首】

木芙蓉

新闻寒露丛远比水间红【露或作路间或作边皆非是】艳色宁相妬嘉名偶自同采江官渡晚搴木古祠空【或从杭蜀馆本官渡作秋节祠作辞又云阁本作秋江官渡晚寒本古祠空洪庆善本校从采江官渡晚搴木古祠空按古诗有涉江采芙蓉正谓荷花又九歌搴芙蓉兮木末则谓搴之非其地也此以二花对喻谓将采之江则秋节已晚将搴之木则古辞所喻为无益盖诗人强彼弱此意也今按方说非是盖此诗言荷花与木芙蓉生不同处而色皆美名又同故以采江搴木二事相对言其生处而九歌者祭神之辞故曰古祠也如此则此诗从头至此六句意皆联属然嘉佑杭本已如此非洪意定也】愿得勤来看无令便逐风【愿得或作须劝】题张十一旅舍三咏【公自阳山与张十一徙橡江陵道潭州而作以其咏井云贾谊宅中今始见知之】

榴花

五月榴花照眼明枝间时见子初成可怜此地无车马颠倒青苔落绛英【绛或作细】

井

贾谊宅中今始见【水经注云长沙县西陶侃庙传是贾谊宅中有一井实谊所穿】葛洪山下昔曾窥【葛洪丹井所在有之】寒泉百尺空看影正是行人渴死时【渴或作喝】

蒲萄

新茎未徧半犹枯高架支离倒复扶【复或作後】若欲满盘堆马乳【若或作君蜀本图经本草蒲萄注子有似马乳】莫辞添竹引龙须

峡石西泉【西一作寒】

居然鳞介不能容石眼环环水一锺闻说旱时求得雨祗疑科斗是蛟龙

梁国惠康公主挽歌二首【梁或作凉考之史当作梁宪宗长女也下嫁于頔之子季父元和中薨谥曰惠康

今按本或有词字羊士谔集有梁国惠康公主挽歌词二首注云时诏令百官进诗】

定谥芳声远移封大国新巽宫尊长女【易巽为长女】台室属良人【季支之父頔为相故云台室】河汉重泉夜梧桐半树春龙輶非厌翟【选潘岳寡妇赋龙輶俨以星驾兮注丧车也周礼王后五辂二曰厌翟谓以雉羽饰车 輶音而厌於涉反翟丁历反】还轍禁城尘

秦地吹箫女【列仙传秦穆公女字弄玉时有箫史善吹箫弄玉好之公以妻马】湘波鼓瑟妃【屈原远游云二女御九韶歌使湘灵鼓瑟兮】佩兰初应梦【左传郑文公有妾曰燕姑梦天使与已兰曰以是为而子】奔月竟沦辉【竟或作竞非是淮南子羿请不死之药於西王母羿妻嫦娥窃而奔月】夫族迎魂去宫官会葬归从今沁园草【後汉明帝女沁水公主田园尝为窦宪所夺 沁七鸠反】无复更芳菲

和崔舍人咏月二十韵【舍人崔群也公元和七年以职方员外郎下迁国子博士此诗其年八月所作故落句云独有虞庠客无由舍落莫意谓职在虞庠去尧堦远矣 阁本无此篇】

三秋端正月今夜出东溟对日犹分势腾天渐吐灵未高烝远气半上霁孤形赫奕当躔次虚徐度杳冥长河晴散雾列宿曙公萤【宿音秀】浩荡英华溢潇疎物象泠【或作零】池边临倒照檐际送横经花树参差见臯禽断续聆【诗鹤鸣于九臯臯泽也】牖光窥寂寞砧影伴娉婷幽坐看侵户闲吟爱满庭辉斜通壁练彩碎射沙星清洁云间路空凉水上亭净堪分顾兔【天问厥利维何而顾兔在腹】细得数飘萍山翠相凝绿林烟共冪青过隅惊桂侧当午觉轮停属思摘霞锦【属音烛】追欢罄缥緋【缥青白色缥普沼反】郡楼何处望陇笛此时听右掖连台座重门限禁扃风台观滉漾【滉一作洗】冰砌步青荧【选眩耀青荧】独有虞庠客无由拾落莫【帝王世纪尧阶有莫朔後日生一莢至望则日落一莢】

咏雪赠张籍【此诗或云自松篁遭挫抑以下等语专讥时相故终以其意谓张籍曰惟子能谄尔诸人得语哉又曰莫烦相属和传示及提孩其有所讥也审矣】

只见纵横落【只或作祗】宁知远近来飘飏还自弄历乱竟谁催【梁书豫章王综鸣钟诗历乱百愁生】座暖销那怪池清失可猜坳中初盖底【坳地不平】垤处遂成堆【刘贡父云欧阳永叔与江邻几论此诗以随车翻缟带逐马散银盃为不工而以坳中初盖底垤处遂成堆为胜且谓未知得韩意否 垤徒结反】慢有先居後【慢或作漫】轻多去却回度前铺瓦陇发本积墙隈【发本或作奔发】穿细时双透乘危忽半摧舞深逢坎井集早值层台砧练终宜捣阶磼未暇裁城寒装睥睨【装或作粧睥睨城上女墙 睥匹诣反睨妍计反二字合从王作埤垤】树冻裹莓苔【裹或作覆】片片匀如翦纷纷碎若拏【乃禾反】定非燐鹄鹭【燐音寻】真是屏琼瑰【王氏尘史云说文以琼为赤玉比见人咏白物多用之韩愈雪诗真是屑琼瑰又今朝踏作琼瑰迹别有所稽耶岂用之不审也

瑰姑回反一作瓌】纬繡观朝萼【楚词忽纬繡其难迁注纬繡乖戾也萼花树

纬音輝繡音画】冥茫矚晚埃当窗恒凜凜出户即皑皑【选涉积雪之皑皑 皑五来切】压野荣芝菌【压或作润菌巨陨切】倾都委货财娥嬉华荡漾【娥娣娥见淮南子娣娥窃不死药奔月宫事漾或作漾】胥怒浪崔嵬【胥伍子胥伏劒死投江中随潮往来事见吴越春秋】磧迴疑浮地云平想辗雷随车翻缟带【缟音杲白色也缟带二字见左襄二十九年】逐马散银盃万屋漫汗合【漫汗皆平声】千株照曜开松篁遭挫抑【或作折方云公时以柳涧事下迁疑寄意於时宰也 今按此诗无岁月方说恐未必然】粪壤获饶培隔絶门庭遽挤排陞级才【史记挤排庄助买臣】岂堪裨岳鎮强欲效盐梅隐匿瑕疵尽【左氏瑾瑜匿瑕】包罗委琐该【汉相如传岂特委琐握 】误鸡宵呃喔【误或作悟选良游呃喔 呃音厄喔音渥】惊雀暗徘徊浩浩过三暮【史记天官书白帝行德毕昴围三暮德乃成】悠悠币九垓【风俗通十兆曰经十经曰垓国语天子之田九垓以食兆民 垓音该】鲸鲵陆死骨【木华海赋其鱼则横海之鲸陆死盐田颇骨成岳】玉石火炎灰【书火炎昆冈玉石俱焚】厚虑填溟壑高愁?斗魁【杨子云甘泉赋?北极之嶸嶸北斗第一至四为魁第五第七为标?音致】日轮埋欲侧坤轴压将颓岸类长蛇搅【岸类或作堰似搅或作扰】陵犹巨象脰【音灰】水官夸杰黠木气怯胚胎着地无由卷连天不易推龙鱼冷蛰苦虎豹饿号哀巧借奢豪便专绳困约灾威贪陵布被光肯离金罍【离或作杂】赏玩捐他事歌謡放我才狂教诗砭砭【或作机砭勒末反砭五忽反】兴与酒陪鳃【陪鳃怒张 字见潘岳射雉赋樊李校作毳毳 鳃苏来反】惟子能谙耳诸人得语哉助留风作党劝坐火为媒雕刻文刀利搜求智网恢莫烦相属和传示及提孩

酬王二十舍人雪中见寄【或云王涯为舍人见王适墓志本传略之今作仲舒非 今按王二十涯亦见讳行録】

三日柴门拥不开阶平庭满白皑皑【平庭或作庭平皑五来切】今朝蹋作琼瑶迹为有诗从凤沼来【从或作仙】

送侯喜【公长庆元年有雨中寄张博士籍侯主簿喜之什此诗岂同时作欵喜时为国子主簿公为祭酒故云长官也】

已作龙鍾後时者懒於街里蹋尘埃如今便别长官去直到新年衙日来【长官或作官长非是】

学诸进士作精卫衔石填海【任昉述异记炎帝女溺死东海化为精卫自呼其名每衔西山木石填东海】

鸟有偿冤者终年抱寸诚口衔山石细心望海波平渺渺功难见区区命已轻人皆讥造次我独赏专精岂计休无日惟应尽此生何慙刺客传不着报讎名

奉酬振武胡十二丈大夫【胡证也传云河东人元和九年党项屡扰边证以儒而勇由谏议

大夫选拜振武军节度使 诸本无奉字】

倾朝共羨宠光频半岁迁腾作虎臣戎旆暂停辞社树【诸本作弩矢前驱烦县令方从阁本云赵璘因话録曰胡证建节赴振武过河中时赵宗儒为帅证持刺称百姓入谒献诗曰诗书入京国旌节过乡关若用今语亦非胡公敬桑梓之意阁本多出於公晚年所定 今按方意甚善但其言阁本为晚年所定者为无据耳】里门先下敬乡人【诗意取汉万石君传诸子弟入里门趋至家事】横飞玉盞家山晓远蹀金珂塞草春自笑平生夸胆气不离文字鬓毛新

奉和库部卢四兄曹长元日朝回【卢汀也国史谱云两省相呼为阁老尚书丞即相呼为曹长郎中员外御史遗补相呼为院长上可兼下下不可兼上唯御史相呼为端公然退之呼卢库部为曹长张功曹为院长则上下亦通称也】

天仗宵严建羽旄【建或作树毛诗出车云建彼旄矣】春云送色晓鸡号金炉香动螭头暗【唐会要曰汉栢梁殿灾越巫言海中有鱼虬尾似鸱激浪则降雨遂作像于屋以厌火灾亦作螭字唐制起居郎舍人分侍左右直第二螭首】玉佩声来雉尾高【唐制人君举动必以扇雉尾障扇四小团雉尾扇四方雉尾扇十二见仪卫志】戎服上趋承北极儒冠列侍映东曹太平时节难身遇【难身或作身难】郎署何须叹二毛【左僖二十二年不擒二毛二毛黑白相半选潘安仁秋兴赋余春秋三十有二始见二毛】寒食直归遇雨【唐本笺云元和十年公时以考功郎中知制诰归作宿】

寒食时看度【荆楚岁时记去冬至一百五日即有疾风甚雨谓之寒食又先贤传云太原旧俗以介子推焚死至时一月寒食不敢烟爨】春游事已违风光连日直陰雨半朝归【朝或作晴】不见红球上【刘向别録曰踏鞠黄帝所造本兵势也或云起於战国鞠与球同红球者以红帛为之】那论彩索飞【古今艺术图曰比方山戎寒食日用秋千为戲彩索即谓秋千戲也】惟将新赐火【周礼季春出火即赐火也】向曙着朝衣

送李六協律归荆南【李協律翱也公尝量移为江陵法曹故此诗首言羈游处云】

早日羈游所春风送客归柳花还漠漠江燕正飞飞【高斋诗话云退之诗江燕正飞飞盖取老杜清秋燕子正飞飞】歌舞知谁在宾僚逐使非宋亭池水緑【杜子美诗曾闻宋玉宅每欲到荆州荆州即江陵也公往在江陵寒食出游有宋玉庭边不见人之句】莫忘蹋芳菲

题百叶桃花【公元和十年知制诰时作】

百叶双桃晚更红窥窗映竹见玲珑【窥或作归或作临令以嘉佑杭本】应知侍史归天上故伴仙郎宿禁中【应劭汉官仪曰尚书入直台廨中给使史一人女侍史二人唐人任郎官多称仙郎白乐天所谓仙郎静翫禁闱闲】

春雪

新年都未有芳华二月初惊见草芽白雪却嫌春色晚故穿庭树作飞花

戏题牡丹【段成式酉阳杂俎云前史无说牡丹者惟谢康乐集言竹闲水际多牡丹成式捡隋朝种植法初不说牡丹则知隋朝花药中所无也开元末裴士淹奉使回至汾州得白牡丹一窠植於长兴私第至德中马仆射领太原各得红紫二色者移於城中元和初犹少今与戎葵角多少矣】

幸自同开俱隐约何须相倚鬪轻盈凌晨并作新粧面对客偏含不语情双燕无机还拂掠游蜂多思正经营【正或作近】长年是事皆抛尽今日栏边暂眼明

盆池五首【刘贡父云退之古诗高卓至律诗虽可称善要有不工者老翁真个似童儿此真谐语为戏耳或云盆池诗有天工如拍岸才添水数鉞一夜青蛙鸣到晓非意到不能作也】

老翁真个似童儿汲水埋盆作小池一夜青蛙鸣到晓恰如方口钓鱼时【方或作枋方云唐属卫州桓温败枋头乃其地也此诗与送李愿诗只作方口今按公盘谷诗因及方口燕川则二处皆盘谷旁近之小地名耳盘谷在孟州济原县孟州东过怀州乃至卫州而济原又在孟州西北四十里则盘谷者安得至卫州之枋头乎方说非是】

莫道盆池作不成藕梢初种已齐生从今有雨君须记来听萧萧打叶声【有雨或作雨洒】

瓦沼晨朝水自清小虫无数不知名忽然分散无踪影惟有鱼儿作队行【惟或作为】

泥盆浅小讵成池夜半青蛙圣得知【圣或作听】一听暗来将伴侣不烦鸣唤鬪雄雌

池光天影共青青拍岸才添水数鉞且待夜深明月去试看涵泳几多星【明或作乘】

芍药【公元和十年知制诰寓直禁中作】

浩态狂香昔未逢红灯烁烁绿盘龙觉来独对情惊恐身在仙宫第几重【情或作忽】

奉和虢州刘给事使君三堂新题二十一咏【并序或无奉新题三字刘伯刍以元和八年出刺虢州白居易有制词】

虢州刺史宅连水池竹林往往为亭台岛渚目其处为三堂【三堂建於开元中吕温尝记之谓三者明臣子在三之节堂者励宗室肯堂之义】刘兄自给事中出刺此州在任逾岁职修人治州中称无事颇复增饰从子弟而游其间又作二十一诗以咏其事流行京师文士争和之余与刘善故亦同作

新亭

湖上新亭好公来日出初水文浮枕簟【文或作纹】瓦影?龟鱼

流水

汨汨几时休从春复到秋只言池未满池满强交流【只或作祗】

竹洞

竹洞何年有公初斫竹开洞门无锁钥俗客不曾来

月台

南馆城陰阔东湖水气多直须台上看始奈月明何

渚亭

自有人知处那无步往踪莫教安四壁面面看芙蓉

竹溪

蔼蔼溪流慢【慢或作漫】稍稍岸筱长【筱或作竹】穿沙碧篴净落水紫苞香【少陵竹诗有雨洗娟娟净风吹细细香前辈尝云竹未尝有香而少陵以香言之岂知公亦有落水紫苞香之语乎】

北湖

闻说游湖棹寻当到此回应留醒心处準拟醉时来【準或作准俗字】

花岛

蜂蝶去纷纷香风隔岸闻欲知花岛处水上覓红云

柳溪

柳树谁人种行行夹岸高莫将条系?着处有蝉号

西山

新月迎宵挂晴云到晚留为遮西望恨终是懒回头

竹迳

无尘从不扫有鸟莫令弹若要添风月应除数百竿

荷池

风雨秋池上高荷盖水繁未谙鸣撼撼【选卢子谅云撼撼芳叶零撼所格切】那似卷翻翻

稻畦

罨布畦堪数【罨或作卦布或作圃罨博局上方目也字见选博奕论今按博局当云碁局桓谭新论守边隅趋作罨以自生於小地】枝分水莫寻鱼肥知已秀鹤没觉初深

柳巷

柳巷还飞絮春余几许时吏人休报事公作送春诗

花源【或作原】

源上花初发公应日日来丁宁红与紫慎莫一时开【莫或作勿】

北楼

郡楼乘晓上尽日不能回晚色将秋至长风送月来

镜潭

非铸复非熔泓澄忽此逢鱼鰕不用避只是照蛟龙

孤屿

朝游孤屿南暮戲孤屿北所以孤屿鸟与公尽相识

方桥

非阁复非船可居兼可过君欲问方桥方桥如此作【白乐天皮日休诗皆自注曰音佐今按广韵作造也将祚切而荀子肉腐出虫鱼枯生蠹贪利忘身祸裁乃作及廉范五袴之謡皆已为此音矣然读如佐者又将祚切之讹而世俗所用从人从故而切为将祚者又字之俗体也】

梯桥

乍似上青冥初疑蹑菡萏自无飞仙骨欲度何由敢

月池

寒池月下明新月池边曲若不妬清妍却成相映烛

游城南十六首【十六诗非一日作编者类次之】

赛神【赛谓祷赛字本作塞汉书郊祀志云冬塞祷祀广陵厉王杀牛塞祷是也今作赛赛悉代反】

白布长衫紫领巾差科未动是闲人麦苗含穗桑生椹【椹桑实诗食我桑黷怀我好音黷即椹也 椹食荏反】共向田头乐社神

题于宾客庄【于頔字允元元和八年为太子宾客】

榆荚车前盖地皮【释木云榆荚榆钱尔雅云白粉车前草名释草云一名芣苢一名马舄郭璞云大叶长穗好生道边江东呼为虾蟆衣车尺遮反】蔷薇蘸水笋穿篱马蹄无入朱门迹纵使春归可得知

晚春

草树知春不久归【草树一作草木】百般红紫鬪芳菲杨花榆荚无才思惟解漫天作雪飞

落花

已分将身着地飞那羞践蹋损光晖无端又被春风误吹落西家不得归

楸树二首

几岁生成为大树一朝纏绕困长藤谁人与脱青罗帔看吐高花万万层

幸自枝条能树立可烦萝蔓作交加【可或作何】傍人不解寻根本却道新花胜旧花【傍或作游】

风折花枝

浮艳侵天难就看清香扑地只遥闻【只或作可】春风也是多情思故?繁枝折赠君【拣或作折折或作将】

赠同游【诸本无此篇杭蜀本皆阙唯唐本有之且属在此】

唤起窗全曙催归日未西无心花里鸟更与尽情啼【鲁直云吾儿时每哦此诗而了不解其意自出峡吾年五十八矣时春晓偶忆此诗方悟之唤起催归二禽名也古人於小诗用意精深如此催归子规也唤起声如人络丝圆转清亮偏於春晓鸣江南谓之春唤复斋漫录云予尝读唐顾渚山茶记曰顾渚山中有鸟如鸚鵡而色苍每至正二月作声曰春起也三四月云春去也采茶人呼为唤春鸟然则唤起之名唐人说矣豫章不举为证何也】

赠张十八助教【张十八籍也时为四门国子博士助教】

喜君眸子重清朗【籍尝病眼故云】携手城南历旧游忽见孟生题竹处【公与孟郊尝游此有城南联句至是郊死矣】相看泪落不能收题韦氏庄【城南韦曲在唐最盛名与杜陵相埒当时为之语曰城南韦杜去天尺五杜子美赠韦赞善诗所谓时论同归尺五天也是时庄已衰矣故诗意有云】

昔者谁能比今来事不同寂寥青草曲散漫白榆风架倒藤全落篱崩竹半空宁须惆怅立翻覆本无穷【须一作知】

晚雨

廉纤晚雨不能晴【蜀本作晚雨廉纤於律不谐今从诸本】池岸草间蚯蚓鸣投竿跨马蹋归路才到城门打鼓声

出城

暂出城门蹋青草远於林下见春山应须韦杜家家到祇有今朝一日闲

把酒

扰扰驰名者谁能一日闲我来无伴侣把酒对南山【对或作谢】

嘲少年

直把春偿酒都将命乞花【乞音气与人物也汉乞扬生师公调张藉诗云乞君飞霞佩亦与此乞字同】祇知闲信马不觉误随车

楸树

青幢紫盖立童童【蜀先主传舍东南角有桑树童童如小车盖童童茂盛貌 幢传江反】细雨浮烟作彩笼不得画师来貌取定知难见一生中【貌或作邈犹少陵貌得山僧及童子之貌 今按貌音邈】

遣兴【遣或作远】

断送一生惟有酒寻思百计不如闲莫忧世事兼身事须着人间比梦间

东雅堂昌黎集注卷九

卷十

钦定四库全书

东雅堂昌黎集注卷十

律诗凡八十首【诸本作七十九首今从蜀本】

送李尚书赴襄阳八韵【得长字季逊也逊字友道荆州石首人元和十年十月分山南东道为两节度使以逊检校工部尚书为襄州刺史充襄复郢均房节度使以右羽林将军高霞寓为唐州刺史充唐随邓节度使逊赴襄阳廷臣送者三十余人分韵赋诗太常卿许孟容为之序按逊本传迁户部侍郎为山南东道节度使又按襄州石本题名衔云检校工部尚书李逊时逊盖自尚书而出史略之】

帝忧南国切改命付忠良【先是山南东道节度使严绶讨吴元济无功罢为太子少保乃以逊为节度故云】壤画星摇动旗分兽簸扬五营兵转肃千里地还方控带荆门远飘浮汉水长赐书宽属郡【或作部】战马隔邻疆纵猎雷霆迅观碁玉石忙风流岷首客【羊叔子尝与客邹湛登岷山曰自有宇宙便有此山】花艳大堤倡【大堤地名在襄阳宋隋王诞为襄阳郡闻诸女歌因为词曰朝发襄阳城暮至大堤曲大堤诸女儿花艳惊郎目】富贵由身致谁教不自强

和席八十二韵【席八或以为席谦非也当是席□按讳行録席□行八贞元十年进士】

绦阙银河曙东风右掖春【应劭汉官仪中书为右曹称西掖正门之两旁曰掖】官随名共美花与思俱新绮陌朝游间绫衾夜直频【汉官典职仪曰尚书郎入直供青绫白绫被】横门开日月高阁切星辰庭变寒前草天销霁後尘沟声通苑急柳色压城匀纶綍谋猷盛【礼记王言如纶其出如綍音绋李本校谋作谟然阁本只作谋考之周书作谋为是但谟古字作碁李涪刊误曰旧作嘉谟今作嘉谋犹沈浮二音通也】丹青步武亲芳菲含斧藻【扬子吾未见斧藻其德若斧藻其槩者斧与黼同】光景畅形神傍砌看红药【谢朓中书省诗云红药当阶翻】巡池咏白苹【柳恽为吴兴太守有江南曲云汀洲采白苹日落江南春】多情怀酒伴【怀或作法】余事作诗人倚玉难藏拙【玉或作市】吹竽久混真【齐宣王好竽南郭先生不知竽而滥进见韩子】坐惭空自老江海未还身和武相公早春闻鶯【武元衡也元衡以元和八年三月自西川节度使拜相公此篇与所和孔雀皆元衡拜相後追和其镇蜀时作】

早晚飞来入锦城【华阳国志成都万里桥南岸有锦城】谁人教解百般鸣春风红树惊眠处似妬歌童作艳声

太安池【阙 唐长安有太安宫太安亭而太安池未尝载见岂安乐公主所凿定昆池耶景龙中请昆明池中宗不与主怒自凿定昆池延袤数里岂即此池耶】

游太平公主山庄【诸本无此题唐本太安池下增阙字而别出此题云晁本李谢本所校并同】

公主当年欲占春故将台榭押城闌【押或作压】欲知前面花多少【或作处】直到南山不属人

晚春

谁收春色将归去【将归或作归将非是】慢绿妖红半不存【慢或作漫】榆荚祇能随柳絮等闲撩乱走空园

大行皇太后挽歌词三首【此宪宗母庄宪皇后也樊本云诸本脱太字非是韦昭云大行者不反之辞天子皇后崩未有谥故称大行】

一纪尊名正【后以永贞元年尊为皇太后崩於十一年故曰一纪】三时孝养荣【礼记文王之世子朝於王季曰三 养移亮切】高居朝圣主厚德载羣生武帐虚中禁【虚或作空 汉霍光传太后被珠襦盛服坐武帐中】玄堂掩太平【齐谢朓敬皇后哀册文曰翠?舒阜玄堂啓扉】秋天笳鼓歇松柏徧山鸣

威仪备吉凶文物杂军容配地行新祭【汉光武中元元年上文帝母薄太后曰高皇后配食地】因山托故封【汉文帝治霸陵因山不起坟皇后合葬丰陵故云故封】凤飞终不返【列仙传秦穆公女弄玉吹箫随凤凰飞去】劒化会相从【晋张华劒化延平津事有天生神物终当合耳之语王介甫曰此非君臣所宜言近於黷也】无复临长乐【叔孙通传惠帝东朝长乐宫汉皇太后所居宫名】空闻报晓钟【报晓或作晓暮】

追攀万国来警卫百神陪画褰登秋殿【礼丧服大记画褰二注云汉制以木为筐广三尺高二尺四方两角高衣以布 褰所甲切】容衣入夜台【丧大记饰棺君龙帷三池振容注云青质五色画之於绞绘而垂之以为振容容衣盖谓此也】云随仙驭远风助圣情哀【助方作动非是】只有朝陵日粧奁一暂开【汉明帝谒原陵见太后镜奁中物感动悲涕】

广宣上人频见过【广宣蜀僧元和中住长安安国寺寺有红楼宣有诗名号红楼集】

三百六旬长扰扰【百或作十】不冲风雨即尘埃久慙朝士无裨补【慙一作为】空愧高僧数往来学道穷年何所得吟诗竟日未能回天寒古寺游人少红叶窗前有几堆

闲游二首【元和十二年春作公自中书舍人降右庶子云】

雨後來更好绕池徧青青柳花闲度竹菱叶故穿萍【故或作乱杜诗潜龙故起云江上燕子故来频皆用此字】独坐殊米厌孤斟讵能醒持竿至日暮幽咏欲谁听

兹游苦不数再到遂经旬【到或作至经或作兼】萍盖污池净藤笼老树新林鸟鸣讶客【鸟或作鷺】岸竹长遮邻子云祗自守【杨子云传安帝时丁传董贤用事雄方草太元有以自守泊如也】奚事九衢尘

酬马侍郎寄酒【马总】

一壶情所寄四句意能多秋到无诗酒其如月色何和侯协律咏笋【侯喜也或云公意专以讥时相自得时方张王至蛇虺首掀掀大抵言其挟势植党苞藏奸慝之状如此岂李逢吉之谓耶是时裴度欲讨蔡逢吉引其党令孤楚萧俛等阻之公亦坐忤宰相意自中书舍人降右庶子】

竹亭人不到新笋满前轩乍出真堪赏初多未觉烦【或作繁公律诗不重用韵】成行齐婢仆环立比儿孙验长常携尺愁乾屡侧盆对吟忘膳饮偶坐变朝昏滯雨膏腴湿骄阳气候温得时方张王【庄子所谓王长其间是也并去声读公与刘梦得蒲萄诗皆用张王字】挟势欲腾骞见角牛羊没看皮虎豹存攢生犹有隙散布忽无垠讵可持筹筭谁能以理言纵横公占地罗列暗连根狂剧时穿壁羣强几触藩深潜如避逐【一作世】远去若追奔始讶妨人路还惊入药园萌牙防?大覆载莫偏恩已复侵危砌非徒出短垣身宁虞瓦砾计拟擿兰荪且叹高无数庸知上几番短长终不校先後竟谁论外恨苞藏密中仍节目繁暂须回步履要取助盘飧【或作餐盘飧寘壁左氏语】穰穰疑翻地【穰上声】森森竞塞门戈矛头戢戢蛇虺首掀掀妇懦咨料?【料音聊一或作聊量也张湛列子序且将料简世所希有者】儿痴谒尽髡侯生来慰我【或作意】诗句读惊魂属和才将竭呻吟至日暾【日或作欲楚词九叹日暾暾其西舍亦可以日入言也暾他昆切】过鸿沟【公从裴晋公平蔡元和十二年八月入汴过鸿沟作也汉四年刘项割鸿沟以西为汉以东为楚地在荥阳东南二十里此下皆随裴晋公伐蔡诗】

龙疲虎困割川原亿万苍生性命存谁劝君王回马首真成一掷赌乾坤

送张侍郎【张贾时自兵部侍郎为华州刺史阁本作侍御非】

司徒东镇驰书谒【元和十年正月加宣武节度使韩弘为司徒】丞相西来走马迎【元和十二年七月以宰相裴度为淮西宣慰处置使】两府元臣今转密一方逋寇不难平

赠刑部马侍郎【马总时副晋公东征】

红旗照海压南荒徵入中台作侍郎【中台或作台中非是】暂从相公平小寇便归天阙致时康

奉和裴相公东征途经女几山下作【或无奉字女几山在河南府福昌县三十四里白乐天云晋公出讨淮西过女几山下题诗云待平贼垒报天子莫指仙山示武夫而公此诗和云】

旗穿晓日云霞杂【云一作红杂作集今按对偶及文势当从诸本】山倚秋光劒戟明【洪庆善云以我之旗况彼云霞以彼之山况我之劒戟诗家谓之回鸾舞凤格】敢请相公平贼後暂携诸吏上峥嵘

鄜城晚饮奉赠副使马侍郎及冯李二员外【或无奉字冯李谓冯宿李宗闵也阁本冯宿时以都官李宗闵时以礼部并从征鄜音偃】

城上赤云呈胜气眉闲黄色见归期幕中无事惟须饮即是连镳向阙时【说文云镳马衔也镳补骄切】

酬别留後侍郎【或无酬字蔡平命马总为留後】

为文无出相如右【司马相如也汉武帝擢居左右常召相如视草】谋帅难居却縠先【僖二十七年左氏晋文公作三军谋元帅赵襄曰却縠可

却音隙縠音斛】归去雪销溱洧动【溱洧二水名溱在河南洧在郑】西来旌旆拂晴天

同李二十八夜次襄城【李正封也】

周楚仍连接川原乍屈盘云垂天不暖尘涨雪犹乾印绶归台室旌旗别将坛欲知迎候盛骑马万星攒同李二十八员外从裴相公野宿西界

四面星辰着地明散烧烟火宿天兵不关破贼须归奏自赭新年贺太平

过襄城

鄜城辞罢过襄城颍水嵩山刮眼明已去蔡州三百里家人不用远来迎

宿神龟招李二十八冯十七【龟下或有驿字汝州有神龟驿台按九域志开皇初建李谓正封冯谓宿也】

荒山野水照斜晖啄雪寒鸦趁始飞夜宿驿亭愁不睡幸来相就盖征衣

次硤石【诸本硤作峡今陕县也地理志可考】

数日方离雪今朝又出山试凭高处望隐约见潼关和李司勳过连昌宫【或作李二十八司勳无过字速昌宫在河南寿安县之二十九里按志高宗显庆三年置然落句云云疑为明皇

所作而元微之连昌宫辞大?咏明皇帝或云开元中曾葺之耳公从晋公平淮西回过壽安而作】

夹道踈槐出老根高薨巨桷压山原宫前遗老来相问今是开元几叶孙

次潼关先寄张十二阁老使君【张贾

潼关在华州华陰县界张阁老即华州刺史国史补云两省相呼为阁老】

荆山已去华山来【史记黄帝铸鼎荆山下荆山在汉冯翊怀德县华山太华也在华陰县】

日出潼关四扇开【出或作照扇或作面】刺史莫辞迎候远相公亲破蔡州回【亲或作新】

次潼关上都统相上【都统谓韩弘也

馆本无此篇关下或有头字一本在雨中寄张籍候喜诗後】

暂辞堂印执兵权尽管诸军破贼年寇盖相望催入相待将功德格皇天

桃林夜贺晋公【元和十二年十二月壬戌以裴度守本官赐上柱国晋国公丙子以右庶子韩愈为刑部侍郎考其年十二月丙辰朔壬戌则其月七日度以其月十六日方至自蔡则前除命盖在公未入朝之前故公诗夜贺晋公於桃林桃林在陕之灵宝县云】

西来骑火照山红夜宿桃林腊月中手把命珪兼相印一时重叠赏元功

送李员外院长分司吏部【李员外正封也】

去年秋露下羈旅逐东征今岁春光动驱驰别上京饮中相顾色送後独归情两地无千里因风数寄声晋公破贼回重拜台司以诗示幕中宾客愈奉和【或作晋公自蔡州入覲途中重拜云云愈因和之】

南伐旋师太华东天书夜到册元功将军旧压三司贵相国新兼五等崇鹄鹭欲归仙仗里熊罴还入禁营中长慙典午非材职【或作识蜀志譙周曰典午忽兮典司午马也白乐天自江州司马还朝再出亦曰昔徵从典午】得就闲官即至公

独钓四首【钓或作酌坐厌亲刑柄为刑部侍郎时作】

侯家林馆胜偶入得垂竿曲树行藤角平池散芡盘【芡音俭】羽沈知食驶【或作快或作趺】缙细觉牵难聊取夸儿女榆条系从鞍

一迳向池斜池塘野草花雨多添柳耳水长减蒲芽坐厌亲刑柄偷来傍钓车【坐厌方作厌

坐云仄与偷为一义坐亲刑柄来弄钓车为一说公诗多此体今按坐仄与偷来为对亦自亲切又况坐仄乃常用之语韦苏州云坐仄淮南守此类极多方从误本更为曲说不知语意之拙澁也】太平公事少吏隐诘相賒

独往南塘上秋晨景气醒露排四岸草风约半池萍鸟下见人寂鱼来闻饵馨所嗟无可召不得倒吾餅秋半百物变溪鱼去不来风能坼芡觜露亦染梨頰【广信晁氏旧藏印本能作棱亦作液一云山谷所定】远岫重叠出寒花散乱开所期终莫至日暮与谁回

枯树

老树无枝叶风霜不复侵腹穿人可过皮剥蚁还寻寄托惟朝菌依投絶暮禽犹堪持改火【论语鑽燧改火马融曰周书令有改火之文春取榆柳之火夏取枣杏之火季夏取桑柘之火秋取柞櫟之火冬取檀槐之火一年之中鑽火各异木故曰改火也】未肯但空心

元日酬蔡州马十二尚书去年蔡州元日见寄之什【马十二总也元和十三年元日有诗寄公次年元日公以此诗酬之】

元日新诗已去年蔡州遥寄荷相怜今朝纵有谁人领自是三峯不敢眠【峯或作冬方从唐本云华岳有三峯唐人守华者皆谓之三峯守盖公西归经从之路马诗必有所序述今不可得而详也今按此诗并题皆不言经由华州所作方说既无所据又三峯不敢眠亦无文理今当阙之以俟知者】

咏灯花同侯十一【或作同侯十一咏灯花侯十一喜也雪浪斋日记云此诗极似少陵】

今夕知何夕花然锦帐中自能当雪暖那肯待春红黄里排金粟【诸本黄作囊何逊诗金粟囊搔头蜀人史彦升曰黄里排金谓额闲花钿也又沈约宋书汉制乘舆翠盖黄裹所谓黄屋也诸本多引汉纪注实此义今按汉制黄屋与此诗文意不同疑史说误】钗头缀玉虫更烦将喜事来报主人公【一作翁】

祖席前字【旧注云以王涯徙袁州刺史而作按旧纪涯刺袁州元和三年四月也公时在东都故曰祖席洛桥边此诗前後注文旧本无之蜀本亦然又或二题前字秋字上皆有得字】

祖席洛桥边亲交共黯然野晴山簇簇霜晓菊鲜鲜书寄相思处盃衔欲别前淮阳知不薄【阳本作南洪本作阳云用汲黯薄淮阳事以後诗有淮南字随笔以误也】终愿早回船

秋字

淮南悲木落而我亦伤秋【而或作今】况与故人别那堪羈宦愁荣华今异路风雨苦同忧莫以宜春远【宜春即袁州也】江山多胜游【公自题此二诗後云两诗何处好就中何处

佳何处恶】

送郑尚书赴南海【郑尚书名权有序在集】

番禺军府盛【番禺今之广州番禺音潘禺音愚】欲说暂停盃盖海旗幢出连天观阁开衙时
龙户集【龙户采珠户也南海亦谓之蜃户】上日马人来【後汉马援讨蛮以数十人留於
象林所铸铜柱下南蛮呼为马留人见新史南蛮传】风静鷗鷖去【左氏祀爰居国语海鸟
曰鷗鷖鷗音爰鷖音居】官廉蚌蛤回【东汉孟尝为合浦太守珠复还】货通师子国【师
子国在南海中】乐奏武王台【武或作越汉传尉佗自称南越武王】事事皆殊异无嫌屈
大才

答道士寄树鸡【树鸡木耳之大者东坡和陶诗曰黄菰养土羔老褚生树鸡】

软湿青黄状可猜欲烹还唤木盘回烦君自入华阳洞直割乖龙左耳来【柳子厚龙城志茅
山道士吴缙采药於华阳洞口见一儿手把三珠戏於松下缙从之奔入洞中化为龙以三珠
填左耳中缙斲其耳而失其珠又冯贽云仙録天罚乖龙必割其耳】左迁至蓝关示侄孙湘
【汉时依上古法朝列以右为尊故谓降秩为左迁蓝关即秦之嶢关在今蓝田县青琐高议
云湘字清夫公侄也落魄不羁公勉之学乃笑作诗有能开顷刻花之句公曰汝能夺造化开
花乎湘遂聚土覆盆良久曰花已发矣举盃乃碧花二朵叶间有小金字乃诗一联云云横秦
岭家何在雪拥蓝关马不前公未晓诗意湘曰事久可验公後贬潮州途有一人冒雪而来乃
湘也湘曰公忆花上句乎乃今日事也公询地名即蓝关再三嗟叹曰吾为汝成此诗云云西
阳杂俎亦载是事独不载湘名然公逸诗有徐州赠族侄云自言有奇术探妙知天工意亦若
□是事岂湘果有出世之学耶笔墨闲録云此诗仁且有礼非志仁义者不能也】

一封朝奏九重天夕贬潮州路八千【州一作阳元和十四年公为刑部侍郎上表极谏佛骨
事帝大怒将抵死持示宰相崔羣裴度羣度力言愈忠愿少寬假以来谏诤帝稍解乃责潮州
刺史】欲为圣明除弊事肯将衰朽惜残年【欲或作本肯将作岂将又作岂於朽或作暮惜
一作计】云横秦岭家何在雪拥蓝关马不前【拥或作揜今按此诗於暮计揜四字皆不如
今本之胜】知汝远来应有意好收吾骨瘴江边【左传蹇叔曰余收尔骨焉】

武关西逢配流吐蕃【唐志武关在商州商洛县之东公谪潮州自蓝田入商洛於武关西见
作】

嗟尔戎人莫惨然湖南地近保生全【地近或作近地】我今罪重无归望直去长安路八千

次邓州界

潮阳南去倍长沙恋阙那堪又忆家心讶愁来惟贮火【惟一作谁】眼知别後自添花商顏
暮雪逢人少【前汉沟洫志引洛水至商顏下注商山之顏譬人之顏额也】邓鄙春泥见驿

賒【邓鄙字见左威公九年】早晚王师收海岳普将雷雨发萌芽

题临洺寺【临洺韶州县名公前洺吏诗具述其详】

不觉离家已五千【汉高帝纪提三尺取天下及韩安国传本无劒字古固有如此造语者公言离家已五千则知其为里也或以歇後诮之则非】仍将衰病入洺船潮阳未到吾能说【吾能或作人先或作先闻】海气昏昏水拍天【水或作浪】

晚次宣溪辱韶州张端公使君惠书叙别酬以絶句二章【或无辱端公絶句字韶去潮尚远当在元和十四年夏作笔墨闲録潮州以後诗最哀深宣溪絶句等诗絶有味】

韶州南去接宣溪【韶或作潮非是】云水苍茫日向西客泪数行元自落【元或作先】鸕鷀休傍耳边啼

兼金那足比清文【那或作安】百首相随愧使君【百或作白】俱是岭南巡管内莫欺荒僻断知闻

题秀禅师房

桥夹水松行百步【松或作船】竹牀莞席到僧家【牀或作林莞九还切】暂拳一手支头卧【头或作颐】还把渔竿下钓沙【钓或作晚】

将至韶州先寄张端公使君借图经【或无端公字此诗及下至韶州留别诗皆自潮移袁道中作】

曲江山水闻来久恐不知名访倍难愿借图经将入界每逢佳处便开看【每或作亦】

过始兴江口感怀【韶州始兴郡大历十四年四月起居舍人韩会以罪贬韶州刺史公随会而迁时年十岁至是贬潮州道过始兴所谓感怀也】

忆作儿童随伯氏南来今只一身存目前百口还相逐旧事无人可共论

韶州留别张端公使君【公量移袁州故云留别又曰公元和十四年正月以论佛骨贬潮州三月至潮州十月量移袁州十五年正月至袁州其往来上下於韶皆梅柳新时也故云来往再逢梅柳新】

来往再逢梅柳新别离一醉绮罗春久钦江总文才妙【陈孔奂曰江总文华之人】自叹虞翻骨相屯【虞翻仕吴为骑都尉尝云自恨骨体不媚犯上获罪】鸣笛急吹争落日清歌缓送欸行人【诸本争作催欸作感唐本云蜀本亦作争李云二宋评此诗小宋疑惑字误大宋

初不以为然後得善本始信】已知奏课当徵拜那复淹留咏白苹【汀洲采白苹柳惲诗语】

量移袁州张韶州端公以诗相贺因酬之【或无端公因三字或作量移袁州酬张韶州先寄诗贺或作量移袁州张韶州先诗见贺因酬之题语凡四易各有义也】

明时远逐事何如遇赦移官罪未除北望讵令随塞鴈【管子鴈春北秋南】南迁才免葬江鱼【屈原宁葬江鱼腹中】将经贵郡烦留客先惠高文谢起予暂欲系船韶石下【水经韶石对峙似阙郡志曰舜尝登此奏乐今有庙在焉】上宾虞舜整冠裾

次石头驿寄江西王十中丞阁老【仲舒也时仲舒自中书舍人出为江南西道观察使公自袁还朝次石头而作按水经注赣水西岸有盘石谓之石头在豫章郡北】

冯高试回首【试回或作回马今按下句有马字作马非是】一望豫章城人由恋德泣【由或作犹】马亦别羣鸣寒日夕始照风江远渐平【风江或作江风】默然都不语应识此时情

游西林寺题萧二兄郎中旧堂【萧兄有女出家诸本游作题题作故无兄字及注萧二存也存少与韩会梁肃友善恶裴延龄之为人弃官归庐山庐山今犹有萧存魏弘李渤同游大林题名】

中郎有女能传业【中郎蔡邕也其女文姬能诵忆父书无遗误】伯道无儿可保家【今按因话録作无人可主家伯道邓攸也攸弃已子而全兄子卒以无後时人哀之曰皇天无知邓伯道无儿】偶到匡山曾住处几行衰泪落烟霞【因话録作今日匡山过旧隐空将衰泪对烟霞】

自袁州还京行次安陆先寄随州周员外【诸本如此但以随为循方从唐本云自贬所蒙恩袁州除官还京凡多六字方云如淳汉纪注曰凡言除者除故官就新官也公志郑詹墓曰诏授司马节度除其官为工部尚书与此同周员外周君巢也时为随州刺史以经由道里考之作循非是今按诸本得之唐本既颠倒重复而方说又不可晓疑袁州字当在贬字上或注在所字下循州之辨则方得之一本或袁州下有除官二字亦通随又作复当考】

行行指汉东【左氏汉东之国随为大】暂喜笑言同雨雪离江上蒹葭出梦中面犹含瘴色眼已见华风岁暮难相值酣歌未可终

题广昌馆【馆在随州枣阳县南】

白水龙飞已几春【张衡东京赋我世祖乃龙飞白水】偶逢遗迹问耕人【逢或作寻】丘坟发掘当官路【或作道】何处南阳有近亲【显宗为东海公曰河南帝城多近臣南阳帝

乡多近亲】

寄随州周员外【随或作循或作复说已见上】

陆孟丘杨久作尘【蜀本杨作阳公与陆长源孟叔度丘颖杨凝及周君巢用为董晋幕客故也】同时存者更谁人金丹别後知传得【周好金丹服饵之术柳子厚集中有答周君巢论饵药久寿书是也】乞取刀圭救病身【本草云刀圭者十分方寸匕之一】酒中留上襄阳李相公【谓逢吉也诸本作醉中留别襄州李相公】

浊水污泥清路尘【曹子建诗君若清路尘妾若浊水泥】还曾同制掌丝纶【公元和十一年正月为中书舍人而逢吉以其年二月自舍人拜相故云】眼穿长讶双鱼断【选遗我双鲤鱼中有尺素书】耳热何辞数爵频【杨惲书云酒後耳热仰天拊缶而呼乌乌】银烛未消窗送曙【销或作终或作残窗或作鸡】金钗半醉座添春【醉或作坠许彦周云退之此语殊不类其为人乃知赋梅花不独宋广平也】知公不久归钧轴应许闲官寄病身

去岁自刑部侍郎以罪贬潮州刺史乘驿赴任其後家亦谴逐小女道死殡之层峯驿旁山下蒙恩还朝过其墓留题驿梁【诸本只作题驿梁下有注字与此题少异今从唐本】

数条藤束木皮棺草殡荒山白骨寒惊恐入心身已病扶舁沿路衆知难【舁音余】绕坟不暇号三帑【延陵季子适齐子死葬於赢博之间既封且号者三见礼记】设祭惟闻饭一盘【荆楚岁时记祭子推文黍饭一盘】致汝无辜由我罪百年慙痛泪阑干

贺张十八秘书得裴司空马【张籍裴度也或作酬张秘书因骑马赠诗】

司空远寄养初成毛色桃花眼镜明【尔雅马黄白杂毛曰駉注云今桃花马也顔延之赭白马赋曰双瞳夹镜】落日已曾交轡语春风还拟并鞍行长令奴仆知饥渴须着贤良待性情旦夕公归伸拜谢免劳骑去逐双旌【骑去或作去骑裴诗有他日着鞭能顾我之语故公云尔】

杏园送张彻侍御归使【或作侍郎无归使字唐本云彻时以幽州判官趋朝半道有诏还之仍迁侍御史从张弘靖之请也杏园在长安城南其实彻已抵京但未朝见耳旧传云续有张彻自远使归是也】

东风花树下送尔出京城久抱伤春意新添惜别情归来身已病相见眼还明更遣将诗酒谁家逐後生

雨中寄张博士籍侯主簿喜

放朝还不报半路蹋泥归【半路一作夜半 今按朝还无因至夜半作半路亦不可晓疑以雨

放朝而有司失於关报行至半路乃得报而归也】雨惯曾无节雷频自失威见墙生菌徧忧麦作蛾飞【述异记晋太康中麦化为飞蛾】岁晚偏萧索谁当救晋饥【左僖十三年晋荐饥乞糒于秦】

奉和兵部张侍郎酬郢州马尚书祇召途中见寄开缄之日马帅已再领郢州之作【张谓张贾马谓马总诸本无奉和及郢州之作字别有奉和二字祇或作被】

来朝当路日承诏改辕时再领须句国【左传僖公二十一年邾人灭须句杜预注须句在郢之东平须昌县西北句音劬】仍迁少昊司【月令秋之三月其帝少昊盖秋主刑而总加检校刑部尚书故云】暖风抽宿麦清雨卷归旗【石林诗话云蔡天啓言尝与张文潜论韩柳五字警句文潜举退之暖风抽宿麦清雨卷归旗子厚壁空残月曙门掩候虫秋皆集中第一】赖寄新珠玉长吟慰我思

早春与张十八博士籍游杨尚书林亭寄第三阁老兼呈白冯二阁老【诸本无十八字唐本云白居易冯宿也第三阁老杨於陵之子嗣复也白和诗只作杨舍人林池今按洪本第三作三弟云澄本如此然王沂公言行録记杨大年呼沂八为第四厅舍人疑前世遗俗自有此等称呼洪本或未必然而此所游乃嗣复家林亭故特以诗寄之而并呈白冯也但未知三人者其次第又如何耳阁老二字按杨绾传故事中书舍人年久者为阁老】

墙下春渠入禁沟【或作流】渠水初破满渠浮凤池近日长先暖流到池时更不流【更或作见】

奉使常山早次太原呈副使吴郎中【或无早字长庆元年七月成德军大将王廷凑杀其节度田弘正以反诏公宣抚衆皆危之即此行也公使鎮州吴丹以驾部郎中副行事详本传谓时虽已赦廷凑诏公以宣抚出使盖明年二月云唐子西曰公孙洪以董仲舒相胶西梁冀以张纲守广陵李逢吉以韩愈使鎮州卢杞】

【以顔鲁公使李希烈其用意正相类然考之史公出使镇在二月而逢吉三月始召为兵部尚书六月始代裴度为相子西云尔何也种岂逢吉险邪遂以公此行为其所中欵君子恶居下流天下之恶皆归焉此之谓也】

朗朗闻街鼓晨起似朝时翻翻走驿马春尽是归期地失嘉禾处【书唐叔得禾异亩同颖献诸天子作嘉禾太原本晋地即唐叔之国也】风存蟋蟀辞【晋国风有蟋蟀诗刺昭公之俭】暮齿良多感无事涕垂颐

夕次寿阳驿题吴郎中诗後【或作寿阳驿题絶句蜀本亦注夕次字寿阳太原属邑】

风光欲动别长安春半边城特地寒不见园花兼巷柳马头惟有月团团

镇州初归

别来杨柳街头树摆弄春风只欲飞【摆或作摇弄或作撼只或作祗】还有小园桃李在留花不发待郎归【唐语林云退之二侍妾名柳枝绦桃初使王廷凑至寿阳驿絶句云云邵氏闻见録孙子阳为予言近时寿阳驿发地得二诗石唐人跋云退之有倩桃风柳二妓归途闻风柳已去故云後张籍祭退之诗云乃出二侍女非此二人耶】

同水部张员外曲江春游寄白二十二舍人【或作同张水部籍游曲江寄云云白舍人乐天也长安志曲江在城南昇道坊以其有流水屈曲谓之曲江居易有和篇後世传韩白无往来之诗非也】

漠漠轻陰晚自开青天白日映楼台【天或作春】曲江水满花千树有底忙时不肯来

和水部张员外宣政衙赐百官樱桃诗【或作和张水部勅赐樱桃诗】

汉家旧种明光殿【洛阳宫殿簿曰汉有明光殿徽音殿又显阳殿前樱桃六株徽音殿前乾元殿前并三株】炎帝还书本草经【神农本草云樱桃味甘益脾胃】岂似满朝承雨露共看传赐出青冥香随翠笼擎初到【或作重或作出】色映银盘写未停【映或作照】食罢自知无所报空然慙汗仰皇局早春呈水部张十八员外二首【阁本无此二首】

天街小雨润如酥草色遥看近却无最是一年春好处絶胜花柳满皇都【花或作烟】

莫道官忙身老大即无年少逐春心凭君先到江头看柳色如今深未深

送桂州严大夫【同用南字 严谔也题下或有赴任二字】

苍苍森八桂【森八阁本作八月桂或作树山海经桂林八树在贲禺东今番禺也天台山赋八桂森挺以凌霜】兹地在湘南【地阁本作树在或作近】江作青罗带【东坡云退之诗江作青罗带子厚诗海上羣山似劒铍子瞻为之对曰系懣岂无罗带水割愁还有劒铍山】山如碧玉簪【梁刘孝威诗金簪临鬓斜簪祖含切与簪同】户多输翠羽家自种黄甘远胜登仙去飞鸾不假骖【假或作暇】

奉酬天平马十二仆射暇日言怀见寄之作【或无暇日言怀之作六字元和十四年以马总为郢曹濮等州观察使十五年名其军为天平军就加检校尚书左仆射】

天平篇什外政事亦无双威令加徐土儒风被鲁邦【刘梦得天平军节度使厅壁记惟郢在春秋为须句之国宣精在上奎为文宿画野在下鲁为儒邦禹贡海岱及淮惟徐州前汉以徐隶临淮则徐亦鲁也徐土鲁邦字见诗常武闕宫之什】清为公论重寬得士心降岁晏偏相忆长謡坐北窗【选刘越石诗引领长謡】

奉使镇州行次承天行营奉酬裴司空【或有相公字公之宣谕鎮州也衆皆危之元稹言於穆宗曰韩愈可惜上悔驰诏令母径入公卒至贼营麾其衆责之庭湊听命出牛元翼之围东坡为公作潮州庙碑所谓勇夺三军之帅者以此】

窜逐三年海上归逢公复此着征衣旋吟佳句还鞭马恨不身先去鸟飞

镇州路上谨酬裴司空相公重见寄【谨或作奉】

衔命山东抚乱师日驰三百自嫌迟风霜满面无人识何处如今更有诗

奉和仆射裴相公感恩言志【或无奉字】

文武成功後居为百辟师林园穷胜事钟鼓乐清时【诗话云庆历中西师未解晏元献为枢密使会大雪置酒西园欧阳永叔赋诗云须怜铁甲冷彻骨四十余万屯边兵晏曰昔韩愈亦能作言语赴裴度会但云林园穷胜事钟鼓乐清时不曾如此作鬧】摆落遗高论雕镌出小诗自然无不可范蠡尔其谁【其或作为范蠡事见史记】

和仆射相公朝回见寄【或作回朝或有裴字】

尽瘁年将久公今始暂闲事随忧共减诗与酒俱还放意机衡外收身矢石闲秋台风日?正好看前山奉和李相公题萧家林亭【逢吉也萧氏在唐最盛瑀嵩华复俛眞仿遇凡八叶宰相嵩第在城南布政坊见长安志】

山公自是林园主【山简晋永嘉中为襄阳守岷山有佳园池】叹惜前贤造作时岩洞幽深门尽琐不因丞相几人知

奉和杜相公太清宫纪事陈诚上李相公十六韵【或作杜相公太清宫十六韵纪事陈诚上李相因和杜相公元稹也长庆元年二月拜相李相公逢吉也长庆二年六月拜相太清宫玄元皇帝庙也】

耒耜兴姬国【后稷以农事开国故云耒耜兴姬国也姬周姓】輶櫟建夏家【书益稷禹曰予乘四载孔安国谓泥乘輶山乘櫟輶以板置泥上櫟前无齿者輶丑伦切櫟力迫切】在功诚可尚於道讵为华象帝威容大仙宗宝历賒卫门罗戟槩图壁杂龙蛇礼乐追尊盛乾坤降福遐四眞皆齿列【天宝元年亲享玄元皇帝于新庙以庄子为南华眞人文子为通玄眞人列子为冲虚眞人庚桑子为洞虚眞人是为四眞也】二圣亦肩差【初太清宫成命工於太白山采白石为玄元眞像充冕之服当展南面元宗肃宗眞容侍立立左右皆朱衣朝服】阳月时之首【尔雅十月为阳】陰泉气未牙殿阶铺水碧【阶或作筵】庭炬坼金葩紫极观忘倦青词奏不譁【本朝景灵宫天兴殿祝以青词荐以酒果用唐制也】噌吰宫夜辟【相如曰声噌吰而似钟音铮宏】嘈囀鼓晨樞【张衡东京赋奏严鼓之嘈囀嘈才高切囀才曷

切樞陟瓜切】?味陈奚取【味或作服非是】名香荐孔嘉垂祥纷可録俾寿浩无涯贵相山
瞻峻清文玉絶瑕代工声问远【书天工人其代之】摄事敬?加【语官事不摄】皎洁当天
月葳蕤捧日霞【葳或作萎今从蜀本】唱妍酬亦丽俛仰但称嗟【亦或作匪唱酬谓李杜
称嗟公自谓也】

东雅堂昌黎集注卷十

卷十一

<集部,别集类,汉至五代,东雅堂昌黎集注>

钦定四库全书

东雅堂昌黎集注卷十一

杂着

原道【淮南子以原道首扁许氏笺云原本也公所作原道原性等扁史氏谓其奥衍宏深与孟轲扬雄相表里而佐佑六经诚哉是言东坡尝曰自孟子後能将许大见识寻求古人其断然曰孟子醇乎醇荀与扬也择焉而不精语焉而不详若非有见识岂千余年後便断得如此分明伊川亦曰退之晚年作文所得甚多如曰轲之死不得其传似此言语非是蹈袭前人又非凿空撰得必有所见二先生之论岂轻发者哉山谷尝曰文章必谨布置每见後学多告以原道命意曲折後以此槩求古人法度如老杜赠韦见素诗布置最得正体如官府甲第厅堂房室各有定处不可乱也韩文公原道与书之尧典盖如此石介守道曰孔子之易春秋自圣人以来未有也吏部原道原性原毁行难禹问佛骨表净臣论自诸子以来未有也】

博爱之谓仁行而宜之之谓义由是而之焉之谓道足乎已无待於外之谓德仁与义为定名道与德为虚位【杨诚斋曰道德之实非虚也而道德之位则虚也韩子之言实其虚者也其曰仁与义为定名又曰吾之所谓道德者合仁与义言之也而後道德之虚位可得而实矣张无垢曰此正是退之辟佛老要害处老子平日谈道德乃欲撻提仁义一味自虚无上去曾不知道德自仁义中出故以定名之实主张仁义在此二字既言行仁义後必继曰由是而之焉之谓道足乎已无待於外之谓德亦未始薄道德也特恶佛老不识仁义即是道德故不得不表出之杨龟山曰韩子意曰由仁义而之焉斯谓之道充仁义而足乎已斯谓之德所谓道德云者仁义而已故以仁义为定名道德为虚位中庸曰天命之谓性率性之谓道仁义性所有也则拾仁义而言道者固非也道固有仁义而仁义不足以尽道则以道德为虚位者亦非也】故道有君子小人而德有凶有吉【子下或有有字】老子之小仁义非毁之也其见者小也坐井而观天曰天小者非天小也【非天下或有之字下小字或作罪云尸子曰井中视星所视不过数星今按韩公未必用尸子语正使用之作罪亦非文意】彼以煦煦为仁【煦音诩】孑孑为义其小之也则宜其所谓道道其所道非吾所谓道也其所谓德德其所德非吾所谓德也【或无其所谓德四字非是】凡吾所谓道德云者合仁与义言之也天下之公言也老子所谓道德云者去仁与义言之也一人之私言也【公言私言下或皆有者字或惟下句有之】周道衰孔子没火于秦黄老于汉佛于晋魏梁隋之闲【或无黄字晋魏梁隋诸本作晋宋齐梁魏隋文苑作晋梁魏隋蜀本作魏晋宋梁齐方从阁杭本云南举晋梁北举魏隋也】其言道德仁义者不入于杨则入于墨不入于老则入于佛【墨下诸本有不入于墨则

入于老二语】入於彼必出于此入者主之出者奴之【必上或有则字主或作王 今按作主乃与下文三韵皆叶作王非是】入者附之出者污之【二者字或皆作则附或作隆皆非是】噫後之人其欲闻仁义道德之说孰从而听之老者曰孔子吾师之弟子也佛者曰孔子吾师之弟子也为孔子者习闻其说乐其诞而自小也亦曰吾师亦尝云尔【诸本尝下有师之字】不惟举之於其口而又笔之於其书噫後之人虽欲闻仁义道德之说其孰从而求之甚矣人之好怪也不求其端不讯其末惟怪之欲闻古之为民者四今之为民者六古之教者处其一今之教者处其三农之家一而食粟之家六工之家一而用器之家六贾之家一而资焉之家六奈之何民不穷且盗也古之时人之害多矣有圣人者立然後教之以相生养之道【或无以字】为之君为之师驱其虫蛇禽兽而处之中土寒然後为之衣饥然後为之食木处而颠土处而病也然後为之宫室为之工以贍其器用为之贾以通其有无【通或作同】为之医药以济其夭死为之葬埋祭祀以长其恩爱为之礼以次其先後为之乐以宣其壹郁【壹或作湮或作堙按史记贾谊传独堙郁其谁语汉书作壹郁壹当作□集韵音咽□郁不得泄也平入声通用湮与壹亦音义同也作壹字则非今按字书壹□吉凶在壶中不得泄也即今之氤氲字壹湮古盖通用故汉书但作壹耳】为之政以率其怠勸为之刑以锄其强梗相欺也为之符玺斗斛权衡以信之相夺也为之城郭甲兵以守之【或无权衡字非是】害至而为之备患生而为之防今其曰圣人不死大盗不止剖斗折衡而民不爭【剖或作掊】呜呼其亦不思而已矣如古之无圣人人之类灭久矣何也无羽毛鳞介以居寒热也无爪牙以爭食也是故君者出令者也臣者行君之令而致之民者也民者出粟米麻丝作器皿通货财以事其上者也【致之或作致其非是麻丝或作丝麻篇内并同】君不出令则失其所以为君臣不行君之令而致之民民不出粟米麻丝作器皿通货财以事其上则诛【臣不字下诸本有能字无而致之民四字而句下有则失其所以为臣一语】今其法曰必弃而君臣去而父子禁而相生养之道以求其所谓清淨寂灭者呜呼其亦幸而出於三代之後不见黜於禹汤文武周公孔子也其亦不幸而不出於三代之前不见正於禹汤文武周公孔子也帝之与王其号名殊其所以为圣一也【名下或有虽字】夏葛而冬裘渴饮而饥食其事殊其所以为智一也【事下或有虽字】今其言曰曷不为太古之无事是亦责冬之裘者曰曷不为葛之之易也责饥之食者曰曷不为饮之之易也【其言或作之言饥之或作饥而】传曰古之欲明明德於天下者先治其国欲治其国者先齐其家欲齐其家者先修其身欲修其身者先正其心欲正其心者先诚其意然则古之所谓正心而诚意者将以有为也【尹彦明曰介甫谓退之正心诚意将以有为非是盖介甫不知道也正心诚意便休却是释氏也正心诚言乃所以将有为也非韩子不能至是】今也欲治其心而外天下国家【一作国家天下句下或有者字皆非是】灭其天常子焉而不父其父臣焉而不君其君民焉而不事其事孔子之作春秋也诸侯用夷礼则夷之进於中国则中国之经曰夷狄之有君不如诸夏之亡诗曰戎狄是膺荆舒是惩【进上或有夷而字】今也举夷狄之法而加之先王之教之上几何其不胥而为夷也夫所谓先王之教者何也博爱之谓仁行而宜之之谓义由是而之焉之谓道足乎足无待於外之谓德其文诗书易春秋【文或作书或作教】其法礼乐刑政其民士农工贾其位君臣父子师友宾主昆弟夫妇其服麻丝其居宫室其食粟米果蔬鱼肉【果蔬或作蔬果】其为道易明而其为教易行也【或无而字而下或无其字】是故以之为己则顺而祥以之为人则爱而公以之为心则和而平以之为天下国家无所处而不当是故生则得其情死则尽其常郊焉而天神假【音格】庙焉而人鬼飨曰斯道也何道也曰斯吾所谓道也非

向所谓老与佛之道也【何下或无也字 今按曰斯道也何道也是问词而曰斯吾所谓道也以下乃答语也斯道也何道也或作斯何道也斯吾所谓道也或作斯道也吾所谓之道也又或无所谓字皆非是】尧以是传之舜舜以是传之禹禹以是传之汤汤以是传之文武周公文武周公传之孔子孔子传之孟轲轲之死不得其传焉【或问张无垢曰易学於伊尹韩愈乃谓其传自禹扬雄自比孟子是得其传者而愈以谓轲死无传何也先生曰禹之道尧舜之道也伊尹得以授汤置伊尹而言禹亦无害也扬雄虽自比孟子而愈以小疵讥之其言无传则舍之矣】苟与扬也择焉而不精语焉而不详【宛丘论公原论亦曰愈者择焉而不精语焉而不详而健於言】由周公而上上而为君故其事行由周公而下下而为臣故其说长然则如之何而可也【何而或作何其今按此句复是问词其下乃答语】曰不塞不流不止不行其人火其

书庐其居明先王之道以道之鰥寡孤独癯疾者有养也【癯音废】其亦庶乎其可也【苏子由曰愈之学朝夕从事於仁义礼智刑名度数之间自形而上者愈所不如也原道之作遂指道德为虚位而斥佛老与杨墨同科岂为知道哉韩愈工於文者也张芸叟曰张籍尝劝愈排佛老不若着书愈亦尝以书反复之既而原道原性等篇皆激籍而作其原道也大抵言教其原性也大抵言情云云子由所云释氏柳子厚在当时於送僧浩初序已有此论而芸叟指摘纷然盖少作也今其画墁集删之矣学者其审之】

原性【一作性原 今按原道原人原鬼之例作原性为是又此五原篇目既同当是一时之作与兵部李侍郎书所谓旧文一卷扶树教道有所明白者疑即此诸篇也然则皆是江陵以前所作程子独以原性为少作恐其考之或未详 孟子言人性善荀子言恶扬子言善恶混公乃作原性取三者而折之以孔子之言其说有上中下之殊於是说者纷然李习之则置孟荀扬之论本中庸作复性书三篇皇甫持正则作孟荀言性论而谓孟子之言合经为多杜牧之则作三子言性辨而谓荀言人之性恶比二子荀得多其论不能相一至王荆公作原性则又曰太极者五行之所由生而五行非太极也性者五常之太极也而五常不可以谓之性此吾所以异於韩子太极生五行然後利害生焉性生情有情然後善恶形焉而性则不可以善恶言也此吾所以异於孟荀其论益相胜矣白云郭氏曰唐自韩愈之後言性者皆出其下李翱之言至论动静皆离寂然不动则异教矣皇甫湜之论谓孟荀扬殊趋而一致又为韩子三品之论皆无去取杜牧之言爱怒生而自能为性之根恶之端其荀氏徒欬本朝言性者四家司马公谓扬子兼之王荆公谓扬子之言似矣苏氏亦曰扬雄之论固已近之亦多敝於雄之学独程氏言孟子性善乃极本穷原之理又谓荀扬不知性故舍扬不论郭氏之论尽矣】

性也者与生俱生也情也者接於物而生也性之品有三而其所以为性者五情之品有三而其所以为情者七【而其或皆无而字性者情者或并无者字皆非是】曰何也【或无曰字】曰性之品有上中下三上焉者善焉而已矣中焉者可导而上下也下焉者恶焉而已矣其所以为性者五曰仁曰礼曰信曰义曰智【方从阁杭蜀本云礼信去仁为近诸本多作曰仁曰义曰礼曰智曰信 今按方本以五行相生之序而言诸本以四方相对一位居中而言理皆可通但窃意诸本语陈而韩公亦颇尚异恐方本或得之】上焉者之於五也主於一而行於四【行於方作行之】中焉者之於五也一不少有焉则少反焉其於四也混【不上诸本无

一字乃从阁杭潮本作一也而并属下旬云一谓仁也言不少存乎仁则少畔乎仁蜀本倒一也二字杭蜀反皆作及非也 今按也一二字当从蜀本而以也字属上句一字属下旬方及诸本皆非也方以一为仁亦非是此但言中人之性於五者之中其一者或偏多或偏少其四者亦杂而不纯耳反字则方得之】下焉者之於五也反於一而悖於四【悖音佩】性之於情视其品情之品有上中下三其所以为情者七曰喜曰怒曰哀曰惧曰爱曰恶曰欲上焉者之於七也动而处其中【其中或作於中非是】中焉者之於七也有所甚有所亡然而求合其中者也下焉者之於七也亡与甚直情而行者也【亡与上或有无字非是】情之於性视其品孟子之言性曰人之性善荀子之言性曰人之性恶扬子之言性曰人之性善恶混夫始善而进恶与始恶而进善与始也混而今也善恶皆举其中而遗其上下者也得其一而失其二者也【与诸本多作欤善恶下又有欤字 今按二与字皆当读如字而为句首犹言及也作欤而为句絶者皆非左传夫弗及而忧与可忧而乐与忧而弗害皆取忧之道也语势亦相似】叔鱼之生也其母视之知其必以贿死【国语叔鱼生其母视之曰是虎目而豕喙鸢肩而牛腹谿壑可盈是不可饜也必以贿死】杨食我之生也叔向之母闻其号也知必灭其宗【昭二十八年左传叔向生子伯石叔向之母视之及堂闻其声而还曰是豺狼之声也狼子野心非是莫丧羊舌氏矣至是果灭伯石食我字也食采於杨故号杨食我 旧本食我音异俄】越椒之生也子文以为大戚【或无大字】知若敖氏之鬼不食也【宣四年左氏楚司马子良生子越椒子文曰必杀之是子也熊虎之状而豺狼之声弗杀必灭若敖氏矣子良不可子文以为大戚曰鬼犹求食若敖氏之鬼不其馁而】人之性果善乎后稷之生也其母无灾其始匍匐也则岐岐然疑疑然【见诗生民篇疑鱼力切】文王之在母也母不忧【或无母字母不忧等事见国语】既生也傅不勤既学也师不烦人之性果恶乎尧之朱舜之均文王之管蔡习非不善也而卒为奸瞽瞍之舜鯀之禹习非不恶也而卒为圣人之性善恶果混乎【圣下或有人字属上句】故曰三子之言性也举其中而遗其上下者也得其一而失其二者也曰然则性之上下者其终不可移乎【终上或无其字】曰上之性就学而愈明下之性畏威而寡罪是故上者可教而下者可制也【教或作学】其品则孔子谓不移也曰今之言性者异於此何也【性下或有情字】曰今之言者杂佛老而言也杂佛老而言也者奚言而不异【言也者或无也字 今按此篇之言过荀扬远甚其言五性尤善但三品之说太拘又不知性之本善而其所以或善或恶者由其稟气之不同为未尽耳】

原毁【或作毁原说已见上】

古之君子其责已也重以周其待人也轻以约【此孔子所谓躬自厚而薄责於人之意】重以周故不怠轻以约故人乐为善闻古之人有舜者其为人也仁义人也求其所以为舜者责於已曰彼人也予人也彼能是而我乃不能是早夜以思去其不如舜者就其如舜者【顔渊曰舜何人也予何人也有为者亦若是文意盖本此 古之人或无人字下同早或作蚤】闻古之人有周公者其为人也多才与艺人也求其所以为周公者责於已曰【方从阁本无求其所以四字只作责於已为周公者 今按阁本不成文理而方从之误矣】彼人也予人也彼能是而我乃不能是早夜以思去其不如周公者就其如周公者【去其下十三字或从阁本作求其所以为周公者而为之】舜大圣人也後世无及焉周公大圣人也後世无及焉是人也乃曰不如舜不如周公吾之病也是不亦责於身者重以周乎【身或作已】其於人也曰彼

人也能有是是足为良人矣能善是是足为艺人矣【善或作有非是】取其一不责其二【责或作取】即其新不?其旧恐恐然惟惧其人之不得为善之利一善易修也一艺易能也其於人也乃曰能有是是亦足矣曰能善是是亦足矣【或无此八字非是】不亦待於人者轻以约乎【不上或有是字】今之君子则不然【或无则不然字】其责人也详其待已也廉详故人难於为善廉故自取也少已未有善曰我善是是亦足矣已未有能曰我能是是亦足矣外以欺於人内以欺於心未少有得而止矣不亦待其身者已廉乎【其身或作於已】其於人也曰彼虽能是其人不足称也彼虽善是其用不足称也举其一不计其十?其旧不图其新恐恐然惟惧其人之有闻也是不亦责於人者已详乎夫是之谓不以衆人待其身而以圣人望於人吾未见其尊已也【是之或作如是或无之字】虽然为是者有本有原【原上或无有字】怠与忌之谓也怠者不能修而忌者畏人修吾常试之矣尝试语於衆曰某良士某良士其应者必其人之与也不然则其所疎远不与同其利者也不然则其畏也不若是强者必怒於言懦者必怒於色矣又尝语於衆曰某非良士某非良士其不应者必其人之与也【不应下或无者字非是】不然则其所疎远不与同其利者也不然则其畏也不若是强者必说於言懦者必说於色矣是故事修而谤兴德高而毁来呜呼士之处此世而望名誉之光道德之行难已【此下或无世字非是已或作矣】将有作於上者得吾说而存之其国家可几而理欤【作或作仕或作化欤或作也】

原人【或作仁】

形於上者谓之天形於下者谓之地命於其两闲者谓之人形於上日月星辰皆天也形於下草木山川皆地也命於其两闲夷狄禽兽皆人也曰然则吾谓禽兽人可乎曰非也【人可上或有曰字】指山而问焉曰山乎【指下或有南字非是】曰山可也山有草木禽兽皆举之矣指山之一草而问焉曰山乎曰山则不可【或无曰山乎三字】故天道乱而日月星辰不得其行【或无故字】地道乱而草木山川不得其平人道乱而夷狄禽兽不得其情天者日月星辰之主也地者草木山川之主也人者夷狄禽兽之主也主而暴之不得其为主之道矣是故圣人一视而同仁笃近而举远【仁或作人非是】

原鬼【李石曰退之作原鬼与晋阮千里相表里至作罗池碑欲以鬼威獨人是为子厚求食也送穷文虽出游戏皆自叛其说也退之以长庆四年寝疾帝遣神召之曰骨蕝国世与韩氏相?欲同力讨之天帝之兵欲行陰诛乃更藉人力乎当是退之数穷识乱为鬼所乘不然平生强?至死无用】

有嘯於梁【於梁於堂下一本各有者字】从而烛之不见也斯鬼乎曰非也鬼无声有立於堂从而视之不见也斯鬼乎曰非也鬼无形有触吾躬从而执之无得也斯鬼乎曰非也鬼无声与形安有气【鬼无声与形上或有鬼无气三字非是】曰鬼无声也无形也无气也果无鬼乎曰有形而无声者物有之矣土石是也有声而无形者物有之矣风霆是也有声与形者物有之矣人兽是也无声与形者物有之矣鬼神是也【李石曰公子彭生托形於豕晋文公托声如牛韩子谓鬼无声与形未尽也】曰然则有怪而与民物接者何也曰是有二有鬼有物【有怪或作见怪二下或有说字或有说字而无有鬼有物四字】漠然无形与声者鬼之

常也民有忤於天有违於民【上民字一作人下民字或作时】有爽於物逆於伦而感於气於是乎鬼有形於形【有形或作有托】有凭於声以应之而下殃祸焉皆民之为之也【为下或无之字】其既也又反乎其常曰何谓物曰成於形与声者土石风霆人兽是也反乎无声与形者鬼神是也【反乎或作反其非是】不能有形与声不能无形与声者物怪是也【或无不能有形与声六字或无不能无形与声六字】故其作而接於民也无恒故有动於民而为祸亦有动於民而为福【本或先言为福按左氏国语周惠王十五年有神降于莘王问诸内史过对曰云云有得神以兴亦有以亡夏之兴也祝融降于崇山其亡也回禄信於聆隧商之兴也禘机次於丕山其亡也夷羊在牧周之兴也鸛鸛鸣於岐山其衰也杜伯射王於郕动於民而为祸福其斯之谓欤】亦有动於民而莫之为祸福适丁民之有是时也作原鬼【阁蜀粹无作字今按古书篇题多在後者如荀子诸赋正此类也但此篇前已有题不应复出故且从诸本存此字】行难【行下孟切公与祠部陆参员外书在贞元十八年此篇言参自越州召拜祠部员外郎岂在前欤参字公佐云】

或问行孰难曰舍我之矜从尔之称孰能之曰陆先生参何如【按李习之集参作慘】曰先生之贤闻天下是是非非【闻下或有於字】贞元中自越州徵拜祠部员外郎京师之人日造焉闭门而拒之满街愈尝往间客席【尝或作常间或作问客或作宾席下或有坐定二字】先生矜语其客曰某胥也某商也其生某任之其死某谏之某与某可人也【可或作何或从阁杭苑作可云可人见礼记郑注曰此人可也今按据礼记是也然详下文韩公之语似以陆公虽尝任谏此人复自疑於有罪则颇有薄其门地之意而以荐引之力自多者恐须作何字语势乃协详之】任与谏也非罪欤皆曰然【也或作之罪一作过曰上或有应字】愈曰某之胥某之商其得任与谏也有由乎抑有罪不足任而谏之邪【任而谏或作谏而任而或作与】先生曰否吾恶其初【恶去声】不然任与谏也何尤愈曰苟如是先生之言过矣昔者管敬子取盗二人为大夫於公【礼记管仲遇盗取二人焉上以为公臣曰其所与由辟也可人也敬子仲之谥也】赵文子举管库之士七十有余家【礼记赵文子所举於晋国管库之士七十有余家】夫恶求其初【恶音乌】先生曰不然彼之取者贤也愈曰先生之所谓贤者大贤欤抑贤於人之贤欤齐也晋也且有二与七十而可谓今之天下无其人邪【而可上或有焉字邪上或有也字】先生之选人也已详先生曰然愈曰圣人不世出贤人不时出千百岁之闲傥有焉【圣人贤人人或皆作之或并有人之二字世出或作世生百岁或作百年】不幸而有出於胥商之族者先生之说传吾不忍赤子之不得乳於其母也先生曰然【乳於或无於字】他日又往坐焉【或无坐字】先生曰今之用人也不详位乎朝者吾取某与某而已在下者多于朝凡吾与者若干人愈曰先生之与者尽於此乎其皆贤乎抑犹有举其多而缺其少乎【或无其皆贤乎四字缺或作没少或作细或作一少下或有者字今按此言人之才或不全备姑举其可取之多而略其可弃之少也】先生曰固然吾敢求其全【其或作於今按作其语意为近但陆公此句正不敢必求全才之意而下文韩公又以太详而不早责之殊不可晓当更考之】愈曰由宰相至百执事凡几位由一方至一州凡几位先生之得者无乃不足充其位邪【其位下或有也字】不早图之一朝而举焉今虽详其後用也必粗【举焉或作索之详下或有且微字非是粗聪徂切】先生曰然子之言孟轲不如【文録作退语其人曰乃今吾见孟轲】对禹问【孟子万章问曰人有言至於禹而德衰不传於贤而传於子有诸孟子曰否不然也天与贤则与贤大与子则与子云云公乃设问而为之答

且曰孟子之心以为圣人不苟私於其子以害天下求其说而不得从而为之辞大抵孟子之说主天命而公以人事言之尔具致一也】

或问曰尧舜传诸贤禹传诸子信乎曰然然则禹之贤不及於尧与舜也欤曰不然尧舜之传贤也欲天下之得其所也禹之传子也忧後世争之之乱也尧舜之利民也大禹之虑民也深【利一作虑】曰然则尧舜何以不忧後世曰舜如尧尧传之禹如舜舜传之得其人而传之尧舜也无其人虑其患而不传者禹也【无其人下或有而不传三字不传者或作不得如已者非是】舜不能以传禹尧为不知人禹不能以传子舜为不知人尧以传舜为忧後世禹以传子为虑後世曰禹之虑也则深矣【虑下或有民字】传之子而当不淑则奈何曰时益以难理传之人则争未前定也传之子则不争前定也前定虽不当贤犹可以守法不前定而不遇贤则争且乱天之生大圣也不数其生大恶也亦不数【音朔上同】传诸人得大圣然後人莫敢争【莫上或无人字】传诸子得大恶然後人受其乱【或作祸】禹之後四百年然後得桀亦四百年然後得汤与伊尹汤与伊尹不可待而传也【待或作得】与其传不得圣人而争且乱孰若传诸子虽不得贤犹可守法【诸或作之守法或从阁作法守非是】曰孟子之所谓天与贤则与贤天与子则与子者何也曰孟子之心以为圣人不苟私於其子以害天下求其说而不得从而为之辞

杂说四首【或作三首其一作题崔山君传】

龙嘘气成云【嘘上或有之字】云固弗灵於龙也然龙乘是气茫洋穷乎玄闲【茫上或有而字】薄日月伏光景感震电神变化水下土汨陵谷【汨音骨】云亦灵怪矣哉云龙之所能使为灵也【灵或从阁本作云非是】若龙之灵则非云之所能使为灵也然龙弗得云无以神其灵矣失其所凭依信不可欤【弗或作不或无信字非是】异哉其所凭依乃其所自为也易曰云从龙既曰龙云从之矣

善医者不视人之瘠肥【医下或有人字】察其脉之病否而已矣善计天下者不视天下之安危察其纪纲之理乱而已矣【纲下或无之字理乱或作乱否】天下者人也安危者肥瘠也纪纲者脉也【纪纲或作纲纪】脉不病虽瘠不害脉病而肥者死矣通於此说者其知所以为天下乎【所以阁无以字】夏殷周之衰也诸侯作而战伐日行矣【作或作僭】传数十王而天下不倾者纪纲存焉耳秦之王天下也无分势於诸侯聚兵而焚之传二世而天下倾者纪纲亡焉耳【世或作帝】是故四支虽无故不足恃也脉而已矣四海虽无事【四海或作天下】不足矜也纪纲而已矣忧其所可恃惧其所可矜善医善计者谓之天扶与之【诸本或无天字扶或作持今按此句未详疑有误字】易曰视履考祥善医善计者为之【善计或无善字】

谈生之为崔山君传【谈生者谈姓不知其名之或作云而无为字非是】称鹤言者岂不怪哉然吾观於人其能尽其性而不类於禽兽异物者希矣将愤世嫉邪长往而来者之所为乎昔之圣者【圣者或作圣人或并有人者二字】其首有若牛者其形有若蛇者其喙有若鸟者【鸟阁作马或云尸子禹长颈鸟喙阁本讹也】其貌有若蒙俱者【荀子仲尼之状面

如蒙俱注云方相也其首蒙茸然故曰蒙俱 俱音欺】彼皆貌似而心不同焉可谓之非人邪即有平胁曼肤【楚词平胁曼肤何以肥之】顾如渥丹美而很者貌则人其心则禽兽又恶可谓之人邪【貌或作面貌上或有其字禽下或无兽字邪或作也列子包牺女娲神农夏后氏蛇身人面牛尾虎鼻皆有非人之状而有大圣人之德夏桀殷纣鲁桓楚穆状貌七窍皆同而有禽兽之心公意亦如此耳】然则观貌之是非不若论其心与其行事之可否为不失也【或从阁杭无可否字非是】怪神之事孔子之徒不言余将特取其愤世嫉邪而作之故题之云尔

世有伯乐然後有千里马千里马常有而伯乐不常有【或无下千里字】故虽有名马祗辱於奴隶人之手【或无人字】骈死於槽枥之间不以千里称也马之千里者一食或尽粟一石食马者不知其能千里而食也是马也虽有千里之能食不饱力不足才美不外见且欲与常马等不可得安求其能千里也【食马上或有今之字而食下疑脱一石字马也或无也字且欲或无且字且或作而 今按且字恐当在等字下】策之不以其道食之不能尽其材鸣之而不能通其意执策而临之曰天下无马呜呼其真无马邪其真不知马也【二无字下诸本皆有良字阁杭本皆脱其真无马邪五字知或作识也字皆作邪】

读荀【下或有子字 荀卿名况赵人齐襄王时为稷下祭酒避谗适楚春申君以为兰陵令春申君死而荀卿废着书数万言而卒因葬兰陵荀子三十二篇其非十二子篇以子弓并仲尼谓子思孟轲略法先生而不知其统其性恶篇谓人之性恶礼义生於圣人之伪此其抵牾不合於道而公所欲削者欤】

始吾读孟轲书然後知孔子之道尊圣人之道易行王易王霸易霸也以为孔子之徒没尊圣人者孟氏而已晚得扬雄书益尊信孟氏因雄书而孟氏益尊则雄者亦圣人之徒欤【雄下或有也字】圣人之道不传於世周之衰好事者各以其说干时君【其下或有所能字】纷纷藉藉相乱六经与百家之说错杂然老师大儒犹在火于秦黄老于汉【或无黄字】其存而醇者孟轲氏而止耳扬雄氏而止耳【或作矣一无扬雄氏而止耳一句】及得荀氏书於是又知有荀氏者也考其辞时若不粹【时下或有有字不下或有醇字】要其归与孔子异者鲜矣抑犹在轲雄之闲乎【抑下或有其字】孔子删诗书笔削春秋合於道者着之离於道者黜去之故诗书春秋无疵【或无黜字去下或无之字】余欲削荀氏之不合者附於圣人之籍亦孔子之志欤孟氏醇乎醇者也荀与扬大醇而小疵【或从阁无乎醇字或无乎醇者三字而有如字皆非是扬或作雄非是伊川曰荀卿才高而其言多过子云才短而其言多失然皆未免夫驳者也退之以大醇归之盖韩子待人以恕】

读鶡冠子【西汉艺文志有鶡冠子一篇其下笺云楚人居深山以鶡羽为冠而唐志云鶡冠子三卷岂汉时遗缺至唐而全耶汉唐皆以为道家者流公谓其辨施於国家功德岂少而柳子厚作辨鶡冠子则曰得其书而读之尽鄙浅言也二公所见不同如此鶡音曷】

鶡冠子十有九篇其词杂黄老刑名【九方作六云今鶡冠子自博选至武灵王问凡十九篇此只云十六篇未详 今按方盖不见或本已作九也或无杂字非是】其博选篇【博选鶡冠

子第一篇】四稽五至之说当矣【博选篇云道有四稽一曰天二曰地三曰人四曰命人有五至一曰百已二曰什已三曰若已四曰斯役五曰徒隶至或作室】使其人遇时援其道而施於国家功德岂少哉【遇下或有其字功上或有其字】学问篇【学问鶡冠子第二篇】称贱生於无所用中流失船一壶千金者【壶或作瓠音义同】余三读其辞而悲之文子脱谬为之正三十有五字乙者三灭者二十有二注十有二字云【灭或作减注下或有者字】

读仪礼【仪礼十七篇周之旧典汉高堂隆生所传者也此外又有三十九篇河间王献之遭巫蛊仓卒之难竟不施行今亡矣唐明经有三科仪礼其一也今书具在凡十七篇】

余尝苦仪礼难读又其行於今者盖寡【其或作且】沿袭不同复之无由考之今诚无所用之【或作云】然文王周公之法制粗在於是孔子曰吾从周谓其文章之盛也古书之存者希矣百氏杂家尚有可取况圣人之制度邪【存上或无之字家或作说尚下或无有字】於是掇其大要奇辞奥旨着於篇学者可观焉【或无学字】惜乎吾不及其时进退揖让於其间呜呼盛哉

读墨子【墨子名翟宋大夫汉艺文志云着书七十一篇今存者十二篇有节用兼爱尚贤明鬼神非命尚同等诸篇明鬼神在尚同篇中无别篇也世之学者因临川王氏诗有孔墨必相用自古宁有此之语意谓孟子排扬墨公排释老自比孟子不当有相用之说然学者必知孟子归斯受之之意然後识公读墨之旨云伊川先生曰或问退之读墨一篇如何曰此一篇意亦甚好但言不谨严便有不是处至若言孔子尚同兼爱与墨子同则甚不可也】

儒讥墨以上同兼爱上贤明鬼【上或皆作尚从阁本云考墨子本书及汉艺文志当作上】而孔子畏大人居是邦不非其大夫【荀子子路问鲁大夫练而牀礼欤子不答以告子贡子贡曰汝问非也君子居是邦不非其大夫】春秋讥专臣不上同哉孔子泛爱亲仁以博施济衆为圣不兼爱哉孔子贤贤以四科进褒弟子疾歿世而名不称不上贤哉孔子祭如在讥祭如不祭者曰我祭则受福不明鬼哉儒墨同是尧舜同非桀纣同修身正心以治天下国家奚不相悦如是哉余以为辩生於末学各务售其师之说非二师之道本然也孔子必用墨子墨子必用孔子不相用不足为孔墨【列子云孔丘墨翟无地而为君无官而为长古语云墨翟突不及黔孔丘席不及煖孟子以前皆以孔墨并称则墨亦大贤孟子特以其非中道其流不能无弊故辟之耳艺文志曰墨家者流盖出於清庙之守茅屋采椽是以贵俭养三老五更是以兼爱选士大射是以尚贤宗祀严父是以右鬼顺四时而行是以非命以孝视天下是以尚同此其所长也退之读墨盖出於此庄孟荀卿之论皆斥其所短也又严有翼曰墨子之书孟子疾其兼爱无父力排而禽兽之其言曰扬墨之道不熄孔子之道不着能言距扬墨者圣人之徒也今退之谓孔子必用墨子墨子必用孔子抑何乖刺如是耶若以孔墨为必相用则孟子距之为非矣其与孟简书则又取孟子距扬墨之说以谓向无孟氏皆服左衽而言侏离矣故推尊孟子以为其功不在禹下意以已之排佛老可以比肩孟氏也殊不知已之先後自相矛盾可胜其说哉】

卷十二

钦定四库全书

东雅堂昌黎集注卷十二

杂着

获麟解【尔雅曰麟麋身牛尾一角获麟事见春秋鲁哀公十四年元和七年麟见东川或疑公因此而作解然李翱尝书此文以赠陆惨曰韩愈非兹世之文古之文也其词与意适则孟轲既没亦不见其有过於斯者惨死於贞元十八年则此文非元和间作也今按此文有激而托意之词非必为元和获麟而作也】

麟之为灵昭昭也咏於诗书於春秋【书或作载】杂出於传记百家之书虽妇人小子皆知其为祥也然麟之为物不畜於家不恒有於天下其为形也不类非若马牛犬豕豺狼麋鹿然【马牛或作牛马鹿然或作鹿之状或无之字皆非是】然则虽有麟不可知其为麟也角者吾知其为牛鬣者吾知其为马犬豕豺狼麋鹿吾知其为犬豕豺狼麋鹿【下或有也字】惟麟也不可不知则其谓之不祥也亦宜虽然麟之出必有圣人在乎位麟为圣人出也圣人者必知麟麟之果不为不祥也又曰麟之所以为麟者以德不以形【下或有也字】若麟之出不待圣人则谓之不祥也亦宜【下或有也字或有哉字】
宋远孙曰关雎之应实无麟而若麟之瑞春秋之作实有麟而非麟之时】

师说【柳子厚答韦中立书云今之世不闻有师独韩愈不顾流俗犯笑侮收召後学作师说因杭顔为师愈以是得狂名又报严厚舆书云仆才能勇敢不如韩退之故不为人师人之所见有同异以以韩责我余观退之师说云弟子不必不如师师不必贤於弟子其言非好为人师者也学者不归子厚归退之故子厚有此说耳】

古之学者必有师师者所以传道受业解惑也人非生而知之者孰能无惑惑而不从师其为惑也终不解矣生乎吾前其闻道也固先乎吾吾从而师之【阁本无此五字非是】生乎吾後其闻道也亦先乎吾吾从而师之吾师道也夫庸知其年之先後生於吾乎【庸或从阁杭作岂或并有二字而无夫字皆非是】是故无贵无贱无长无少道之所存师之所存也【存一作资或无也字】嗟乎【嗟上或有咨字非是】师道之不传也久矣欲人之无惑也难矣古之圣人其出人也远矣犹且从师而问焉今之衆人其下圣人也亦远矣而耻学於师【且或作已下或作去皆非是】是故圣益圣愚益愚圣人之所以为圣愚人之所以为愚其皆出於此乎【一作矣】爱其子择师而教之於其身也则耻师焉惑矣彼童子之师授之书而习其句读者非吾所谓传其道解其惑者也【非上或有也字方云读音豆周礼天官注徐邈读马融笛赋作句投徒鬪切何休公羊序失其句读不音山谷和黄冕仲诗只从如字】句读之

不知惑之不解或师焉或不焉小学而大遗吾未见其明也巫医乐师百工之人不耻相师士大夫之族曰师曰弟子云者则羣聚而笑之问之则曰彼与彼年相若也道相似也【似一作类】位卑则足羞官盛则近谀【盛或作大按官盛语见中庸】呜呼师道之不复可知矣巫医乐师百工之人君子不齿【或作鄙之】今其智乃反不能及其可怪也欤【其可或无其字】圣人无常师孔子师郯子苌弘师襄老聃【句絶】郯子之徒其贤不及孔子【孔子至周问礼於老聃放乐於苌弘史记曰孔子学鼓琴於师襄子左氏传曰郯子来朝孔子问少昊氏以鸟名官之故 苌音长郯音谈国名也方无孔子师郯子五字而以苌弘师襄老聃六字连下句郯子之徒为句曰校本一云郯子下当有数子二字其上当存孔子师三字为是 今按孔子见郯子在适周见苌弘老聃之前而圣人无常师本杜氏注问官各语故此上句既叙孔子所师四人而再举郯子之徒则三子在其中矣方氏知当存孔子师字而不知当并存上郯子二字乃以下郯子二字属上句读之而疑郯子之下更有数子二字误矣】孔子曰三人行则必有我师【子下有曰字方从杭本云论语本无则字曰字似不当有】是故弟子不必不如师师不必贤於弟子【故上或无是字】闻道有先後术业有专攻如是而已李氏子蟠年十七【蟠贞元十九年进士】好古文六艺经传皆通习之不拘於时学於余【学上或有请字无下余字】余嘉其能行古道作师说以贻之

进学解【进学解出於东方朔客难扬雄解嘲而公过之孙樵所谓韩文公以进学解穷者此也孙樵又与王霖书曰玉川子月蚀诗韩吏部进学解莫不拔地倚天句句欲活读之如赤手捕长蛇不施鞚勒骑生马急不得暇莫不捉搦据本传云再为国子博士既才高数黜官又下迁乃作进学解以自喻执政奇其才改比部郎中史馆修撰元和八年三月二十三日也】

国子先生晨入太学招诸生立馆下【招或作召】诲之曰业精于勤荒于嬉行成于思毁于随方今圣贤相逢治具毕张拔去凶邪登崇峻良【毕或作必峻或作俊古文尚书俊皆作峻公佗文石本多用峻字新旧史同上】占小善者率以录【占去声】名一艺者无不庸爬罗剔抉【爬或作把 爬蒲巴切抉於决切】刮垢磨光盖有幸而获选孰云多而不扬诸生业患不能精无患有司之不明【之不或作不能非是】行患不能成无患有司之不公言未既有笑于列者曰先生欺余哉弟子事先生於兹有年矣【年或作时云考旧史公时以职方下迁盖非久於博士 今按此文恐非职方左迁时作说见下三年博士注】先生口不絶吟於六艺之文【吟或作唸】手不停披於百家之编记事者必提其要【记或作纪】纂言者必钩其玄贪多务得细大不捐焚膏油以继晷【焚或作烧】恒兀兀以穷年【兀兀或作矻矻】先生之业可谓勤矣【之下或有於字】觝排异端攘斥佛老补苴罅漏张皇幽眇【衣弊不补履决不苴吕氏春秋语抗辞幽说闷意眇旨见扬子云解难 罅呼讶切】寻坠绪之茫茫【或作芒芒】独旁搜而远绍障百川而东之【障或作停礼记鯨鄣洪水音章】回狂澜於既倒先生之於儒可谓有劳矣【或无有字】沈浸醲郁【醲或作酿】含英咀华【张子韶曰文字有眼目处当涵泳之使书味存於胷中则益矣韩子曰沈浸醲郁含英咀华正谓此咀在吕切】作为文章其书满家上规姚姒【姚姒舜禹姓姒徐里切】浑浑无涯【无或作亡或作之非是扬子曰虞夏之书浑浑尔浑浑胡本切】周诰殷盘佶屈聱牙【聱广雅谓不入人语也佶屈聱牙皆艰澁貌 佶其乙切屈求勿切聱牛交切】春秋谨严左氏浮夸易奇而法诗正而葩下逮庄骚太史所录子云相

如同工异曲先生之於文【一作德或作儒或作得非是】可谓阅其中而肆其外矣少始知学勇於敢为长通於方左右具宜【具或作其或作且】先生之於为人可谓成矣【或无为字】然而公不见信於人私不见助於友跋前踖後【踖多作?诗云载?其尾说文与?义通】动辄得咎暂为御史遂窜南夷【遂或作逐谓贞元十九年为监察御史谪阳山令也】三年博士冗不见治【年方作为谓贞元末为四门博士元和初为国子博士今复下迁诸本多作三年樊谓公元和元年六月为博士四年六月迁都官史谓三岁为真盖三年也今按洪谱则樊说为是当作三年唐本诗注行状皆有三年字何烦曲说乎然洪亦附三为之说则又误矣楚词虽过失犹弗治治陈之切】命与仇谋取败几时【取或作其】冬煖而儿号寒年丰而妻啼饥【丰或作登】头童齿豁竟死何裨不知虑此而反教人为【或无而字】先生曰吁子来前夫大木为杗【尔雅杗廂谓之梁说文云杗屋大梁也

杗武方莫郎二切又音盲】细木为桷【诗松桷有梲左氏传子尾抽桷击扉注桷椽也桷音角】欂栌侏儒【尔雅云欂栌柱也栌柱上跗欂一名枅栌一名欂侏儒一名桼字或作株櫨欂音薄栌音卢】椳闔居楔【椳户枢闔在地谓之臬注即门槩也居关牡也楔门两傍木并见尔雅广韵椳乌回切闔鱼烈切居徒点切楔音屑】各得其宜施以成室者匠氏之工也【或无宜字室下有屋字工作功淮南子曰贤主之用人也犹巧工之制木也大者以为舟航梁栋小者以为楫楔修者以为栏榱短者以为朱儒枅栌无小大修短皆得其所宜规矩方圆各有所施天下之物莫凶於鸡毒乌头也然而良医囊而藏之有所用也是故林莽之材犹不弃者而况於人乎公言盖祖此而宜施二字当为一节】玉札丹砂赤箭青芝牛溲马勃败鼓之皮俱收并畜待用无遗者医师之良也登明选公杂进巧拙紆余为妍卓犖为杰【卓犖或作犖犖犖吕角切】校短量长惟器是适者【是一作所】宰相之方也昔者孟轲好辩孔道以明辙还天下卒老於行荀卿守正大论是弘【荀卿至是弘八字方从旧史如此又云文苑上文皆同惟是弘作以兴盖国初以讳避也阁本亦只作大论以正为王以论为伦自苑本也而新史又易守为宗其讹益甚矣】逃谗於楚废死兰陵【史记荀卿游於齐三为祭酒齐人或谗荀卿荀卿乃适楚春申君以为兰陵令春申死而荀卿因家兰陵】是二儒者吐辞为经举足为法絶类离伦优入圣域其遇於世何如也【遇或作进】今先生学虽勤而不繇其统言虽多而不要其中【要平声】文虽奇而不济於用行虽修而不显於衆【显或作洎旧史四句皆无而字】犹且月费俸钱【俸或作奉】岁靡廩粟【靡音糜】子不知耕妇不知织乘马从徒【从才用切或作而非是】安坐而食踵常途之促促【诸本多作役役促音龔公张署墓志抑首促促就食与此同史记申屠嘉娵娵廉谨娵与促音义通集韵龔下二字皆出】窥陈编以盗窃【编或作篇】然而圣主不加诛宰臣不见斥非其幸欤【或无其字或作此非其利哉】动而得谤名亦随之投闲置散乃分之宜若夫商财贿之有亡计班资之崇庳【庳下也吕氏春秋谓确乎其节之不庳也太元经亦曰山川福庳而祸高

庳音卑】忘已量之所称【已量或作量已非是称去声】指前人之瑕疵是所谓诘匠氏之不以杙为榼【庄子求狙猴之杙者斩杙槩也榼柱也杙小而榼大故公以杙自喻杙音弋】而訾医师以昌阳引年欲进其豨苓也【师下或有不字本草昌蒲一名昌阳作不以者非是楚人呼猪为豨豨苓乃猪苓也訾音紫豨许岂切又音希】本政【周衰文弊老子之徒庄周唱为太古之说曰圣人不死大盗不止焚符破玺而民朴鄙剖斗折衡而民不爭殫残天下之圣法而民始可与论议公亦原道篇既详辨而排之矣至是又作本政云】

周之政文既其弊也【其或作有或无其字 今按犹言既而弊矣既字又似及字】後世不知其承大敷古先遂一时之术以明示民【遂或作逐】民始惑教百氏之说以兴其言曰天下可为也彼之政仁矣反於谊此之政敬矣戾於忠何居我其周从乎【何居或无何字或无居字我或作吾 今按何居准檀弓音姬大率此篇僻澁必其少作今或有所未通阙之可也】曰周不及殷其殷从乎曰夏曰虞曰陶唐曰三皇氏曰遂古之初暴孽情饰淫志【孽或作泰孽鱼列切】枝辞琢正纷紊纠射以僻民和以导民乱呜呼道之去世其终不复矣乎长民者发一号施一令民莫不悱然非矣【或无然非二字 悱芳尾切】谓不可守遽变而从之譬将适千里及门而复後虽屹屹决不可暨【或无後字暨或作泊 屹苦骨反】原其始固有啓之者也闻於师曰古之君天下者化之不示其所以化之之道及其弊也易之不示其所以易之之道政以是得民以是淳其有作者知教化之所繇废抑诡怪而畅皇极【怪或作类】伏文貌而尚忠质茫乎天运窅尔神化道之行也其庶已乎

守戒【唐自安史乱後河南河北地裂为七八蔡在当时最为近地成德淄青连结为援所谓今之通都大邑介於屈强之间而不知为之备者此公守戒之所以作终之曰如之何而备之曰在得人及裴度平蔡而公之言验太和间杜牧作守论亦公遗意欤】

诗曰大邦维翰书曰以蕃王室诸侯之於天子不惟守土地奉职贡而已固将有以翰蕃之也今人有宅於山者知猛兽之为害则必高其柴援而外施谿羿以待之【援或云篱也拦也字当从木 谿徒散切羿慈井切】宅於都者知穿窬之为盗则必峻其垣墙而内固扃鐃以防之【鐃音决】此野人鄙夫之所及非有过人之智而後能也今之通都大邑介於屈强之闲【屈或作倔 屈渠勿切强居亮切又巨两切】而不知为之备噫亦惑矣野人鄙夫能之【野下或无人鄙二字】而王公大夫反不能焉岂材力为有不足欤【为下或有之而二字或只有之字 今详文势疑为字衍】盖以谓不足为而不为耳天下之祸莫大於不足为【句下或有而不为三字 今详文势疑下足字衍下文不足为者放此】材力不足者次之【足下或有为字非是】不足为者敌至而不知材力不足者先事而思则其於祸也有间矣彼之屈强者带甲荷戈不知其多少其縣地则千里而与我壤地相错【与上或无而字】无有丘陵江河洞庭孟门之关【战国策三苗之居左彭蠡之波右洞庭之水殷紂之国左孟门而右漳滏】其闲又自知其不得与天下齿朝夕举踵引颈【或作领】冀天下之有事以乘吾之便此其暴於猛兽穿窬也甚矣呜呼胡知而不为之备乎哉贲育之不戒童子之不抗【蒯通曰孟贲之狐疑不如童子之必至贲育古之勇力士也孟贲生拔牛角夏育卫人力举千钧 贲音奔】鲁鸡之不期蜀鸡之不支【尔雅鸡大者曰蜀庄子庚桑楚篇越鸡不能伏鹄卵鲁鸡固能之矣向氏注云越鸡小鸡也鲁鸡大鸡也今蜀鸡也 按公上下文考之蜀鸡当作越鸡】今夫鹿之於豹非不巍然大矣【於或作与非是】然而卒为之禽者爪牙之材不同猛怯之资殊也曰然则如之何而备之曰在得人圻者王承福传【圻或作圻圻音乌左传圻人以时埴馆宫室杜注圻人涂者题语正本此说不当用圻字 今按论语作圻】

圻之为技贱且劳者也有业之其色若自得者听其言约而尽问之王其姓承福其名世为京兆长安农夫【或无夫字】天宝之乱发人为兵持弓矢十三年有官勲弃之来归丧其土田手镬衣食【镬圻具尔雅镬谓之圻 镬母官切】余三十年舍於市之主人而归其屋食之当

焉【当谓所当之直】视时屋食之贵贱而上下其圻之佣以偿之有余则以与道路之废疾饿者焉又曰粟稼而生者也若布与帛必蚕绩而後成者也其他所以养生之具皆待人力而後完也吾皆赖之然人不可徧为宜乎各致其能以相生也故君者理我所以生者也【方从阁杭本如此诸本以生或作以出令 今按所以出令与原道意同似当从之然详上文有三生字故此言君者理我之所以生者正承上文而言也若作出令则与上下文意皆不协矣今当以方本为正】而百官者承君之化者也【或从阁杭无也字非是】任有小大惟其所能若器皿焉食焉而怠其事必有天殃故吾不敢一日舍镬以嬉【一日舍镬或作舍镬一日】夫镬易能可力焉又诚有功取其直虽劳无愧吾心安焉夫力易强而有功也心难强而有智也【智上或无有字】用力者使於人用心者使人亦其宜也吾特择其易为而无愧者取焉【特或作故孟子陈相见孟子道许行之言又彭更问士无事而食不可也二章孟子有食於人及食功之说公所言盖有合於此】嘻吾操镬以入富贵之家有年矣【入下或有於字】有一至者焉又往过之则为墟矣有再至三至者焉而往过之则为墟矣问之其邻【问下或无之字】或曰噫刑戮也或曰身既死而其子孙不能有也或曰死而归之官也【死上或无曰字】吾以是观之非所谓食焉怠其事而得天殃者邪【焉下或有而字】非强心以智而不足不择其才之称否而冒之者邪非多行可愧知其不可而强为之者邪【知其不可下杭本有能字蜀本能上又有强字或从阁本作知己之不可能又无强字 今按此数本语意皆与上文不择其才之称否者相复又与本句多行可愧者不相承惟杭蜀本近是但能字亦未安而强字当在而字下耳今参取二本定为知其不可而强为之则其上下文之义皆畅矣】将富贵难守薄功而厚飨之者邪【或无之字】抑丰悴有时一去一来而不可常者邪吾之心悯焉是故择其力之可能者行焉乐富贵而悲贫贱我岂异於人哉又曰功大者其所以自奉也薄妻与子皆养於我者也吾能薄而功小不有之可也【我者阁作我类有之阁作有小皆非是】又吾所谓劳力者【下或有也字】若立吾家而力不足则心又劳也一身而二任焉虽圣者不可能也愈始闻而惑之又从而思之盖贤者也盖所谓独善其身者也然吾有讥焉谓其自为也过多其为人也过少其学扬朱之道者邪扬之道不肯拔我一毛而利天下【扬之上或有然字非】是而夫人以有家为劳心不肯一动其心以畜其妻子【畜或作蕃】其肯劳其心以为人乎哉虽然其贤於世之患不得而患失之者以济其生之欲贪邪而亡道以丧其身者其亦远矣【亡或作忘】又其言有可以警余者故余为之传而自鉴焉【鉴或作覽或作觉今疑自鉴或当作日□】

五箴五首【并序】

人患不知其过既知之不能改是无勇也【或无是字】余生三十有八年【三或作四或从阁杭蜀本云洪樊辨证详矣】发之短者日益白齿之摇者日益脱聪明不及於前时道德日负於初心【二於字或并作于】其不至於君子而卒为小人也昭昭矣作五箴以讼其恶云

游箴

余少之时将求多能蚤夜以孜孜余今之时既饱而嬉蚤夜以无为【余方从阁杭蜀本并作于云左传于民生之不易于胜之不可保杜注于曰也 今按方说不为无据然与所证之文初

不相似况下文有呜呼余乎则此于字皆是余字明矣】呜呼余乎其无知乎【知下或无乎字】君子之弃而小人之归乎

言箴

不知言之人乌可与言【乌或作焉】知言之人默焉而其意已传【焉或作然】幕中之辩人反以汝为叛【此谓佐董晋张建封于汴徐二州时】台中之评人反以汝为倾【此谓为监察御史坐论天旱人饥出为阳山令以汝方并作汝以今接近世校本务为新奇多作倒语文乖字逆几类欧阳公所讥石公操作字之怪殊失韩公立言本意今悉正之不敢从也】汝不惩邪而呶呶以害其生邪【呶音饶】

行箴【行或作悔】

行与义乖言与法违後虽无害汝可以悔行也无邪言也无颇【普禾切】死而不死汝悔而何宜悔而休汝恶曷瘳宜休而悔汝善安在悔不可追【追诸本皆同而方从阁杭作止今按草书追字近似止字二本偶以转写致误而方乃以好怪取之不复计其文义之通塞可一笑也】悔不可为思而斯得汝则弗思

好恶箴

无善而好【善方从杭蜀作悖今按二本盖由下句而误方亦不顾文义而取之也】不观其道无悖而恶不详其故前之所好今见其尤从也为比舍也为雠前之所恶今见其臧从也为愧舍也为狂维雠维比维狂维愧於身不祥於德不义不义不祥维恶之大几如是为而不颠沛齿之尚少庸有不思今其老矣不慎胡为

知名箴

内不足者急於人知需焉有余厥闻四驰【焉或作然闻去声】今日告汝知名之法勿病无闻病其晬晬昔者子路惟恐有闻赫然千载德誉愈尊矜汝文章负汝言语乘人不能揜以自取汝非其父汝非其师不请而教谁云不欺欺以贾憎【贾音古】揜以媒怨汝曾不寤以及於难小人在辱亦克知悔及其既宁【及其或作其及】终莫能戒既出汝心又铭汝前汝如不顾祸亦宜然【祸亦方作辱则】

後汉三贤赞三首【後汉王充王符仲长统三人者同传公为之赞各不满百言而叙事略无遗者】

王充者何会稽上虞本自元城爰来徙居【充字仲任其先魏郡元城人父诵徙居上虞】师事班彪家贫无书閱书於肆市肆是游一见诵忆遂通衆流闭门潜思论衡以修【充归郷里屏居教授以为俗儒守文多失其言乃闭门潜思着论衡八十五篇】为州治中自免归欤同

郡友人谢姓夷吾上书荐之待诏公车以病不行【刺史董勤辟究从事转治中自免还家友人同郡谢夷吾上书荐充才学肃宗特诏公车徵以病不行】年七十余乃作养性一十六篇肃宗之时终於永元

王符字节信安定临泾好学有志为乡人所轻【或无为字人或作里】愤世着论潜夫是名【符着潜夫论三十六篇以讥当时得失不欲章显其名故号曰潜夫论】述赦之篇以赦为贼良民之甚其旨甚明【甚或作患王符述赦篇曰今日贼良民之甚者莫大於数赦公全具此语】皇甫度辽闻至乃惊衣不及带屣履出迎岂若鴈门问鴈呼卿【皇甫规解官归安定乡人有以货得鴈门守者谒规卧不起既入而问卿前郡食鴈美乎有顷王符在门规素闻符名衣不及带屣履出迎时人为为之语曰徒见二千石不如一逢掖】不仕终家吁嗟先生

仲长统字公理【仲长统字公理或无仲字】山阳高平谓高干有雄志而无雄才【谓上或有自字】其後果败【并州刺史高干素贵有名士多归附时统过干干访以当时之事统谓干曰君有雄志而无雄才未几干以并州叛卒至於败】以此有声俶傖敢言【俶或作偶或云俶与传合】语默无常人以为狂生州郡会召称疾不就着论见情初举尚书郎【举下或有高第字今按本传无高第字】後参丞相军事卒不至于荣论说古今发愤着书昌言是名【着论名曰昌言凡三十四篇】友人缪袭称其文章足继西京【文章或云考本传当作才章公三赞未尝私立一语】四十一终【一下或有而字】何其短邪呜呼先生讳辩【旧史公传云李贺父名晋肃不应进士而愈为贺作讳辩令举进士盖以是罪公而新史则书其事於贺传云以父名晋肃不肯举进士愈为作讳辩然亦卒不就举】

愈与李贺书【李上或有进士二字非是】劝贺举进士贺举进士有名与贺争名者毁之【此公自言尝劝李贺举进士而贺从已说举进士有名称故与之争名者毁之也今方氏乃从诸本删去名字而以有字属下句遂使复出四字为剩语而争名二字无所承故诸本亦有觉其误者而并删四字以从省虽若小胜方本然要为失韩公本指而不究毁者之情也方本又无之字亦非是方又云康骅剧谈录谓公此文因元稹而发董彦远谓贺死元和中使稹为礼部亦不相及争名盖当时同试者】曰贺父名晋肃贺不举进士为是劝之举者为非听者不察也【或无也字】和而唱之同然一辞皇甫湜曰若不明白子与贺且得罪【或无若字】愈曰然律曰二名不偏讳释之者曰谓若言徵不称在言在不称徵是也律曰不讳嫌名释之者曰谓若禹与雨丘与蓀之类是也【蓀与丘同音乌蓀草名或无此注字】今贺父名晋肃贺举进士为犯二名律乎为犯嫌名律乎父名晋肃子不得举进士若父名仁子不得为人乎【嫌名律乎下诸本皆有此二十字或从杭本去之非是】夫讳始於何时作法制以教天下者非周公孔子欤周公作诗不讳【若曰克昌厥後又曰骏发尔私谓文王名昌武王名发也若字或作周公】孔子不偏讳二名【若曰宋不足徵又曰某在斯若字或作孔子】春秋不讥不讳嫌名【若卫桓公名完本或无若字】康王钊之孙实为昭王【康王名钊钊音昭】曾参之父名

皙曾子不讳昔【若曰昔者吾友又曰褐裘而吊若字或作曾子】周之时有骐期汉之时有杜度【期字度字下或并有者字董彦远曰骐期以姓苑考之为菴又李涪谓杜操字伯度魏

人以武帝讳谓杜度公误用也然张仲景方自有杜度公所用或出此】此其子宜如何讳将讳其嫌遂讳其姓乎将不讳其嫌者乎汉讳武帝名彻为通【谓彻侯为通侯蒯彻为蒯通之类】不闻又讳车辙之辙为某字也讳吕后名雉为野鸡不闻又讳治天下之治为某字也【或无下又讳二字顔氏家训曰相公名白传有五皓之称厉王名长琴有修短之目不闻谓布帛为布皓乎肾肠为肾修公言盖有自也今按公言或与顔氏偶同未必用其语也】今上章及诏不闻讳浒势秉饥也【以浒势秉饥为近太祖太宗世祖玄宗庙讳盖太祖名虎太宗名世民世祖名昞玄宗名隆基 浒呼古切】惟宦官宫妾乃不敢言谕及机以为触犯【以谕为近代宗庙讳以机为近玄宗庙讳代宗讳豫玄宗讳见上】士君子言语行事宜何所法守也【言语或作立言】今考之於经质之於律稽之於国家之典贺举进士为可邪为不可邪【或无举字为可下或无邪字或无邪为二字】凡事父母得如曾参可以无讥矣作人得如周公孔子亦可以止矣【矣或并作也或并作邪】今世之士不务行曾参周公孔子之行而讳亲之名则务胜於曾参周公孔子亦见其惑也夫周公孔子曾参卒不可胜胜周公孔子曾参乃比於宦者宫妾则是宦者宫妾之孝於其亲贤於周公孔子曾参者耶【宦者或并作宦官】

讼风伯【讼或作谗非是德宗贞元十九年正月不雨至七月甲戌公时为四门博士作此专以刺权臣裴延龄李齐运京兆尹李实之徒壅蔽聪明不顾旱饥专於诛求使人君思泽不得下流如风吹云而雨泽不得坠也是年冬公拜御史竟以言旱饥谪阳山云】

维兹之旱兮其谁之由【旱上或无之字】我知其端兮风伯是尤山升云兮泽上气雷鞭车兮电摇帜【天志切】雨澍澍兮将坠【澍澍或作侵侵将下或有欲字】风伯怒兮云不得止阳乌之仁兮念此下民闕其光兮不鬬其神嗟风伯兮其独谓何【独或作将】我於尔兮岂有其他求其时兮修祀事羊甚肥兮酒甚旨食足饱兮饮足醉风伯之怒兮谁使云屏屏兮吹使醺之气将交兮吹使离之铄之使气不得化寒之使云不得施【气不或作云不云不或作气不】嗟尔风伯兮欲逃其罪又何辞【或无兮字义上或有其字】上天孔明兮有纪有纲我今上讼兮其罪谁当【我今或作今我】天诛加兮不可悔风伯虽死兮人谁汝伤【虽或作之非是汝或作尔】

伯夷颂【王荆公伯夷论谓韩子之颂为不然曰伯夷尝与太公闻西伯善养老而往归焉当是之时欲夷纣者二人之心岂有异哉及武王一奋太公相之遂出元元於涂炭之中伯夷乃不与岂伯夷欲归西伯而志不遂乃死於北海邪抑来而死於道路耶抑其至文王之都而不足以及武王之世而死耶呜呼使伯夷之不死以及武王之时其烈岂下太公哉荆公之论与此颂相反学者其审之伊川曰伯夷颂只说得伯夷介处要说得伯夷心须是圣人语不念旧恶怨是用希】

士之特立独行适於义而已不顾人之是非皆豪杰之士信道笃而自知明者也一家非之力行而不惑者寡矣至於一国一州非之力行而不惑者盖天下一人而已矣若至於举世非之力行而不惑者则千百年乃一人而已耳若伯夷者穷天地亘万世而不顾者也【举世非之下方从杭粹及范文正公写本无力行二字千下有五字云自周初至唐贞元末几二千年公

言千五百年举其成也 今按此篇自一家一国以至举世非之而不惑者泛说有此三等人而伯夷之穷天地亘万世而不顾又别是上一等人不可以此三者论也前三等人皆非有所指名故举世非之而不顾者亦难以年数之实论其有无而且以千百年言之盖其大约如此耳今方氏以伯夷当之已失全篇之大指至於计其年数则又舍其几二千年全数之多而反促就千五百年奇数之少其误甚矣方说不通文理大率类此不可以不辨】昭乎日月不足为明 岷乎泰山不足为高【岷音粹】巍乎天地不足为容也当殷之亡周之兴微子贤也抱祭器而去之【事见史记宋世家去下或无之字】武王周公圣也【圣下一有人字】从天下之贤士与天下之诸侯而往攻之【从或作率与或作从】未尝闻有非之者也彼伯夷叔齐者【伯夷姓墨名允字公信叔齐名智字公达孤竹君之二子伯长也叔少也夷齐谥也见春秋少阳篇】乃独以为不可殷既灭矣天下宗周彼二子乃独耻食其粟饿死而不顾繇是而言夫岂有求而为哉信道笃而自知明也【明下或有者字】今世之所谓士者【或无所字】一凡人誉之则自以为有余一凡人沮之则自以为不足【一凡人诸本两句皆作凡一人唯范本并作一凡人乃与下文非圣人者相发明诸本非是】彼独非圣人而自是如此夫圣人乃万世之标准也余故曰若伯夷者特立独行穷天地亘万世而不顾者也【准方作准 今按准字从水准声俗作准方本误也又按此篇之意所谓圣人正指武王周公而言也既曰圣人则是固为万世之标准矣而伯夷者乃独非之而自是如此是乃所以为穷天地亘万世而不顾者也与世之以一凡人之毁誉而遽为喜愠者有闻矣近世读者多误以伯夷为万世标准故因附见其说云】虽然微二子乱臣贼子接迹於後世矣

卷十三

<集部,别集类,汉至五代,东雅堂昌黎集注>

钦定四库全书

东雅堂昌黎集注卷十三

杂着

子产不毁乡校颂【左傳郑人游於乡校以论执政然明谓子产曰毁乡校何如子产曰何为夫其所善者吾则行之其所恶者吾则改之是吾师也若何毁之然明日若果行此郑国实赖之仲尼闻之曰以是观之人谓子产不仁吾不信也】

我思古人伊郑之侨【国侨字子产郑大夫穆公之孙子国之子 侨音乔】以礼相国【相去声下同】人未安其教【安或作知云此以教叶侨与器车牵诗用韵如此】游于乡之校衆口嚣嚣【许尧反】或谓子产毁乡校则止曰何患焉可以成美夫岂多言亦各其志善也吾行不善吾避维善维否【易否臧凶否音鄙】我於此视川不可防言不可弭【左传襄公三十一年子产不毁乡校曰我闻忠善以损怨不闻作威以防怨岂不遽止然犹防川大决所犯伤人必多吾不克救也不如小决使道不如吾闻而药之也】下塞上聋【文六年谷梁云上塞则下闇下闇则上聋】邦其倾矣既乡校不毁而郑国以理在周之兴养老乞言及其已衰谤者使监【国语厉王虐国人谤王怒得卫巫使监谤者 监古衫反】成败之迹昭哉可观【哉或作然】维是子产执政之式维其不遇化止一国诚率是道相天下君交畅旁达施及无垠【君或作者交畅旁达或作旁畅通达非是达或作通】於虞四海所以不理有君无臣谁其嗣之我思古人【理下或有者字】

释言【此元和二年春作宰相郑絪翰林学士李吉甫中书舍人裴垕也国语云骊姬使奄楚以环释言注云以言解释也退之作释言取此】

元和元年六月十日【或无十日字】愈自江陵法曹诏拜国子博士始进见今相国郑公公赐之坐【或无下公字】且曰吾见子某诗吾时在翰林职亲而地禁不敢相闻今为我写子诗书为一通以来【我下或有尽字而无一通以字或无为我字而有尽字一或作二】愈再拜谢退録诗书若干篇择日时以献【若干或作着于献下或有之字 今按着于篇虽古语然施之於此似不相入且公亦未必特用此语以为奇也】於後之数月有来谓愈者曰子献相国诗书乎曰然曰有为谗於相国之座者曰【或无为字】韩愈曰相国徵余文余不敢匿相国岂知我哉子其慎之【或无之字】愈应之曰愈为御史得罪德宗朝同迁於南者凡三人【三人谓公及张署李方叔也】独愈为先收用相国之赐大矣百官之进见相国者或立

语以退而愈辱赐坐语相国之礼过矣【以或作已】四海九州之人自百官已下欲以其业彻相国左右者多矣皆憚而莫之敢独愈辱先索相国之知至矣赐之大礼之过知之至是三者於敌以下受之宜以何报况在天子之宰乎【敌以或作敌已国语自敌以下则有讎注敌体也今人多用敌已字者非宰下或有相字】人莫不自知凡适於用之谓才堪其事之谓力愈於二者虽日勉焉而不近束带执笏立士大夫之行不见斥以不肖幸矣其何敢敖於言乎【或无乎字】夫敖虽凶德必有恃而敢行愈之族亲鲜少无扳联之势於今【扳音攀】不善交人无相先相死之友於朝【礼记儒有爵位相先患难相死】无宿资蓄货以钓声势【宿资蓄货或作宿货蓄资】弱於才而腐於力不能奔走乘机抵巇以要权利【巇许宜反要平声】夫何恃而敖若夫狂惑丧心之人蹈河而入火妄言而骂詈者则有之矣而愈人知其无是疾也虽有谗者百人相国将不信之矣愈何惧而慎欤【相国或作宰相或无欤字】既累月又有来谓愈曰有谗子於翰林舍人李公与裴公者子其慎欤愈曰二公者吾君朝夕访焉以为政於天下而阶太平之治【或作理】居则与天子为心膂出则与天子为股肱四海九州之人自百官已下其孰不愿忠而望赐【不下或有能字非是】愈也不狂不愚不蹈河而入火病风而妄骂不当有如谗者之说也虽有谗者百人二公将不信之矣愈何惧而慎既以语应客夜归私自尤曰咄【咄字见晋殷浩语当没切】市有虎而曾参杀人谗者之效也【市有虎见战国策龐葱语曾参杀人见史记甘茂语】诗曰取彼谗人投畀豺虎豺虎不食投畀有北有北不受投畀有昊【小雅巷伯诗】伤於谗疾而甚之之辞也又曰乱之初生僭始既涵乱之又生君子信谗【小雅巧言之诗云云】始疑而终信之之谓也孔子曰远佞人夫佞人不能远则有时而信之矣今我恃直而不戒祸其至哉徐又自解之曰市有虎听者庸也曾参杀人以爱惑聪也巷伯之伤乱世是逢也【聪或作听非是乱世一作世乱】今三贤方与天子谋所以施政於天下而阶太平之治听聪而视明公正而敦大夫聪明则听视不惑【听视或作视听】公正则不迓谗邪敦大则有以容而思彼谗人者孰敢进而为谗哉【进而或作而进】虽进而为之亦莫之听矣我何惧而慎【或无而慎字】既累月上命李公相客谓愈曰子前被言於一相今李公又相子其危哉【或无哉字】愈曰前之谤我於宰相者翰林不知也後之谤我於翰林者宰相不知也今二公合处而会言若及愈必曰韩愈亦人耳彼敖宰相又敖翰林其将何求必不然吾乃今知免矣既而谗言果不行【宰相或皆作相国乃今或作今乃又无矣字既下或无而字】爱直赠李君房别【南阳公张建封也时为徐帅公佐其幕李君房张墉也贞元六年进士公此文十五年在徐作】

左右前後皆正人也欲其身之不正乌可得邪【乌或作焉】吾观李生在南阳公之侧有所不知知之未尝不为之思有所不疑疑之未尝不为之言勇不动於气义不陈乎色【乎或作于】南阳公举措施为不失其宜【公下或有之字】天下之所窥观称道洋洋者抑亦左右前後有其人乎【有其或作其有】凡在此趋公之庭【或无此字今按此下疑当有而字】议公之事者吾既从而游矣言而公信之者谋而公从之者四方之人则既闻而知之矣李生南阳公之甥也人不知者将曰李生之托婚於贵富之家将以充其所求而止耳故吾乐为天下道其为人焉今之从事於彼也吾爲南阳公爱之【为南上或有能字】又未知人之举李生於彼者何辞【又或作且】彼之所以待李生者何道举不失辞待不失道虽失之此足爱惜而得之彼为欢忻於李生道犹若也举之不以吾所称待之不以吾所期李生之言不可出诸其口矣吾重为天下惜之【惜或作爱】

张中丞传後叙【欧阳文忠跋张中丞传後云张巡许远之事壮矣秉笔之士皆喜称述然以翰所纪考唐书列传及退之所书互有得失而列传最为疎略虽云史家当记大节然其大小数百战智谋材力亦有过人可以示後者史家皆灭而不着甚可惜也翰之所书诚为太繁然广纪备言以俟史官之采也文忠所云唐书列传者谓旧传若新传则采翰及公所书并旧传为之矣】

元和二年四月十三日夜愈与吴郡张籍阅家中旧书【张籍字文昌公举荐进士】得李翰所为张巡传【巡上或无张字巡邓州南阳人】翰以文章自名为此传颇详密然尚恨有阙者不为许远立传【远杭州盐官人敬宗曾孙】又不载雷万春事首尾远虽材若不及巡者开门纳巡【开上或疑当有然字】位本在巡上授之柄而处其下无所疑忌竟与巡俱守死成功名城陷而虏与巡死先後异耳两家子弟材智下不能通知二父志以为巡死而远就虏疑畏死而辞服於贼远诚畏死何苦守尺寸之地食其所爱之肉【睢阳食尽巡出爱妾远亦杀其奴以食士】以与贼抗而不降乎当其围守时外无虬蟄蚁子之援【虬蟄音毗浮】所欲忠者国与主耳而贼语以国亡主灭【贼将令狐潮闻玄宗已幸蜀以书招巡有大将六人白巡上存亡不可知不如降贼巡责以大义斩之士心益劝语或校作悟灭下或有悟之字今按悟字无理且从诸本作语】远见救援不至而贼来益衆必以其言为信外无待而犹死守人相食且尽虽愚人亦能数日而知死处矣远之不畏死亦明矣乌有城坏其徒俱死独蒙愧耻求活虽至愚者不忍为呜呼而谓远之贤而为之邪【其徒上或有而字或又疑而字当在死字之下邪上或无之字】说者又谓远与巡分城而守城之陷自远所分始以此诟远【诟或作语非是】此又与儿童之见无异人之将死其藏腑必有先受其病者引绳而絶之其絶必有处观者见其然从而尤之其亦不达於理矣小人之好议论不乐成人之美如是哉如巡远之所成就如此卓卓犹不得免其他则又何说当二公之初守也宁能知人之卒不救【之卒或无之字】弃城而逆遁苟此不能守虽避之他处何益及其无救而且穷也将其创残饿羸之余【创平声】虽欲去必不达二公之贤其讲之精矣守一城扞天下以千百就尽之卒战百万日滋之师蔽遮江淮【温公曰唐人皆以全江淮为巡远之功按睢阳虽当江淮之路城既被围若取江淮绕出其外睢阳岂能障之哉盖巡善用兵贼畏巡为後患不灭巡则不敢越过其南耳】沮遏其势天下之不亡其谁之功也【之不或无之字非是】当是时弃城而图存者不可一二数【所拒切】擅强兵坐而观者相环也不追议此而责二公以死守亦见其自比於逆乱设淫辞而助之攻也【攻或作功非是】愈尝从事於汴徐二府屡道於两府间【府或作州】亲祭於其所谓双庙者【时诏赠巡扬州大都督远荆州大都督皆立庙睢阳岁时致祭号双庙】其老人往往说巡远时事云南霁云之乞救於贺兰也【或无之字】贺兰嫉巡远之声威功绩出已上不肯出师救爱霁云之勇且壮不听其语强留之具食与乐延霁云坐霁云慷慨语曰【慷上或无霁云字非是】云来时睢阳之人不食月余日矣云虽欲独食义不忍虽食且不下咽因拔所佩刀断一指血淋漓以示贺兰一座大惊皆感激为云泣下云知贺兰终无为云出师意即驰去将出城抽矢射佛寺浮图矢着其上瓢半箭【或作箭】曰吾归破贼【归或作师非是】必灭贺兰此矢所以志也愈贞元中过泗州船上人犹指以相语城陷贼以刃胁降巡巡不屈即牵去将斩之又降霁云云未应【或无霁字】巡呼云曰南八男儿死耳不可为不义屈云笑曰欲将以有为也【欲将或疑衍一字】公有言云敢不死即不屈张籍曰有于嵩者少依於巡及巡起事嵩常在围中【及巡或作及其常或作

尝】籍大历中於和州乌江县见嵩嵩时年六十余矣【或无下嵩字】以巡初尝得临涣县尉【或无尝字】好学无所不读籍时尚小粗问巡远事不能细也云巡长七尺余须髯若神尝见嵩读汉书谓嵩曰何为久读此【久或作又】嵩曰未熟也巡曰吾於书读不过三遍终身不忘也因诵嵩所读书尽卷不错一字嵩惊以为巡偶熟此卷因乱抽他帙以试无不尽然嵩又取架上诸书试以问巡巡应口诵无疑嵩从巡久亦不见巡常读书也为文章操纸笔立书未尝起草【巡开元二十四年进士刘梦得嘉话载其谢加金吾表有云主辱臣死当臣致命之时恶稔罪盈是贼灭亡之日激励将士赋诗有云裹疮犹出阵饮血更登陴又夜闻笛声诗云营开星月近战苦阵云深观此则巡之文见矣起或作有】初守睢阳时士卒仅万人城中居人户亦且数万【或无户字】巡因一见问姓名其後无不识者巡怒须髯辄张及城陷贼缚巡等数十人坐且将戮巡起旋其衆见巡起或起或泣【或起或作犹起】巡曰汝勿怖死命也衆泣不能仰视巡就戮时顔色不乱阳阳如平常远寛厚长者貌如其心与巡同年生月日後於巡呼巡为兄死时年四十九【呼巡或作呼之】嵩贞元初死於亳宋间或传嵩有田在亳宋间武人夺而有之嵩将诣州讼理为所杀嵩无子张籍云【嵩将上或有而字为下或有其字皆非是】

河中府连理木颂【开元九年正月丙辰改蒲州为河中府孝经援神契曰王者德至草木则木连理公作此颂时年二十四犹未第也】

司空咸宁王【浑瑊也】尹蒲之七年木连理生於河之东邑野夫来告且曰吾不知古殆气之交畅也【殆或作始非是】维吾王之德交畅者有五是其应乎【或无五字非是】训戎奋威荡戮凶回举政宣和人则宁嘉入践台阶庶尹克司来帅熊罴四方作仪闵仁鰥寡不宁燕息【仁或作人非是】人乐王德祝年万亿府有羣吏王有从事异体同心【异体或作上下非是体或作事】归民於理天子是嘉俾锡劳王【劳去声】王拜稽首天子之光庶德昭融神斯降祥殊本连理之柯同荣异垄之禾【方云三馆本潮木之柯皆作枝柯仍与下文同荣为一句今本本作禾由枝字讹也今按殊本连理之柯即今所颂之木也同荣异垄之禾即书所谓异亩同颖之嘉禾盖追为前日之预言而泛举其类耳司马相如所谓双觥共抵之兽其句法亦类此如方所定则理华语赘句分而韵不协失之远矣】吾僖之产兹土也久矣【或无之字今按之字疑当作其】今欲明于大君【欲或作将】纪于策书王抑余也冶金伐石垂耀无极王余抑也【王余抑也或作余抑王也或依上文作王抑余也方从三本定此今按抑余余抑盖互文以叶韵耳作余抑王固无理作王抑余亦重复无他奇当从方本为是】奋肆媁媁【上音吁下音俞】不知所如愿托颂词长言之于康衢颂曰

木何为兮此祥洵厥美兮在吾王【洵或作询非是】愿封植兮永固俾斯人兮不忘【斯或作其人或作民】

汴州东西水门记【并序公时佐董晋在汴州作陈后山云退之作记记其事耳今之记乃论也以后山语观公诸记信然】

贞元十四年正月戊子陇西公命作东西水门【或无陇西二字非是董晋本仲舒之裔自广

川徙陇西故云】越三月辛巳朔水门成三日癸未大合乐设水嬉会监军军司马宾佐僚属将校熊罴之士肃四方之宾客以落之士女酈会阆郭溢郛既卒事其从事昌黎韩愈请纪成绩其词曰

维汴州河水自中注厥初距河为城【距或作拒】其不合者诞置联锁于河【不合或作弗合】宵浮昼湛舟不潜通【湛或作沈舟不方作舟用方并从石本今按上下文意盖言置锁虽足以禁舟之潜通然未免亏疏宣泄之患故须作水门耳诸本作舟不潜通者是也今上文既言置锁而下文乃云舟用潜通则是锁为虚设而其下句亦不应着然字矣若以为误则石本乃当时所刻不应有误然亦安知非其书者之误刻者之误况或非所亲见则又安知非传者之误耶其说之未尽者又见於溪堂盘谷等篇览者详之】然其襟抱亏疏风气宣泄邑居弗宁讹言屡腾历载已来就究孰思皇帝御天下十有八载此邦之人遭逢疾威囂童噉【噉音叫】劫衆沮兵櫜櫜栗栗若坠若覆时维陇西公受命作藩爰自洛京单车来临遂拯其危【拯或作持】遂去其疵弗肃弗厉薰为太和神应祥福五谷穰熟既庶而丰人力有余监军是咨司马是谋【诸本及石本皆有此二句方从阁本删去云阁本盖公晚日改定当从之今详此二语疑後人恶监军二字而删之耳方氏直谓阁本为公晚年所定不知何据而云然以今观之其舛误为最多疑为初出未校之本前已辨之详矣大抵馆阁藏书不过取之民间而诸儒畧以官课校之耳岂能一一精善过於私本世俗但见其为官本便尊信之而不复问其文理之如何已为可笑今此乃复造为改定之说以钳衆口则又可笑之甚也】乃作水门为邦之郭以固风气以閤寇偷【閤或作扞】黄流浑浑【胡本切】飞阁渠渠因而饰之匪为观游天子之武维陇西公是布天子之文维陇西公是宣【文方从石阁蜀本作醇今按此记方氏多从石本石本固当据信但上条用字大误而此醇字亦未安耳】河之沄沄源于崑仑天子万祀公多受祉乃伐山石刻之日月尚俾来者知作之所始

燕喜亭记【燕或作宴此记多从石本王弘中名仲舒自吏部员外郎贬连州司户参军亭在连州公为阳山令时作阳山连之属邑云】

太原王弘中在连州与学佛人景常元慧游【佛下或有之字慧下或有者字】异日从二人者行於其居之後丘荒之间上高而望得异处焉斩茅而嘉树列发石而清泉激輦糞壤燔樛翳【燔或作焚诗其樛其翳注曰木立死曰樛自毙曰翳樛侧师反翳於计反】却立而视之出者突然成丘陷者呀然成谷【呀音鰕】洼者为池【洼音蛙】而缺者为洞若有鬼神异物陰来相之自是弘中与二人者晨往而夕忘归焉乃立屋以避风雨寒暑【避或作御寒上或有御字或作立屋以游风雨既除寒暑既去或作以御风雨以除寒暑今从石本云左传吾侪小人皆有阖庐以避燥湿寒暑】既成愈请名之其丘曰埃德之丘蔽於古而显於今有埃之道也【其丘上或有名字有埃下或有德字】其石谷曰谦受之谷瀑曰振鹭之瀑谷言德瀑言容也其土谷曰黄金之谷瀑曰秩秩之瀑谷言容瀑言德也洞曰寒居之洞志其入时也池曰君子之池虚以鍾其美盈以出其恶也泉之源曰天泽之泉出高而施下也合而名之以屋曰燕喜之亭取诗所谓鲁侯燕喜者颂也【名或作言者颂从石阁杭蜀本如此或作颂者今按颂字疑衍文】於是州民之老闻而相与观焉【石阁杭本如此或无老字而或作者州民之老或作州之老民非是】曰吾州之山水名天下然而无与燕喜者比经营於其侧者相

接也而莫直其地凡天作而地藏之以遗其人乎【名下或有於字其侧石本无其字直或作多或作宜皆非是直音值当也史记樗里子墓正直其其北匈奴传诸将居东方直上谷或读如字地藏石本无地字其人石本无其字】弘中自吏部郎贬秩而来【部下或有侍字或无郎字皆非是】次其道途所经自蓝田入商洛【田下或有山字】涉浙湍【今邓州有淅江县以淅水得名今按淅音锡其县本楚之析邑汉书所谓析郦者也湍亦水名在邓州穰县】临汉水升岷首以望方城出荆门下岷江过洞庭上湘水行衡山之下繇郴踰岭猿狖所家【猿或作猿狖音柚】鱼龙所宫极幽遐瑰诡之观【瑰或作瓌】宜其於山水饫闻而厌见也【也或作之石本无也字】今其意乃若不足传曰智者乐水仁者乐山弘中之德与其所好可谓协矣智以谋之仁以居之吾知其去是而羽仪於天朝也不远矣遂刻石以记【石本无而字】徐泗豪三州节度掌书记厅石记【豪诸本作濠石或作壁地理志濠初作豪元和三年改为濠据退之作记时尚为豪作濠误矣通典以为州名字本作濠今按颜鲁公干禄字樣及唐韵亦皆作豪而元和郡国志云濠字中间误去水元和三年字又加水皆与地理志合但通典偶脱中闻去水一节耳此濠字当作豪此记当在贞元十五年作】

书记之任亦难矣元戎整齐三军之士【整或作总士或作事】统理所部之毗以镇守邦国【守或作定】赞天子施教化而又外与宾客四邻交其朝覲聘问慰荐祭祀祈祝之文【祈或作所】与所部之政三军之号令升黜凡文辞之事皆出书记非閎辨通敏兼人之才【閎或作宏】莫宜居之然皆元戎自辟然後命於天子【後或作后】苟其帅之不文则其所辟或不当亦其理宜也南阳公自御史大夫豪壽庐三州观察使授节移镇徐州【贞元四年十一月置徐泗豪三州节度使徙建封为之】历十一年而掌书记者三人【者下或有凡字】其一人曰高阳许孟容入仕于王朝今为尚书礼部郎中其一人曰京兆杜兼今为尚书礼部员外郎观察判官其一人陇西李博【陇上或有曰字】自前乡贡进士授秘书省校书郎方为之【孟容以文词知名兼建中初进士家聚书至万卷博公同年进士赠李君房别云李生在南阳公之侧或云恐是博】南阳公文章称天下其所辟实所谓閎辨通敏兼人之才者也後之人苟未知南阳公之文章【人苟下或有有字】吾请观於三君子苟未知三君子之文章吾请观於南阳公可知矣蔚乎其相章【或作扶或作华】炳乎其相辉志同而气合鱼川泳而鸟云飞也【泳或作伏或无也字】愈乐是宾主之相得也故请刻石以记之而陷置于壁间俾来者得以览观焉【记下或无之字来上或无俾字】

画记【苏内翰尝曰世有妄庸者作欧阳永叔语云吾不能为退之画记此大妄也】

杂古今人物小画共一卷骑而立者五人骑而被甲载兵立者十人【兵下或无立字】一人骑执大旗前立【骑下或有而字】骑而被甲载兵行且下牵者十人骑且负者二人骑执器者二人骑拥田犬者一人骑而牵者二人骑而驱者三人执羈勒立者二人【勒音的】骑而下倚马臂隼而立者一人骑而驱涉者二人徒而驱牧者二人【徒下或无而字驱牧或作骑牧今按徒则非骑矣】坐而指使者一人甲冑手弓矢鉞钺植者七人甲冑执帜植者十人负者七人偃寝休者二人甲冑坐睡者一人方涉者一人【或无方字】坐而脱足者一人【坐上或有方涉二字】寒附火者一人杂执器物役者八人奉壶矢者一人舍而具食者十有一人【具或作且十上或有二字】挹且注者四人牛牵者二人【二或作三】驴驱者四人一

人杖而负者【负下或无者字 今按一人字疑在负者之下】妇人以孺子载而可见者六人【妇人或作妇女而无以字】载而上下者三人孺子戏者九人凡人之事三十有二为人大小者百二十有三而莫有同者焉【事下或有主字为或作焉属上句非是】马大者九匹於马之中又有上者下者【又有上者下者杭本作亦有马之下者焉蜀本同但又作亦阁本作亦有马焉 今按此句三本皆无理唯别本作又有上者下者而无焉字乃与上下文意相属今从之】行者牵者【牵或作奔或并无四字】

今按牵谓牵而行也後有走者则奔者为重复当存牵而去奔】涉者陆者【或无陆者二字 今按此承涉者则陆为方出水也不当无】翹者顾者鸣者寝者讹者立者人立者【或无人立者三字非是】齧者【齧音纈又下没切】饮者溲者陟者降者痒磨树者嘘者嗅者喜相戏者【喜下或有而字】怒相踹啮者【啮音臬】秣者骑者骤者走者载服物者载狐兔者凡马之事二十有七为马大小八十有三而莫有同者焉【为或作焉属上句非是】牛大小十一头【十下或有有字】橐驼三头【橐或作骆下同汉书子虚赋注橐驼者言其可负橐而驼物故以名】驴如橐驼之数而加其一焉隼一犬羊兔麋鹿共三十旃车三两杂兵器弓矢旌旗刀劒矛楯弓服矢房甲冑之属【楯音盾】餅盂簋笠筐筥錡釜饮食服用之器壶矢博奕之具二百五十有一皆曲极其妙【阁杭本用下有投壶二字而无器字非是】贞元甲戌年余在京师甚无事同居有独孤生申叔者【或无有字】始得此画而与余弹碁【沈存中云弹碁有谱一卷其局方二尺中心高如覆孟其颠为小壶四角微隐起李商隐诗玉作弹碁局中心亦不平谓其中高也白乐天诗弹碁局上事最妙是长斜谓抹角斜弹一发过半局 今谱中有此法】余幸胜而获焉意甚惜之以为非一工人之所能运思盖聚集衆工人之所长耳虽百金不愿易也【工下或皆无人字藜或作丛】明年出京师至河阳与二三客论画品格因出而观之座有赵侍御者君子人也见之戚然若有感然【感上或有所字或无若有感然四字】少而进曰噫余之手模也【摸上或有所字或作手之所摹也】亡之且二十年矣余少时常有志乎兹事得国本【国一作故】絶人事而模得之游闽中而丧焉居闲处独时往来余怀也以其始为之劳而夙好之笃也【来上或有日字为上方无始字今以下文夙好之语推之当有】今虽遇之力不能为已且命工人存其大都焉余既甚爱之又感赵君之事因以赠之而记其人物之形状与数而时观之以自释焉

蓝田县丞厅壁记【崔立之贞元四年进士公尝寄其诗曰连年收科第如摘颌下髭记谓再进再屈于人屈当作出字乃与诗意合】

丞之职所以贰令於一邑无所不当问其下主簿尉主簿尉乃有分职丞位高而偪例以嫌不可否事文书行吏抱成案诣丞卷其前钳以左手右手摘纸尾鴈鹜行以进平立睨丞曰当署【鴈或作鳬曰下或有丞字】丞涉笔占位署惟谨【涉或作濡】目吏问可不可吏曰得则退不敢略省漫不知何事官虽尊力势反出主簿尉下谚数慢必曰丞至以相訾警丞之设岂端使然哉【谚或作劾或作该方从文苑云谓谚语之所举计者以丞为慢之最且至以相訾警也数所矩切訾将此切警牛刀切】博陵崔斯立种学绩文以蓄其有泓涵演迤日大以肆【涵或作澄大以或作以大】贞元初挟其能战艺於京师再进再屈口人【杭本无再进二字文苑无下再字而屈下一字皆作千字又多作于字方云斯立贞元四年进士六年中博学宏词再进而屈千人也今按杭苑作千字方从之为误盖唐人试宏词者甚少如贞元九年仅

三十二人而已作千人恐非是或疑千当作其如云屈其坐人也然无所据姑放穆天子传阙其处以俟知者】元和初以前大理评事言得失黜官再转而为丞兹邑始至喟曰官无卑顾材不足塞职既噤不得施用又喟曰丞哉丞哉余不负丞而丞负余则尽枿去牙角【枿音蘖】一蹶故迹破崖岸而为之【喟下或皆有然字负余上方有喜字云喜音许吏切黄霸传少学律令喜为吏岸下方无而字为之方作为文而读连下句曰为文丞言犹文具也今按文丞不成文理方说之僻类如此】丞厅故有记坏漏污不可读【按丞字或疑为衍文】斯立易桷与瓦墁冶壁悉书前任人名氏庭有老槐四行南墙钜竹千挺俨立若相持【挺从木说文挺一枚也】水??循除鸣斯立痛扫溉对树二松日哦其间【日下或有吟字】有问者辄对曰余方有公事子姑去考功郎中知制诰韩愈记

新修滕王阁记【滕王阁在洪州公自袁州作此记凡五百五字首尾叙其不一到为叹而终之曰其江山之好登望之乐虽老矣如获从公游尚能为公赋盖叙事之外所以寄吾不尽之意欧阳永叔为襄守史中辉记岷山亭尹师鲁为襄守燕公记岷山亭苏子美为处守李然明记照水堂苏子瞻为眉守黎希声记远景?四者其辞虽异而大意畧同岂作之之法当如是耶抑亦祖公此意而为之也】

愈少时则闻江南多临观之美【则或作尝临观或作登临】而滕王阁独为第一【滕王名元婴高祖之子永徽中为洪州都督作此阁】有瑰伟絶特之称【特阁本作时非是】及得三王所为序赋记等【注或云王勃作游阁序王绪作赋今巾丞王公为从事日作修阁记或并无】壮其文辞益欲往一观而读之以忘吾忧系官於朝愿莫之遂十四年以言事斥守揭阳【或无事字揭或作潮】便道取疾以至海上又不得过南昌而观所谓滕王阁者其冬以天子进大号加恩区内移刺袁州袁於南昌为属邑【於上或无袁字】私喜幸自语以为当得躬诣大府受约束於下执事及其无事且还傥得一至其处窃寄目偿所愿焉【诸本皆同方独从文苑无及其无事且还傥得一至其处十二字而偿作赏下又增适字今按叙事当如诸本乃有曲折而其先公後私不以游览杂乎受命之重尤得事大府之体与聘礼既受饗餼然後请观乃从下门而入意亦相似如方所定则皆失之而窃寄目赏语意生澁适所愿亦不若偿字之稳也】至州之七月诏以中书舍人太原王公为御史中丞观察江南西道【太原王公即仲舒也旧史元和十五年六月戊寅以中书舍人王仲舒为洪州刺史御史中丞充江西观察使】洪江饶?吉信抚袁悉属治所八州之人前所不便及所愿欲而不得者公至之日皆罢行之【行上文苑有而字非是】大者驿闻小者立变春生秋杀【尘方从文苑作施今按下字对偶文苑亦非是】阳开陰闭令修於庭户数日之间【日或作月】而人自得於湖山千里之外吾虽欲出意见论利害听命於幕下而吾州乃无一事可假而行者又安得舍已所事以勤馆人则滕王阁又无因而至焉矣【或无矣字】其岁九月人吏浹和【浹音接】公与监军使燕於此阁文武宾士皆与在席【与去声】酒半合辞言曰此屋不修且壤前公为从事此邦适理新之公所为文实书在壁【理或作治所上或无公字】今三十年而公来为邦伯适及期月公又来燕于此公乌得无情哉【乌或作胡杭苑作乎今按作乎语意轻脱不类公文亦非寮属所得施於其长者盖本作乌自乌而胡又自胡而讹耳大抵此篇文苑多误】公应曰诺於是栋楹梁桷板槛之腐黑挠折者盖瓦级甃之破缺者赤白之漫漶不鲜者治之则已【前汉为其泰漫漶而不可知注漫漶不分别貌】

漫莫干切漈胡馆反又乎贯反破或作故鲜或作圭说见祭湘君夫人文 今按瓦甑坚物破缺乃不可用而故则无甚害也且修屋而尽易其故则是是作而非修之谓矣作故非是】无侈前人无废後观工既讫功公以衆饮而以书命愈曰子其为我记之【而下或有赏焉字子下或无其字】愈既以未得造观为叹窃喜载名其上词列三王之次有荣耀焉乃不辞而承公命其江山之好登望之乐虽老矣如获从公游尚能为公赋之元和十五年十月某日袁州刺史韩愈记【某或作五】

科斗书後记【元和十一年六月四日作】

愈叔父【名云卿仕终礼部侍郎】当大历世文辞独行中朝天下之欲铭述其先人功行取信来世者咸归韩氏【上元辛丑特进试鸿胪卿兼御史中丞田神功平刘展于淮西云卿为平淮碑又为丞相赠太子太师崔圆庙碑铭二碑并载姚铉文粹李太白武昌宰韩君去思碑云云卿文章冠世皇甫持正公神道碑云先叔父云卿当肃代朝独为文章官李习之志其妻母墓曰礼部君好立义节有大功於昭陵其文章出于时而官不甚高习之妻云卿孙女也观此则公所云盖可见矣】於时李监阳水独能篆书而同姓叔父择木善八分【择木代宗时官礼部尚书杜子美李潮八分歌云尚书韩择木骑曹蔡有邻开元以来数八分同姓阁蜀本如此或只作配善或作盖或作盖能非是 今按礼云五世袒免杀同姓也公於择木已无服矣故以同姓言之】不问可知其人不如是者不称三服故三家传子弟往来贞元中愈事董丞相幕府於汴州【董丞相晋贞元中镇汴州】识开封令服之者阳水子【服之或作复之】授余以其家科斗孝经汉卫宏官书【官书新唐志作字书考之杜林传及陈蕃传注非也卫宏字子敬光武时为议郎】两部合一卷愈宝蓄之而不暇学後来京师为四门博士识归公【归登字冲之】归公好古书能通之愈曰古书得其据依盖可讲【或无其字据依或作依据左氏无所据依】因进其所有书属归氏元和来愈亟不获让嗣为铭文荐道功德思凡为文辞宜略识字【或无道字识下或有古字】因从归公乞观二部书得之留月余张籍令进士贺拔恕写以留愈【或无愈字】盖得其十四五而归其书归氏十一年六月四日右庶子韩愈记

东雅堂昌黎集注卷十三

卷十四

钦定四库全书

东雅堂昌黎集注卷十四

杂着 书

郢州谿堂诗【并序 郢音运秦为薛郡汉为东平国春秋齐人来归郢此篇多从石本退之文有石本者郢州谿堂诗孟州济源送李愿序京兆万年薛公达铭司马村柳子厚铭县北刘村路应碑州廨田氏先庙碑郑州荥阳索河上郑儋碑衢州徐偃王碑华州蒲城胡珣碑西京北邙权德舆碑广州南海神庙碑柳州罗池碑潭州湘阴黄陵碑徐州节度掌书记厅石记其闲异同皆以石本为正长安薛氏有皇甫湜手帖云郢塘特高古风敢树降旗而作者之下何人能及矣崔侍御前日称叹终席满座不觉继烛我唐有国退之文宗一人不任钦慰之极湜上侍郎宗伯郢塘正谓此郢州谿堂也公时为兵部侍郎曰宗伯者文章宗伯也】

宪宗之十四年始定东平三分其地【元和十四年二月平卢都知兵马使刘悟杀其节度使李师道以降青淄十二州皆平命户部侍郎杨於陵为淄青宣慰使分其地为三道以郢曹濮为一道淄青齐登莱为一道兗海沂密为一道东平郡即平卢军所治】以华州刺史礼部尚书兼御史大夫扶风马公【下或有总字】为郢曹濮节度观察等使镇其地【三月以薛平为平卢节度使青齐登莱等州观察使以王遂为沂州刺史沂海兗密等州都团练观察使三分其地者谓摠及此二人也 濮音卜】既一年褒其军号曰天平军【旧史穆宗纪云十五年六月郢曹濮等州节度赐号天平军从马总奏也】上即位之二年召公入直将用之【长庆元年三月卢龙军节度使刘总上幽镇地诏总徙天平而召总还将大用】以其人之安公也复归之镇【安下或有於字此句或作以彼之人安於公也】上之三年【穆宗以元和十五年正月即位其曰上即位之二年则长庆元年上之三年则长庆二年也】公为政於郢曹濮也适四年矣治成制定衆志大固恶絶於心仁形於色竭心一力以供国家之职【竭心一力或作竭心力竭或作竭一或作勦竭旨兗切专也国语竭本肇末】于时沂密始分而残其帅【元和十四年沂海将王弁杀其观察使王遂自称留後】其後幽镇魏不悦於政相扇继变【於或作于幽谓长庆元年幽州卢龙军都知兵马使朱克融囚其节度使张弘靖以反镇谓其月成德军大将王廷凑杀其节度使田弘正以反魏谓二年魏博节度使田布自杀兵马使史宪诚自称留後】复归於旧徐亦乘势逐帅自置【谓二年武宁军节度副使王智兴逐其节度使崔羣也置或作署或置上有署字】同於三方惟郢也截然中居四邻望之【阁杭蜀及诸本皆有四邻望之一句方从石本删去 今按文势及当时事实皆当有此句若其无之则下文所谓恃以无恐者为谁恃之邪大凡为人作文而身或在远无由亲视摹刻既有脱误又以毁之重劳遂不能改若此者盖亲见之亦非独古为然也方氏最信阁杭蜀本虽有谬误往往曲从今此三本幸皆不误而反为石本脱句所夺甚可笑也】若防之制水恃以无恐然而

皆曰郢为虜巢且六十年【永泰元年七月以平卢兵马使李正己为本军节度使传子纳子师道至元和十四年败凡五十五年】将强卒武曹濮於郢州大而近【曹濮於郢自为一句或作於曹濮州非是】军所根柢皆骄以易怨而公承死亡之後掇拾之余剥肤椎髓公私扫地赤立新旧不相保持万目睽睽【持或作恃】公於此时能安以治之其功为大若幽镇魏徐之乱不扇而变此功反小何也公之始至衆未孰化以武则忿以憾【或无以憾二字或作而憾】以恩则横而肆一以为赤子一以为龙蛇惫心罢精【惫音韡罢蒲糜切】磨以岁月然後致之难也及教之行衆皆戴公为亲父母夫叛父母从仇讎非人之情故曰易【下或有也字】於是天子以公为尚书右仆射封扶风县开国伯以褒嘉之【或无公及封字县或作郡】公亦乐衆之和知人之悦而侈上之赐也於是堂於其居之西北隅号曰谿堂以飨士大夫通上下之志既飨其从事陈曾谓其衆言公之畜此邦其勤不亦至乎此邦之人累公之化【累平声一本作繫】惟所令之不亦顺乎上勤下顺遂济登兹不亦休乎昔者人谓斯何今者人谓斯何虽然斯堂之作意其有谓而暗无诗歌是不考引公德而接邦人於道也【德下或无而字】乃使来请其诗曰帝奠九壘【九壘九州也壘与?同】有叶有年有荒不条【不或作有】河岱之间及我宪考一收正之【收或作牧】视邦选侯以公来尸公来尸之人始未信公不饮食以训以徇孰饥无食孰呻孰叹孰冤不问不得分愿孰为邦蠹【或作蟬音义同】节根之螟羊狼狼贪以口覆城吹之煦之【煦音诩】摩手拊之箴之石之【箴或作针】膊而磔之【膊音粕磔陟格切】凡公四封既富以强谓公吾父孰违公令可以师征【师石本作帅今按平淮西碑云屡兴师征作师为是石本或误未可知也】不宁守邦公作谿堂播播流水浅有蒲莲深有蒹葭公以宾燕其鼓駭駭【此诗十一章以令叶强以駭叶水皆古音也令有平声一读公独孤郁墓志亦见淮南子勿惊勿駭万物将自理勿挠勿撓万物将自清駭古音自与理叶也周官注疾雷击鼓曰駭西京赋所谓駭雷鼓是也今按古音之说甚善吴才老补音补韵二书其说甚详駭水叶韵如管子宫如牛鸣盎中徽如负豕觉而駭亦一证也沙随程可久曰吴说虽多其例不过四声互用切响通用二条而已此说得之如通其说则古书虽不尽见今可以例推也】公燕谿堂宾校醉饱流有跳鱼岸有集鸟既歌以舞其鼓考考公在谿堂公御琴瑟公暨宾赞稽经诹律【诹音媿】施用不差【施音试】人用不屈谿有蕢苽【蕢毗宾切萍也根浮水而生者苽与菰同音孤】有龟有鱼公在中流右诗左书无我戮遗【戮音亦】此邦是麻

猫相乳【蜀本乳下有说字司徒北平王马燧也燧字洵美是说先儒或以为几乎谄然反复终篇则言北平王之德感应召致不为谄矣】

司徒北平王家猫有生子同日者其一死焉【或作其一母死或作其母一死】有二子饮於死母母且死其鸣咿咿【音伊】其一方乳其子若闻之起而若听之走而若救之【走下或无而字】衔其一置于其栖又往如之反而乳之若其子然噫亦异之大者也【或无也字】夫猫人畜也非性於仁义者也【阁杭无仁字非是】其感於所畜者乎哉北平王牧人以康伐罪以平【伐或作罚非是】理陰阳以得其宜国事既毕家道乃行父父子子兄兄弟弟雍雍如也愉愉如也视外犹视中一家犹一人夫如是其所感应召致其亦可知矣易曰信及豚鱼非此类也夫【非此或作亦其非是】愈时获幸於北平王客有问王之德者愈以是对客曰夫禄位贵富人之所大欲也得之之难未若持之之难也得之於功或失於德得之於身或

失於子孙【二失字下或并有之字】今夫功德如是祥祉如是其善持之也可知己既已【或无此二字】因叙之为猫相乳说云【下或有尔字非是】

进士策问十三首【非一岁所作编者集之耳】

问书称汝则有大疑谋及乃心谋及卿士以至于庶人龟筮考其从违以审吉凶【蜀本作凶吉今按经传凡言吉凶者多先吉而後凶惟协韵谐声则或倒用而近世好奇之士不问可否一例倒用则失之矣此类当徐读而从其声之谐者不能悉论也】则是圣人之举事兴为无不与人共之者也於易则又曰君不密则失臣臣不密则失身凡事不密则害成而春秋亦有讥漏言之词【春秋文公六年晋杀其大夫阳处父公羊传其称国以杀何君漏言也何休注此引易凡事不密为证】如是则又似不与人共之而独运者【下或有也字】书与易春秋经也圣人於是乎尽其心焉耳矣今其文相戾悖如此欲人之无疑不可得已是二说者其信有是非乎抑所指各殊而学者不之能察也【老苏曰圣人之道有经有权有机曰经者天下之民举知之可也曰权者民不得而知之矣羣臣知之可也曰机者虽羣臣亦不得而知之矣腹心之臣知之可也此书与易春秋所指各殊也】谅非深考古训读圣人之书者其何能辨之【或作此】此固吾子之所宜无让者愿承教焉【让下或无者字者下或有也字】

问古之人有云夏之政尚忠殷之政尚敬而周之政尚文是三者相循环终始【高祖纪曰夏之政忠忠之敝小人以野故商人承之以质质之敝小人以鬼故周人承之以文三王之道若循环终而复始】若五行之与四时焉原其所以为心皆非故立殊而求异也各适於时救其敝而已矣夏殷之书存者可见矣【夏殷下或无之字非是】至周之典籍咸在考其文章其所尚若不相远然焉所谓三者之异云乎【远下或无然字焉或作乌今按当有然字而焉字属下句但其下疑当有一有字作乌亦通其下疑或有一睹字】抑其道深微不可究欤将其词隐而难知也不然则是说为谬矣周之後秦汉蜀吴魏晋之兴与霸亦有尚乎无也【或无兴与字】观其所为其亦有意云尔循环之说安在吾子其无所隐焉

问夫子之序帝王之书而系以秦鲁及次列国之风而宋鲁独称颂焉【孔安国曰诸侯之事而连帝王孔子序书以鲁有治戎征讨之备秦有悔过自誓之戒足以後世法故録之以备王事犹诗録商鲁之颂而郑康成以为鲁得用天子之礼乐故有颂而商颂至孔子之时存者五篇而夏颂已亡故録鲁以备三颂着为後王之法此夫子取予之意也】秦穆之德不踰於二霸【穆或作鲁非是】宋鲁之君不贤乎齐晋其位等其德同升黜取舍如是之相远亦将有由乎愿闻所以辨之之说

问夫子既没圣人之道不明盖有杨墨者【杨朱字子居後与墨子与禽滑厘辩论其说在爱己不拔一毛以利天下与墨子相反墨子名翟为宋大夫在孔子後有书七十一篇】始侵而乱之其时天下咸化而从焉【或无其时字】孟子辞而辟之则既廓如也【或无则字】今其书尚有存者其道可推而知不可乎【或无知字非是】其所守者何事其不合於道者几何孟子之所以辞而辟之者何说【之者或作之也】今之学者有学於彼者乎有近於彼者乎其已无传乎其无乃化而不自知乎其无传也则善矣如其尚在将何以救之乎【尚在方

从阁杭苑作在尚无将字 今按若从方本则尚何以救之乎乃是恐不及救之意与此上下文不相入其说非是】诸生学圣人之道必有能言是者其无所为让问所贵乎道者不以其便於人而得於已乎当周之衰管夷吾以其君霸九合诸侯【孔子曰桓公九合诸侯九合者谓兵车之会三乘车之会六】一匡天下戎狄以微京师以尊四海之内无不受其赐者天下诸侯奔走其政令之不暇而谁与为敌此岂非便於人而得於已乎【人下或无而字已作身】秦用商君之法人以富国以强诸侯不敢抗及七君而天下为秦使天下为秦者商君也而後代之称道者咸羞言管商氏何哉庸非求其名而不责其实欤【名下或无而字其实或作於实】愿与诸生论之无惑於旧说【旧或作记非是句下或有焉字】

问夫子之言盍各言尔志【盍上或有曰字】又曰居则曰不吾知也如或知尔则何以哉今之举者不本於乡不序於庠一朝而羣至乎有司有司之不之知也宜矣【不之或无之字】今将自州县始请各诵所怀聊以观诸生之志死者可作其谁与归【此下或有又曰居是邦也六字】事其大夫之贤者友其士之仁者敢问诸生之所事而友者为谁乎【而或作所为或作其】所谓贤而仁者其事如何哉言及之而不言亦君子之所不为也【或无之所二字】

问春秋之时百有余国皆有大夫士详於传者无国无贤人焉其余皆足以充其位不闻有无其人而阙其官者【闻下或无有字】春秋之後其书尤详以至於吴蜀魏下及晋氏之乱国分如镗铄读其书亦皆有人焉【魏字或在晋下谓元魏尔盖不然也三国之魏岂应略而不言乎】今天下九州四海其为土地大矣国家之举士内有明经进士外有方维大臣之荐其余以门地勲力进者又有倍於是其为门户多矣【有倍或作加倍】而自御史台尚书省以至于中书门下省咸不足其官岂今之人不及於古之人邪何求而不得也夫子之言曰十室之邑必有忠信如丘者焉诚得忠信如圣人者而委之以大臣宰相之事有不可乎【委之以或作以委之非是】况於百执事之微者哉古之十室必有任宰相大臣者今之天下而不足士大夫於朝其亦有说乎

问夫子曰洁净精微易教也今习其书不识四者之所谓盍举其义而陈其数焉

问易之说曰【易上或有周字说下或有者字】乾健也今考乾之爻在初者曰潜龙勿用在三者曰夕惕若厉无咎在四者亦曰无咎在上曰有悔卦六位一勿用二苟得无咎有一悔安在其为健乎【二或作一非是】又曰乾以易知坤以简能乾之四位既不为易矣坤之爻又曰龙战于野【此下或有其血玄黄四字】战之於事其足为简乎易六经也学者之所宜用心愿施其词陈其义焉【或无所字非是】

问人之仰而生者谷帛谷帛丰无饥寒之患【者下或有在字丰上或有既字】然後可以行之於仁义之途措之於安平之地此愚智所同识也今天下谷愈多而帛愈贱人愈困者何也【愈贱或作益贱而字疑当在贱字下但此正与张中丞传後城坏而其徒皆死云云者相类恐公自有此一种句法也】耕者不多而谷有余蚕者不多而帛有余有余宜足而反不足此其故又何也将以救之其说如何问夫子言尧舜垂衣裳而天下理又曰无为而理者其舜也

欽書之說堯曰親九族又曰平章百姓又曰協和萬邦又曰歷象日月星辰敬授人時又曰洪水懷山襄陵下人其咨【人或作民此試進士當避諱作民字非是】夫親九族平百姓和萬邦則天道授人時愁水禍非無事也而其言曰垂衣裳而天下理者何也於舜則曰慎五典又曰叙百揆又曰賓四門又曰齊七政又曰類上帝禋六宗望山川徧羣神又曰協時月正日同律度量衡五載一巡狩又曰分十二州封山濬川【封諸本作隨非是】恤五刑典三禮彰施五色出納五言嗚呼其何勤且煩如是而其言曰無為而理者何也將亦有深辭隱義不可曉邪抑其年代已遠失其傳邪【抑其下或有所字非是已遠或作遠矣或無已字】二三子其辨焉問古之學者必有師所以通其業成就其道德者也【德下或無者字】由漢氏已來【氏或作代或無已字】師道日微然猶時有授經傳業者及于今則無聞矣德行若顏回言語若子貢政事若子路文學若子游猶且有師非獨如此雖孔子亦有師【或無雖字】問禮於老聃問樂於苾弘是也今之人不及孔子顏回遠矣而且無師【無下或有所字】然其不聞有業不通而道德不成者何也【或無而字】

問食粟衣帛服仁行義以俟死者二帝三王之所守聖人未之有改焉者也今之說者有神仙不死之道不食粟不衣帛薄仁義以為不足為是誠何道邪聖人之於人猶父母之於子【二於字或皆作于】有其道而不以教之不仁其道虽有而未之知不智仁與智且不能又烏足為聖人乎【烏或作焉】不然則說神仙者妄矣

爭臣論【陽城拜諫議大夫聞得失熟猶未肯言公作此論訛切之城亦不屑意及裴延齡逐陸贄等城乃守延英閣上疏極論延齡罪慷慨引諍申直等帝欲相延齡城顯語曰延齡為相吾當取白麻坏之哭於庭帝不相延齡城之力也公作此論時城居位五年矣後三年而能排击延齡或謂城盖有待抑公有以激之欽爭或作諫歐公與范司諫書溫公通監皆作爭】

或問諫議大夫陽城於愈【城字亢宗定州北平人】可以為有道之士乎哉學廣而聞多【城好學貧不能得書乃求為集賢寫書吏竊官書讀之晝夜不出六年乃無所不通】不求聞於人也行古人之道居於晉之鄙晉之鄙人薰其德而善良者幾千人【城及進士第乃去隱中條山遠近慕其德行多從之學】大臣聞而荐之天子以為諫議大夫【子下或無以字城徙居陝州夏縣李泌為陝虢觀察使聞城名泌入相荐為著作郎後德宗令長安尉楊寧賁束帛召為諫議大夫】人皆以為華陽子不色喜【或無人字及色字皆非是】居於位五年矣視其德如在野彼豈以富貴移易其心哉【在下或有草字移易或作易移初城未至京人皆想望風采曰陽城山人今為諫官必能以死奉職而城與二弟日夜痛飲人莫能窺其際皆以虛名訛之】愈應之曰是易所謂其德貞而夫子凶者也惡得為有道之士乎哉在易蛊之上九云不事王侯高尚其事蹇之六二則曰王臣蹇蹇匪躬之故夫不以所居之時不一而所蹈之德不同也【之時之德或並無之字】若蛊之上九居無用之地而致匪躬之節以蹇之六二在王臣之位而高不事之心則冒進之患生曠官之刺興志不可則而尤不終無也【蹇上或無以字事下或有上字尤下或有之字終或作絕或作如皆非是】今陽子在位不為不久矣【今陽子下或有實一匹夫四字或作實一介之夫下再出陽子二字或作實匹夫陽子亦再見】聞天下之得失不為不熟矣天子待之不為不加矣而未嘗一言及於政【或無於字】視政之得失若越人視秦人之肥瘠忽焉不加喜戚於其心問其官則曰諫議也問其祿則

曰下大夫之秩也【夫下或无之字】问其政则曰我不知也有道之士固如是乎哉且吾闻之有官守者不得其职则去有言责者不得其言则去今阳子以为得其言言乎哉【乎上或无复出言字按此语正谓阳子若自谓得其言则何不言乎哉或无非是】得其言而不言与不得其言而不去无一可者也阳子将为禄仕乎古之人有云仕不为贫而有时乎为贫谓禄仕者也宜乎辞尊而居卑辞富而居贫若抱关击柝者可也盖孔子尝为委吏矣尝为乘田矣亦不敢旷其职必曰会计当而已矣必曰牛羊遂而已矣若阳子之秩禄【或作禄秩】不为卑且贫章章明矣而如此其可乎哉或曰否非若此也夫阳子恶讪上者恶为人臣招其君之过而以为名者【旧本招下注音翹二字武子好尽言以招人过见国语汉书五行志苏林读招为翹招举也宋元宪曰考他书未获为翹之意作音者当有所据今按吕氏春秋孔子之劲能招国门之关注招举也又过秦论招八州而朝同列苏林亦音翹】故虽谏且议使人不得而知焉书曰尔有嘉谏嘉猷则入告尔后于内尔乃顺之于外曰斯谏斯猷惟我后之德夫阳子之用心亦若此者愈应之曰若阳子之用心如此滋所谓惑者矣【滋或作兹非是】入则谏其君出不使人知者大臣宰相者之事非阳子之所宜行也夫阳子本以布衣隐於蓬蒿之下【或无本以字】主上嘉其行谊擢在此位官以谏为名诚宜有以奉其职使四方後代知朝廷有直言骨鯁之臣天子有不僭赏从谏如流之美庶岩穴之士闻而慕之束带结髮愿进於阙下而伸其辞说致吾君於尧舜熙鸿号於无穷也若书所谓则大臣宰相之事非阳子之所宜行也且阳子之心将使君人者恶闻其过乎是啓之也【是啓或作其啓非是】或曰阳子之不求闻而人闻之不求用而君用之不得已而起守其道而不变何子过之深也愈曰自古圣人贤士皆非有求於闻用也【有下或有心字】闵其时之不平人之不义得其道不敢独善其身而必以兼济天下也【必或作不】孜孜矻矻【音窟】死而後已故禹过家门不入【门下或有而字】孔席不暇暖而墨突不得黔彼二圣一贤者岂不知自安佚之为乐哉诚畏天命而悲人穷也夫天授人以贤圣才能岂使自有余而已诚欲以补其不足者也【补上方本有自字者下无也字云自者指言天之所授也义为长今按韩公之意乃言天生圣贤非但使之自有余也乃欲以补衆人之不足耳故下文云云方说非是】耳目之於身也耳司闻而目司见听其是非视其险易然後身得安焉圣贤者时人之耳目也【目下或无也字】时人者圣贤之身也且阳子之不贤则将役於贤以奉其上矣【则将或作且将於贤或作於身皆非是】若果贤则固畏天命而闵人穷也恶得以自暇逸乎哉或曰吾闻君子不欲加诸人【或无欲字】而恶讪以为直者若吾子之论直则直矣无乃伤于德而费於辞乎好尽言以招人过国武子之所以见杀於齐也【国语柯陵之会单襄公见国武子其言尽襄公曰立於淫乱之闲而好尽言以招人过怨之本也鲁成公十八年齐人杀武子招音翹】吾子其亦闻乎愈曰君子居其位则思死其官未得位则思修其辞以明其道我将以明道也非以为直而加人也且国武子不能得善人而好尽言於乱国是以见杀【而好尽言於乱国方本作而言尽言尽言於乱国今按方本殊无文理】传曰惟善人能受尽言谓其闻而能改之也子告我曰阳子可以为有道之士也今虽不能及已阳子将不得为善人乎哉【或无哉字林少颖曰退之讥阳城固善矣及退之为史官不敢褒贬而柳子厚作书以责之子厚之责退之亦犹退之之责阳城也目见泰山不见眉睫其是之谓乎】

改葬服议

经曰改葬緦【见仪礼丧服篇】春秋谷梁传亦曰改葬之礼緦举下緦也【鲁庄公三年五月葬桓王谷梁传曰改葬也改葬之礼緦举下緦也緦谓远也】此皆谓子之於父母其他则皆无服何以识其必然经次五等之服小功之下然後着改葬之制更无轻重之差以此知惟记其最亲者其他无服则不记也若主人当服斩衰其余亲各服其服则经亦言之不当惟云緦也【云一作言】传称举下緦者緦犹远也下谓服之最轻者也以其远故其服轻也【最轻下或无者也字故下或无其字】江熙曰礼天子诸侯易服而葬以为交於神明者不可以纯凶况其緦者乎【或无其字】是故改葬之礼其服惟轻【自江熙以下皆庄公二年谷梁传注】以此而言则亦明矣卫司徒文子改葬其叔父问服於子思子思曰礼父母改葬緦既葬而除之不忍无服送至亲也【旧唐礼仪志云田再思议曰改葬之服郑玄服緦三月注云讫葬而除】非父母无服无服则吊服而加麻【自卫司徒文子已下皆孔丛子抗志篇之文吊而加麻无服字】此又其着者也文子又曰丧服既除然後乃葬则其服何服【葬下或有者字或有也字】子思曰三年之丧未葬服不变除何有焉【亦孔业子之文未下或有除字非是】然则改葬与未葬者有异矣古者诸侯五月而葬大夫三月而葬士逾月【隐元年左氏天子七月而葬同轨毕至诸侯五月同盟至大夫三月同位至士逾月外姻至】无故未有过时而不葬者也过时而不葬【或无下而字】谓之不能葬春秋讥之【春秋隐公三年八月癸未葬宋穆公公羊传曰过时而不日谓之不能葬之也】若有故而未葬虽出三年子之服不变此孝子之所以着其情先王之所以必其时之道也虽有其文未有着其人者以是知其至少也【或无是字】改葬者为山崩水涌毁其墓及葬而礼不备者若文王之葬王季以水啮其墓【吕氏春秋惠公说魏太子曰昔王季历葬于涡山之尾乐水啮其墓於是更葬】鲁隐公之葬惠公以有宋师太子少葬故有阙之类是也【隐元年左传十月改葬惠公惠公之薨也有宋师太子少葬故有阙是以改葬诸本无故字考之左氏当有】丧事有进而无退【礼檀弓文】有易以轻服无加以重服殡於堂则谓之殡瘞於野则谓之葬近代以来事与古异或游或仕在千里之外或子幼妻稚而不能自还【稚下或无而字】甚者拘以陰阳畏忌遂葬於其土及其反葬也远者或至数十年近者亦出三年其吉服而从於事也久矣又安可取未葬不变服之例而反为之重服欵在丧当葬犹宜易以轻服况既远而反纯凶以葬乎若果重服是所谓未可除而除不当重而更重也【而除下或有之字更下或无重字非是】或曰丧与其易也宁戚虽重服不亦可乎曰不然易之与戚则易固不如戚矣虽然未若合礼之为懿也俭之与奢则俭固愈於奢矣虽然未若合礼之为懿也过犹不及其此类之谓乎或曰经称改葬緦而不着其月数则似三月而後除也【似或作以非是】子思之对文子则曰既葬而除之今宜如何曰自啓至于既葬而三月则除之【啓下或有殡字至下或无既字今按礼有自啓至于反哭之语】未三月则服以终三月也曰妻为夫何如曰如子【或无曰如二字非是】无吊服而加麻则何如曰今之吊服犹古之吊服也省试学生代斋郎议【诸本此下有贞元十年应博学宏词九字】

斋郎职奉宗庙社稷之小事盖士之贱者也执豆笾骏奔走【书祀于周庙邦甸侯卫骏奔走执豆笾骏大也】以役于其官之长不以德进不以言扬盖取其人力以备其事而已矣奉宗庙社稷之小事执豆笾骏奔走亦不可以不敬也於是选大夫士之子弟未爵命者【子上或无之字】以塞员填阙而教之行事其勤虽小其使之不可以不报也必书其岁岁既久矣於是乎命之以官而授之以事其亦微矣哉学生或以通经举或以能文称其微者至於习法律

知字书皆有以贊於教化可以使令於上者也自非天姿茂异旷日经久以所进业发闻於乡闾【所进或作进所或作进以进或作道】称道于朋友荐於州府而升之司业则不可得而齿乎国学矣然则奉宗庙社稷之小事【或无然字稷下或无之字】任力之小者也贊於教化可以使令於上者德艺之大者也其亦不可移易明矣今议者谓学生之无所事谓斋郎之幸而进不本其意因谓可以代任其事而罢之盖亦不得其理矣【亦或作以】今夫斋郎之所事者力也学生之所事者德与艺也以德艺举之而以力役之是使君子而服小人之事且非国家崇儒劝学诱人为善之道也此一说不可者也抑又有大不可者焉宗庙社稷之事虽小不可以不专敬之至也古之道也今若以学生兼其事及其岁时日月然後授其宗彝蠹洗其周旋必不合度其进退必不得宜其思虑必不固其容貌必不庄此其无他其事不习而其志不专故也非近於不敬者欤【非上或有此字】又有大不可者其是之谓欤若知此不可【此或作其】将令学生恒掌其事而隳坏其本业则是学生之教加少【教或作数】学生之道益贬而斋郎之实犹在斋郎之名苟无也大凡制度之改政令之变利於其旧不什则不可为已又况不如其旧哉【什或作然此商君传所谓利不百不变法工不十不易器是也如下或有於字】考之於古则非训稽之於今则非利寻其名而求其实则失其宜【失或作去非是】故曰议罢斋郎而以学生荐享亦不得其理矣【文苑此篇前後有议曰谨议四字】

禘祫议【或作祫禘 今按篇内皆作禘祫礼三年一祫五年一禘祫者合也谓以昭穆合食於太祖之庙禘者谛也谓审谛其尊卑而祀之禘祫之议考之新史陈京传及礼乐志前後议者不一陈京始建议继有礼仪使顔真卿议左庶子李嶠等七人议吏部侍郎柳冕等十二人议司勳外郎裴枢同官县尉仲子陵京兆少府韦武等议左司陆淳议左仆射姚南仲等献议五十七封尚书王绍等五十五人议鸿胪卿王权又申衍之公所排五说即此诸人议也其闲惟顔鲁公议与公合後卒诏从王绍等议正景皇帝东向之位已下列序昭穆附献懿二主於兴圣庙禘祫就本室飨之凡二十年乃决】

右今月十六日勅旨【时贞元十八年】宜令百僚议限五日内闻奏者将仕郎守国子监四门博士臣韩愈谨献议曰伏以陛下追孝祖宗肃敬祀事【宗下方有庙字 今按此等公家文字或施於君上或布之吏民只用当时体或直述事意乃易晓而通行非如诗篇等於戏剧铭记期於久远可以时出奇怪而无所拘也故韩公之文虽曰高古然於此等处亦未尝敢故为新巧以失庄敬平易之体但其闻反覆曲折说尽事理便是真文章它人自不能及耳方本非是後皆仿此】凡在拟议不敢自专【在或作有拟或作疑】聿求厥中延访羣下然而礼文繁漫所执各殊自建中之初迄至今岁屡经禘祫未合适从臣生遭圣明涵泳恩泽虽贱不及议而志切効忠【切或作在 今按官不及议而自言则作切为是】今辄先举衆议之非然後申明其说一曰献懿庙主【庙或作之】宜永藏之夹室【见贞元七年八年裴郁李嶠等议】臣以为不可夫祫者合也毁庙之主皆当合食於太祖献懿二祖即毁庙主也今虽藏於夹室至禘祫之时岂得不食於太庙乎名曰合祭而二祖不得祭焉【祭焉或作登焉详上下文作登非是】不可谓之合矣二曰献懿庙主宜毁之瘞之【见李嶠等议诸本毁下或无之字或毁之下再有宜字 今按上之字疑当作而】臣又以为不可谨按礼记天子立七庙一坛一墠【礼记注土封为壇除地为墠 墠时战切】其毁庙之主皆藏於祧庙【礼记远庙为祧注云迁庙之主皆以昭穆合藏於祧庙之中】虽百代不毁祫则陈於太庙而飨焉自魏晋以降

始有毀瘞之议事非经据竟不可施行今国家德厚流光创立九庙【开元十年六月增太庙为九室】以周制推之献懿二祖犹在坛墠之位况於毀瘞而不禘祫乎三曰献懿庙主宜各迁於其陵所【员外郎裴枢曰建石室于寝园以藏神主至禘祫之世则祭之】臣又以为不可二祖之祭於京师列於太庙也二百年矣今一朝迁之岂惟人听疑惑抑恐二祖之灵眷顾依迟不即飨於下国也【迟诸本作违今从阁杭蜀苑云新史与文粹作依违以意改也甘泉赋徕祗郊禋神所依兮徘徊招摇灵犀迟兮犀音栖迟与迟同皆徐行也顔曰言神久留安处不即去也】四曰献懿庙主宜附於兴圣庙而不禘祫【考功员外郎陈京同官县尉仲子陵皆曰迁神主於德明兴圣庙】臣又以为不可传曰祭如在景皇帝虽太祖其於属乃献懿之子孙也【虽下或有为字其於或作於其之下一无子字】今欲正其子东向之位废其父之大祭固不可为典矣【父之或作父子父下或并有子之字皆非是】五曰献懿二祖宜别立庙於京师【吏部郎中柳冕等十二人又曰献懿二祖犹周先公也请筑别庙以居之】臣又以为不可夫礼有所降情有所杀是故去庙为祧去祧为墠去坛为墠去墠为鬼渐而之远其祭益稀【方本无去坛去墠四字之远作远之今按四字祭法本文之犹适也言渐而适远也方本皆误】昔者鲁立炀宫春秋非之【春秋公羊传定公九年九月立炀宫非礼也】以为不当取已毁之庙既藏之主而复筑宫以祭今之所议与此正同又虽违礼立庙至於禘祫也合食则禘无其所废祭则於义不通此五说者皆所不可【其所方作所主义或作经或作礼今按此言若作别庙则不当禘於太庙又不当禘於别庙故云禘无其所若以无可禘祫之所而遂直废其祭则於义又有不可通者故其说如此方本误也】故臣博采前闻求其折中以为殷祖玄王【玄王高也诗长发玄王桓拨是也】周祖后稷太祖之上皆自为帝又其代数已远不复祭之故太祖得正东向之位子孙从昭穆之列礼所称者盖以纪一时之宜非传於後代之法也【盖以或作盖曰或无於字】传曰子虽齐圣不先父食【春秋文公二年左氏语】盖言子为父屈也景皇帝虽太祖也其於献懿则子孙也当禘祫之时献祖宜居东向之位景皇帝宜从昭穆之列祖以孙尊孙以祖屈求之神道岂远人情【之神或作神之非是】又常祭甚衆【衆或作频新书陈京传亦作衆】合祭甚寡则是太祖所屈之祭至少所伸之祭至多比於伸孙之尊废祖之祭不亦顺乎【今按韩公本意献祖为始祖其主当居初室百世不迁懿祖之主则当迁於太庙之西夹室而太祖以下以次列於诸室四时之享则唯懿祖不与而献祖太祖以下各祭於其室室自为尊不相降厌所谓所伸之祭常多者也禘祫则唯献祖居东向之位而懿祖太祖以下皆序昭穆南北相向於前所谓祖以孙尊孙以祖屈而所屈之祭常少者也韩公礼学精深盖诸儒所不及故其所议独深得夫孝子慈孙报本反始不忘其所由生之本意真可为万世之通法不但可施於一时也程子以为不可漫观者其谓此类也欤但其文字简严读者或未遽晓故窃推之以尽其意云】事异殷周礼从而变非所失礼也【所字疑衍】臣伏以制礼作乐者天子之职也陛下以臣议有可采【议下或有为字】粗合天心断而行之是则为礼如以为犹或可疑乞召臣对面陈得失庶有发明谨议

省试顔子不贰过论【贞元十年应博学宏词科作】

论曰登孔氏之门者衆矣三千之徒四科之目【或作夫】孰非由圣人之道【由或作曰】为君子之儒者乎其於过行过言亦云鲜矣而夫子举不贰过惟顔氏之子其何故哉请试论之夫圣人抱诚明之正性根中庸之至德苟发诸中形诸外者不由思虑莫匪规矩不善之心

无自入焉可择之行无自加焉故惟圣人无过所谓过者【所上或有故字非是】非谓发於行彰於言人皆谓之过而後为过也生於其心则为过矣故顏子之过此类也不貳者盖能止之于始萌絕之於未形不貳之於言行也中庸曰自诚明谓之性自明诚谓之教自诚明者不勉而中不思而得从容中道圣人也无过者也自明诚者【或无自字】择善而固执之者也不勉则不中不思则不得不貳过者也故夫子之言曰回之为人也择乎中庸得一善则拳拳服膺而不失之矣又曰顏氏之子其殆庶几乎言犹未至也而孟子亦云顏子具圣人之体而微者皆谓不能无生于其心而亦不暴之於外【亦不或无亦字】考之於圣人之道差为过耳【伊川曰顏子所事则曰非礼勿视非礼勿听非礼勿言非礼勿动仲尼称之则曰得一善则拳拳服膺而弗失之又曰不迁怒不貳过有不善未尝不知知之未尝复行也此其好之笃学之之道也视听言动皆礼矣所异於圣人者盖圣人则不思而得不勉而中从容中道顏子则必思而後得必勉而後中故曰顏子之与圣人相去一息】顏子自惟其若是也於是居陋巷以致其诚饮一瓢以求其志【或无饮字】不以富贵妨其道不以隐约易其心确乎不拔浩然自守知高坚之可尚忘钻仰之为劳任重道远竟莫之致是以夫子叹其不幸短命今也则亡谓其不能与已并立於至圣之域观教化之大行也不然【或无不然字下或并无夫字】夫行发於身加於人言发乎迯见乎远苟不慎也败辱随之而後思欲不貳过其於圣人之道不亦远乎而夫子尚肯谓之其殆庶几孟子尚复谓之具体而微者哉则顏子之不貳过尽在是矣谨论【或无谨论二字】

与李秘书论小功不税书【秘书官称也或无书字而以秘为人名及论作问又税下无书字者皆非是税当作稅其字从衣博雅云过制追服谓之税输芮反亦音吐外反既作此书先儒刘敞原父尝辨其说而论之曰曾子曰小功不税则是远兄弟终无服也而可乎韩子尝吊於人见其貌戚其意哀而其服吉者问之曰可也曰小功不税也是以韩子疑之而作小功不税之书夫韩子之疑之是也彼人之为非也然而小功不税礼也韩子曰君子於其骨肉死则悲哀而为之服者岂牵於外哉闻其死则悲哀岂有间於新故死哉甚矣韩子之达於理而近之也虽然疑之未尽也求之不得也夫为服者至亲之恩以菴断其杀至于大功兄弟之恩以小功止其杀至于緦外亲之服以緦穷其杀至於袒免圣人之制礼岂苟言情哉亦着於文而已矣大功税小功不税其文至于是也兄弟之服不过小功外亲之服不过緦其情至于是也因其情而为之文亲疎之杀见矣故礼大功以上不谓之兄弟兄弟有加而大功无加者亲亲也有加者报之也亲亲者税下亲亲者不税是亦其情也且礼专为情乎亦为文乎如专为情也则至亲不可以菴断小功不可以不税如为文也则至亲之菴断小功之不税一也夫曾子韩子隆於情而不及文失礼之指而疑其说虽然韩子疑之是也彼人之为非也何以言之邪小功虽不税亦不吉服而已矣记曰闻远兄弟之丧既除丧而后闻之则免袒哭之成踊夫若是奚其吉哉故曰彼人之为非也韩子疑之是也小功不税礼也然则免袒成踊则已矣乎犹有加焉曰我未之闻也虽然降而无服者麻不税是亦降而无服已哀之以其麻哭之以其情逾月然後已其亦愈乎吉也】

曾子称小功不税则是远兄弟终无服也而可乎郑玄注云以情责情【文见礼记檀弓以情上诸本有是字郑注无此语只云以已恩怪之】今之士人遂引此不追服小功【不上或有而字】小功服最多【功服或作功之服】亲则叔父之下殇与适孙之下殇【适音的】与

昆弟之下殇【礼十六至十九为长殇十二至十五为中殇八岁至十一为下殇七岁以下为无服之殇生未三月不为殇】尊则外祖父母常服则从祖父母【或无常字】礼沿人情其不可不服也明矣古之人【或作时】行役不踰时各相与处一国【或无相字非是然各字亦疑误】其不追服虽不可犹至少今之人男出仕女出嫁或千里之外家贫讣告不及时则是不服小功者恒多而服小功者恒鲜矣君子之於骨肉死则悲哀而为之服者岂牵於外哉【岂下或有有字】闻其死则悲哀岂有间於新故死哉今特以讣告不及时闻死出其月数则不服其可乎愈常怪此近出吊人见其颜色戚戚类有丧者【戚戚或作戚容类下或有於字丧或作服】而其服则吉问之则云小功不税者也【税下或无者字】礼文残缺师道不传不识礼之所谓不税果不追服乎无乃别有所指而传注者失其宗乎伏惟兄道德纯明躬行古道如此之类必经於心而有所决定不惜示及幸甚幸甚泥水马弱不敢出不果鞠躬亲问而以书【唐子西云泥水马弱以下若无而以书三字则上重甚矣此为文之法也】悚息尤深【或作甚】愈再拜

太学生何蕃传【或无太学生字传作书云此文总於书类当从旧本
今按此当作传而入书类未详其说但其词则实传也况有诸本可从乎】

太学生何蕃入太学者廿余年矣【诸本作二十余年方从杭本作廿年余又云蜀本作二十而余字亦缀於年之下按说文廿音入二十并也卅先合切三十之省便古文也考之国语有云行玉廿者正作此字泰山秦碑亦云皇帝临立廿有六年则又以四字为句而以廿为一字尤明白矣故公文多用廿卅字唯孔左丞碑尚以四言故可考如南海碑薛助教碑石本亦皆然但世人多不之见耳今廿从方本余年从诸本】岁举进士学成行尊自太学诸生推颂不敢与蕃齿相与言於助教博士助教博士以状申於司业祭酒司业祭酒撰次蕃之羣行焯焯者数十事以之升於礼部而以闻於天子【之升或作升之闻下或无於字】京师诸生以荐蕃名文说者不可选纪【名下或有为字】公卿大夫知蕃者比肩立莫为礼部【立下或有叹字而无莫为礼部四字】为礼部者率蕃所不合者以是无成功蕃淮南人【子厚作阳城遗爱碣则云蕃庐江人】父母具全【具或作俱】初入太岁岁率一归父母止之其後间一二岁乃一归又止之不归者五岁矣蕃纯孝人也闵亲之老不自克一日揖诸生归养于和州诸生不能止乃闭蕃空舍中於是太学六馆之士百余人【国子太学四门律书算为六馆】又以蕃之义行言於司业阳先生城【贞元十一年七月城自谏议大夫罢为国子祭酒】请谕留蕃【或无谕字谕或作论】於是太学阙祭酒会阳先生出道州【贞元十五年九月以城为道州刺史】不果留欧阳詹生言曰蕃仁勇人也【詹生或作生詹方本阳下注詹字下同今按欧阳詹生如史称辕固生乐瑕公之类甚多不当作注】或者曰蕃居太学诸生不为非义葬死者之无归哀其孤而字焉【杭蜀本无葬字非是】惠之大小必以力复斯其所谓仁欤蕃之力不任其体其貌不任其心吾不知其勇也欧阳詹生曰朱泚之乱【建中四年十月泾原军乱推朱泚为主泚此礼反】太学诸生举将从之来请起蕃蕃正色叱之六馆之士不从乱兹非其勇欤惜乎蕃之居下其可以施於人者不流也譬之水其为泽不为川乎川者高泽者卑高者流卑者止是故蕃之仁义充诸心行诸太学积者多施者不遐也天将雨水气上【气上或有之字】无择於川泽涧谿之高下然则泽之道其亦有施乎抑有待於彼者欤故凡贫贱之士必有待然後能有所立独何蕃欤吾是以言之无亦使其无传焉【无下或

无亦字】

答张籍书【公与籍相识於汴观此书意谓薄晚须到公府即尚为佐於汴州时贞元十一年也新史曰籍性狷直尝责愈喜博塞及为駁杂之说论议好胜人其排佛老不能着书若扬雄孟轲以垂世即谓此书也籍遗公书云顷承论於执事尝以世俗陵靡不及古昔盖圣人之道废弛之所为也宣尼没後杨朱墨翟恢诡异说干惑人听孟轲作书而正之圣人之道复存于世秦氏灭学汉重以黄老之术教人使人澆惑扬雄作法言而辨之圣人之道犹明及汉衰末西域浮屠之法入于中国中国之人世世译而广之黄老之术相沿而炽天下之言善者惟二者而已矣昔者圣人以天下生生之道旷乃物其金木水火土谷药之用以厚之因人资善乃明乎仁义之德以教之俾人有常故治生相存而不殊今天下资於生者咸备圣人之器用至於人情则溺乎异学而不由乎圣人之道使君臣父子夫妇朋友之义沉于世而邦家继乱固仁人之所痛也自扬子云作法言至今近千载莫有言圣人之道者言之者唯执事焉耳习俗者闻之多怪而不信徒相为訾终无裨於教也执事聪明文章与孟轲扬雄相若盍为一书以兴存圣人之道使时之人後之人知其去絶异学之所为乎曷可俯仰於俗器器为多言之徒哉然欲举圣人之道者其身亦宜由之也比见执事多尚駁杂无实之说使人陈之於前以为欢此有以累於令德又商论之际或不容人之短如任私尚胜者亦有所累也先王存六艺自有常矣有德者不为犹以为损况为博塞之戏与人竞财乎君子固不为也今执事为之废弃时日窃实不识其然且执事言论文章不谬於古人今所为或有不出於事之守常者窃未为得也愿执事絶博塞之好弃无实之谈弘广以接天下士嗣孟轲扬雄之作辨杨墨老释之说使圣人之道复见於唐岂不尚哉】

愈始者望见吾子於人人之中固有异焉【上人字或作衆今按人人乃衆人之义此篇下文及与孟东野书别本欧阳詹哀词皆有之然不见於它书疑当时之俗语也】及聆其音声接其辞气则有愿交之志因缘幸会遂得所图岂惟吾子之不遗抑仆之所遇有时焉耳近者尝有意吾子之阙焉无言意仆所以交之之道不至也【意吾子下或再出吾子字非是言下或无意字】今乃大得所图脱然若沈痼去体洒然若执热者之濯清风也然吾子所论排释老不若着书器器多言【器音枵】徒相为訾若仆之见则有异乎此也【见上或有所字】夫所谓着书者义止於辞耳宣之於口书之於简何择焉孟轲之书非轲自着轲既没其徒万章公孙丑相与记轲所言焉耳【或作者耳】仆自得圣人之道而诵之排前二家有年矣不知者以仆为好辩也然从而化者亦有矣闻而疑者又有倍焉顽然不入者亲以言谕之不入则其观吾书也固将无得矣【无下或有所字得下或无矣字】为此而止吾岂有爱於力乎哉然有一说化当世莫若口传来世莫若书又惧吾力之未至也【未至或作不能或至下更有至之不能四字】三十而立四十而不惑吾於圣人既过之犹惧不及矧今未至固有所未至耳请待五六十然後为之冀其少过也吾子又讥吾与人人为无实駁杂之说【与下或无复出人字駁杂之说世多指毛颖传盖因摭言有云韩公着毛颖传好博塞之戏张水部以书劝之耳而不知籍此书乃与公酬答於贞元佐汴时而毛颖传以吕汲公年谱考之则元和十年所作又柳子厚书毛颖传後云自吾居夷不与中州人通书有来南者时言韩愈为毛颖传子厚以永贞元年出为永州司马凡十年则毛颖传诚元和闲作後此书十有余岁摭言未可凭也】此吾所以为戏耳比之酒色不有间乎吾子讥之似同浴而讥裸裎也【裎或作体】若

商论不能下气或似有之当更思而悔之耳博塞之讥敢不承教其他俟相见薄晚须到公府言不能尽【或无言字】愈再拜重答张籍书【籍遗公第二书云籍不以其愚辄进说於执事执事以导进之分复赐还答曲折教之使昏塞者不失其明然犹有所见愿复於执事以毕其说焉夫老释惑乎生人久矣诚以世相沿化而莫之知所以久惑乎尔执事材识明旷可以任着书之事故有告焉今以其言谕之不入则观书亦无所得为此而止未为至也夫处一位在一乡其不知圣人之道可以言谕之谕之不入乃舍之犹有已化者为证也天下至广民事至衆岂可资一人之口而亲谕之者近而不入则舍之远而有可谕者又岂可以家至而说之乎故曰莫若为书为书而知者则可以化乎天下矣可以传於後世矣若以不入者而止为书则於圣人之道奚传焉士之壮也或从事於要剧或旅游而不安宅或偶时之丧乱皆不皇有所为况有疾疢吉凶虞其闲哉是以君子汲汲於所欲为恐终无所显於後若皆待五六十而後有所为则或有遗恨矣今执事虽参於戎府当四海弭兵之际优游无事不以此时着书而曰俟後或有不及曷可追乎天之与人性度已有器也不必老而後有成立者昔顔子之庶几岂待五六十乎执事目不覩圣人而究圣人之道材不让於顔子矣今年已踰之曷惧於年未至哉顔子不着书者以其从圣人之後圣人已有定制故也若顔子独立於世必有所云着也古之学君臣父子之道必资於师师之贤者其徒数千人或数百人是以没则纪其师之说以为书若孟轲者是已传者犹以孟轲自论集其说不云没後其徒为之也後轲之世发明其学者扬雄之徒咸自作书今师友道丧浸不及扬雄之世不自论着以兴圣人之道欲待孟轲之门人必不可冀矣君子发言举足不远於理未尝闻以驳杂无实之说为戏也执事每见其说亦拊拊呼笑是挠气害性不得其正矣苟正之不得曷所不至焉或以为中不失正将以苟悦於衆是戏人也是玩人也非示人以义之道也】

吾子不以愈无似意欲推而纳诸圣贤之域【而或作之】拂其邪心增其所未高谓愈之质有可以至於道者浚其源导其所归溉其根将食其实此盛德者之所辞让【德下或无者字】况於愈者哉抑其中有宜复者故不可遂已昔者圣人之作春秋也既深其文辞矣然犹不敢公传道之口授弟子至於後世然後其书出焉【或无然後二字】其所以虑患之道微也今夫二氏之所宗而事之者下乃公卿辅相【乃或作及 今按此言其下者犹是公卿辅相盖微词以见上自天子亦宗事二氏之意】吾岂敢昌言排之哉择其可语者海之犹时与吾悖其声晓晓若遂成其书则见而怒之者必多矣必且以我为狂为惑其身之不能恤书於吾何有【此句书於方作於书仍无吾字 今按书於吾何有言无补也方本误】夫子圣人也且曰自吾得子路而恶声不入於耳其余辅而相者周天下犹且絶粮於陈畏於匡毁於叔孙奔走於齐鲁宋卫之郊其道虽尊其穷也亦甚矣【穷或作躬甚作穷皆非是甚又或作至】赖其徒相与守之卒有立於天下向使独言之而独书之其存也可冀乎今夫二氏行乎中土也盖六百年有余矣其植根固其流波漫非所以朝令而夕禁也自文王没武王周公成康相与守之礼乐皆在及乎夫子未久也自夫子而及乎孟子未久也自孟子而及乎扬雄亦未久也【下未及乎或并作至乎句下无也字】然犹其勤若此其困若此而後能有所立吾其可易而为之哉其为也易则其传也不远故余所以不敢也然观古人得其时行其道则无所为书书者皆所为不行乎今而行乎後世者也【书者上或有为字或无世字】今吾之得吾志失吾志未可知矣五六十年为之未失也天不欲使兹人有知乎则吾之命不可期如使兹人有知乎非我其谁哉其行道其为书其化今其传後必有在矣吾子其何遽戚戚於吾所为哉【其何

或作又何】前书谓吾与人商论不能下气若好胜者然虽诚有之抑非好已胜也好已之道胜也非好已之道胜也已之道乃夫子孟轲扬雄所传之道也【论上或无商字考张籍本书实有若好下或有已字或无然字或无非好已之道胜也一语雄下或无所传也三字皆非是】若不胜则无以为道【若上或有传者二字以或作所皆非是】吾岂敢避是名哉夫子之言曰吾与回言终日不违如愚则其与衆人辨也有矣驳杂之讥前书尽之吾子其复之昔者夫子犹有所戏诗不云乎善戏谑兮不为虐兮记曰张而不弛文武不能也恶害於道哉【能字本皆作为考之记实曰张而不弛文武不能也弛而不张文武不为也则此为字当作能字乃是但李本云论衡尝引此以辟董仲舒不窥园事正作为字疑公自用论衡非用戴礼也今按作为无理必有脱误不然不应舍前汉有理之礼记而信後汉无理之论衡也况公明言记曰而无论衡之云且又安知论衡之不误哉今据公本语依礼记定作能字恶害於道哉恶或作岂於下或有为字一本作乌害其为道哉】吾子其未之思乎孟君将有所适思与吾子别庶几一来愈再拜

东雅堂昌黎集注卷十四

卷十五

<集部,别集类,汉至五代,东雅堂昌黎集注>

钦定四库全书

东雅堂昌黎集注卷十五

书

与孟东野书【东野或作郊公贞元十五年从董晋丧出汴州依张建封于徐因被留以职事此书当在十六年三月作】

与足下别久矣以吾心之思足下知足下悬悬於吾也【以吾或作以余今从阁蜀本云除下文江湖予乐也一语余并作吾】各以事牵不可合并其於人人【其於人人或无下人字说见前卷答张籍书或作它人非是】非足下之为见而日与之处足下知吾心乐否也【一本而下有又字之处或作人处】吾言之而听者谁欤吾唱之而和者谁欤言无听也唱无和也独行而无徒也是非无所与同也足下知吾心乐否也【无听无和上或并有之而字行下或无而字与或作以】足下才高气清行古道处今世无田而衣食事亲左右无违足下之用心勤矣足下之处身劳且苦矣混混与世相浊独其心追古人而从之【从之或作从今之人谢以贞元本定今按上语与世相浊即是从今之人更着二字则赘而不词矣】足下之道其使吾悲也【使上或无其字】去年春脱汴州之乱【贞元十五年二月从董晋丧出汴州四日而军乱杀留後陆长源】幸不死无所於归遂来于此【於或作与今按送杨少尹序亦有此语】主人与吾有故【主人谓张建封也】哀其穷居吾于符离睢上及秋将辞去因被留以职事【是年秋建封辟公为幕职】默默在此行一年矣到今年秋聊复辞去江湖余乐也与足下终幸矣李习之娶吾亡兄之女【习之翱也公亡兄即礼部郎中云卿之子弇也】期在後月朝夕当来此张籍在和州居丧家甚贫恐足下不知故具此白冀足下一来相视也自彼至此虽远要皆舟行可至速图之吾之望也春且尽时气向热【尽时或作时尽向作日】惟侍奉吉庆愈眼疾比剧甚无聊不复一一愈再拜

答窦秀才书【窦下或有存亮字公时以言事黜为山阳故云远宰蛮县贞元二十年作】

愈白愈少驽怯於他艺能自度无可努力又不通时事而与世多齟齬【上牀吕切又壮所切下音语】念终无以树立遂发愤笃专於文学学不得其术【不得上一有而字】凡所辛苦而仅有之者皆符於空言而不适於实用又重以自废是故学成而道益穷年老而智愈困【智或作身】今又以罪黜於朝廷远宰蛮县【贞元十九年公以言事出为山阳令】愁忧无聊瘴疠侵加喘喘焉无以冀朝夕足下年少才俊辞雅而气锐【雅或作清】当朝廷求贤如

不及之时当道者又皆良有司操数寸之管书盈尺之纸【书或作尽】高可以钓爵位循次而进亦不失万一於甲科【循上或有若字或无万一二字】今乃乘不测之舟入无人之地以相从问文章为事身勤而事左【或作尤非是】辞重而请约非计之得也虽使古之君子积道藏德遁其光而不曜【其光二字或作世曜或作耀】胶其口而不传者遇足下之请恳恳【请或作情】犹将倒廩倾囷【囷一作籩】罗列而进也若愈之愚不肖又安敢有爱於左右哉顾足下之能足以自奋愈之所有如前所陈是以临事愧耻而不敢答也钱财不足以贿左右之匮乏文章不足以发足下之事业【章不足或作章不可】捆载而往垂橐而归【管子小正篇诸侯之使垂橐而入捆载而归 捆苦陨切】足下亮之而已愈白

上李尚书书【李下或有实字】

月日【贞元十九年】将仕郎前守四门博士韩愈谨载拜奉书尚书大尹阁下【载或作再古字通用或无尚书二字贞元十九年三月乙亥以检校工部尚书李实为京兆尹】愈来京师於今十五年【此书称将仕郎前守四门博士退之以贞元十八年授国子四门博士十九年拜监察御史作此书时盖已罢博士而未授御史正十九年也退之以贞元五年复来京师至是十五年矣】所见公卿大臣不可胜数皆能守官奉职无过失而已未见有赤心事上忧国如家如阁下者【或无如家二字实恃宠强愎专於聚敛公於顺宗实录备书之矣而於此书且复有赤心忧国之语何哉岂诗所谓因以箴之耶抑屈身行道圣贤所不免也】今年已来不雨者百有余日【贞元十九年自正月不雨至七月】种不入土野无青草而盗贼不敢起谷价不敢贵百坊百二十司六军二十四县之人皆若阁下亲临其家老奸宿赃销缩摧沮亡魄丧影灭迹絶非阁下条理镇服布宣天子威德其何能及此愈也少从事於文学见有忠於君孝於亲者虽在千百年之前犹敬而慕之况亲逢阁下得不候於左右以求効其恳恳谨献所为文两卷凡十五篇【谨或作仅】非敢以为文也以为谒见之资也进退惟命愈恐惧再拜

贺徐州张仆射白兔书【或注建封字或作状公贞元十五年秋佐张建封于徐书是时作】

伏闻今月五日营田巡官陈从政献瑞兔毛质皤白【皤或作全或作皎】天驯其心【驯音循】其始实得之符离安阜屯【安阜或云屯名如唐孟元阳董作西华屯是也今按下云得之军田则此屯字乃屯田之屯也】屯之役夫【屯或作田】朝行遇之迫之弗逸【弗或作不】人立而拱窃惟休咎之兆天所以啓觉于下依类托喻事之纤悉不可图验非睿智博通孰克究明愈虽不敏【或无此一语】请试辨之兔陰类也又窟居狡而伏逆象也今白其色絶其羣也驯其心化我德也人立而拱非禽兽之事革而从人且服罪也得之符离符离实戎国名又附丽也【戎阁杭本作我名下注絶句二字丽或作离今按实我国名不成文理汉书卫青传讨蒲泥破符离晋灼曰二王号也所谓戎国疑或取此】不在农夫之田而在军田武德行也不战而来之之道也有安阜之嘉名焉【道下或无也字安阜或作革附或作安附嘉或作喜又无名字皆非是】伏惟阁下股肱帝室藩垣天下四方其有逆乱之臣未血斧鑕之属【鑕职日切铁槌也】畏威崩析归我乎哉其事兆矣【诸本多如此嘉佑杭本亦然方本之属作其属属下句析作折云汉终军传野兽并角明同本也衆支内附示无外也殆将有解

编髮削左衽而蒙化者又王褒讲德论今南郡获白虎偃武兴文之应也获之者张武张而猛也公言盖祖此今按嘉佑诸本之析二字文理分明方氏但据蜀本而不复着诸本之同异其所定又皆误盖其属归我事小不足言不若逆乱之臣归我之为大而可愿也崩拆亦不成文若用论语分崩离析之语则当从木若用史记折而入於魏之语则当从手二义皆通然既有崩字则似本用论语中字也】是宜具迹表闻以承答天意小子不惠猥以文句微识蒙念【或无不惠二字念文苑作合全无文理】睹兹盛美焉敢避不让之责而默默耶【杭蜀苑作默贺也亦不成文理】愈再拜

上兵部李侍郎书【蜀本注巽字或作异非是永贞元年十二月九日江陵作李巽是时自江西观察使入为兵部侍郎】

十二月九日【永贞元年】将仕郎守江陵府法曹参军韩愈谨上书侍郎阁下愈少鄙钝於时事都不通晓家贫不足以自活应举覓官凡二十年矣【书称守江陵府法曹参军盖永贞元年也退之以贞元二年入京师至此二十年矣】薄命不幸动遭谗谤进寸退尺卒无所成性本好文学【好或作喜】因困厄悲愁无所告语遂得究穷於经传史记百家之说沈潜乎训义反复乎句读砮磨乎事业而奋发乎文章凡自唐虞以来编简所存大之为河海高之为山岳【文苑作泰山与上下句不类非是】明之为日月幽之为鬼神織之为珠玕华实变之为雷霆风雨奇辞奥旨靡不通达惟是鄙钝不通晓於时事学成而道益穷年老而智益困【智或作身】私自怜悼悔其初心髮秃齿豁不见知己夫牛角之歌辞鄙而义拙【琴操曰甯戚饭牛车下叩牛角而歌曰南山矸白石烂生不逢尧与舜禅短布单衣才至骭长夜漫漫何时旦齐桓公闻之举以为相】堂下之言不书於传记【左氏昭二十八年叔向适郑驪蔑恶欲观叔向从使之收器者而往立於堂下一言而善叔向将饮酒闻之曰必驪明也下执其手以上日子若无言吾几失子矣】齐桓举以相国叔向携手以上然则非言之难为听而识之者难遇也【难为属上句为或作其则属下句】伏以阁下内仁而外义行高而德钜尚贤而与能哀穷而悼屈【方本仁下贤下无而字今详此上下四句本或皆有而字者为正或皆无之或上二句无而下二句有者亦通而方本必於其第一第三句去之使其参差齟齬而不可读以为古则不淳以为今则不响不识其何意也】自江而西既化而行矣今者入守内职为朝廷大臣当天子新即位【是岁八月宪宗即位】汲汲於理化之日出言举事宜必施設【宜或作计】既有听之之明又有振之之力甯戚之歌驪明之言不发於左右则後而失其时矣谨献旧文一卷扶树教道有所明白南行诗一卷舒忧娱悲杂以瓊怪之言时俗之好所以讽於口而听於耳也如赐览观亦有可采干黜严尊伏增惶恐愈再拜

答尉迟生书【下或注汾字】

愈白尉迟生足下【或无愈白二字尉音郁】夫所谓文者必有诸其中是故君子慎其实实之美恶其发也不揜本深而未茂形大而声宏行峻而言厉心醇而气和昭晰者无疑优游者有余体不备不可以为成人辞不足不可以为成文愈之所闻者如有问於愈者亦以是对今吾子所为皆善矣谦谦然若不足而以徵於愈愈又敢有爱於言乎抑所能言者皆古之道古之道不足以取於今【或无复出之道三字】古吾子何其爱之异也贤公卿大夫在上比

肩始进之贤士在下比肩彼其得之必有以取之也子欲仕乎其往问焉皆可学也若独有爱於是而非仕之谓则愈也尝学之矣请继今以言

答杨子书【此书答杨敬之凌之子也所谓远其兄甚者谓海之海之冯之子柳子厚所为说车者也此书贞元十七年作】

辱书并示表记述书辞等五篇比於东都略见顔色未得接言语心固已相奇但不敢果於貌定【果於或作果以】知人尧舜所难【舜或作帝】又尝服宰予之诫故未敢决然挹亦不敢忽然忘也到城已来不多与人还往友朋之中所敬信者平昌孟东野【东野德州平昌人】东野砭砭说足下不离口崔大敦诗不多见【敦诗名羣】每每说人物亦以足下为处子之秀近又得李七翱书【李下或无七字】亦云足下之文远其兄甚【下或有矣字】夫以平昌之贤其言一人固足信矣况又崔与李继至而交说邪故不待相见相信已熟既相见不要约已相亲审知足下之才充其容也今辱书乃云云是所谓以黄金注重外而内惑也【庄子达生篇以瓦注者巧以鈎注者惮以黄金注者昏其巧一也而有所矜则重外也凡外重者内拙】然恐足下少年与仆老者不相类尚须验以言故具白所以【下或有也字非是】而今而後不置疑於其间可也【闲上或无其字】若曰长育人才则有天子之大臣在若仆者守一官且不足以修理况如是重任邪学问有暇幸时见临愈白

上襄阳于相公书【或注頔字公元和元年自江陵掾召为国子博士行至邓州北境作是书以答之于頔字允元 頔音油】

伏蒙示文武顺圣乐辞【唐德宗以後方镇多制乐舞以献頔献顺圣乐曲其曲将半行缀皆伏一人舞于中又令女妓为佾舞雄健壮妙号为孙武顺圣乐】天保乐诗【保或作宝】读蔡琰胡笳辞诗【後汉蔡琰字文姬中郎将邕之女兴平中没於南匈奴十二年笳音茄胡人卷芦叶吹之也】移族从并与京兆书【移族从以下八字阁杭本如此云頔世雄朔易时移羣从占数为京兆人以书修敬於京兆尹李实刘梦得集有代李尹答书可考诸本或以从并为徙并非也今按刘集代实答頔第二书也其曰移族从者頔与京兆书外别有移羣从书移非移居之移乃移文之移盖始去其旧乡故移书以晓其宗族羣从也】自幕府至邓之北境凡五百余里自庚子至甲辰凡五日【庚上或无自字】手披目视口咏其言心惟其义且恐且惧忽若有亡不知鞍马之勤道途之远也夫?谷之水深不过咫尺丘垤之山高不能踰寻文人则狎而翫之【人则或作则人】及至临泰山之悬崖窥巨海之惊澜莫不战掉掉栗眩惑而自失【掉或作悸或作惶或作惮说文掉惧也陈楚谓惧曰掉陆士衡表五情震掉】所观变於前所守易於内亦其理宜也阁下负超卓之奇材蓄雄刚之俊德浑然天成无有畔岸而又贵穷乎公相威动乎区极【区或作枢】天子之毗诸侯之师故其文章言语与事相侔憚赫若雷霆【憚赫或作变化阁蜀録粹皆作憚赫字小讹也 丹末切与怛同庄子声侔鬼神憚赫千里】浩汗若河汉正声谐韶濩劲气沮金石丰而不余一言约而不失一辞其事信其理切孔子之言曰【或无之言字】有德者必有言信乎其有德【一有而字】且有言也杨子云曰【云下或有言字】商书灏灏尔周书噩噩尔信乎其能灏灏而且噩噩也【灏胡老切同浩】昔者齐君行而失道管子请释老马而随之【随上或无而字管仲隰朋从威公伐孤

竹迷惑失道管仲曰老马之智可用也乃放老马而随之遂得道见韩子】樊迟请学稼孔子使问之老农【论语樊迟请学稼孔子曰吾不如老农】夫马之智不贤於夷吾农之能不圣於尼父然且云尔者【然下或有则字非是】圣贤之能多农马之知专故也今愈虽愚且贱其从事於文章专且久则其赞王公之能而称大君子之美不为僭越也伏惟详察愈恐惧再拜

上郑尚书相公啓【郑余庆字居业元和三年以检校兵部尚书兼东都留守公时为都官员外郎分司东都】

愈啓伏蒙仁恩猥赐示问【猥或作俯方无 今按言猥若俯者事上之礼无者非是】感戴战悚【或作栗】若无所容措然尚有厥诚须尽露於左右者敢避其烦黷怀不满之意於受恩之地哉【或无厥诚字黷或作渎字通用或作默则讹矣又连下句读之其误益甚】愈幸甚三得为属吏【元和元年九月余庆为国子祭酒公为博士十一月余庆为河南尹公分司东都至是余庆为留守公为都官员外郎】朝夕不离门下出入五年【方从杭蜀本无入字 今按出入汉人语多有之公作襄阳卢丞志亦云出入十年方误矣】窃自计较受与报不宜在门下诸从事後【较或作校】故事有当言未尝敢不言有不便於已【阁无於字非是】辄吐私情阁下所宜怜也分司郎官职事惟祠部为烦且重愈独判二年日与宦者为敌相伺候罪过恶言詈辞狼藉公牒不敢为耻实虑陷祸故前者为状乞与诸郎官更判意虽甚专事似率尔言语精神不能自明不蒙察允遽以慙归僂俛日日【僂音泯】遂踰累旬私图其宜敢以病告鴈鵠平均歌於国风【诗曹国风鴈鵠刺不壹也在位无君子用心之不壹也】从事独贤雅以怨刺【诗小雅北山刺幽王也役使不均已劳於从事而不得养其父母焉】伏惟俯加怜察【阁无俯字録无俯察二字俯或作特 今按得失之意已论於篇首矣】幸甚幸甚愈再拜

上留守郑相公啓【元和五年冬改河南令以军人事辨於留守郑公其言剴切其退甚轻信乎史所谓笃道君子也】

愈啓愈为相公官属五年辱知辱爱伏念曾无丝毫事为报答效【或无伏字】日夜思虑谋画以为事大君子当以道不宜苟且求容悦故於事未尝敢疑惑宜行则行宜止则止【止方并作尔 按对上句行字义当作止方本无理不词今改从衆】受容受察【阁杭本无受容字非是】不复进谢自以为如此真得事大君子之道【或无之字】今虽蒙沙汰为县固犹在相公治下未同去离门墙为故吏为形迹嫌疑改前所为以自疎外於大君子【外下或无於於非是】固当不待烦说於左右而後察也人有告人辱骂其妹与妻为其长者得不追而问之乎追而不至为其长者得不怒而杖之乎坐军营操兵守御为留守出入前後驱从者此真为军人矣坐坊市卖饼又称军人则谁非军人也愚以为此必奸人以钱财赂将吏盗相公文牒窃注名姓於军籍中以陵驾府县【陵驾字见选沈休文论】此固相公所欲去奉法吏所当嫉虽捕系杖之未过也【嫉下或有矣字未上或无之字 非是未下或有至字或作不至过】昨闻相公追捕所告受辱骂者愚以为大君子为政当有权变始似小异要归於正耳军吏纷纷入见告屈为其长者【长下或无者字非是】安得不小致为之之意乎未敢以此仰疑

大君子及见诸从事说则与小人所望信者少似乖戾虽然岂敢生疑於万一必诸从事与诸将吏未能去朋党心盖覆黧黧【黧黧甚黑也刘伶客至诗黧黧元夜陰
黧乌敢切黧徒敢切】不以真情状白露左右小人受私恩良久【受私或作私受今按私受非是然此七字为句语亦太烦又下语便有私恨字不应重复如此疑此私字是衍文也】安敢闭蓄以为私恨不一二陈道伏惟相公怜察幸甚幸甚愈无适时才用渐不喜为吏得一事为名可自罢去不啻如弃涕唾无一分顾藉心【阁本名字在罢字下而名字下更有一罢字杭本无名字可自作自可亦无下罢字一本或作可自罢乃罢去今按此句读本皆不可读但别本作得一事为名可自罢去比阁本只移一名字去一罢字比杭本但增一】

【名字倒一自字而文义通畅畧无凝滞今从之 又按此二书误字尤多而阁杭蜀本又为特甚不知何故如此大抵公於朝廷或抵上官论时事及职事则皆如公状之体不用古文奇语此二篇亦其类也窃意读者厌其无奇而辄改之故其多误至此云】顾失大君子纤芥意如丘山重守官去官惟今日指挥愈惶惧再拜

东雅堂昌黎集注卷十五

卷十六

钦定四库全书

东雅堂昌黎集注卷十六

书

上宰相书【李肇国史补云进士得第谓之前进士公贞元八年登第後又试博学宏辞於礼部又黜於中书此贞元十一年所以上宰相书求仕凡三上不报 是年五月东归】

正月二十七日前乡贡进士韩愈谨伏光范门下再拜献书相公阁下【书下或有于字时宰相赵憬贾耽卢迈也】诗之序曰菁菁者莪乐育材也君子能长育人材则天下喜乐之矣【或作也】其诗曰菁菁者莪在彼中阿既见君子乐且有仪说者曰菁菁者盛也莪微草也阿大陵也言君子之长育人材若大陵之长育微草能使之菁菁然盛也既见君子乐且有仪云者天下美之之辞也其三章曰既见君子锡我百朋说者曰百朋多之之辞也言君子既长育人材又当爵命之赐之厚禄以宠贵之云尔【赐之赐或作锡之或作以】其卒章曰泛泛杨舟载沈载浮既见君子我心则休说者曰载载也【载载也或作载者载也或作载者舟也或作载舟也】沈浮者物也言君子之於人才无所不取若舟之於物浮沉皆载之云尔既见君子我心则休云者言若此则天下之心美之也【心上或无之字】君子之於人也既长育之又当爵命宠贵之而於其才无所遗焉【邵氏闻见录云退之於文不全用诗书之言如田弘正先庙碑曰鲁僖公能遵其祖伯禽之烈周天子实命其史臣克作为駉駉泮閼之诗使声于庙其用诗之法如此上宰相书解释菁菁者莪二百余字盖少作也云云】孟子曰君子有三乐王天下不与存焉其一曰乐得天下之英才而教育之此皆圣人贤士之所极言至论古今之所宜法者也然则孰能长育天下之人材将非吾君与吾相乎孰能教育天下之英才将非吾君与吾相乎【然则下或无孰能至相乎十七字欧本云存此则与後相应然亦无孰长人三字则非是】幸今天下无事小大之官各守其职【或作所】钱谷甲兵之间不至於庙堂论道经邦之暇舍此宜无大者焉今有人生二十八年矣【退之以天历三年戊申生至贞元十一年乙亥二十八年也】名不着於农工商贾之版其业则读书着文歌颂尧舜之道鸡鸣而起孜孜焉亦不为利其所读皆圣人之书杨墨释老之学无所入於其心其所着皆约六经之旨而成文抑邪与正辨时俗之所惑【与或作兴】居穷守约【或无守字】亦时有感激怨怼奇怪之辞【怼音队】以求知於天下亦不悖於教化妖淫谀佞譸张之说【譸音輶】无所出於其中四举於礼部乃一得三选於吏部卒无成九品之位其可望一亩之宫其可怀【宫或作宅方云一亩之宫本儒行语公苗蕃志无宫以归今本亦误 今按二字无大利害公用儒行语亦或有之然谓其专用宫字而不得更用宅字则固矣】遑遑乎四海无所归恤恤乎饥不得食【恤恤乎左昭十二年之文恤恤忧貌】寒不得衣滨於死而益固得其所者争笑之忽将弃其旧而新是图求老农老圃而为师悼本志之变化中夜涕泗交颐虽不足当诗

人孟子之谓【子之下或有所字】抑长育之使成材其亦可矣教育之使成才其亦可矣抑又闻古之君子相其君也【之字或在君子下或子下别有之字】一夫不获其所若已推而内之沟中今有人生七年而学圣人之道以修其身积二十年【十下或有一字】不得已一朝而毁之是亦不获其所矣伏念今有仁人在上位若不往告之而遂行是果於自弃而不以古之君子之道待吾相也其可乎宁往告焉若不得志则命也【志上或有其字今拟志字衍】其亦行矣洪范曰凡厥庶民有猷有为有守汝则念之不恊于极不罹于咎【二不字或并作弗】皇则受之而康而色曰予攸好德汝则锡之福是皆与善之辞也抑又闻古之人有自进者而君子不逆之矣【君上或无而字】曰予攸好德汝则锡之福之谓也抑又闻上之设官制禄必求其人而授之者非苟慕其才而富贵其身也【或无贵字】盖将用其能理不能用其明理不明者耳下之修已立诚必求其位而居之者非苟没於利而荣於名也【没或作役国语重耳不没於利注没贪也】盖将推已之所余以济其不足者耳然则上之於求人下之於求位交相求而一其致焉耳【一其致或作其致一】苟以是而为心则上之道不必难其下下之道不必难其上可举而举焉不必让其自举也【让下或有於字】可进而进焉不必廉於自进也【於下或有其字】抑又闻上之化下【或无之字】得其道则劝赏不必徧加乎天下而天下从焉【则或作其疑当并有则其字】因人之所欲为而遂推之之谓也【或作矣】今天下不由吏部而仕进者几希矣主上感伤山林之士有逸遗者屡诏内外之臣旁求于四海【求下或有儒雅字雅亦或作士】而其至者盖阙焉岂其无人乎哉亦见国家不以非常之道礼之而不求耳【家下或有之字】彼之处隐就闲者亦人耳其耳目鼻口之所欲其心之所乐其体之所安岂有异於人乎哉今所以恶衣食穷体肤麋鹿之与处猿狖之与居【狖音柚】固自以其身不能与时从顺俯仰【从方作俗今按後卷与冯宿书云委曲从顺向风承意则诸本作从顺者固韩公常用之语也方本语意拙澁非是】故甘心自絶而不悔焉而方闻国家之仕进者【闻下或有今字】必举於州县然後升於礼部吏部试之以绣绘雕琢之文考之以声势之逆顺章句之短长中其程式者然後得从下士之列虽有化俗之方安边之画不繇是而稍进万不有一得焉【进下或有者字】彼惟恐入山之不深入林之不密【惟恐或作之恐或无此二字】其影响昧昧惟恐闻於人也今若闻有以书进宰相而求仕者而宰相不辱焉而荐之天子而爵命之而布其书於四方【进或作止而宰而爵或并无而宰而复出天子二字或无於字】枯槁沈溺魁閎寛通之士必且洋洋焉动其心峨峨焉纓其冠于于焉而来矣此所谓劝赏不必徧加乎天下而天下从焉者也因人之所欲为而遂推之之谓者也伏惟览诗书孟子之所指念育才锡福之所以考古之君子相其君之道而忘自进自举之罪思设官制禄之故以诱致山林逸遗之士庶天下之行道者知所归焉【归上或有依字】小子不敢自幸其尝所着文辄采其可者若干首録在异卷冀辱赐观焉【或无敢字或无冀字冀辱或作伏垂】干黜尊严伏地待罪愈再拜後十九日复上书【张子韶曰退之平生本强人而为饥寒所迫累数千言求官於宰相亦可怪也至第二书乃复自比为盗贼管库且云大其声而疾呼矣略不知耻何哉岂作文者其文当如是其心未必然邪】

二月十六日前乡贡进士韩愈谨再拜言相公阁下向上书及所着文後待命凡十有九日不得命恐惧不敢逃遁不知所为【或无逃字】乃复敢自纳於不测之诛以求毕其说而请命於左右愈闻之蹈水火者之求免於人也不惟其父兄子弟之慈爱然後呼而望之也将有介於其侧者虽其所憎怨苟不至乎欲其死者则将大其声疾呼而望其仁之也【仁或作人而

之下有救字或作人而下无之字 今按此若作人之救则正与下句全字为对而下文再疊其语亦以二字相对但觉其语差凡故今且从方本】彼介於其侧者闻其声而见其事不惟其父兄子弟之慈爱然後往而全之也虽有所憎怨苟不至乎欲其死者则将狂奔尽气濡手足焦火髮救之而不辞也若是者何哉其势诚急而其情诚可悲也愈之强学力行有年矣愚不惟道之险夷【愚上或有其字而愚下有也字也又或作甚或有其字而无也甚二字】行且不息以蹈於穷饿之水火其既危且亟矣大其声而疾呼矣阁下其亦闻而见之矣【或作坎】其将往而全之坎抑将安而不救坎【不下或有之字】有来言於阁下者曰有观溺於水而爇於火者有可救之道而终莫之救也阁下且以为仁人乎哉不然若愈者亦君子之所宜动心者也或谓愈【下或有曰字】子言则然矣宰相则知子矣如时不可何愈窃谓之不知言者诚其材能不足当吾贤相之举耳【材或作才能不或作不能而无足字相上或无贤字】若所谓时者固在上位者之为耳【或无之字又无也字或并无之耳非也四字之为耳三字或作为之耳皆非是】非天之所为也前五六年时宰相荐闻尚有自布衣蒙抽擢者与今岂异时哉且今节度观察使及防御营田诸小使等尚得自举判官无间於已仕未仕者【或无使及二字非是闲或作闻或作】问况在宰相吾君所尊敬者而曰不可乎古之进人者或取於盗【礼记杂记曰管仲遇盗取二人焉上以为公臣曰其所与游辟也可人也】或举於管库【礼记檀弓曰赵文子所举於晋国管库之士七十有余家】今布衣虽贱犹足以方於此情隘辞戚不知所裁亦惟少垂怜焉【怜下或有察字】愈再拜

後廿九日复上书

三月十六日前乡贡进士韩愈谨再拜言相公阁下愈闻周公之为辅相其急於见贤也方一食三吐其哺方一沐三捉其髮【事见史记辅相下或有也字其急或无其字捉或作握】当是时天下之贤才皆已举用奸邪谗佞欺负之徒皆已除去【奸下或有人字无欺字非是】四海皆已无虞九夷八蛮之在荒服之外者皆已宾贡【之在或无之字】天灾时变昆虫草木之妖皆已销息天下之所谓礼乐刑政教化之具皆已修理风俗皆已敦厚动植之物风雨霜露之所沾被者皆已得宜休徵嘉瑞麟凤龟龙之属皆已备至而周公以圣人之才凭叔父之亲其所辅理承化之功又尽章章如是其所求进见之士岂复有贤於周公者哉不惟不贤於周公而已岂复有贤於时百执事者哉岂复有所计议能补於周公之化者哉然而周公求之如此其急惟恐耳目有所不闻见思虑有所未及以负成王托周公之意不得於天下之心【托周公疑此周公字当是国字意下或有以字】如周公之心设使其时辅理承化之功未尽章章如是而非圣人之才而无叔父之亲则将不暇食与沐矣岂特吐哺捉髮为勤而止哉维其如是故于今颂成王之德而称周公之功不衰今阁下为辅相亦近耳天下之贤才岂尽举用奸邪谗佞欺负之徒岂尽除去【或无佞欺字】四海岂尽无虞九夷八蛮之在荒服之外者岂尽宾贡天灾时变昆虫草木之妖岂尽销息天下之所谓礼乐刑政教化之具岂尽修理风俗岂尽敦厚动植之物风雨霜露之所沾被者岂尽得宜休徵嘉瑞麟凤龟龙之属岂尽备至其所求尽见之士虽不足以希望盛德至比於百执事【至比或作如比】岂尽出其下哉其所称说岂尽无所补哉今虽不能如周公吐哺捉髮亦宜引而进之察其所以而去就不宜默默而已也愈之待命四十余日矣【余日或作日余】书再上而志不得通足三及门而阍人辞焉惟其昏愚不知逃遁故复有周公之说焉阁下其亦察之【或无此六字】古之

士三月不仕则相吊故出强必载质然所以重於自进者以其於周不可则去之魯於魯不可则去之齊於齊不可则去之宋之郑之秦之楚也【之魯之齊之下或并有於字则去之宋或无则字】今天下一君四海一国舍乎此则夷狄矣去父母之邦矣故士之行道者【道下一有也字】不得於朝则山林而已矣山林者山之所独善自养而不忧天下者之所能安也如有忧天下之心则不能矣故愈每自进而不知愧焉书亟上足数及门而不知止焉【数音朔】宁独如此而已惴惴焉惟不得出大贤之门下是惧【不得上或有恐字】亦惟少垂察焉渎冒威尊惶恐无已【威尊或作尊威无已或作无文非是】愈再拜

答侯继书【继与公同贞元八年进士第公时以宏词三试於吏部不售故云又为考官所辱此贞元十一年年上宰相书之前也】

裴子自城来得足下一书明日又於崔大处【崔大名羣字敦诗】得足下陕州所留书翫而复之不能自休寻知足下不得留仆又为考官所辱【官一作功】欲致一书开足下【开或作闻】并自舒其所怀含意连辞将发复已卒不能成就其说及得足下二书凡仆之所欲进於左右者足下皆以自得之【或无以字 今按以已通晋宋人书帖多用以字】仆虽欲重累其辞谅无居足下之意外者故絶意不为【虽欲或作虽复或无之意二字】行自念方当远去潜深伏隩与时世不相闻【行或作亦当或作将隩或作奥或无世字 今按行疑当作复】虽足下之思我无所窥寻其声光故不得不

有书为别非复有所感发也仆少好学问自五经之外百氏之书未有闻而不求得而不观者然其所志惟在其意义所归至於礼乐之名数陰阳土地星辰方药之书【或无方药二字】未尝一得其门户虽今之仕进者不要此道然古之人未有不通此而能为大贤君子者【子下或有事字者下或有也字】仆虽庸愚每读书辄用自愧今幸不为时所用无朝夕役役之劳将试学焉力不足而後止犹将愈於汲汲於时俗之所争【一作事】既不得而怨天尤人者此吾今之志也【此句或无今字】惧足下以吾退归因谓我不复能自强不息【或无我字】故因书奉晓冀足下知吾之退未始不为进而衆人之进未始不为退也【或无两之字】既货马即求船东下二事皆不过後月十日有相问者为我谢焉【月十日或只作旬字或无我字此下或有愈再拜字】

答崔立之书【立之字斯立贞元四年进士唐进士礼部既登第後吏部试之中其程度然後命之官公贞元八年第进士至是三试吏部不售斯立以书勉之而公以书答之也】

斯立足下仆见险不能止动不得时颠顿狼狈失其所操持困不知变以至辱於再三君子小人之所悯笑天下之所背而驰者也【或无也字】足下犹复以为可教贬损道德乃至手笔以问之扳援古昔【扳音攀援于元切】辞义高远且进且劝足下之於故旧之道得矣【之於上或无之字得下或有之字】虽仆亦固望於吾子不敢望於他人者耳然尚有似不相晓者非故欲发余乎不然何子之不以丈夫期我也【或无之字】不能默默聊复自明【自明或作明白】仆始年十六七时未知人事读圣人之书以为人之仕者皆为人耳非有利乎已也及年二十时苦家贫衣食不足谋於所亲然後知仕之不唯为人耳及来京师见有举进士

者人多贵之仆诚乐之就求其术或出礼部所试赋诗策等以相示【赋诗或作诗赋】仆以为可无学而能因诣州县求举有司者好恶出於其心【司下或无者字】四举而後有成亦未即得仕闻吏部有以博学宏词选者人尤谓之才且得美仕就求其术或出所试文章亦礼部之类私怪其故然犹乐其名因又诣州府求举凡二试於吏部一既得之而又黜於中书虽不得仕人或谓之能焉退自取所试读之乃类於俳優者之辞【退下或有因字类於或作类乎】顏忸怩而心不宁者数月【忸音衄怩女夷切】既已为之则欲有所成就【所成或无此二字或无所字】书所谓耻过作非者也因复求举亦无幸焉乃复自疑以为所试与得之者不同其程度及得观之余亦无甚愧焉夫所谓博学者岂今之所谓者乎夫所谓宏辞者岂今之所谓者乎诚使古之豪杰之士若屈原孟轲司马迁相如扬雄之徒进于是选必知其怀慙乃不自进而已耳【或无相如二字】设使与夫今之善进取者竞於蒙昧之中【或无进者二字】仆必知其辱焉然彼五子者且使生於今之世【五或作数生或作出】其道虽不显於天下其自负何如哉肯与夫斗筭者决得失於一夫之目而为之忧乐哉故凡仆之汲汲於进者其小得盖欲以具裘葛养穷孤【具或作完穷孤或作孤穷】其大得盖欲以同吾之所乐於人耳其他可否自计已熟诚不待人而後知今足下乃复比之献玉者以为必埃工人之剖【工人或作良工】然後见知於天下虽两刖足不为病【卞和献玉刖足事是韩非子刖足下或有而字】且无使勅者再克【或作刖下同 勅渠京切】诚足下相勉之意厚也然仕进者岂舍此而无门哉足下谓我必待是而後进者尤非相悉之辞也【後进或作後振尤非或作非尤非是】仆之玉固未尝献而足固未尝刖足下无为为我戚戚也【或无足下字或无复出为字或并无二为字非是】方今天下风俗尚有未及於古者边境尚有被申执兵者【境或作地或无境字】主上不得怡而宰相以为忧仆虽不贤亦且潜究其得失【或无其字】致之乎吾相荐之乎吾君上希卿大夫之位下犹取一障而乘之【见西汉武帝时匈奴求和亲博士狄山语】若都不可得犹将耕於寬闲之野钓於寂寞之滨求国家之遗事考贤人哲士之终始【终上或有所字】作唐之一经垂之於无穷诛奸谀於既死发潜德之幽光二者将必有一可足下以为仆之玉凡几献而足凡几刖也又所谓勅者果谁哉再克之刑信如何也【刑或作形】士固信於知己微足下无以发吾之狂言【信或作伸吾下或无之字】愈再拜

答李翊书【翊或作翱非也贞元十八年陆惨佐主司权德輿於礼部公以李翊荐於惨用是其年登第此书其十七年所作欤吕居仁云退之此书最见其为文养气妙处】

六月二十六日【或无此六字】愈白李生足下生之书辞甚高而其问何下而恭也【而恭或作之恭非是】能如是谁不欲告生以其道道德之归也有日矣况其外之文乎【外或作余非是】抑愈所谓望孔子之闕墙而不入于其宫者焉足以知是且非邪【者下或有也字焉或作乌】虽然不可不为生言之生所谓立言者是也【或无者字】生所为者与所期者甚似而几矣抑不知生之志蘄胜於人而取於人邪【取於人或无於字下一语同】将蘄至於古之立言者邪蘄胜於人而取於人则固胜於人而可取於人矣将蘄至於古之立言者【下或有邪字非是】则无望其速成无诱於势利养其根而埃其实加其膏而希其光根之茂者其实遂膏之沃者其光晔仁义之人其言藹如也抑又有难言者愈之所为不自知其至犹未也虽然学之二十余年矣【余年或作年余】始者非三代两汉之书不敢观【两或作秦

】非圣人之志不敢存处若忘行若遗僣乎其若思茫乎其若迷当其取於心而注於手也惟陈言之务去戛戛乎其难哉其观於人【下或有也字】不知其非笑之为非笑也如是者亦有年犹不改然後识古书之正伪与虽正而不至焉者昭昭然白黑分矣而务去之乃徐有得也当其取於心而注於手也汨汨然来矣【汨音聿】其观於人也笑之则以为喜誉之则以为忧以其犹有人之说者存也【二则字下或并有心字】如是者亦有年然後浩乎其沛然矣吾又惧其杂也迎而距之平心而察之其皆醇也然後肆焉【後或作后】虽然不可以不养也行之乎仁义之途游之乎诗书之源无迷其途无絶其源【或作府无絶其源亦作无虚其府】终吾身而已矣气水也言浮物也水大而物之浮者大小毕浮气之与言犹是也气盛则言之短长与声之高下者皆宜虽如是其敢自谓几於成乎虽几於成其用於人也奚取焉虽然待用於人者其肖於器邪用与舍属诸人【或无邪字而有则时用焉四字或并有邪字】君子则不然处心有道行已有方用则施诸人【施或作垂】舍则传诸其徒垂诸文而为後世法如是者其亦足乐乎其无足乐也【或作乎】有志乎古者希矣【古下或有人字】志乎古必遗乎今吾诚乐而悲之亟称其人所以劝之非敢褒其可褒而贬其可贬也问於愈者多矣念生之言不志乎利聊相为言之愈白【樊汝霖云自三代以还陵夷至于江左斯文浸地唐兴贞观开元之盛终莫能起至贞元末而公出於是六经之文为诸儒唱其观於人也笑之则心以为喜者大声不入於里耳而不笑不足以为道此公所以喜若人人皆见而说之而誉之斯亦浅矣此所以为忧李汉所谓时人始而惊中而笑且排先生益坚终而翕然以定者其此之谓乎王荆公乃云力去陈言夸末俗可怜无补费精神好诋之过也汨汨然来矣浩乎其沛然者皇甫持正谕业所云韩吏部之文如长江秋注千里一道老苏上欧阳书亦云韩子之文如长江大河浑浩流转者是也】

重答翊书【答下或有李字】

愈白李生生之自道其志可也其所疑於我者非也人之来者虽其心异於生其於我也皆有意焉君子之於人无不欲其入於善【入杭本作人非是】宁有不可告而告之孰有可进而不进也言辞之不酬礼貌之不答虽孔子不得行於互乡宜乎余之不为也【方从三本无於字非是余或作愈】苟来者吾斯进之而已矣乌待其礼踰而情过乎虽然生之志求知於我邪求益於我邪其思广圣人之道邪其欲善其身而使人不可及邪【其思上或有求字及邪或作及也】其何汲汲於知而求待之殊也贤不肖固有分矣生其急乎其所自立而无患乎人不已知未尝闻有响大而声微者也况愈之於生恳恳邪属有腹疾无聊不果自书【属下或无有字不下或无果字】愈白

代张籍与李浙东书【或作浙东观察李中丞或注巽字元和五年八月以巽兼御史中丞充浙东观察使张籍时为太常寺太祝病眼京师公於是为之代书】

月日前某官某谨东向再拜寓书浙东观察使中丞李公阁下【寓或作献或无使字】籍闻议论者皆云方今居古方伯连帅之职坐一方得专制於其境内者【云上或无皆字云下或无方字又无得字】惟阁下心事萃萃【萃吕角切】与俗辈不同籍固以藏之胷中矣近者阁下从事李協律翱到京师籍於李君友也【友上或有朋字】不见六七年闻其至驰往省

之问无恙外不暇出一言且先贺其得贤主人李君曰子岂尽知之乎吾将尽言之【言下无之字】数日籍益闻所不闻【不闻或作未尝】籍私独喜常以为自今已後【已或作以】不复有如古人者於今忽有之退自悲不幸两目不见物无用於天下【退下或有而字】胷中虽有知识家无钱财寸步不能自致今去李中丞五千里何由致其身於其人之侧开口一吐出胷中之奇乎因饮泣不能语【或无能字】既数日复自奋曰无所能人乃宜以盲废有所能人虽盲当废於俗辈不当废於行古人之道者【所能或并无所字】浙水东七州户不下数十万【十或作百】不盲者何限李中丞取人固当问其贤不贤不当计盲与不盲也【计下或有其字】当今盲於心者皆是若籍自谓独盲於目尔其心则能别是非【别上或有计字是非或作非是】若赐之坐而问之其口固能言也幸未死实欲一吐出心中平生所知见【或无心中字或无见字】合下能信而致之於门邪【致或作置】籍又善於古诗【於或作为】使其心不以忧衣食乱合下无事时一致之座侧使跪进其所有合下凭几而听之未必不如听吹竹弹丝敲金击石也【方云校本一云敲当作?唐人多使敌字如卢全诗敌金撻玉击或作拊或无之今按方说敌字甚怪所引卢全诗当亦是误本耳】夫盲者业专於艺必口故乐工皆盲【诸本专字在必字下今从文苑但文苑必作也而下缺一字疑是精字更详之】籍傥可与此辈比并乎【或无籍字或无比乎二字今按并字疑衍】使籍诚不以蓄妻子忧饥寒乱心有钱财以济医药其盲未甚庶几其复见天地日月【几下或无其字】因得不废则自今至死之年皆合下之赐【下或有也字】合下济之以已絶之年赐之以既盲之视其恩轻重大小籍宜如何报也合下裁之度之【裁下或无之字】籍慙腴再拜

答李秀才书【李下或有师锡字或注图南字李观卒於贞元十年此书云故友元宾则当在十年後作】

愈白故友李观元宾十年之前示愈别吴中故人诗六章其首章则吾子也盛有所称引元宾行峻洁清其中狭隘不能苞容【苞或作包】於寻常人不肯苟有论说因究其所以於是知吾子非庸衆人【或有复出庸字或作庸庸之衆】时吾子在吴中其後愈出在外无因缘相见元宾既歿其文益可贵重思元宾而不见见元宾之所与者则如元宾焉【杭本无既没以下八字非是与方作以今按方以以与可通用故从杭本作以然孰若从诸本之为正邪】今者辱惠书及文章观其姓名元宾之声容恍若相接读其文辞【文辞阁杭本作命辞云元宾所命意於辞也今按此文辞指李生所作耳非谓元宾之辞也正使实谓元宾之辞作命辞亦无理】见元宾之知人交道之不污甚矣子之心有似於吾元宾也【矣或作乎於或作乎】子之言以愈所为不违孔子不以琢雕为工将相从於此愈敢自爱其道而以辞让为事乎然愈之所志於古者不惟其辞之好好其道焉尔读吾子之辞而得其所用心将复有深於是者与吾子乐之况其外之文乎【与或作坎属上句非是】愈顿首答陈生书【生下或有商字或注师锡字陈生以书求速化之术於公公以待已以信事亲以诚而告之此与子张学干禄孔子告之以言寡尤行寡悔之说无异君子之言自衆人视之虽若迂濶而其理实如此】

愈白陈生足下今之负名誉享显荣者在上位几人足下求速化之术不於其人乃以访愈是所谓借听於聋求道於盲虽其请之勤勤教之云云未有见其得者也【或无有字今按有字或当在此句其字下】愈之志在古道又甚好其言辞观足下之书及十四篇之诗亦云有志

於是矣而其所问则名所慕则科故愈疑於其对焉虽然厚意不可虚辱聊为足下诵其所闻盖君子病乎在已而顺乎在天待已以信而事亲以诚所谓病乎在已者仁义存乎内彼圣贤者能推而广之而我蠢焉为衆人【蠢焉或作蠢然】所谓顺乎在天者贵贱穷通之来平吾心而随顺之不以累于其初所谓待已以信者已果能之人曰不能勿信也已果不能人曰能之勿信也孰信哉信乎已而已矣【方从阁杭本无果不至信也十字文録并上已字亦无今按此阁杭本之谬全无文理而方信之误矣】所谓事亲以诚者尽其心不夸於外先乎其质後乎其文者也【後上或有而字】尽其心不夸於外者不以已之得於外者为父母荣也名与位之谓也先乎其质者行也後乎其文者饮食旨甘以其外物供养之道也【行上或有文字旨甘或作甘旨道下或有者字非是】诚者不欺之名也待於外而後为养薄於质而厚於文斯其不类於欺欤果若是子之汲汲於科名以不得进为亲之羞者惑也速化之术如是而已古之学者惟义之问诚将学於太学愈犹守是说而埃见焉【犹或作独见下或有知字见胡旬切公时为博士也】愈白

与李翱书【与或作答】

使至辱足下书【或无足下字】欢愧来并不容于心嗟乎子之言意皆是也仆虽巧说何能逃其责邪然皆子之爱我多重我厚不酌时人待我之情而以子之待我之意使望於时人也仆之家本穷空重遇攻刼【贞元十五年宣武军乱】衣服无所得养生之具无所有家累仅三十口携此将安所归托乎舍之入京不可也挈之而行不可也足下将安以我为谋哉【此句或无将安】此一事耳足下谓我入京城有所益乎【谓上或有诚字城或作诚】仆之有子犹有不知者【之下或有所字】时人能知我哉持仆所守驱而使奔走伺候公卿间开口论议其安能有以合乎【驱或作执今按作驱即属下句作执即属上句详下文亦有复驱之使就其故地之文而持守执三守语太繁复故当以驱为正】仆在京城八九年【谓应进士时】无所取资日求於人以度时月当时行之不觉也今而思之如痛定之人思当痛之时不知何能自处也今年加长矣【长下或有已字非是】复驱之使就其故地是亦难矣所贵乎京师者不以明天子在上贤公卿在下布衣韦带之士谈道义者多乎【不以上或有得字】以仆皇皇於其中能上闻而下达乎其知我者固少【或无我字】知而相爱不相忌者又加少内无所资外无所从终安所为乎嗟乎子之责我诚是也爱我诚多也今天下之人有如子者乎【或无今字】自尧舜以来士有不遇者乎无也子独安能使我洁清不污而处其所可乐哉【或无安字】非不愿为子之所云者【为或作如】力不足势不便故也仆於此岂以为大相知乎【此谓张建封幕府谓在南阳公幕中也】累累随行役役逐队饥而食饱而嬉者也【饱而嬉或作渴而饮杭本嬉作悲云悲者悲其不得所从故也皆非是】其所以止而不去者以其心诚有爱於仆也然所爱於我者少不知我者犹多吾岂乐於此乎哉将亦有所病而求息於此也【所爱或作其爱少上或有尤字非是知下或有於字犹或作尤非是吾下或无岂字】嗟乎子诚爱我矣子之所责於我者诚是矣然恐子有时不暇责我而悲我不暇悲我而自责且自悲也及之而後知履之而後难耳孔子称顔回一簞食一瓢饮【孔子上或有昔者字瓢饮下一有在陋巷字】人不堪其忧回也不改其乐彼人者有圣者为之依归【圣上或无有字依上或无之字】而又有簞食瓢饮足以不死【食去声】其不忧而乐也岂不易哉若仆无所依归无簞食无瓢饮无所取资则饿而死其不亦难乎子之闻我言亦悲矣

嗟乎子亦慎其所之哉离违久乍还侍左右当日懽喜故专使驰此候足下意并以自解【此候杭本作候此今按此与与孟东野书春已时尽相似说已见於彼矣】愈再拜

东雅堂昌黎集注卷十六

卷十七

<集部,别集类,汉至五代,东雅堂昌黎集注>

钦定四库全书

东雅堂昌黎集注卷十七

书

上张仆射书【建封字本立兖州人贞元四年为徐州刺史徐泗濠节度使十二年加检校右仆射公以十五年二月脱汴州之乱依建封于徐秋建封辟为节度推官至是供职书意以晨入夜归为不可其不谄屈於富贵之人可知矣】

九月一日愈再拜受牒之明日在使院中有小吏持院中故事节目十余事来示愈其中不可者有自九月至明年二月之终皆晨入夜归非有疾病事故辄不许出当时以初受命不敢言古人有言曰人各有能有不能若此者非愈之所能也【愈下或无之字】抑而行之必发狂疾上无以承事於公忘其将所以报德者【忘或作望非是】下无以自立丧失其所以为心【丧或作哀或校作衷皆非是】夫如是则安得而不言凡执事之择於愈者非为其能晨入夜归也必将有以取之苟有以取之虽不晨入而夜归其所取者犹在也【或无将字与而字所取下亦无者字】下之事上不一其事上之使下不一其事量力而任之度才而处之其所不能不强使为是故为下者不获罪於上为上者不得怨於下矣【或作也】孟子有云今之诸侯无大相过者以其皆好臣其所教而不好臣其所受教【诸本皆如此阁本二教字并作命方从杭蜀苑教作受命所受教作所以受命云考孟子上语当作受命今按依孟子则上语不当有受字下语不当有以字而二命字本皆作教童而习者皆能知之不知方氏何据而云考孟子上语当作受命也】今之时与孟子之时又加远矣皆好其闻命而奔走者不好其直已而行道者闻命而奔走者好利者也直已而行道者好义者也未有好利而爱其君者未有好义而忘其君者【文苑而爱作而能爱而忘作而不爱二语并无者字】今之王公大人惟执事可以闻此言惟愈於执事也可以此言进【此言进或作言此言或作言此事】愈蒙幸於执事其所从旧矣若寬假之使不失其性加待之使足以为名寅而入尽辰而退申而入终酉而退【终或作中】率以为常亦不废事天下之人闻执事之於愈如是也【闻下或无执事之三字】必皆曰执事之好士也如此【好或作待杭蜀文苑只此句有也字余并无今从之】执事之待士以礼如此执事之使人不枉其性而能有容如此执事之欲成人之名如此执事之厚於故旧如此又将曰韩愈之识其所依归也如此【阁本惟此句有也字余并无今从之】韩愈之不谄屈於富贵之人如此韩愈之贤能使其主待之以礼如此【能上或无贤字】则死於执事之门无悔也【则上或有苟如此三字】若使随行而入逐队而趋言不敢尽其诚道有所屈於已【或无所字】天下之人闻执事之於愈如此皆曰执事之用韩愈哀

其穷收之而已耳韩愈之事执事不以道利之而已耳苟如是虽日受千金之赐一岁九迁其官感恩则有之矣将以称於天下曰知已知已则未也【或无复出知已二字】伏惟哀其所不足【哀下方有察字按下方合有察字此不当有】矜其愚不録其罪察其辞而垂仁采纳焉愈恐惧再拜

答胡生书【或作胡直均均或作钧李肇国史补云文公引致後辈为求科第多有投书请益者人谓韩门弟子云直均之求谒於公望其称荐於公卿为科第计公答之以不知者乃用是为谤信当时韩门弟子之衆也直均其後竟登贞元十九年第亦公称道所致耶】

愈顿首胡生秀才足下雨不止薪刍价益高生远客怀道守义非其人不交得无病乎斯须不展思想无已【斯须或作顷渴或作倾渴皆非是】愈不善自谋口多而食寡然犹月有所入以愈之不足知生之穷也至於是而不悔非信道笃者其谁能之所示千百言略不及此而以不屡相见为忧谢相知为急谋道不谋食乐以忘忧者生之谓也顾无以当之如何【当或作答】夫别是非分贤与不肖公卿贵位者之任也愈不敢有意於是如生之徒於我厚者知其贤时或道之於生未有益也【未有下或有所字】不知者乃用是为谤不敢自爱惧生之无益而有伤也如之何若曰彼有所合吾不利其求则庶可矣【或无其字 今按後卷答陈商书云文虽工不利於求则此其字亦当作於】生又离乡邑去亲爱甘辛苦而不厌者本非为是也如之何愈之於生既不变矣戒生无以示愈者语於人【语或作谓】用息不知者之谤生慎从之讲礼释友二篇比旧尤佳【或作嘉又作加】志深而喻切因事以陈辞古之作者正如是尔愈顿首

与于襄阳书【与或作上于頔字允元贞元十四年九月以工部尚书为山南东道节度使頔音廸】

七月三日【书称守国子四门博士当在贞元十八年秋也】将仕郎守国子四门博士韩愈谨奉书尚书阁下士之能享大名显当世者莫不有先达之士负天下之望者为之之前焉【士之上或有夫字达或作进】士之能垂休光照後世者亦莫不有後进之士负天下之望者为之之後焉莫为之之前虽美而不彰莫为之後虽盛而不传是二人者未始不相须也然而千百载乃一相遇焉岂上之人无可援下之人无可推欤何其相须之殷而相遇之疎也其故在下之人负其能不肯諂其上上之人负其位不肯顾其下故高材多戚戚之穷盛位无赫赫之光是二人者之所为皆过也未尝干之不可谓上无其人未尝求之不可谓下无其人愈之诵此言久矣未尝敢以闻於人【矣下或有而字】侧闻阁下抱不世之才【抱阁杭蜀本作苞文选包多作苞陈寔碑所谓苞灵曜之纯是也蜀世下仍有出字文苑有出人字 今按韩公未必固用选语且从诸本作抱】特立而独行道方而事实【立下或无而字】卷舒不随乎时文武唯其所用岂愈所谓其人哉抑未闻後进之士有遇知於左右获礼於门下者岂求之而未得邪【或无而字】将志存乎立功而事专乎报主【将或作其】虽遇其人未暇礼邪何其宜闻而久不闻也愈虽不材其自处不敢後於恒人阁下将求之而未得欤古人有言请自隗始【郭隗答燕昭王语事见史记战国策言下或有曰字非是隗五贿切】愈今者惟朝夕刍米仆赁之资是急不过费阁下一朝之享而足也【享或作宴】如曰吾志存乎立功而事专乎

报王【功下或无而字】虽遇其人未暇礼焉【或作哉非是】则非愈之所敢知也世之龊龊者既不足以语之【以一作与以与义通 龊测角切】磊落奇伟之人【磊鲁猥切】又不能听焉则信乎命之穷也谨献旧所为文一十八首如赐览观亦足知其志之所存愈恐惧再拜

与崔羣书【羣字敦诗清河人贞元八年中进士第时为宣州判官而公为国子四门博士】

自足下离东都【公时在徐州幕】凡两度枉问寻承已达宣州主人仁贤同列皆君子【贞元十二年八月以崔衍为宣歙观察使羣与李博俱在幕府公送杨仪之序亦云当今藩翰之宾客惟宣州多贤与之游者二人焉陇西李博清河崔羣】虽抱羁旅之念亦且可以度日无入而不自得乐天知命者固前修之所以御外物者也况足下度越此等百千辈【或无百千辈三字 今按诸本及详文势皆当有此三字但不知指何人而言耳】岂以出处近远累其灵台邪【灵台字见庄子】宣州虽称清凉高爽然皆大江之南风土不并以北将息之道当先理其心心闲无事然後外患不入【或无无事二字患或作达或无不入二字皆非是】风气所宜可以审备小小者亦当自不至矣足下之贤虽在穷约犹能不改其乐况地至近官荣禄厚亲爱尽在左右者邪所以如此云云者以为足下贤者宜在上位托於幕府则不为得其所是以及之乃相亲重之道耳非所以待足下者也【也上或无者字】仆自少至今从事於往还朋友闲一十七年矣日月不为不久所与交往相识者千百人非不多【或无所与二字】其相与如骨肉兄弟者亦且不少或以事同或以艺取或慕其一善或以其久故或初不甚知而与之已密其後无大恶因不复决舍或其人虽不皆入於善而於已已厚虽欲悔之不可【悔之下或有亦字不可或作可乎】凡诸浅者固不足道深者止如此【诸或作此或无诸字】至於心所仰服考之言行而无瑕尤【服或作伏言或作百又无尤字皆非是】窥之阃奥而不见畛域明白淳粹辉光日新者惟吾崔君一人仆愚陋无所知晓然圣人之书无所不读其精麤巨细出入明晦虽不尽识抑不可谓不涉其流者也以此而推之以此而度之诚如足下出羣拔萃无谓仆何从而得之也与足下情义宁须言而后自明邪【自明或作明白非是】所以言者惧足下以为吾所与深者多不置白黑於胷中耳【为上或无以字】既谓能粗知足下而复惧足下之不我知亦过也比亦有人说足下诚尽善尽美抑犹有可疑者仆谓之曰何疑疑者曰君子当有所好恶好恶不可不明【上好恶字或作法非是然本字亦未安】如清河者人无贤愚无不说其善伏其为人以是而疑之耳【伏或作服或无耳字】仆应之曰凤皇芝草贤愚皆以为美瑞青天白日奴隶亦知其清明譬之食物【食上或有於字】至於遐方异味则有嗜者有不嗜者至於稻也粱也脍也?也【?音蔗】岂闻有不嗜者哉疑者乃解解不解於吾崔君无所损益也【於吾或作吾於非是或无所字】自古贤者少不肖者多自省事已来又见贤者恒不遇不贤者比肩青紫贤者恒无以自存不贤者志满气得贤者虽得卑位则旋而死【旋或作旅非是】不贤者或至眉寿不知造物者意竟如何【或无意字非是】无乃所好恶与人异心哉又不知无乃都不省记任其死生寿夭邪未可知也人固有薄卿相之官千乘之位而甘陋巷菜羹者同是人也犹有好恶如此之异者况天之与人当必异其所好恶无疑也合於天而乖於人何害况又时有兼得者邪崔君崔君无怠无怠【或作崔君无怠崔君无怠】仆无以自全活者从一官於此转困穷甚思自放於伊颍之上当亦终得之【伊颍二水名颍之或作颍水】近者尤衰惫【蒲拜切】左车第二牙无故动摇脱

去【左氏僖公五年辅车相依唇亡齿寒注云车谓车牙 车尺奢切】目视昏花寻常闲便不分人颜色两鬓半白头髮五分亦白其一须亦有一茎两茎白者【亦白或作已白其一或无一字鬓或作鬢】仆家不幸诸父诸兄皆康强早世如仆者又可以图於久长哉以此忽忽思与足下相见一道其怀小儿女满前能不顾念【或无小字或无女字满下或有眼字能或不作不能非是】足下何由得归北来仆不乐江南官满便终老嵩下足下可相就仆不可去矣珍重自爱慎饮食少思虑惟此之望愈再拜

与陈给事书【京字庆复大历元年中进士第贞元十九年将禘京奏禘祭必尊太祖正昭穆帝嘉之自考功员外迁给事中公於十九年冬贬阳山此书当在京迁给事後作】

愈再拜愈之获见於阁下有年矣始者亦尝辱一言之誉贫贱也衣食於奔走不得朝夕继见其後阁下位益尊伺候於门墙者日益进【候下或无於字】夫位益尊则贱者日隔【或无益字或无日字】伺候於门墙者日益进则爱博而情不专愈也道不加修而文日益有名夫道不加修则贤者不与文日益有名则同进者忌始之以日隔之疏加之以不专之望以不与者之心而听忌者之说由是阁下之庭无愈之迹矣【专上杭本有辱字忌者或作忌始生之迹上或有也字皆非是】去年春亦尝一进谒於左右矣温乎其容若加其新也【若上或有其字也下或有矣字下句亦然皆非是或又疑加当作嘉乃与下文闵字为对】属乎其言若闵其穷也【属或厉或从文苑云属者犹附属连属之属决非厉字也】退而喜也以告於人其後如东京取妻子又不得朝夕继见及其还也亦尝一进谒於左右矣邈乎其容若不察其愚也悄乎其言若不接其情也【若上或并有其字愚或作言其情或作於情】退而惧也不敢复进今则释然悟翻然悔曰其邈也乃所以怒其来之不继也其悄也乃所以示其意也【示或作不尽】不敏之诛无所逃避不敢遂进辄自疏其所以并献近所为复志赋已下十首为一卷卷有标轴【所为下或有文字下下或有赋字非是】送孟郊序一首生纸写【邵氏闻见录云唐人有生纸有熟纸所谓妍妙辉光者其法不一生纸非有丧故不用退之云送孟郊序用生纸急於自解不暇择耳今人少有知者】不加装饰皆有楷字注字处【楷下或无字字】急於自解而谢不能俟更写合下取其意而略其礼可也【意或作言】愈恐惧再拜

答冯宿书【宿字拱之婺州东阳人公同年进士分教东都时作】

垂示仆所阙非情之至仆安得闻此言【或无得字】朋友道缺絶久【诸本久下有矣字方从阁杭本云汉武纪夷狄无义所从来久语自此也 今按矣字有无无利害姑从方本但未有以见其必用汉纪中语而决无此字耳】无有相箴规磨切之道仆何幸乃得吾子仆常闵时俗人有耳不自闻其过懔懔然惟恐已之不自闻也【懔音凛】而今而後有望於吾子矣然足下与仆交久仆之所守足下之所熟知在京城时嚣嚣之徒【嚣音枵】相訾百倍【訾音紫】足下时与仆居【仆居或作并居或无仆字或无居字】朝夕同出入起居亦见仆有不善乎然仆退而思之虽无以获罪於人亦有以获罪於人者【思下或无之字下获字或作服今按二句皆云获罪於人恐有誤字作服亦无理疑上句人字或是天字更详之】仆在京城一年不一至贵人之门人之所趋仆之所傲与已合者则从之游不合者虽造吾庐未尝与之坐【造或作居】此岂徒足致谤而已不戮於人则幸也追思之可为战栗寒心故至此已来

【已或作以】尅已自下虽不肖人至未尝敢以貌慢之况时所尚者邪以此自谓庶几无时患不知犹复云云也闻流言不信其行【礼记儒行久不相见闻流言不信其行行下孟切】呜呼不复有斯人也君子不为小人之恟恟而易其行【或无而字恟许勇切】仆何能尔委曲从顺向风承意【向或作望】汲汲恐不得合犹且不免云云命也可如何【且下或有惧字或无可字】然子路闻其过则喜禹闻昌言则下车拜【此本孟子之说车下或有而字】古人有言曰告我以吾过者吾之师也【过上或无吾字】愿足下不惮烦苟有所闻必以相告吾亦有以报子不敢虚也不敢忘也【下或有愈再拜字与卫中行书同或作顿首】

与卫中行书【中行字大受御史中丞晏之子贞元九年进士公始从董晋汴州张建封徐州二公甫卒而军皆乱大受喜公脱祸以书遗公公後寓东都作此书与之故言其穷居之状云】

大受足下辱书为赐甚大然所称道过盛岂所谓诱之而欲其至於是欤不敢当不敢当其中择其一二近似者而窃取之【一下或无二字】则於交友忠而不反於背面者少似近焉亦其心之所好耳行之不倦则未敢自谓能尔也不敢当不敢当【或无此六字】至於汲汲於富贵以救世为事者皆圣贤之事叶知其智能谋力能任者也【谋上或无能字谋下或有与字而属下句】如愈者又焉能之始相识时方甚贫衣食於人其後相见於汴徐二州仆皆为之从事日月有所入比之前时丰约百倍足下视吾饮食衣服亦有异乎然则仆之心或不为此汲汲也其所不忘於仕进者亦将小行乎其志耳此未易遽言也凡祸福吉凶之来似不在我惟君子得祸为不幸而小人得祸为恒君子得福为恒而小人得福为幸【为幸或作为不幸非是】以其所为似有以取之也必曰君子则吉小人则凶者不可也【吉下或有而字】贤不肖存乎已贵与贱祸与福存乎天【石大任曰韩愈谓贵与贱祸与福存乎天以予观之贵与贱存乎天可也祸与福存乎天则不可也盖祸与福在已而已孟子曰祸福无不自己求之者是祸与福皆存乎已欤】名声之善恶存乎人存乎已者吾将勉之存乎天存乎人者吾将任彼而不用吾力焉其所守者岂不约而易行哉足下曰命之穷通自我为之吾恐未合於道足下徵前世而言之则知矣若曰以道德为已任穷通之来不接吾心则可也穷居荒凉草树茂密出无驴马因与人絶一室之内有以自娱足下喜吾复脱祸乱不当安安而居迟迟而来也【而居或作於居非是】上张仆射第二书【公此书谏张建封击球事第二书者或指前论晨入夜归为第一书也观堂刘夷叔云退之谏张仆射击球书才数百言使人意动神悚子厚劝李睦州服气书费千余言乃反缓而不切人才相去不可及哉】

愈再拜以击球事谏执事者多矣【谏或作陈】谏者不休执事不止此非为其乐不可舍其谏不足听故哉【阁本蜀本如此而或从诸本哉作也今以下两句推之作哉近是盖此非至故哉十五字当作一句读之乃得其意或者又云哉字恐是邪字声讹为也今作邪字读之文理尤顺】谏不足听者辞不足感心也【心上或有人字】乐不可舍者患不能切身也【身上一有人字】今之言球之害者必曰有危堕之忧【堕或作坠下同】有激射之虞小者伤面目大者残形躯执事闻之若不闻者其意必曰进若习熟则无危堕之忧避能便捷则免激射之虞小何伤於面目大何累於形躯者哉愈今所言皆不在此其指要非以他事外物牵引相比也特以击球之闲之事明之耳【事上或无之字】马之与人情性殊异至於筋骸之相

束血气之相持安佚则适劳顿则疲者同也乘之有道步骤折中少必无疾老必後衰及以之驰球於场荡摇其心腑振挠其骨筋【或作筋骨】气不及出入走不及回旋远者三四年近者一二年无全马矣然则球之害於人也决矣【诸本皆如此杭本决下无矣字今按上句有矣字此句亦须有矣字语势方杀杭本只是偶然脱漏不谓後人信之过甚而使韩公为是歇後不了之语也今当以诸本为正】凡五藏之系络甚微坐立必悬垂於胷臆之闲【臆或作腹】而以之颠顿驰骋呜呼其危哉春秋传曰夫有尤物足以移人苟非德义则必有祸【左氏昭二十八年叔向之辞】虽岂弟君子神明所扶持然广虑之深思之亦养寿命之一端也【虽或作惟或无一字】愈恐惧再拜

与冯宿论文书【或无论文字公此书於汴州作】

辱示初筮赋【筮或作仕】实有意思但力为之古人不难到但不知直似古人亦何得於今人也【何下或有有字或有有字而无得字】仆为文久每自称意中以为好则人必以为恶矣【则人或作即人必下或无以字】小称意人亦小怪之【亦上或有即字】大称意即人必大怪之也时时应事作俗下文字下笔令人慙及示人则人以为好矣【俗下下或无文字二字而有者字则人或无则字】小慙者亦蒙谓之小好大慙者即必以为大好矣不知古文直何用於今世也然以竢知者知耳【直或作眞或无今字然以或作然而】昔扬子云着太玄人皆笑之子云之言曰【或无之言二字】世不我知无害也後世复有扬子云必好之矣子云死近千载竟未有扬子云可叹也其时桓谭亦以为雄书胜老子【或无为字】老子未足道也子云岂止与老子争强而已乎此未为知雄者【未为或作不为】其弟子侯芭颇知之以为其师之书胜周易【师上或无其字】然侯之他文不见於世不知其人果如何耳以此而言作者不祈人之知也明矣直百世以竢圣人而不惑质诸鬼神而不疑耳【或作矣】足下岂不谓然乎近李翱从仆学文颇有所得然其人家贫多事未能卒其业有张籍者年长於翱【长上或无年字】而亦学於仆其文与翱相上下一二年业之庶几乎至也【几下或有至字】然闵其弃俗尚而从於寂寞之道以之争名於时也【此下或有未知果能不叛去乎八字又或疑此句上有然字意无所承恐所增多八字当在然字之上未知是否】久不谈聊感足下能自进於此故复发愤一道【久下或有而字非是】愈再拜与祠部陆员外书【外下或有荐士字贞元十八年中书舍人权德舆典贡举陆惨佐之公时为四门博士荐侯喜等十人于惨尉迟汾侯云长沈杞李翊皆以其年登科侯喜以十九年刘述古以二十一年李绅以元和元年张後余张弘以二年皆相继登科独韦羣玉不见于记非公荐进之力欵宜当是时皆争为韩门弟子也】

执事好贤乐善孜孜以荐进良士明白是非为已任方今天下一人而已愈之获幸於左右其足迹接於门墙之间【或无迹字】陞乎堂而望乎室者亦将一年于今矣念虑所及辄欲不自疑外竭其愚而道其志况在执事之所孜孜为已任者得不少助而张之乎诚不自识其言之可采与否其事则小人之事君子尽心之道也天下之事【天下之事或作天下之士谓有待而为则事字为当】不可遽数又执事之志或有待而为未敢一二言也今但言其最近而切者尔执事之与司贡士者相知诚深矣【诚或作识】彼之所望於执事执事之所以待乎彼者可谓至而无间疑矣【或无矣字】彼之职在乎得人执事之志在乎进贤如得其人而

授之所谓两得其求顺乎其必从也执事之知人其亦博矣夫子之言曰举尔所知然则愈之知者亦可言矣【或作矣或作也】文章之尤者有侯喜者【贞元十九年喜中进士第终国子主簿】侯云长者【贞元十八年云长中进士第】喜之家在开元中衣冠而朝者兄弟五六人及喜之父仕不达弃官而归喜率兄弟操耒耜而耕于野【或无于野字】地薄而赋多不足以养其亲则以其耕之暇【其耕之暇或作非耕之时或作其暇之时】读书而为文以干於有位者而取足焉喜之文章学西京而为也【京或作汉或作汉西京】举进士十五六年矣云长之文执事所自知其为人淳重方实可任以事其文与喜相上下有刘述古者【贞元二十一年述古中进士弟】其文长於为诗文丽而思深当今举於礼部者其诗无与为比而又工於应主司之试其为人温良诚信无邪佞诈妄之心【邪佞诈妄或作邪妄诈伪或作邪妄诈佞】强志而婉容和平而有立其趋事静以敏着美名而负屈称者其日已久矣【或无矣字或作为日久矣】有韦羣玉者【贞元十七年吏部侍郎韦夏卿为京兆尹公所荐十人九弟独羣玉不见于登科记岂有司远嫌而黜之耶摭言云韦纾即羣玉也】京兆之从子其文有可取者其进而未止者也其为人贤而有材【方作行 今按贤即是有行方语为赘】志刚而气和乐於荐贤为善其在家无子弟之过居京兆之侧遇事辄争不从其令而从其义求子弟之贤而能业其家者羣玉是也【能上或无而字】凡此四子皆可以当执事首荐而极论者主司疑焉则以辨之问焉则以告之未知焉则殷勤而语之【语或作论或无有字】期乎有成而後止可也有沈杞者【贞元十八年杞中进士第】张荪者【元和二年弘中进士第荪或作弘与登科记同】尉迟汾者【贞元十八年汾中进士第】李绅者【绅元和元年进士第会昌中为相】张後余者【元和三年後余中进士第】李翊者【贞元十八年翊中进士第】或文或行皆出羣之才也凡此数子与之足以收人望得才实主司疑焉则与解之【与解或作以解】问焉则以对之广求焉则以告之可也往者陆相公司贡士【贞元八年陆贽知举贾棱等二十二人登第八与焉】考文章甚详愈时亦幸在得中【或无幸字】而未知陆之得人也其後一二年所与及第者皆赫然有声原其所以亦由梁补阙肃王郎中础佐之【肃字敬之础大历七年中第】梁举八人无有失者【欧阳詹传云詹与韩愈李观李纬崔羣王涯冯宿庾承宣聯第天下下选时称龙虎榜梁举八人疑此是也】其余则王皆与谋焉陆相之考文章甚详也待梁与王如此不疑也梁与王举人如此之当也【人下或无如此字】至今以为美谈自后主司不能信人人亦无足信者故蔑蔑无闻【蔑蔑或作蔑然】今执事之与司贡士者有相信之资谋行之道【谋上或有与字】惜乎其不可失也方今在朝廷者多以游讌娱乐为事独执事眇然高举有深思长虑为国家树根本之道宜乎小子之以此言闻於左右也愈恐惧再拜

卷十八

钦定四库全书

东雅堂昌黎集注卷十八

书

与凤翔邢尚书书【或作京西节度使邢尚书邢谓邢君牙也】

愈再拜布衣之士身居穷约不借势於王公大人则无以成其志王公大人功业显着不借誉於布衣之士则无以广其名是故布衣之士虽甚贱而不谄王公大人虽甚贵而不骄其事势相须其先後相资也今合下为王爪牙为国藩垣威行如秋仁行如春戎狄弃甲而远遁朝廷高枕而不虞是岂负大丈夫平生之志愿哉岂负明天子非常之顾遇哉【下岂上或有是字】赫赫乎洸洸乎【或无洸洸乎三字洸音光】功业逐日以新名声随风而流宜乎謹呼海隅高谈之士奔走天下慕义之人使或愿驰一传【传驿通也周礼太仆传达於四方音转】或愿操一戈【操上或无或愿二字】纳君於唐虞收地於河湟【或作隍】然而未至乎是者盖亦有说云【盖亦或作亦盖说上有其字非是】岂非待士之道未甚厚遇士之礼未甚优请粗言其事合下试详而听之夫士之来也必有求於合下夫以贫贱而求於富贵正其宜也合下之财不可以徧施於天下在择其人之贤愚而厚薄等级之可也假如贤者至合下乃一见之愚者至不得见焉则贤者莫不至而愚者日远矣【或无日字】假如愚者至合下以千金与之贤者至亦以千金与之则愚者莫不至而贤者日远矣【亦或作又杭本无贤者至与之九字非是日或作亦】欲求得士之道尽於此而已欲求士之贤愚在於精鉴博采之而已【得或作待已下或并有矣字】精鉴於已固已得其十七八矣【或无固字】又博采於人百无一二遗者焉若果能是道【能或作行】天下之下之竹帛不足书合下之功德【下或有矣字】天下之金石不足颂阁下之形容矣愈也布衣之士也【布上或有固字士下或无也字】生七岁而读书十三而能文二十五而擢第於春官以文名於四方前古之兴亡未尝不经於心也当世之得失未尝不留於意也常以天下之安危在边【常或作尝】故六月于迈来观其师及至此都徘徊而不能去者【此上或无至字不上或无而字能下或有速字去或作进不能去或作不敢遽进】诚悦合下之义愿少立於堦墀之际【或作下】望见君子之威仪也居十日而不敢进者诚以左右无先为容【进下或有谒字诚字或在容字下容下或有也字或无以左至为容七字皆非是】惧合下以衆人视之则杀身不足以灭耻徒悔恨於无穷故先此书序其所以来之意合下其无以为狂而以礼进退之幸甚幸甚愈再拜【先下或有陈字书下或有陈字皆非是来之下或复有之字其无以或无其字或无以字洪庆善年谱云公以贞元八年壬申二十五岁中第十一年乙亥二十八岁上宰相书求官不得而归出潼关作二鸟赋又据程致道说既出潼关因游凤翔上邢君牙书今按程说大误盖赋序言五月过潼关而此书言六月至凤翔潼关在长安之东风翔在长安之西相距六】

【百余里岂有五月方东出潼关而六月遽能复西至凤翔之理此书决非此年所作必是八年以後十年以前尝至凤翔而有此书及岐山下等诗也】

为人求荐书

某闻木在山马在肆遇之而不顾者【遇或作过】虽日累千万人未为不材与下乘也及至匠石过之而不睨【匠石字见庄子】伯乐遇之而不顾【伯乐顾马事见战国策】然後知其非栋梁之材超逸之足也以某在公之宇下非一日而又辱居姻娅之後是生於匠石之园长於伯乐之廐者也於是而不得知假有见知者千万人亦何足云【或无有字云下或有耳字或有尔字】今幸赖天子每岁诏公卿大夫贡士若某等比咸得以荐闻【若下或有干字而无比字或无等字】是以冒进其说以累於执事亦不自量已然执事其知某如何哉昔人有鬻马不售於市者知伯乐之善相也从而求之伯乐一顾价增三倍某与其事颇相类是故终始言之耳某再拜【诸本皆如此独阁杭本以其知某如何哉为其如某何哉而无昔人以下四十三字今按此书本为人求荐而杭本曰执事其如某何哉则似决以其人力不能荐已矣故诸本或作执事其知某何如哉语意似協而亦未有恳切必求之意又无结末收拾之语故又继以鬻马之说文意方似粗足然亦重复无奇文意首尾不甚通畅恐尚有脱误处更详之】

应科目时与人书【或作与韦舍人即贞元九年宏词试也】

月日愈再拜【一云应博学宏词前进士韩愈谨再拜上书舍人合下】天池之滨大江之濱【扶文切】曰有怪物焉盖非常鳞凡介之品彙匹俦也【匹或作比】其得水变化风雨上下於天不难也【天下或有地字】其不及水盖寻常尺寸之间耳无高山大陵旷途絶险为之关隔也然其穷涸不能自致乎水为獫狫之笑者【礼记獫祭鱼选獫狫啖 乎匳空 獫音宾】盖十八九矣【或无十字矣或作年方从谢本云唐举子礼部及第例须守选选未滿或就制举或书判拔萃方获出仕此书谓其不及水盖寻常尺寸之间是专指宏词试也言世之嗤笑者十而八九乃上宰相书所谓得其所者争笑之是也本多作八九年其义非也】如有力者哀其穷而运转之盖一举手一投足之劳也然是物也负其异於衆也且曰烂死於沙泥吾宁乐之若俛首帖耳摇尾而乞怜者非我之志也是以有力者遇之熟视之若无覩也其死其生固不可知也今又有力者当其前矣聊试仰首一鸣号焉庸詎知有力者不哀其穷而忘一举手一投足之劳而转之清波乎【而转或作而输转之清波作转致之波涛】其哀之命也其不哀之命也知其在命而且鸣号之者亦命也【鸣或作呼鸣下或有且字或作而鸣且号】愈今者实有类於是是以忘其疎愚之罪而有是说焉阁下其亦怜察之

答刘正夫书【正或作岩此书谓贤尊给事者刘伯刍也伯刍三子寬夫端夫岩夫无名正夫者故蜀本刊作岩岂正夫即岩夫邪今且从旧】

愈白进士刘君足下辱賤教以所不及既荷厚赐且愧其诚然幸甚幸甚凡学进士者於先进之门【或无凡字】何所不往先进之於後輩苟见其至宁可以不答其意邪来者则接之举

城士大夫莫不皆然而愈不幸独有接後輩名【接後輩下或有之字】名之所存謗之所归也有来问者不敢不以诚答或问为文宜何师必谨对曰宜师古圣贤人曰古圣贤人所为书具存辞皆不同宜师必谨对曰师其意不师其辞又问曰文宜易宜难必谨对曰无难易惟其是尔如是而已【诸本无尔如是字已下有矣字谢枝矣作尔或作耳李习之云天下之语文章其爱难者则曰文章宜深而不当易其爱易者则曰文章宜通不当难此皆偏滞而不流未识文章之所主也书曰朕圣谗说殄行震惊朕师诗曰苑彼柔桑其下侯甸此非易也书曰允恭克让光被四表格于上下诗曰千亩之闲兮桑者闲闲兮此非难也】非固开其为此而禁其为彼也夫百物朝夕所见者人皆不注视也及覩其异者则共观而言之夫文岂异於是乎汉朝人莫不能为文独司马相如太史公刘向扬雄为之最然则用功深者其收名也远若皆与世沈浮【或作浮沈】不自树立虽不为当时所怪亦必无後世之传也【李习之云义虽深理虽当辞不工者不成文宜不能传也文理义三者兼并乃能独立於一时而不泯减於後代能必传也仲尼曰言之不文传之不远】足下家中百物皆赖而用也然其所珍爱者必非常物夫君子之於文岂异於是乎今後进之为文【或无进字】能深探而力取之以古圣贤人为法者虽未必皆是要若有司马相如太史公刘向扬雄之徒出【若上或无要字】必自於此不自於寻常之徒也【不下或无自字】若圣人之道不用文则已用则必尚其能者能者非他能自树立不因循者是也有文字来谁不为文然其存於今者必其能者也顾常以此为说耳【顾常或作必当或作顾当】愈於足下忝同道而先进者又常从游於贤尊给事既辱厚赐又安得不进其所有以为答也足下以为何如【或作如何】愈白

答殷侍御书【殷侑也或注銜字非是公尝荐侑堪任御史大夫太常博士後又有序送其自太常博士迁尚书虞部员外郎兼侍御史副李孝诚使回鹘则知殷侍御为侑无疑序作於元和十二年此书曰八月益凉则明年八月欵】

某月日愈顿首辱赐书周览累日竦然增敬蹙然汗出以慙愈於进士中粗为知读经书者一来应举事随日生虽欲加功竟无其暇游从之类相熟相同不教不学闷然不见已缺日失月亡以至於老【月或作日】所谓无以自别於常人者每逢学士真儒叹息踟躇【上子六反下资昔反】愧生於中顔变於外不复自比於人【句】前者蒙示新注公羊春秋【前者或作前人非是】又闻口授指略私心喜幸恨遭逢之晚愿尽传其学职事羈縻未得继请怠惰因循不能自强此宜在摈而不教者今反谓少知根本其辞章近古可令叙所注书惠出非望承命反侧善诱不倦斯为多方敢不喻所指八月益凉时得休假【或作暇】悦矜其拘缀不得走请务道之传而赐辱临执经座下获卒所闻是为大幸况近世公羊学几絶何氏注外不见他书【後汉何休作春秋公羊解詁】圣经贤传屏而不省要妙之义无自而寻非先生好之乐之味於衆人之所不味务张而明之其熟能勤勤缱绻若此之至【缱绻或作拳拳】固鄙心之所最急者如遂蒙开释章分句断其心晓然直使序所注挂名经端自托不腐其又奚辞【或作词】将惟先生所以命愈再拜

答陈商书【公为国子先生时商未第以文求益而答之也商後元和九年进士第唐志有商集十七卷】

愈白辱惠书语高而旨深三四读尚不能通晓茫然增愧赧又不以其浅弊无过人知识且喻以所守幸甚【知或作智且或作具】愈敢不吐情实然自识其不足补吾子所须也齐王好竽有求仕於齐者操瑟而往【或无者字】立王之门三年不得入叱曰吾瑟鼓之能使鬼神上下吾鼓瑟合轩辕氏之律吕【诸本皆如此方独以阁杭本以律吕二字为宫字云国语琴瑟尚宫钟尚羽重者从细轻者从大今按方氏所引国语是也然凡作乐者八音并奏而其一音之中大者为宫细者为羽莫不皆有五声之序又以六律六吕节之然後声之大细得其次第而不差书所谓声依永律和声而八音克谐是也其曰琴瑟尚宫者非谓琴瑟只有宫声也但以丝声太细恐其掩於衆乐而不可听故大其器使其声重大而与衆乐相称耳其中固自有五声而声必中律吕也方意似以琴瑟专为宫声而不用它律吕者故特取此误本耳今从诸本】客骂之曰王好竽而子鼓瑟虽工如王不好何【瑟字句絶诸本如此方独以鼓为瑟而为句絶其下瑟字乃属下句曾本上亦作瑟而下作之皆非是】是所谓工於瑟而不工於求齐也【求齐或作竽或无也字皆非是】今举进士於此世求禄利行道於此世【求上或有也字道於下或无此字】而为文必使一世人不肖者不好得无与操瑟立齐门者比欬文虽工不利於求【虽或作诚或虽上有诚字】求不得则怒且怨不知君子必尔为不也故区区之心每有来访者皆有意於不肖者也略不辞让遂尽言之【言下或无之字】惟吾子谅察愈白与孟尚书书【孟下一有简字孟简字几道德州平昌人最嗜佛尝与刘伯刍归登萧俛译次梵言者公元和十四年以言佛骨贬潮州与潮僧大颠游人遂云奉佛氏其冬移袁州明年简移书言及公作此书答之】

愈白行官自南回过吉州【元和十五年贬太子宾客分司孟简吉州司马】得吾兄二十四日手书数番忻悚兼至未审入秋来眠食何似伏惟万福来示云有人传愈近少信奉释氏此传之者妄也【或无吉州二字下云被吾兄二十四日手示披读数番阁杭本无行官至来示三十八字但云蒙惠书今按阁杭乃节本诸本乃其本文今从之信此传之阁杭蜀本无此四字】潮州时【元和十四年正月公谪潮州】有一老僧号大颠颇聪明识道理远地无可与语者【无下或有所字无与者字】故自山召至州郭留十数日实能外形骸以理自胜不为事物侵乱【司马温公书心经後曰世称韩文公不喜佛尝排之予观其与孟尚书论大颠云能以理自胜不为事物侵乱乃知公於书无所不观盖尝徧观佛书取其精粹而排其糟粕耳不然何以知不为事物侵乱为学佛者所先耶】与之语虽不尽解要自胷中无滞碍以为难得因与来往【要自至难得十一字诸本皆如此阁杭蜀本删胷中无滞碍五字自又或作且今按此书称许大颠之语多为後人妄意隐避删节太过故多脱落失其正意如上两条犹无大利害若此语中删去五字则要自以为难得一句不复成文理矣盖韩公之学见於原道者虽有以识夫大用之流行而於本然之全体则疑其有所未睹且於日用之间亦未见其有以存养省察而体之於身也是以虽其所以自任者不为不重而其平生用力深处终不离乎文字言语之工至其好乐之私则又未能卓然有以自拔於流俗所与游者不过一时之文士其於僧道则亦仅得毛于畅观灵惠之流耳是其身心内外所立所资不越乎此亦何所据以为息邪距詖之本而充其所以自任之心乎是以一旦放逐憔悴亡聊之中无复平日饮博过从之乐方且郁郁不能自遣而卒然见夫瘴海之滨异端之学乃有能以义理自胜不为事物侵乱之人与之语虽不尽解亦岂不足以荡涤情累而暂空其滞碍之怀乎然则凡此称誉之言自不必讳而於公所谓不求其福不畏其祸不学其道者初亦不相妨也虽然使公於此能因

彼稊稗之有秋而悟我黍?之未熟一旦翻然反求诸身以尽圣贤之蘊则所谓以理自胜不为外物侵乱者将无复羨於彼而吾之所以自任者益恢乎其有余地矣岂不伟哉】及祭神至海上遂造其庐及来袁州留衣服为别乃人之情非崇信其法求福田利益也孔子云丘之祷久矣凡君子行已立身自有法度圣贤事业具在方册可效可师仰不愧天俯不愧人内不愧心积善积恶殃庆自各以其类至【庆下或无自字】何有去圣人之道舍先王之法而从夷狄之教以求福利也诗不云乎恺悌君子求福不回【见诗旱麓篇】传又曰不为威惕不为利疚【见左氏昭公二十年】假如释氏能与人为祸崇【或作福】非守道君子之所惧也况万万无此理且彼佛者果何人哉其行事类君子邪小人邪若君子也必不妄加祸於守道之人如小人也其身已死其鬼不灵天地神祇昭布森列非可诬也【布森或作森布 今按公进平淮西碑状亦有森列字可】考又肯令其鬼行胷臆作威福於其闲哉进退无所据而信奉之亦且惑矣【或作非大惑欤】且愈不助释氏而排之者其亦有说孟子云【子下或有有字】今天下不之杨则之墨杨墨交乱而圣贤之道不明【或复出圣贤之道不明六字】则三纲沦而九法斲【都故切】礼乐崩而异端横【户孟切】几何其不为禽兽也故曰能言拒杨墨者皆圣人之徒也扬子云云【或作曰】古者杨墨塞路孟子辞而辟之廓如也夫杨墨行正道废且将数百年以至於秦卒灭先王之法烧除其经【至或作埃非是其经或作经书或下有书字】坑杀学士天下遂大乱及秦灭汉兴且百年尚未知修明先王之道其後始除挟书之律稍求亡书招学士经虽少得尚皆残缺十亡二三【尚皆或无尚字或作皆尚】故学士大夫多老死新者不见全经不能尽知先王之事各以所见为守分离乖隔不合不公二帝三王羣圣之道於是大坏後之学者无所寻逐以至於今泯泯也其祸出於杨墨肆行而莫之禁故也孟子虽贤圣不得位空言无施虽切何补然赖其言而今学者尚知宗孔氏崇仁义贵王贱霸而已【崇方作贵上又有知字今按宗上已有知字王上又有贵字不应复出方本非是】其大经大法皆亡灭而不救坏烂而不收所谓存十一於千百安在其能廓如也然向无孟氏【向或作苟】则皆服左衽而言侏离矣【後汉南蛮传衣裳班阑语言侏离侏音朱】故愈尝推尊孟氏以为功不在禹下者为此也【苏轼曰孟子曰禹抑洪水孔子作春秋而予距杨墨盖以是配禹也自春秋作而乱臣贼子惧孟子之言行而扬墨之道废孟子既没申商韩非之学遂行秦以是丧至於胜广刘项之祸天下萧然洪水之患盖不至此也使杨墨得志於天下其祸岂减於申韩哉由此言之虽以孟子配禹可也】汉氏已来【或无氏字】羣儒区区修补百孔千疮随乱随失其危如一髮引千钧绵绵延延?以微灭於是时也而已释老於其间鼓天下之衆而从之呜呼其亦不仁甚矣【甚或作耳】释老之害过於杨墨韩愈之贤不及孟子【木鴈郑少微曰孟韩之功其同二而立言行已其异五孟子於杨墨方其始也禽兽视之而愈则曰火其书庐其居人其人一旦逃而归也孟子受之而已矣而愈则序文畅诗澄观此其同者二也孟子曰尧舜不徧爱急亲贤也愈则曰一视而同仁孟子言必称尧爱愈则曰王易王霸易霸也孟子曰性本善也而愈品为三孟子曰墨乱孔也而愈合为一孟子藐大人轻万鍾召之则不往也愈则佞于頔干宰相此其异者五也其曰韩之贤不及孟子可谓能自知矣】孟子不能救之於未亡之前而韩愈乃欲全之於已坏之後呜呼其亦不量其力且见其身之危莫之救以死也虽然使其道由愈而粗传【而或作且】虽灭死万万无恨天地鬼神临之在上质之在傍又安得因一摧折自毁其道以从於邪也籍湜辈虽屡指教不知果能不叛去否辱吾兄眷厚而不获承命惟增慙惧死罪死罪愈再拜【邓瑀曰韩愈始论佛骨似有辟邪说距詖行之意斥守潮阳与大颠往来海滨及得孟简书文过饰非至

今往往传其真与大颠对释氏之徒撰大颠之辞以非之诚自取也交可以不择哉】

答吕鑿山人书

愈白惠书责以不能如信陵执轡者【史记魏公子无忌昭王少子安厘王异母弟也安厘王即位封公子为信陵君魏有隐士侯嬴为大梁夷门监者公子从车骑虚左自迎侯生摄弊衣冠直上载公子上坐欲以观公子公子执轡愈恭 信音申】夫信陵战国公子欲以取士声势倾天下而然耳如仆者【仆下或无者字】自度若世无孔子不当在弟子之列以吾子始自山出有朴茂之美意恐未荅磨以世事又自周後文弊百子为书各自名家【或无书各自名四字非是】乱圣人之宗後生习传杂而不贯【或作实】故设问以观吾子其已成熟乎将以为友也其未成熟乎【或作邪】将以讲去其非而趋是耳【趋下或有其字】不如六国公子有市於道者也方今天下入仕惟以进士明经及卿大夫之世耳其人率皆习熟时俗工於语言识形势善 人主意【方从阁本意下有仕字云意在谓意之所向也左氏晋君少安不在诸侯赵穿有宠而弱不在军事汉书王莽意不在哀义祖此也 今按但如诸本语意已足不假在字为奇也政使能奇亦复几何而已不胜其赘矣此近世所谓古文者之弊而谓韩公为之哉恐阁本初亦失误而方乃曲为之说以误後人故不可以不辨或者又疑在亦草书者字之误更详之】故天下靡靡日入於衰壤恐不复振起务欲进足下趋死不顾利害去就之人於朝以争救之耳非谓当今公卿间无足下辈文学知识也不得以信陵比然足下衣破衣系麻鞋【破上或无衣字系上或有脚字】率然叩吾门吾待足下虽未尽宾主之道不可谓无意者【下或有也字】足下行天下得此於人盖寡乃遂能责不足於我此真仆所汲汲求者议虽未中节其不肯阿曲以事人者灼灼明矣【阿曲或无曲字或作效俗或阿上仍有效字或作效阿俗】方将坐足下三浴而三熏之听仆之所为少安无躁愈顿首答渝州李使君书【或注方古二字方古贞元十二年进士书所言河南事迹或以公尝为河南今疑其指此然观书意当是李使君以河南事迹嘱公有言於朝也】

乖隔年多不获数附书【下或有状字】慕仰风味未尝敢忘使至连辱两书【连辱或作辱连纸】告以恩情迫切不自聊赖重序河南事迹本末文字稠密曲实可寻而推?之明万万无一可疑者【河南谓房式也式为河南尹其卒也谥曰倾式始刺蜀州刘辟作难署牒首曰辟副曰式参谋曰符载意使君欲辨河南之事迹者此耳】钦想所为【钦上或有重字】益深勤企岂以愈为粗有知识可语以心而告之急哉是比数愈於人而收之【於下或有古字】何幸之大也愈虽无节概知感激【知上疑脱一字】若使在形势亲狎於要路有言可信之望虽百悔吝不敢默默【信或作伸或云信音伸之下或无望字敢下或无复出默字 今按衆本皆未安疑本用易有言不信之语若作言有可信而读如字则其义通矣更详之】今既无由缘进言言之恐益累高明是以负所期待窃窃转语於人不见成效此愈之罪也然不敢去心期之无已【去心或作忘去其心或无期之无已四字】以报见待惟且迟之勿遽捐罢幸甚【捐或作止 今按捐罢字疑衍 又按此书题一作状故其词亦用俗体不甚作文】庄子云知其无可奈何而安之若命者圣也传曰君子俟命然无所补益进其厌饫者祇增愧耳良务寬大愈再拜

荅元侍御书【公拜比部郎中史馆修撰元稹以书言甄济父子事丐公笔之於史公以此荅之此书盖元和九年在史馆时作】

九月五日愈顿首微之足下前岁辱书论甄逢父济【甄音真】识安禄山必反即诈为暗弃去【弃或作亡】禄山反有名号又逼致之济死执不起卒不污禄山父子事又论逢知读书刻身立行勤已取足不干州县斥其余以救人之急足下繇是与之交欲令逢父子名迹存诸史氏【或作事非是】足下以抗直喜立事【抗或作伉】斥不得立朝失所不自悔【元和五年稹以监察御史分司东都执政以其年少务作威福贬江陵府士曹】喜事益坚微之乎子真安而乐之者谨详足下所论载校之史法若济者固当得附书【附字疑衍盖济自合立传不应言附书也】今逢又能行身幸於方州大臣以标白其先人事【白或作目】载之天下耳目彻之天子追爵其父第四品赫然惊人逢与其父俱当得书矣济逢父子自吾人发春秋美君子乐道人之善夫苟能乐道人之善则天下皆去恶为善善人得其所共功实大足下与济父子俱宜牵联得书足下勉逢令终始其躬而足下年尚强嗣德有继将大书特书屡书不一书而已也愈既承命又执笔以俟愈再拜

东雅堂昌黎集注卷十八

卷十九

钦定四库全书

东雅堂昌黎集注卷十九

书序

与郑相公书【时郑余庆以节镇兴元孟东野墓志云兴元尹以币如孟氏赙且来商家事即此书致谢之意志云元和九年八月丁亥孟氏卒书必是时也】

再奉示问皆缘孟家事【元和九年三月以郑余庆为兴元尹余庆辟孟郊参谋郊挈其妻行至□乡暴卒】辞旨惻惻忧虑深远窃有以见大人君子笃於仁爱终始不倦伏读感歎【音希】不知所喻旧与孟往还数人昨已共致百千已来寻已至东都计供葬事外尚有余资今裴押衙所二百七十千足以益业为遗孀永久之赖【东野无子妻郑氏】孟氏兄弟【郊二弟酈郢】在江东未至先与相识亦甚循善所虑才干不足任事郑氏兄弟【东野之妻兄弟】惟最小者在东都固如所示不可依仗孟之深友太子舍人樊宗师【孟下或有氏字】比持服在东都今已外除经营孟家事不啻如已前後人所与及裴押衙所送钱物并委樊舍人主之营致生业必能不失利宜孟氏兄弟到分付成事庶可静守无大阙败伏惟不至远虑续具一一谕报不宣【谕或作咨】愈再拜

与袁相公书【滋字德深蔡州朗山人时为山南东道节度使带平章事故云相公也公前书荐樊於郑此又荐於袁後又以状荐于朝皆见集中】

伏闻宾位尚有阙员幸蒙不以常辈知遇恒不自知愚且贱思有论荐窃见朝议郎前太子舍人樊宗师【本传不载宗师为太子舍人墓志亦不载或略之耳】孝女聪明家故饶财身居长嫡悉推与诸弟【宗师弟宗懿宗宪】诸弟皆优赡有余而宗师妻子常寒露饥馁宗师怡然处之无有难色穷究经史章通句解至於陰阳军法声律悉皆研极原本又善为文章词句刻深独追古作者为徒不顾世俗轻重通微晓事可与晤语【与或作以】又习於吏职识时知变非如儒生文士止有偏长退勇守专未为宰物者所识年近五十遑遑勉勉思有所试合下徬引而致之密加识察有少不如所言愈为欺罔大君子便宜得弃絶之罪於门下诚不忍奇宝横弃道侧而合下篋栝尚有少阙不满之处【篋或作匱少阙一作阙少或无阙字】犹足更容辄冒言之退增汗愧谨状与鄂州柳中丞书【公绰始自御史中丞出为湖南观察使後徙鄂岳时方讨吴元济诏发岳鄂兵五千隶安州刺史李听公绰曰朝廷谓吾儒生不知兵邪请自行许之引兵渡江如古名将每战辄胜其为鄂岳观察使在元和七年云】

淮右残孽【一作贼】尚守巢窟【或作窟巢又作巢穴】环寇之师殆且十万瞋目语难【

此用庄子语杭蜀本作难语非】自以为武人不肯循法度颀颀作气势【颀音擷颀胡江切】窃爵位自尊大者肩相磨地相属也不闻有一人援桴鼓誓衆而前者俱日令走马来求赏给助寇为声势而已【日或作月】合下书生也诗书礼乐是习仁义是修法度是束一旦去文就武鼓三军而进之【三一作六】陈师鞠旅【诗征人伐鼓陈师鞠旅注云二千五百人为师五百人为旅鞠告也】亲与为辛苦慷慨感激同食下卒将二州之牧以壮士气斩所乘马以祭蹠死之士【蹠徒计切蹠也又音提】虽古名将何以加兹此由天资忠孝郁於中而大作於外动皆中於机会以取胜於当世而为戎臣师岂常习於威暴之事而乐其鬪战之危也哉愈诚怯弱不适於用听於下风窃自增气夸於中朝稠人广衆会集之中【或无会集二字】所以羞武夫之顔令议者知将国兵而为人之司命者不在彼而在此也【而在或无而字】临敌重慎诚轻出入良食自爱以副见慕之徒之心【食或作用非是或无之徒二字又无下之字】而果为国立大功也幸甚幸甚不宜愈再拜

又一首

愈愚不能量事势可否比常念淮右以靡弊困顿三州之地【彰义节度使管申光蔡三州】蚊蚋蚁虫之聚感凶竖煦濡饮食之惠【凶竖吴元济也】提童子之手坐之堂上奉以为帅出死力以抗逆明诏战天下之兵乘机逐利四出侵暴屠烧县邑贼杀不辜环其地数千里莫不被其毒洛汝襄荆许颍淮江为之骚然丞相公卿士大夫劳於图议【图或作国非是】握兵之将熊羆貔虎之士【羆兽名说文羆猊似狸者椿俱切】畏懦?蹢【足迫也上子六切下所六切】莫肯杖戈为士卒前行者独合下奋然率先扬兵界上【奋上或有能字】将二州之守亲出入行间与士卒均辛苦生其气势见将军之锋颖凜然有向敌之意用儒雅文字章句之业取先天下武夫关其口而夺之气【关一作闭】愚初闻时方食不觉弃匕箸起立岂以为合下真能引孤军单进与死寇角逐【真或作直非是或无单字】争一旦侥幸之利哉就令如是亦不足贵其所以服人心在行事适机宜而风采可畏爱故也是以前状辄述鄙诚眷惠手翰还答益增欣悚【惠下或有赐字益一作伏】夫一衆人心力耳目使所至如时雨三代用师不出是道合下果能充其言继之以无倦得形便之地甲兵足用虽国家故所失地旬岁可坐而得【岁或作月又作序】况此小寇安足置齿牙间勉而卒之以俟其至幸甚【诸本幸甚下复出幸甚二字】夫远徵军士行者有羈旅离别之思居者有怨旷骚动之忧本军有馈饷烦费之难地主多姑息形迹之患急之则怨缓之则不用命浮寄孤悬形势销弱又与贼不相谄委临敌恐骇难以有功若召募土人【召或作占】必得豪勇与贼相熟知其气力所极无望风之惊爱护乡里勇於自战徵兵满万不如召募数千【公此议详见论淮西事宜状】合下以为何如傥可上闻行之否【一作可否】计已与裴中丞相见行营事宜不惜时赐示及【裴中丞即度也时宪宗遣度视淮西诸军还奏多合上旨】幸甚不宣愈再拜

答魏博田仆射书【田弘正始名兴先是田季安为魏博节度使元和七年季安卒其子怀諲自立委政於家奴蒋士则衆怒胁拜弘正使主军弘正於是图其地籍其人以献於朝宪宗嘉之诏检校工部尚书充魏博节度使且赐今名八年十一月公以比部郎中史馆修撰为作先庙碑九年弘正拜检校尚书右仆射其年公以考功郎中知制诰故曰蒙恩改职事也】

季冬极寒伏惟仆射尊体动止万福即日愈蒙免蒙恩改职事不任感惧【诸本无蒙免二字今从间本 今按蒙免者蒙田之庇而得遣免也连上文为句蒙恩者蒙上之恩而改职事也连下文为句】使至奉十一月十二日示问欣慰殊深赞善十一郎行【弘正子布肇驪早牟章】已附状【已下一有曾字】伏计寻上达愈虽未获拜识尝承仆射眷私猥辱荐闻待之上介事虽不允受赐实多顷者又蒙不以文字鄙薄令譔庙碑见遇殊常荷德尤切安有书问稍简遂敢自疎比所与杨书记书盖缘久阙附状求因闲粗述下情【或无求字闲或作闲 今按此谓求杨书记因田之闲为述已意也】忽奉累纸示问辞意重叠捧读再三但增慙悚仆射公忠贤德为内外所宗位望益尊谦巽滋甚谬承知遇欣荷实深伏望照察限以官守拜奉未由无任驰恋谨因使回奉状不宣谨状

与华州李尚书书【吕本注绦字以史考之绦以元和十年二月出刺华州又公与绦同年故曰久故蜀本注实字非是】

比来不审尊体动止何似【比或作夜又作日】乍离阙庭伏计倍增恋慕愈於久故游从之中伏蒙恩獎知待【或无伏字】最深最厚无有比者【比或作伦】懦弱昏塞不能奋励出奇少答所遇拜辞之後窃念旬朔不即获侍言笑东望殒涕有儿女子之感【或无子字史记非儿女子所知为儿女子所诈当有子字】独宿直舍【公时以考功郎中知制诰】无可告语展转歔歔不能自禁华州虽实百郡之首重於藩维然合下居之则为失所愚以为苟虑有所及宜密以上闻不宜以疎外自待【不下或无宜字】接过客俗子絶口不挂时事务为崇深以拒止嫉妬之口亲近药物方书动作步趋以致和宣滞为国自爱副鄙陋拳拳之心幸甚幸甚谨奉状不宣愈再拜

京尹不台参答友人书【或作与友人论京尹不台参书长庆三年六月以公为京兆尹兼御史大夫敕放台参後不得为例按魏氏春秋云故事御史中丞輿洛阳令相遇则分路而行以土主多逐捕不欲稽留然非唐制也顺宗实录云故事尹与御史相遇尹下道避尹尚避御史岂有不台参之理当时敕放台参後不为例则知故事须台参也又曰时宰相恶御史中丞李绅欲逐之特诏公不台参以激绅绅果劾奏公公以诏自解文刺纷然宰相以台府不协遂罢公为兵部侍郎而出绅为江西观察使绅朝辞泣诉穆宗遂留绅为兵部侍郎公复为吏部按贞元十八年公为四门博士时荐士十人於陆惨李绅在焉绅味其平昔之荐而劾公公既不言而世亦未有辨之者又谓公蹙绅以附逢吉独王黄州答丁晋公书以谓曲在绅盖公论也】

所示情眷之至不胜悚荷台参实奏云容桂观察使带中丞尚不台参【或无使字】京尹郡国之首所管神州赤县官带大夫岂得却不如事须台参圣恩以为然便令宣与李绅不用台参亦是何典故赤令尚与中丞分道而行何况京尹【方云吕丞相本改定亦是以下十九字綴於事须台参之下仍於却不如下添中丞二字庆善云今本颠倒不可读当从唐本不知洪所谓唐本者何本也阁杭蜀本只同今文姑以阙疑可也一日不用台参已下当再出台参二字义亦自通 今按二说皆未安後说虽差胜然文意似亦未足当阙之以俟知者】人见近事习耳目所熟【人上或有夫字】稍殊异即怪之其於道理有何所伤圣君使行即是故事自

古岂有定制也停推巡缘府中徧迫是实若别差人即是妄说岂有此事小人言不可信类如此亦在大贤斟酌而断之流言止於智者正谓此耳客多自修报状不得【或作不及自修报或作不及修报状】伏惟照察【照方作昭 今按唐人书帖用照察字亦多】

送陆歙州诗序【陆惨也或无诗字或作送陆员外出刺歙州诗序序一本自此下为第二十卷】

贞元十八年二月十八日祠部员外郎陆君出刺歙州朝廷夙夜之贤都邑游居之良【居一作从】齎咨涕洟咸以为不当去歙大州也刺史尊官也由郎官而往者前後相望也当今赋出於天下江南居十九宣使之所察歙为富州宰臣之所荐闻天子之所选用其不轻而重也较然矣如是而齎咨涕洟以为不当去者陆君之道行乎朝廷则天下望其赐刺一州则专而不能咸【或作或而属下句方从阁本作咸而属上句 今按庄子有周徧咸之语方本得之】先一州而後天下岂吾君与吾相之心哉【先上诸本有谓字方从阁本云杭本讹咸作或然尚无谓字蜀本始作或为今本易为作谓讹转甚也】於是昌黎韩愈道愿留者之心而泄其思作诗曰

我衣之华兮我佩之光【华一作美】陆君之去兮谁与翱翔【诸本如此方从阁杭本光翔下皆有兮字去下无兮字 今按古诗赋有句句用韵及语助者賡歌是也有隔句用韵及兮而兮在上句之末韵在下句之末者骚经是也有隔句用韵而上句不韵不兮下句押韵有兮者橘颂之类是也今此诗方本若用賡歌之例则华光有兮而不韵其去字一句又并无也若用骚经之例则光翔当用韵而不当有兮华虽可以有兮而去复不可以无兮也若用橘颂之例则下三句为合而首句不当有兮也韩公深於骚者不应如此盖方所从之本失之也今定从诸本以骚经及贾谊吊屈原首章为例若欲以橘颂为例则止去方本首句一兮字尤为简便但无此本不敢以意创耳】歙此大惠兮施于一州今其去矣胡不为留我作此诗歌于逵道无疾其驱天子有诏

送孟东野序【据集贞元十九年与陈给事书云送孟郊序一首生纸写不加装饰此序吕汲公以为是年作序云东野之役於江南也有若不释然者时东野为溧阳尉云】

大凡物不得其平则鸣草木之无声风挠之鸣水之无声风荡之鸣其跃也或激之其趋也或梗之其沸也或炙之金石之无声或击之鸣人之於言也亦然有不得已者而后言其譌也有思其哭也有怀凡出乎口而为声者其皆有弗平者乎【为一作有】乐也者郁於中而泄於外者也择其善鸣者而假之鸣金石丝竹匏土革木八者物之善鸣者也维天之於时也亦然择其善鸣者而假之鸣是故以鸟鸣春【鸟下阁本有兽字非是】以雷鸣夏以虫鸣秋以风鸣冬四时之相推斂【斂古夺字或作夺】其必有不得其平者乎其於人也亦然人声之精者为言文辞之於言又其精也【方从阁杭蜀本去又字而取下句尤字足成一句不成文理】尤择其善鸣者而假之鸣【按上文已再言择其善鸣者而假之鸣矣则此又言人声之精者为言而文词又其精者故尤释其善鸣者而假之鸣又字尤字正是关键血脉首尾相应处方以三本之误遂去又字而以尤字属上句不唯此句不成文理又使此篇语无次第其误尤

甚今悉正之】其在唐虞咎陶禹其善鸣者也而假以鸣【在下或有於字假下或有之字】夔弗能以文辞鸣【弗或作不而无能字】又自假於韶以鸣夏之时五子以其歌鸣伊尹鸣殷周公鸣周凡载於诗书六艺皆鸣之善者也周之衰孔子之徒鸣之其声大而远传曰天将以夫子为木铎其弗信矣乎其末也庄周以其荒唐之辞鸣【辞或作说下或有於楚二字庄子蒙人蒙梁地也且辞楚威王之聘未尝仕於楚也】楚大国也其亡也以屈原鸣臧孙辰孟轲荀卿以道鸣者也杨朱墨翟管夷吾晏婴老聃申不害韩非脊到【脊到在申韩前申韩称之为有书四十六篇脊古慎字】田骈邹衍尸佼孙武张仪苏秦之属皆以其术鸣秦之兴李斯鸣之汉之时司马迁相如扬雄最其善鸣者也其下魏晋氏鸣者不及於古然亦未尝絶也【其下方无其字然亦未尝絶也诸本皆有此句方从阁本删去今按有此一句文意乃足阁本脱也】就其善者其声清以浮其节数以急其辞淫以哀其志弛以肆【善下或有鸣字浮方从诸本作淳唯蜀本及文苑作浮今按此数句皆言魏晋以下文章之病不应用淳字以美之诸本皆误数以急弛以肆二句诸本皆如此方从谢本删去二以字今按自其声至此四句当为一列其第二第四句古本偶皆脱一字而方必从之遂使句之短长参差不齐而不可读正与上李巽书相似其意以为必如是然後为古而不知所谓古者不在是也】其为言也乱杂而无章将天丑其德莫之顾邪何为乎不鸣其善鸣者也【诸本如此方从阁本以乱为词又从阁杭本删去将天以下十九字今按方本极无理盖因乱而误为辞又因辞而转作词耳今当改词为乱又补十九字文意乃足】唐之有天下陈子昂苏源明元结李白杜甫李观皆以其所能鸣其存而在下者孟郊东野始以其诗鸣其高出魏晋不懈而及於古其他浸淫乎汉氏矣【魏晋方作晋魏或无古字氏矣方从阁本无此二字皆非是】从吾游者李翱张籍其尤也三子者之鸣信善矣【或无信字或作善鸣皆非是左传云克已复礼仁也信善哉公虽未必用此语然亦偶合也】抑不知天将和其声而使鸣国家之盛邪抑将穷饿其身思愁其心肠而使自鸣其不幸邪三子者之命则悬乎天矣【阁杭蜀苑则下有有字非是若果有有字即天下当有者字更详之】其在上也奚以喜其在下也奚以悲东野之役於江南也有若不释然者故吾道其命於天者以解之【释或作怪然者或作者然云顾命王不怪或作不释释犹开释也按嘉佑本作不释然者其语本出庄子或本皆误也以解或无以字非是】

送许郢州序【或作送许史君刺郢州序仍注仲舆二字或作志雍樊云志雍安陆许氏贞元九年进士时于頔节制山南东道郢於山南为属邑是时頔敛民方急公因志雍之行序以规之公贞元十八年上于頔书故云愈尝以书自通于于公頔此序十九年作也】

愈尝以书自通於于公累数百言【公下或有頔字】其大要言先达之士得人而托之【要下或有也字】则道德彰而名问流【问或作闻】後进之士得人而托之则事业显而爵位通下有矜乎能上有矜乎位虽恒相求而喜不相遇【诸本无喜字方从阁杭蜀苑得】之于公不以其言为不可复书曰足下之言是也于公身居方伯之尊蓄不世之材【世下或有出羣字】而能与卑鄙庸陋相应答如影响是非忠乎君而乐乎善以国家之务为已任者乎愈虽不敢私其大恩抑不可不谓之知己恒矜而诵之情已至而事不从【事不从谓不能卒言之也】小人之所不为也故於使君之行道刺史之事以为于公赠凡天下之事成於自同而败於自异为刺史者恒私於其民不以实应乎府【谓观察府】为观察使者恒急於其赋不以情信乎州繇是刺史不安其官【繇一作县】观察使不得共政财已竭而歛不休人已穷

而賦愈急【賦或作怒非是】其不去為盜也亦幸矣誠使刺史不私於其民觀察使不急於其賦【或無下其字】刺史曰吾州之民天下之民也惠不可以獨厚觀察使亦曰某州之民天下之民也歛不可以獨急【或無以字】如是而政不均令不行者未之有也其前之言者于公既已信而行之矣【前下或無之字非是既一作即】今之言者其有不信乎縣之於州猶州之於府也有以事乎上有以臨乎下同則成異則敗者皆然也非使君之賢其誰能信之【信或作從非是】愈於使君非燕游一朝之好也故其贈行不以頌而以規

送竇從事序【竇平貞元五年登進士第】

踰瓠閩而南皆百越之地【瓠或作越以下文重出越字考之非是或無瓠字亦非越或作粵】於天文其次星紀其星牽牛連山隔其陰鉅海敵其陽【敵一作敵氣上烝也方從閣苑作敵云敵橫擣也謂鉅海敵蕩其南也今按敵微扣也字書訓以橫擣而漢書注又訓擣為發動蓋不以杖末奮擊但以杖身微扣而發動之所謂橫擣也海之為物最鉅其所震蕩豈微扣之謂邪閣本蓋誤而方必為曲說以附之殊不可曉作敵亦非是但當作敵乃當抵對扞之意與上句隔字正相對也】是維島居卉服之民風氣之殊著自古昔【維一作皆島作鳥居作夷氣閣蜀本作俗今按島居卉服已見其民服之陋因又言此以見其風氣之惡自是兩事故下文云民俗既遷風氣亦隨也閣蜀皆誤古或作在非是】唐之有天下号令之所加無異於遠近民俗既遷風氣亦隨雪霜時降疠疫不興【疫或作疾】瀕海之饒固加於初【或云瀕濱也篆文無濱字漢志瀕南山又瀕河十郡只用瀕字加於或作如其非是】是以人之之南海者若東西州焉【之之諸本無復出之字方從閣杭蜀苑得之若或作如】皇帝臨天下二十有二年【臨下或有御字】詔工部侍郎趙植為廣州刺史【貞元十七年以工部侍郎趙植充嶺南節度使】盡牧南海之民署從事扶風竇平【平扶風平陵人】平以文辭進於其行也其族人殿中侍御史牟【牟字貽周為東都留守判官】合東都交游之能文者二十有八人賦詩以贈之於是昌黎韓愈嘉趙南海之能得人壯從事之答於知我不憚行之遠也【我或作已行之遠文苑如此諸本之或作於或作我於行遠或無行之二字皆非是】又樂貽周之愛其族叔父【貽上或有其宗二字】能合文辭以寵榮之作送竇從事少府平序

上巳日燕太學听彈琴詩序【鄭國之俗三月上巳於溱洧水上執蘭招魂自魏以後但用三日不用上巳時公為四門博士作此序】

與衆樂之之謂乐乐而不失其正【一作節】又樂之尤也【尤一作光】四方無鬪爭金革之聲京師之人既庶且豐天子念致理之艱難樂居安之閑暇肇置三令節【舊史云貞元四年九月詔正月晦日三月三日九月九日三節日宜任文武百僚選勝地追賞為樂五年正月詔以二月一日為中和節代正月晦日備三令節數此序在貞元任午癸未閑公為四門博士其云肇置三令節蓋謂德宗朝始置耳】詔公卿羣有司至于其日率厥官屬【或無屬字】飲酒以樂所以同其休宣共和感其心成其文者也三月初吉實惟其時司業武公【下或有少儀二字】於是總太學儒官三十有六人列燕於祭酒之堂罇俎既陳肴羞惟時醴醑序行【一作有序】獻酬有容歌風雅之古辭斥夷狄之新聲褰衣危冠與與如也【與與或作愉愉以杭蜀本云詩我黍與與淮南子善用兵者陵其與與皆音余今按論語有此全句】有儒

一生【儒一或作一儒】魁然其形抱琴而来历阶以昇【以或作而】坐於罇俎之南鼓有虞氏之南风【见家语】赧之以文王宣父之操【见史记孔子学琴於师襄事】优游夷愉广厚高明追三代之遗音想舞雩之咏叹及暮而退皆充然若有得也【有下或有所字】武公於是作歌诗以美之命属官咸作之命四门博士昌黎韩愈序之

送齐皞下第序【皞或作暉考唐宰相世系表当作皞序云齐生之兄为时名相出藩于镇谓齐映也以世系考之映兄弟六人昭?映皞照煦无有暉者岂暉後改名皞或煦耶诸本或作齐皞或作齐曙按登科记映大历五年昭贞元十五年皞十一年煦元和二年踵登进士第而曙亡焉】

古之所谓公无私者其取舍进退无择於亲疎远迩惟其宜可焉其下之视上也亦惟视其举黜之当否不以亲疎远迩疑乎其下之人【下或有也字或无之人二字而有也字】故上之人行志择谊【或无故字之字】坦乎其无忧於下也下之人尅已慎行确乎其无惑於上也是故为君不劳而为臣甚易见一善焉可得详而举也见一不善焉可得明而去也【阁杭蜀苑无详明二字】及道之衰上下交疑於是乎举黜举子之事载之传中而称美之而谓之忠【或无下而字见左氏襄公三年晋祁奚请老举黜举子事】见一善焉若亲与迩不敢举也【或无敢字】见一不善焉若疏与远不敢去也衆之所同好焉矫而黜之乃公也衆之所同恶焉【衆下或皆有人字】激而举之乃忠也於是乎有违心之行有拂志之言有内媿之名若然者俗所谓良有司也【然或作是】肤受之诉不行於君巧言之诬不起於人矣乌虓今之君天下者不亦劳乎为有司者不亦难乎为人向道者不亦勤乎【乌虓犹呜呼也古文於乎乌虓呜呼皆一义或作於是乎非是为有或无为字为人向道诸本皆同但向或作乡阁苑以人为仁殊无文理盖所谓人者指应举者而言为之作向道者谓指引其道路所向如公之於侯喜侯云长之徒是已其作乡者亦音向与兵书所谓以乡人为导者音义皆不同也】是故端居而念焉非君人者之过也则曰有司焉则非有司之过也则曰今举天下人焉则非今举天下人之过也盖其渐有因其本有根生於私其亲【其下或有所字】成於私其身以已之不直而谓人皆然其植之也固久其除之也实难非百年必世不可得而化也非知命不惑不可得而改也已矣乎其终能复古乎若高阳齐生者其起予者乎齐生之兄【之兄或无之字】为时名相出藩于南【于下杭苑有镇字阁本无今按齐映以贞元七年由桂管改江西是时洪州只为江西观察使至咸通中乃有镇南之号耳杭苑皆误】朝之硕臣皆其旧交齐生举进士有司用是连枉齐生齐生不以云乃曰我之未至也有司其枉我哉【其枉或作岂枉今从阁杭蜀本】我将利吾器而俟其时耳抱负其业东归於家吾观於人有不得志则非其上者衆矣亦莫计其身之短长也若齐生者既至矣【一云既屈矣一作既不得志矣今按上文曰我之未至也下文曰我未也则此作至为是】而曰我未也不以闵於有司其不亦鲜乎哉【未下或有至字】吾用是知齐生後日诚良有司也能复古者也公无私者也知命不惑者也

送陈密序

太学生陈密请於余曰密承训於先生今将归覲其亲不得朝夕见愿先生赐之言密将以为

戒【觀或作拜】密来太学举明经累年不获选【经下或有者字获下或有其字】是弗利於是科也今将易其业而三礼是习【唐制取士有明经科而明经之别有五经有三经有二经有三礼有三传有史科三礼科贞元五年二月置】愿先生之张之也密将以为乡荣【或无以字】余媿乎其言遗之言曰子之业信习矣其容信合於礼矣【其下或有仪字非是】抑吾所见者外也夫外不足以信内子诵其文则思其义习其仪则行其道则将谓子君子也爵禄之来也不可辞矣科宁有利不利邪【诵其习其或并无其字】

送李愿归盘谷序【此序贞元十七年作公年才三十四耳东坡云欧阳公言晋无文章惟陶渊明归去来词而已余谓唐无文章惟韩退之送李愿归盘谷序而已平生欲效此作每执笔辄罢因自笑曰不若且放教退之独步 此序孟州济原县有石本其闲小有异同】

太行之阳有盘谷【太行山谷在怀州阳南也盘谷地名在孟州济原县】盘谷之间泉甘而土肥草木蓂茂居民鲜少或曰谓其环两山之闲故曰盘或曰是谷也宅幽而势阻隐者之所盘旋友人李愿居之【盘下诸本皆有旋字洪氏石本杭本同或作桓樊氏石本阁蜀苑删去今按石本之不同说见於後友人诸本及洪氏石本皆作友樊氏石本作有】愿之言曰人之称大丈夫者我知之矣利泽施于人【于诸本作於今从石本】名声昭于豈坐於庙朝进退百官而佐天子出令其在外则树旗旄罗弓矢武夫前呵从者塞途供给之人各执其物夹道而疾驰喜有赏怒有刑【丈苑赏作赐樊氏石本无此六字】才峻满前【峻或作俊】道古今而誉盛德入耳而不烦曲眉丰颊清声而便体秀外而惠中飘轻裾翳长袖粉白黛緑者列屋而闲居妬宠而负恃争妍而取怜大丈夫之遇知於天子用力於当世者之所为也【天子诸本作主上方从石本为上诸本有所字方从石本删去下文於时者之所为也同此】吾非恶此而逃之是有命焉不可幸而致也穷居而野处升高而望远【诸本如此石间苑作远望】坐茂树以终日濯清泉以自洁采於山美可茹钓於水鲜可食起居无时惟适之安【蜀本及洪氏石本之作所苑粹樊石本作之】与其有誉於前孰若无毁於其後与其有乐於身孰若无忧於其心【与其下诸本并有有字方从石本删去】车服不维刀锯不加埋乱不知黜陟不闻大夫夫不遇於时者之所为也我则行之伺 於公卿之门奔走於形势之途足将进而趋【上士思切下七余切】口将言而噤【上之舌切又而舌切下女居切又音如】处秽污而不羞触刑辟而诛戮【秽污诸本作污秽今用石本改不差一本作弗羞辟石本作法】徼幸於万一老死而後止者其於为人贤不肖何如也昌黎韩愈闻其言而壮之与之酒而为之歌曰

盘之中维子之宫盘之土可以稼【诸本作惟子之稼今从石阁如此】盘之泉可濯可治【石阁杭本治作湘方从蜀本云洪庆善以为作湘者石本磨灭以阁本意之也然此文自如往而复以上皆二语一韵以稼叶土此类固多以容叶深以诗七月易恒卦卜家考之亦合古韵独湘不可与泉叶按公论语笔解以浴于沂作治于沂政与此治同义今只以治为正 今按方以古韵为据舍所信之石杭阁本而去湘从治其说当矣然必以笔解为说又似太拘今世所传笔解盖未必韩公本真也又按洪庆善云石本在济源张端家皆残缺不全惟可濯可湘一句甚明又与方引洪氏磨灭之说不同不知何故姑记之以俟知者然其大归只为从湘字耳政使实然亦不足取其说详於下条云或曰湘字考之说文云烹也诗采芣于以湘之从湘为

正】盘之阻谁争子所窈而深廓其有容繚而曲如往而复嗟盘之乐兮乐且无殃【殃方从洪校石本作央又云樊木只作殃然阁杭蜀本皆作央王逸注离骚云央尽也已也方又云此文如丛作藜俊作峻时作皆皆石本字也 今按作殃於义为得又按此篇诸校本多从古本而樊洪两石已自不同未知孰是其有同者亦或无理未可尽信按欧公集古跋尾云盘谷序石本贞元中所刻以集本校之或小不同疑刻本误然以其当时之物姑存之以为佳玩其小失不足校也详公此言最为通论近世论者专以石本为正如水门记溪堂诗予已论之南海庙刘统军碑之类亦然其谬可考而知也】虎豹远迹兮蛟龙遁藏鬼神守护兮呵禁不祥【禁或作御】饮则食兮寿而康无不足兮奚所望【则或作且】膏吾车兮秣吾马从子于盘兮终吾生以徜徉

送牛堪序【此篇或在後卷之首阁杭置本置此公时为四门博士堪为太学生在贞元十五年云】

以明经举者诵数十万言又约通大义徵辞引类旁出入他经者又诵数十万言其为业也勤矣登第於有司者去民亩而就吏禄由是进而累为卿相者常常有之其为获也亦大矣然吾未尝闻有登第於有司而进谢於其门者【门上或无其字】岂有司之待之也抑以公不以情【抑一作御一无抑字】举者之望於有司也亦将然乎其进而谢於其门也则为私乎抑无乃人事之未思或者不能举其礼乎若牛堪者思虑足以及之材质足以行之而又不闻其往者其将有以哉【或无将字】违衆而求识【衆一作俗】立奇而取名非堪心之所存也由是而观之若堪之用心其至於大官也不为幸矣【於一作为】堪太学生也余博士也博士师属也於其登第而归将荣於其乡也能无说乎

东雅堂昌黎集注卷十九

卷二十

<集部,别集类,汉至五代,东雅堂昌黎集注>

钦定四库全书

东雅堂昌黎集注卷二十

序

送董邵南序【邵南寿州安丰人举进士不得志去游河北公作此送之公诗有嗟哉董生行亦为邵南作也南下或有游河北三字】

燕赵古称多感慨悲歌之士董生举进士连不得志於有司怀抱利器郁郁适兹土吾知其必有合也董生勉乎哉夫以子之不遇时苟慕义强仁者皆爱惜焉矧燕赵之士出乎其性者哉【性下一有情字】然吾尝闻风俗与化移易吾恶知其今不异於古所云邪聊以吾子之行卜之也【於古阁作於吾云或作闻而无邪字今按篇首云古称多感慨悲歌之士诸本作古所云语乃相应作吾所闻犹为近之而语势已微舛矣若曰吾所云则都无来历不成文字必是谬误无疑也然此篇言燕赵之士仁义出於其性乃故反其词以深讥其不臣而习乱之意故其卒章又为道上威德以警动而招徕之其旨微矣读者详之】董生勉乎哉吾因子有所感矣为我吊望诸君之墓【乐毅去燕之赵赵封於观津号曰望诸君张华云望诸君家在邯鄲西数里】而观於其市复有昔时屠狗者乎【荆轲至燕爱燕之屠狗者高渐离曰饮燕市酒酣歌于市中】为我谢曰明天子在上可以出而仕矣

赠崔复州序【公此序大概与送许郢州之意同郢复在唐皆隶山南东道两序皆言于公頔又皆言民穷歛急意必有所属也頔时为山南东道节度使云】

有地数百里趋走之吏自长史司马已下数十人【长史司马刺史之佐唐制每州刺史而下长史一人司马一人】其禄足以仁其三族及其朋友故旧乐乎心则一境之人喜不乐乎心则一境之人惧丈夫官至刺史亦荣矣【丈上或有大字】虽然幽远之小民其足迹未尝至城邑苟有不得其所【或无苟有二字或无有字】能自直於乡里之吏者鲜矣况能自辨於县吏乎能自辨於县吏者鲜矣况能自辨於刺史之庭乎由是刺史有所不闻小民有所不宣赋有常而民产无恒水旱疠疫之不期民之丰约悬於州【句】县令不以言连帅不以信民就穷而歛愈急吾见刺史之难为也【州或作前县下或有复出县字皆非是】崔君为复州其连帅则于公崔君之仁足以苏复人【崔君之仁上或有愈以为三字】于公之贤足以庸崔君有刺史之荣而无其难为者将在於此乎愈尝辱于公之知而旧游于崔君庆复人之将蒙其休泽也於是乎言

贈張童子序【子下或有兵曹字唐制有童子科公此序甚備公貞元八年陸贄下及第童子時亦升于禮部故謂俱陸公之門人】

天下之以明二經舉於禮部者歲至三千人始自縣考試定其可舉者然後升於州若府其不能中科者不與是數焉州若府總其屬之所升又考試之如縣加察詳焉定其可舉者然後貢於天子而升之有司其不能中科者不與是數焉謂之鄉貢有司者總州府之所升而考試之加察詳焉第其可進者以名上於天子而藏之屬之吏部歲不及二百人謂之出身能在是選者厥惟艱哉二經章句僅數十萬言其傳注在外皆誦之又約知其大說【或無大字】繇是舉者或遠至十餘年然後與乎三千之數而升於禮部矣又或遠至十餘年然後與乎二百之數而進於吏部矣班白之老半焉【之老二字或作者】昏塞不能及者皆不在是限有終身不得與者焉張童子生九年自州縣達禮部一舉而進立於二百之列【百下或有人字】又二年益通二經有司復上其事繇是拜衛兵曹之命【衛謂左右衛兵曹謂兵曹參軍】人皆謂童子耳目明達神氣以靈余以偉童子之獨出于等夷也童子請於其官之長隨父而寧母歲八月自京師道陝南至虢東及洛師北過大河之陽九月始來及鄭【洛師或作洛陽及鄭或作反鄭云此序疑作於鄭序云愈與童子俱陸公之門人是童子以貞元八年升于禮部又二年拜衛兵曹蓋十年也公十年曾往河陽省墳墓見祭老成文序當作於此時童子豈或鄭人邪今按反字諸本多作及字蓋自洛東出便可至鄭今以北過河陽故九月始及鄭童子未必為鄭人也】自朝之聞人以及五都之伯長羣吏皆厚其餽賂【聞或作文五都當謂雍陝虢蒲洛羣吏以閤苑本定蜀本訛作郡吏今本并訛吏為縣其失遠矣】或作謠詩以嘉童子童子亦榮矣雖然愈將進童子於道使人謂童子求益者非欲速成者夫少之與長也異觀【與或作於】少之時人惟童子之異及其長也將責成人之禮焉【禮上或無之字】成人之禮非盡於童子所能而已也然則童子宜暫息乎其已學者而勤乎其未學者可也愈與童子俱陸公之門人也慕回路二子之相請贈與處也故有以贈童子【與處上或有出字非是禮檀弓子路去魯謂顏子曰何以贈我顏子請曰何處我義不當有出字也】

送浮屠文暢師序【公時為四門博士作後有詩送文暢師北游其略云昔在四門館晨有僧來謁謂僧當少安草序頗排訐蓋謂此也】

人固有儒名而墨行者【儒名或作名儒非是】問其名則是校其行則非可以與之游乎如有墨名而儒行者問之名則非校其行而是【之名或作其名而是或作則是】可以與之游乎揚子云稱在門牆則揮之在夷狄則進之吾取以為法焉浮屠師文暢喜文章【或無浮屠師三字喜下或有為字】其周游天下凡有行必請於搢紳先生以求詠謠其所志【謠或作哥】貞元十九年春將行東南柳君宗元為之請解其裝【請或作序】得所得叙詩累百餘篇【所下或無得字】非至篤好其何能致多如是邪惜其無以聖人之道告之者而徒舉浮屠之說贈焉【告下或無之字】夫文暢浮屠也如欲聞浮屠之說當自就其師而問之何故謁吾徒而來請也彼見吾君臣父子之懿文物事為之盛其心有慕焉【事為或作禮樂心下或有必字】拘其法而未能入故樂聞其說而請之如吾徒者宜當告之以二帝三王之道日月星辰之行【行上或有所以字】天地之所以着鬼神之所以幽人物之所以蕃江河之所以流而語之【江河或作河江】不當又為浮屠之說而渎告之也【渎告之或無渎之二字】

告工毒切】民之初生固若禽兽草木然圣人者立然後知宫居而粒食【粒或作谷】亲亲而尊尊生者养而死者藏是故道莫大乎仁义教莫正乎礼乐刑政【大或作过太乎或作过於正或作大】施之於天下万物得其宜措之於其躬体安而气平尧以是传之舜舜以是传之禹禹以是传之汤汤以是传之文武文武以是传之周公孔子书之於册中国之人世守之今浮屠者孰为而孰传之邪【为下或有之字】夫鸟俛而啄仰而四顾夫兽深居而简出惧物之为已害也犹且不脱焉弱之肉强之食【脱或作免】今吾与文畅安居而暇食优游以生死与禽兽异者宁可不知其所自邪夫不知者非其人之罪也知而不为者惑也悦乎故不能即乎新者弱也知而不以告人者不仁也告而不以实者不信也【不为上或无而字为下或有之字悦或作惑弱或作溺告人或作告之】余既重柳请【或作诗非是】又嘉浮屠能喜文辞於是乎言

送杨支使序【或作送杨八弟支使归府贞元十八年九月以太常少卿杨凭为御史中丞湖南观察使凭奏辟仪之为观察支使此序乃贞元二十年公在阳山作】

愈在京师时尝闻当今藩翰之宾客惟宣州为多贤【尝或作常】与之游者二人陇西李博清河崔羣【二人下或有焉字】羣与博之为人吾知之道不行於主人【或无於字於下或有其字】与之处者非其类虽有享之以季氏之富不一日留也以羣博论之凡在宣州之幕下者虽不尽与之游【尽或作得或别有得字在尽字下】皆可信而得其为人矣愈未尝至宣州而乐颂其主人之贤者以其取人信之也今中丞之在朝【中丞乃杨凭也】愈日侍言於门下其来而镇兹土也【而镇或无而字镇或作领】有问湖南之宾客者愈曰知其客可以信其主者宣州也知其主可以信其客者湖南也去年冬奉诏为邑於阳山【贞元十九年十二月公贬连州阳山令】然後得谒湖南之宾客於幕下於是知前之信之也不失矣及仪之之来也闻其言而见其行则向之所谓羣与博者吾何先後焉仪之智足以造谋材足以立事忠足以勤上惠足以存下【本或无於是知以下十七字一本并无闻其言而见其行七字方从阁杭本幕下即云及支使之来也闻其言而见其行是知前之信之也不失矣支使智足以造谋今按此数本互有得失而方尤疎略独今所定详密有序且及羣博乃与上文相应】而又侈之以诗书六艺之学先圣贤之德音【贤或作人】以成其文以辅其质宜乎从事於是府而流声实於天朝也夫乐道人之善以勤其归者乃吾之心也【勤或作劝心也下一有非文则不能五字】谓我为邑长於斯而媚夫人云者不知言者也工乎诗者歌以系之

送何坚序【坚下本或有归道州字】

何於韩同姓为近【於或作与按何氏出周成王母弟唐叔虞後十一代孙食采於韩为列侯韩王安为秦所灭子孙分散居江淮晋以韩为何遂为何氏】坚以进士举於吾为同业其在太学也吾为博士【公时为四门博士】坚为生博士为同道【生博士或作生与博士】其识坚也十年为故人同姓而近也同业也同道也故人也於其不得愿而归【不上或有志字】其可以无言邪坚道州人道之守阳公贤也【或无贤字贞元十九年九月以国子司业阳城为道州刺史】道於湖南为属州湖南杨公义贤也【贞元十八年九月以太常少卿杨凭为湖南观察使或无湖南又字杨作阳皆非是】坚为民坚又贤也湖南得道为属道得坚

为民坚归唱其州之父老子弟服阳公之令道亦唱其县与其比州服杨公之令【杨或作阳非是】吾闻鸟有凤者恒出於有道之国当汉时黄霸为颍川是鸟实集而鸣焉【川下或有守字是鸟或作是凤鸟也】若史可信【史或作使】坚归吾将贺其见凤而闻其鸣也已【或无已字】

送廖道士序【公永贞元年自阳山徙椽江陵道衡山而作】

五岳於中州衡山最远【衡南岳也】南方之山巍然高而大者以百数【或无之字或无高字】独衡为宗【衡下或有山字】最远而独为宗其神必灵衡之南八九百里地益高山益峻水清而益驶【或无峻水清而益五字非是驶或作駛音快】其最高而横絶南北者岭郴之为州在岭之上测其高下得三之二焉【测如周礼测土深之测或作侧下别有南字皆非是】中州清淑之气於是焉穷【州下或有之字】气之所穷盛而不过【或无盛字】必蜿蜒扶舆磅礴而郁积【选虬龙腾骧以蜿蜒蜿蜒也蟺蚯蚓也扶舆相如子虚赋扶舆猗靡磅礴庄子将磅礴万物以为一注磅礴犹混同也蜿蜒於元切又音宛蟺市衍切又音善磅礴音薄】衡山之神既灵而郴之为州又当中州清淑之气蜿蜒扶舆磅礴而郁积【鬱上或无而字】其水土之所生神气之所感白金水银丹砂石英锺乳橘柚之包竹箭之美千寻之名材不能独当也【或无英及橘柚之包五字当下或有奇字非是】意必有魁奇忠信材德之民生其闲而吾又未见也其无乃迷惑溺没於老佛之学而不出邪【学或作教】廖师郴民而学於衡山气专而容寂多艺而善游岂吾所谓魁奇而迷溺者邪【迷下或有惑没字】廖师善知人若不在其身必在其所与游访之而不吾告何也於其别申以问之

送王秀才序【或作进士王含】

吾少时读醉乡记【王绩字无功隋末大儒通之弟也着醉乡记以次刘伶酒德颂含其子孙也序云建中初天子嗣位当作於德宗之世次前後篇当贞元二十年云】私怪隐居者无所累於世而犹有是言岂诚旨於味邪及读阮籍陶潜诗乃知彼虽偃蹇不欲与世接【乃上或有然後字】然犹未能平其心或为事物是非相感发【或或作不或无发字】於是有托而逃焉者也若顔氏子操瓢与箪【一云顔氏之子操瓢与箪食或无子字】曾参歌声若出金石彼得圣人而师之汲汲每若不可及於外也固不暇尚何翹彙之托而昏冥之逃邪【何下或有事字】吾又以为悲醉乡之徒不遇也【为字疑衍】建中初天子嗣位【大历十四年德宗即位十五年正月改元建中】有意贞观开元之丕绩在廷之臣争言事【廷上或有朝字】当此时醉乡之後世又以直废吾既悲醉乡之文辞而又嘉良臣之烈【或无又字】思识其子孙今子之来见我也无所挟吾犹将张之况文与行不失其世字浑然端且厚惜乎吾力不能振之而其言不见信於世也於其行姑与之饮酒【其世或作於世於其或作於是】

送孟秀才序【或注琯字元和五年刑部侍郎崔枢知举试洪钟待撞赋孟琯中第唐书艺文志有琯岭南异物志一卷其岭南人坎据序云今年秋见孟氏子於郴其十月吾道於衡潭以之荆此永贞元年十月作琯古满切】

今年秋见孟氏子瑄於郴年甚少礼甚虔【一作修】手其文一编甚钜退披其编以读之尽其书无有不能吾固心存而目识矣【识音志矣或作也】其十月吾道於衡潭以之荆累累见孟氏子焉其所与偕尽善人长者吾益以奇之【吾益或作余益】今将去是而随举於京师虽不有请犹将强而授之以就其志【强而或作强有非是】况其请之烦邪京师之进士以千数其人靡所不有吾常折肱焉其要在详择而固交之善虽不吾与吾将强而附不善虽不吾恶吾将强而拒苟如是其於高爵犹阶而升堂又况其细者邪送陈秀才彤序【公贞元十九年冬自御史出为阳山令过潭州见陈彤於杨湖南门下永贞元年徙掾江陵送彤举进士彤後以元和十三年登第】

读书以为学纘言以为文非以夸多而鬪靡也盖学所以为道文所以为理耳【非以或无以字】苟行事得其宜出言适其要虽不吾面吾将信其富於文学也颍川陈彤始吾见之杨湖南门下【谓潭州刺史湖南观察使杨凭也之下或有於字】顾然其长【顾音祈】薰然其和吾目其貌耳其言因以得其为人及其久也果若不可及夫湖南之於人不轻以事接争名者之於艺不可以虚屈吾见湖南之礼有加而同进之士交誉也又以信吾信之不失也如是而又问焉以质其学策焉以考其文【时公为考官】则何信之有【诸本何下有不字旧读此序尝怪则何不信之有以下文意断絶不相承应每窃疑之後见谢氏手校真本卷首用建炎奉使之印未有题字云用陈无已所传欧公定本雖正乃删去此一不字初亦未晓其意徐而读之方觉此字之为碍去之而後一篇之血脉始复通贯因得释去旧疑尝谓此於韩集最为有功但诸本既皆不及方据谢本为多而亦独遗此字岂亦不尝见其真本耶尝以告之人不见信故今持删不字而复详着其说云】故吾不徵於陈【吾一作余下同】而陈亦不出於我此岂非古人所谓可为智者道难与俗人言者类邪凡吾从事於斯也久未见举进士有如陈生而不如志者【志上或有其字今从阁本】於其行姑以是赠之

送王秀才序【或作王垧】

吾常以为孔子之道大而能博【或无为字大而下或有其字】门弟子不能徧观而尽识也故学焉而皆得其性之所近其後离散分处诸侯之国又各以所能授弟子原远而末益分【方以阁本作引今按以分为引盖草书之误然幸有他本可证方乃不取而独信其误何哉】盖子夏之学其後有田子方子方之後流而为庄周故周之书喜称子方之为人【故下或有庄字】荀卿之书【卿下或无之字】语圣人必曰孔子子弓子弓之事业不传惟太史公书弟子传有姓名字曰馯臂子弓子弓受易於商瞿【名字或作名耳或云子弓史记作子弘汉书作子弓又云商瞿授子庸子庸授子弓传授之序与此不同馯音寒瞿音渠】孟轲师子思子思之学盖出曾子自孔子没羣弟子莫不有书【书上或有师字非是】独孟轲氏之传得其宗故吾少而乐观焉【吾或作余】太原王垧示予所为文好举孟子之所道者与之言信悦孟子而屡赞其文辞夫沿河而下苟不止虽有迟疾【或作疾迟】必至於海如不得其道也虽疾不止终莫幸而至焉【幸或作得】故学者必慎其所道道於杨墨老庄佛之学而欲之圣人之道犹航断港絶潢以望至於海也故求观圣人之道必自孟子始今垧之所由既几於知道如又得其船与楫知沿而不止呜呼其可量也哉荆潭唱和诗序【此谓裴均杨凭唐艺文志有裴均荆潭唱和集一卷诸本作裴垧非也均字君齐贞元十九年五月为荆南节度

使凭十八年九月为湖南观察使荆即荆南潭即湖南也公以永贞元年佐均为江陵法曹详见外集河南同官记】

从事有示愈以荆潭酬唱诗者愈既受以卒业【或作集或云卒叶字见汉楚元王传】因仰而言曰夫和平之音淡薄【之音或作者之语非是】而愁思之声要妙謹愉之辞难工而穷苦之言易好也是故文章之作恒发於羈旅草野至若王公贵人气满志得【至若或作若至气满志得或作气得志满】非性能而好之则不暇以为今仆射裴公开镇蛮荆【或无仆射裴三字】统郡惟九【荆南管夔忠万沔朗涪峡江陵九郡也】常侍杨公领湖之南壤地二千里【之南或作南之或无之字】德刑之政并勤爵禄之报两崇乃能存志乎诗书寓辞乎咏歌往复循环有唱斯和搜奇抉怪雕镂文字与韦布里闾憔悴专一之士较其毫厘分寸铿锵发金石幽眇感鬼神【或作神鬼】信所谓材全而能鉅者也两府之从事与部属之吏属而和之【属音蜀吏属之欲切】苟在编者咸可观也【在或作有非是】宜乎施之乐章纪诸册书从事日子之言是也告於公【谓裴均】书以为荆潭唱和诗序

送幽州李端公序【李益时佐幽州刘济幕今相国李藩也公因益来东都序以送之盖勉其归使为济言率先来覲奉职如开元时也】

元年今相国李公为吏部员外郎【年下或有春字洪玉父云是年春公犹在江陵安得有偕朝道语】愈尝与偕朝【元年六月公始自江陵召为国子博士】道语幽州司徒公之贤【贞元二十一年三月济检校司徒】曰某前年被诏告礼幽州【二十一年正月德宗崩以藩为告哀使故至幽州】入其地迺劳之使里至每进益【里或作累或作狭】及郊司徒公红帔首鞬袴握刀左右杂佩【帔或作帕鞬或作靴方从杭本刀下有在字而读连下文左字为句谢本又校作在右今按若如方意则当云左握刀右杂佩矣不应云握刀在左亦不应唯右有佩也在为衍字无疑杭本误也礼疏云带劔之法在左右手抽之为便则刀不当在右谢本亦非矣左右杂佩当自为一句内则所谓左右佩用者也鞬许戈切】弓鞬服【鞬一作?或作在阁杭蜀苑作张引说文云弓施弦为张又云服弓衣也今】

【按鞬服皆弓室也然诗云言鞬其弓又曰交鞬二弓则鞬字又可通作虚字用矣此弓鞬服谓纳弓於服耳况弓云施弦与否於服无利害作张非是鞬丑亮切】矢插房【左传抽矢纳房房箭舍也】俯立迎道左【方从阁格本道作宾非是】某礼辞曰公天子之宰礼不可如是及府又以其服即事某又曰公三公不可以将服承命卒不得辞【卒上或有及馆又如是一句方从阁杭苑粹无之今按此据次第当有此句但下文云上堂即客阶坐必东向若至馆如此即是常礼不足言唯仕府如此乃见其尊事天子使者不敢以主礼自居之意当从方本为是】上堂即客阶坐必东向【阶下一本复出即客二字云文粹亦有即字则知古本诚然也今按复出二字古本虽有然不知是何文理不足为正也】愈曰国家失太平於今六十年矣夫十日十二子相配数穷六十其将复乎【句】平必自幽州始乱之所出也【按天宝十四年范阳节度使安禄山反范阳幽州也其年岁在乙未至元和九年甲午数穷六十一甲子终矣公此序元和四年二月以後为之故云平或作乎今按若作乎字而属上句则下文不应便重出如开元时乎下句但云必自幽州始而上无平字即又不成文理今定作平仍属下句

】今天子大圣司徒公勤於礼庶几帅先河南北之将来覲奉职如开元时乎李公曰然今李公既朝夕左右必数数为上言元年之言殆合矣端公岁时来寿其亲东都【益父时官洛阳公时亦官洛阳】东都之大夫士莫不拜于门【或无复出东都字大夫士或作士大夫】其为人佐甚忠【佐谓为幽州从事】意欲司徒公功名流千万岁请以愈言为使归之献

东雅堂昌黎集注卷二十

卷二十一

钦定四库全书

东雅堂昌黎集注卷二十一

序

送区册序【洪谓区册即区弘考其始末非也贞元十九年冬公自御史出为阳山令此序在阳山作其曰岁初吉当在明年正月也】

阳山天下之穷处也【阳山县名属连州】陆有丘陵之险虎豹之虞江流悍急横波之石廉利侔劒戟舟上下失势【江上或有水有字廉或作其】破碎沦溺者往往有之县郭无居民官无丞尉夹江荒茅篁竹之闲【荒茅篁竹蜀本作荒榛茅竹篁诸本作丛汉书严助传谿谷之闲篁竹之中顔曰竹田曰篁】小吏十余家皆鸟言夷面始至言语不通【语或作说不下有相字川本北本又作言语不相通】画地为字然後可告以出租奉期约是以宾客游从之士无所为而至【士或作事】愈待罪於期且半岁矣【贞元二十年公贬阳山令或无矣字】有区生者誓言相好自南海挈舟而来升自宾阶仪观甚伟【观或作冠】坐与之语文义卓然庄周云逃空虚者闻人足音蹵然而喜矣【见庄子徐无鬼篇 蹵许恭切】况如斯人者岂易得哉【虚或作谷斯或作其或无斯字皆非是】入吾室闻诗书仁义之说欣然喜若有志於其闲也【欣然下或有以字於或作乎闲或作闻】与之翳嘉林坐石矺投竿而渔陶然以乐若能遗外声利而不厌乎贫贱也【乐上方无以字厌下方无乎字 今按欣然喜陶然乐当为一例故诸本皆有以字而方本皆无然窃详其文势之缓急恐上句应无而下句应有也故定从此本】岁之初吉【或作告毛氏诗传云初吉朔日也此盖通言岁首也】归拜其亲【拜或作覲】酒壶既倾序以识别【识音志】

送张道士序【公逸诗有饮城南道边古墓上逢中丞过赠兵部卫员外少室张道士岂此道士耶】

张道士嵩高之隐者【高或作南下同隐或作有道 今按有道语似太重当且作隐】通古今学有文武长材寄迹老子法中为道士以养其亲九年闻朝廷将治东方贡赋之不如法者【方下或有诸侯字】三献书不报长揖而去京师士大夫多为诗以赠而属愈为序诗曰

大匠无弃材寻尺各有施况当营都邑杞梓用不疑张侯嵩高来面有熊豹姿开口论利害劒锋白差差【白或作自非是】恨无一尺捶【或作箠】为国答羌夷诣阙三上书臣非黄冠师臣有胆与气不忍死茅茨又不媚笑语不能伴儿嬉乃着道士服衆人莫臣知臣有平贼策狂童不难治【平声】其言简且要陛下幸听之天空日月高下照理不遗或是章奏繁裁择

未及斯【或从阁本作期非是】宁当不俟报归袖风披披答我事不尔吾亲属吾思昨宵梦倚门手取连环持今日有书至又言归何时霜天熟柿栗收拾不可迟岭北梁可构寒鱼下清伊【或作漪今按伊水在嵩北若前两处作嵩南即此处不可作伊若彼作嵩高则此乃可作伊耳漪字虽可通用然本不从水只是语助辞如书断断猗大学作兮庄子犹为人猗亦是此类故说文水部无之但因伐檀涟漪沦漪故俗遂加水用之而韩公亦有含风漪之句则此作漪亦未可知今上文既作嵩高则此且作伊亦无害若有他证见得上文果当作南则此却当改为漪矣】既非公家用且复还其私从容进退闲无一不合宜时有利不利虽贤欲奚为但当励前操富贵非公谁送高闲上人序【赞宁高僧传云闲乌程人克精书字宣宗尝召入对御草圣遂赐紫衣後归湖州开元寺终焉闲尝好以雪川白紵书真草为世楷法】

苟可以寓其巧智使机应於心不挫於气则神完而守固虽外物至不胶於心尧舜禹汤治天下养叔治射【史记养由基善射去柳叶百步射之百发百中】庖丁治牛【庄子养生篇庖丁为文惠君解牛文惠君曰善哉技盖至於此乎】师旷治音声【旷字子野晋平公时人】扁鹊治病【扁鹊即秦越人晋昭公时人】僚之於丸【庄子市南宜僚弄丸而两家之难解】秋之於奕【孟子弈秋通国之善弈者也】伯伦之於酒【刘伶字伯伦晋人】乐之终身不厌奚暇外慕夫外慕徙业者【徙或作从非是】皆不造其堂不啻其馘者也【啻音剂馘侧吏切】往时张旭善草书【旭苏州吴郡人时或作者善或作喜非是】不治他伎喜怒窘穷忧悲愉佚怨恨思慕酣醉无聊不平有动於心必於草书焉发之【喜怒丈苑作喜焉草书怒焉草书不平监本作平生皆非是或无焉字】观於物见山水崖谷鸟兽虫鱼草木之花实日月列星风水火雷霆霹雳歌舞战鬪天地事物之变可喜可愕一寓於书故旭之书变动犹鬼神不可端倪【或无犹字非是】以此终其身而名後世今闲之於草书有旭之心哉不得其心而逐其迹未见其能旭也为旭有道利害必明无遗锱铢情炎於中【情或作精】利欲鬪进有得有丧勃然不释然後一决於书而後旭可几也【或无後字】今闲师浮屠氏一死生解外胶【诸本并作胶杭欧谢本作缪莫侯切犹绸缪也庄子内轂者不可缪而捉义盖同比今按胶者黏着之物而其力之溃败不黏为解今下文颓堕溃败之语反之当定作胶】是其为心必泊然无所起其於世必淡然无所嗜【二所下方从杭本皆有於字非是】泊与淡相遭颓堕委靡溃败不可收拾【败或作散】则其於书得无象之然乎【东坡送参寥诗云退之论草书万事未尝屏忧愁不平气一寓笔所骋颇怪浮屠人视身如丘井顔然寄淡泊谁与发豪猛正谓此一段文意也】然吾闻浮屠人善幻多技能【善或从阁本作喜今按善幻说已见第四卷酬崔少府诗】闲如通其术则吾不能知矣【闲下或有师字方云此篇用意皆本於庄子所称宋元君画图有一史後至解衣盘礴羸郭注云内足者神闲而意定又云王彦法谓退之此数语乃深得祖师向上休歇一路其见处胜裴休远甚今按韩公本意但谓人必有不平之心鬱积之久而後发之则其气勇决而伎必精今高闲既无是心则其为伎宜其溃败委靡而不能奇但恐其善幻多伎则不可知耳此自韩公所见非如画史祖师之说也】

送殷员外序【一作殷侑员外使回鹘序元和十二年也据传诏侑副宗正少卿李孝诚使回鹘可汗骄甚侑不为屈虜责其倨侑曰可汗唐壻欲坐屈使者拜乃可汗无礼非使臣倨也虜憚其言不敢逼还迁虞部员外即皆与序合惟年次稍先後当以序为正】

唐受天命为天子凡四方万国【阁杭无万字非是】不问海内外无小大咸臣顺於朝【杭本无字字非是】时节贡水土百物大者特来小者附集元和睿圣文武皇帝既嗣位【宪宗元和三年正月上此尊号】悉治方内就法度十二年诏曰四方万国惟回鹘於唐最亲奉职尤谨丞相其选宗室四品一人持节往赐君长告之朕意又选学有经法通知时事者一人与之为贰【法或作术】由是殷侯侑自太常博士迁尚书虞部员外郎兼侍御史朱衣象笏承命以行【杭本无命字非是】朝之大夫莫不出饯酒半右庶子韩愈执盞言曰【元和十一年五月公为太子右庶子】殷大夫【或作殷侯】今人适数百里出门惘惘有离别可怜之色持被入直三省【特或作襍入直三省洪庆善谓唐无三省持被入直当为句絶三息暂反省息并切朱新仲云唐以侍中两令为三省长官张籍寄白舍人诗三省比年名望重说者以唐无三省非也若不言三省不知入直何所以上下文考之朱说为长】丁宁顾婢子语刺刺不能休【刺刺方云洪庆善云刺音虑达切樊泽之云刺七迹切若如洪读则当以戾为义顾婢子语何戾耶潘岳阁道謡和峤刺促不得休语意皆同此当以七迹切为正】今子使万里外国独无几微出於言面岂不真知轻重大丈夫哉丞相以子应诏真诚知人【下或有矣字】士不通经果不足用於是相属为诗以道其行云

送杨少尹序【一有巨源二字新旧史无传艺文志云字景山贞元五年第进士以能诗名尝有三刀梦益州一箭取辽城之句白乐天赠诗云早闻一箭取辽城以此诗遂知名既引年去命为其都少尹盖公河中人即其乡也张籍有诗送云官为本府当身荣因得还乡任野情意盖指此二疏事见前汉此序长庆中公为吏部侍郎时作故序谓余忝在公卿後云】

昔疏广受二子以年老一朝辞位而去【疏或作疎汉书作疏今按疏正字疎俗体也】于时公卿设供张祖道都门外【张或作帐谓供具张设也音竹亮切公送石弘序张上东门只用张字况二疏本传自可考汉书如高祖留沛张饮黥布传张御食饮皆谓张设也】车数百两道路观者多叹息泣下共言其贤汉史既传其事而後世工画者又图其迹至今照人耳目赫赫若前日事国子司业杨君巨源方以能诗训後进【因话録云杨巨源在元和中诗韵不为新语体律务实工夫颇深以高文为诸生所宗】一旦以年满七十【或无一旦二字】亦白丞相去归其乡世常说古今人不相及今杨与二疏其意岂异也【及阁杭本作古及上或别有方字其意岂异也或作岂其异意邪皆非是】予忝在公卿後遇病不能出不知杨侯去时城门外送者几人车几两马几疋【或无几人字疋或作驷】道边观者亦有叹息知其为贤以否【以与通用】而太史氏又能张大其事为传继二疏踪迹否【阁本无踪迹否三字非是或但无否字亦非】不落莫否见今世无工画者而画与不画固不论也然吾闻杨侯之去丞相有爱而惜之者【惜下阁本本无之字】白以为其都少尹【白或作署或无白字】不絶其禄又为歌诗以劝之京师之长於诗者亦属而和之又不知当时二疏之去有是事否古今人同不同未可知也【不下或无同字】中世士大夫以官为家罢则无所於归【或无於字非是】杨侯始冠举於其乡歌鹿鸣而来也【乡或作家】今之归指其树曰某树吾先人之所种也某水某丘吾童子时所钓游也乡人莫不加敬诫子孙以杨侯不去其乡为法古之所谓乡先生没而可祭於社者其在斯人欤其在斯人欤【二语阁杭本皆无在字】

送权秀才序【公时佐汴州权自汴举进士京师送以此序】

伯乐之廐多良马【孙阳字伯乐秦穆公时人也事见战国策】卞和之匱多美玉【卞和献玉事见韩非子】卓犖瓌怪之士【怪或作奇】宜乎游於大人君子之门也相国陇西公既平汴州【西下或有董字贞元十二年七月以陇西公董晋为宣武军节度使平汴州之乱】天子命御史大夫吴县男为军司马【县或作郡非也董晋祭文石本可考下同是年八月以汴州刺史御史大夫吴县男陆长源为节度行军司马使】门下之士权生实从之来【下或有观字】权生之貌固若常人耳其文辞引物连类穷情尽变宫商相宣合石谐和【和方从阁杭蜀死作声云晋范啓谓孙绰天台山赋曰恐此金石非中宫商故文章以谐声为尚公进平淮西表曰丛杂乖戾律吕失次亦谓此也今按谐和即谓其声之和耳若作谐声却犯本字而语意亦不活方説非是】寂寥乎短章春容乎大篇如是者閱之累日而无穷焉【閱或作闻】愈常观於皇都每年贡士至千余人或与之游或得其文若权生者百无一二焉如是而将进於明有司重之以吴县之知其果有成哉於是咸赋诗以赠之

送湖南李正字序【或作送李础判官正字归湖南础之父仁钩也贞元十九年登进士第元和初为秘书省正字湖南观察推官公分司东都础自湖南请告来覲其父於其还公以诗及序送之诗见第四卷末】

贞元中愈从太傅陇西公平汴州【贞元十二年七月以董晋镇宣武】李生之尊府以侍御史管汴之盐铁【府或作父】日为酒杀羊享宾客李生则尚与其弟学读书习文辞以举进士为业愈於太傅府年最少故得交李生父子闲公薨军乱军司马从事皆死【贞元十五年二月晋卒军乱杀行军司马陆长源判官孟叔度等】侍御亦被谗为民日南【日或作由仁钩以谗流交州】其後五年愈又贬阳山令今愈以都官郎守东都省【官下或有员外字王下或有府字此谓东都盖李亦分司也】侍御自衡州刺史为亲王长史亦留此掌其府事【亦留此或无亦此二字留作收皆非是】李生自湖南从事请告来覲於时太傅府之士惟愈与河南司録周君独存【周君名君巢时为河南府司録参军君下或有巢字】其外则李氏父子相与为四人【外下或无则字子下或无相字】离十三年【时元和六年自贞元已卯至元和庚寅才十二年耳此言十三年岂退之与础别在戊寅岁乎】幸而集处得燕而举一觴相属此天也非人力也侍御与周君於今为先辈成德【成或作盛】李生温然为君子【李上或有若字】有诗八百篇传咏於时惟愈也业不益进行不加修顾惟未死耳往拜侍御谒周君抵李生退未尝不发媿也【或无退字】往时侍御有无尽费於朋友及今则又不忍其三族之寒饥聚而館之疏远毕至【寒饥或作饥寒至文苑作在 今按在乃至字之误书史多互用者如此则当作至而治道不至多言不至学古兵法之类以他书所引考之却当作在也】禄不足以养【下或有为字】李生虽欲不从事於外其势不可得已也【已或作止】重李生之还者皆为诗愈最故故又为序云【或作序之或作之序】

送石处士序【或有赴河阳参谋字谋或作谟或有诗字洪字濬川洛阳人罢黄州録事参军退居于洛十年不仕及是为河阳参谋欧公云洪始终无无称而名重一时以尝为退之称道耳洪之河阳幕府之明年召为京兆昭应尉集贤校理又明年六月卒於是公志其墓】

河阳军节度御史大夫乌公为节度之三月【元和五年四月诏用乌公重裔为河阳军节度

使御史大夫治孟州其曰节度之三月则是岁六七月闲也】求士於从事之贤者有荐石先生者公曰先生何如曰先生居嵩邙瀍谷之闲【嵩邙山名瀍谷水名皆在洛阳之境谷即涧水书云卜涧水东是也後改名涧】冬一裘夏一葛食朝夕饭一盂蔬一盘【或无食字】人与之钱则辞请与出游未尝以事辞劝之仕不应【事辞或作事免不上或有则字】坐一室左右图书与之语道理辨古今事当否论人高下事後当成败若河决下流而东注若驷马驾轻车就熟路而王良造父为之先後也若烛照数计而龟卜也【东上或无而字或并无下流而东注五字熟或作夷卜或作兆】大夫曰先生有以自老无求於人其肯为某来邪从事曰大夫文武忠孝求士为国不私於家【或作为家】方今寇聚於恒师环其疆【元和四年三月成德军节度王士真卒其子承宗叛十二月诏吐突承璀率诸道兵讨之地理志鎮州恒山郡本恒州天宝元年更名镇成德军所治也】农不耕收【收蜀本作牧】财粟殫亡吾所处地归输之涂【归阁抗本作师 今按当从诸本作归而读作馈谓漕运也】治法征谋宜有所出【所出阁杭本作主出】先生仁且勇若以义请而强委重焉其何说之辞於是譔书词具马币卜日以授使者求先生之庐而请焉先生不告於妻子不谋於朋友【朋友阁杭本作其朋】冠带出见客拜受书礼於门内宵则沐浴戒行事【或无则字事或作李】载书册问道所由告行於常所来往晨则毕至张上东门外【张下或有筵於二字或只有别字】酒三行且起有执爵而言者曰大夫真能以义取人先生真能以道自任决去就为先生别【真阁作其非是方从阁杭本无为先生别以下十二字 今按此阁杭本由有二去就字而脱其中字遂使下句全无文理方以之误矣】又酌而祝曰凡去就出处何常惟义之归遂以为先生寿又酌而祝曰使大夫恒无变其初无务富其家而饥其师无甘受佞人而外敬正士无味於谄言惟先生是听以能有成功保天子之宠命【或无敬字谄或作诤皆非是或无是字】又祝曰使先生无图利於大夫而私便其身【图阁本作固】先生起拜祝辞曰敢不敬蚤夜以求从祝规【不下或有只字】於是东都之人士咸知大夫与先生果能相与以有成也遂各为歌诗六韵退愈为之序云【退或作遣蜀本云送诗元本具於此今附第四卷末】

送温处士赴河阳军序【温造字简舆大雅之五世孙文宗朝终礼部尚书公前年送石洪今又送造二生皆东都处士之秀者公时为河南令】

伯乐一过冀北之野而马羣遂空夫冀北马多天下【多下或有於字】伯乐虽善知马安能空其羣邪【能下或有遂字】解之者曰吾所谓空非无马也无良马也伯乐知马遇其良辄取之羣无留良焉苟无良虽谓无马不为虚语矣【苟无下或有留其二字虽下阁杭本无谓字】东都固士大夫之冀比也恃才能深藏而不市者【恃或作怀市或作贾】洛之北涯曰石生【石洪也】其南涯曰温生【即造也二处士皆居洛阳南北之涯即赠卢仝诗所谓水北山人水南山人是也】大夫乌公以鉞钺鎮河阳之三月以石生为才以礼为罗罗而致之幕下未数月也以温生为才於是以石生为媒以礼为罗又罗而致之幕下东都虽信多才士朝取一人焉拔其尤暮取一人焉拔其尤自居守河南尹以及百司之执事【居守谓东都留守郑余庆】与吾辈二县之大夫【东都郭下二邑洛阳河南也】政有所不通事有所可疑奚所谘而处焉【谘或作咨处或作取】士大夫之去位而巷处者谁与嬉游小子後生於何考德而问业焉搢绅之东西行过是都者无所礼於其庐若是而称曰大夫乌公一鎮河阳而东都处士之庐无人焉岂不可也夫南面而听天下其所托重而恃力者惟相与将耳相为天

子得人於朝廷【或无朝字】将为天子得文武士於幕下求内外无治不可得也【阁杭蜀本无内外二字或作内外求无理皆非是】愈縻於兹不能自引去【或无自字】资二生以待老今皆为有力者夺之其何能无介然於怀邪【阁杭本无之字】生既至【或无至字】拜公於军门其为吾以前所称为天下贺【其或作具】以後所称为吾致私怨於尽取也留守相公首为四韵诗歌其事愈因推其意而序之【或作焉】

送郑尚书序【郑权汴州开封人贞元六年举进士第】

岭之南其州七十其二十二隶岭南节度府其四十余分四府【通典曰岭南五府经略使治广州领州二十二邕管经略使治邕州领州十三容管经略使治容州领州十四桂管经略使治桂州领州十四镇南经略使安南都护府治交州领州十一至德元年升五府经略使为岭南节度使】府各置帅然独岭南节度为大府大府始至【阁杭本无下大府字】四府必使其佐啓问起居谢守地不得即贺以为礼岁时必遣贺问致水土物大府帅或道过其府府帅必戎服左握刀右属弓矢帕首袴鞬迎郊【郊上或有于字帕莫辖切鞬许戈切】及既至大府帅先入据馆【或无先字】帅守屏【必郢切】若将趋入拜庭之为者大府与之为止至一再【一下或更有至字】乃敢改服以宾主见适位执爵皆兴拜不许乃止若小侯之事大国有大事谕而後行【谕或作咨】隶府之州离府远者至三千里悬隔山海使必数月而後能至蛮夷悍轻易怨以变其南州皆岸大海多洲岛颿风一日蹕数千里【颿与帆同颿或作飘蹕音遄义勅教切】漫澜不见踪迹控御失所依险阻结党仇【或作仇党】机毒矢以待将吏【或无将字】撞搪呼号以相和应蜂屯蚁杂不可爬梳【或作把疏】好则人怒则兽故常薄其征入简节而疎目时有所遗漏不究切之长养以儿子至纷不可治乃草薶而禽猕之【薶音雉芟也猕息浅切】尽根株痛断乃止其海外杂国若耽浮罗流求毛人夷亶之州【或作洲】林邑扶南真腊于陀利之属【耽浮罗国流求国毛人国夷州亶州林邑国扶南国真腊国皆海外蛮夷之国云林邑一曰环玉在交州南海行三千里真腊一曰吉蔑在林邑西北去京师三万七千里耽音耽】东南际天地以万数或时候风潮朝贡蛮胡贾人【胡或作夷】舶交海中若岭南帅得其人则一边尽治不相寇盗贼杀无风鱼之灾水旱疠毒之患外国之货日至珠香象犀玳瑁奇物溢於中国不可胜用故选帅常重於他鎮非有文武威风知大体可畏信者则不幸往往有事长庆三年四月以工部尚书郑公为刑部尚书兼御史大夫往践其任【长庆三年四月权为岭南节度使】郑公尝以节鎮襄阳【尝或作常元和十一年七月权为山南东道节度使】又帅沧景德棣【十三年四月权为德州刺史德棣沧景节度使】历河南尹华州刺史【初权自河南尹帅山南东道为华州刺史】皆有功德可称道入朝为金吾将军散骑常侍【元和十四年十一月权为右金吾卫大将军充左街使穆宗即位改左散骑常侍】工部侍郎尚书【长庆元年权自河南尹入为工部侍郎二年十月迁本曹尚书】家属百人无数亩之宅僦屋以居可谓贵而能贫为仁者不富之效也【贵而能贫此左氏襄二十二年语权本传云用度奢侈复与此异何邪今按通监权家多姬妾禄薄不能贍因李训于王守澄求节镇得广州此语盖讥之也】及是命朝廷莫不悦将行公卿大夫士苟能诗者咸相率为诗以美朝政以慰公南行之思韵必以来字者所以祝公成政而来归疾也【祝上或无以字或祝下有使字】

送水陆运使韩侍御归所治序【考食货志宪宗用李绛议以韩重华为振武京西营田和余水陆运使振武乃单于大都护府故地後改名振武重华後名约预甘露之祸洪谓唐志无所考非也今按汉书王尊传有治所字此所治字当乙】

六年冬振武军吏走驿马诣阙告饥公卿廷议以转运使不得其人【或无转字】宜选才干之士往换之吾族子重华适当其任【元和六年四月以卢坦为户部侍郎判度支曾振武告饥时薛謩为代北水陆运使坦以重华代謩也】至则出赃罪吏九百余人脱其桎梏给耒耜与牛使耕其傍便近地以偿所负释其粟之在吏者四十万斛不徵吏得去罪死假种粮齿平人有以自效莫不涕泣感奋相率尽力以奉其令而又为之奔走经营【为下或无之字】相原隰之宜指授方法故连二岁大熟吏得尽偿其所亡失四十万斛者而私其赢余【私其下或有有字其或作有皆非是】得以苏息军不复饥君曰此未足为天子言请益募人为十五屯屯置百三十人而种百顷令各就高为堡东起振武转而西过云州界极於中受降城出入河山之际【或作险】六百余里屯堡相望寇来不能为暴人得肆耕其中少可以罢漕挽之费朝廷从其议秋果倍收岁省度支钱千三百万八年诏拜殿中侍御史锡服朱银【或作朱金银绯唐五品服】其冬来朝奏曰得益开田四千顷则尽可以给塞下五城矣【五城东西中三受降城朔方振武二军也】田五千顷法当用人七千臣令吏於无事时督习弓矢为战守备因可以制虏庶几所谓兵农兼事务一而两得者也【或无几字务一或作一务雨得或作得雨】大臣方持其议【八年冬重华入朝会宰相李绛已罢後宰相恃其议而止语见食货志志所载营田事大抵与公此序相表里】吾以为边军皆不知耕作开口望哺有司常僦人以车船自他郡往输乘沙逆河远者数千里人畜死蹄踵交道费不可胜计中国坐耗【坐耗或作坐见耗虚或作坐耗虚今从阁杭本定】而边吏恒苦食不继今君所请田皆故秦汉时郡县地其课绩又已验白若从其言其利未可遽以一二数也今天子方举羣策以收太平之功宁使士有不尽用之叹怀奇见而不得施設也君又何忧而中台士大夫亦同言侍御韩君前领三县纪纲二州奏课常为天下第一行其计於边其功烈又赫赫如此使尽用其策西北边故所没地可指期而有也闻其归皆相勉为诗以推大之而属余为序

送郑十校理序【旧史云郑余庆之子瀚本名涵以文宗藩邸时名同改名瀚贞元十年举进士以父谪官累年不仕自秘书省校书郎迁洛阳尉充集贤院修撰改长安尉集贤校理公以元和四年六月为都官员外郎分司东都涵求告来宁公於其行作是序以送之盖五年春也故有归骑春衫薄之句】

秘书御府也天子犹以为外且远不得朝夕视始更聚书集贤殿别置校讎官曰学士曰校理【士下或无曰字】常以宠丞相为大学士【开元十三年改集仙殿为集贤殿聚四部书其中置修撰校理官五品以上为学士六品以下为直学士以宰相张说为大学士】其他学士皆达官也校理则用天下之名能文学者苟在选不计其秩次惟所用之【名下或有士字又或有而字】由是集贤之书盛积尽秘书所有不能处其半书日益多官日益重四年郑生涵始以长安尉选为校理【为一作授】人皆曰是宰相子能?俭守教训好古义施於文辞者如是而在选公卿大夫家之子弟其劝耳矣【家下或有选字非是】愈为博士也始事相公於祭酒分教东都生也事相公於东太学今为郎於都官也又事相公於居守【居上或无於字】

按旧史元和元年郑余庆罢相为太子宾客迁国子祭酒冬十一月庚戌迁河南尹三年夏六月甲戌自河南尹拜东都留守六年十月除吏部尚书唐制东都置六馆学与京师同故掌其职者谓之分教而旧史又云愈始举进士投文於公卿闻故相郑余庆为之延誉由是知名於时】三为属吏经时五年观道德於前後听教诲於左右可谓亲薰而炙之矣【或无後字炙之石切】其高大远密者不敢隐度论也其勤已而务博施以已之有欲人之能不知古君子何如耳【或无耳字或作尔】今生始进仕获重语於天下而慊慊若不足真能守其家法矣其在门者可进贺也【门下或有下字】求告来宁【涵以元和四年为校理五年宁亲东都时余庆为东都留守】朝夕侍侧东都士大夫不得见其面於其行日分司吏与留守之从事【司下或有郎字】窃载酒肴席定鼎门外【古今地名曰河南有鼎门九鼎所定也即成王定鼎于郊廓之所】盛宾客以饯之既醉各为诗五韵且属愈为序

诗【洛诗下或有曰字注字洛上或有得字】

相公倦台鼎分正新邑洛【正或作政】才子富文华校讎天禄阁寿觴佳节过归骑春衫薄【衫或作和】鸟弄正交加杨花共纷泊亲交谁不美去去翔寥廓【亲交或作交亲】

韦侍讲盛山十二诗序【讲或作御或作盛山唱和诗序唐史韦处厚字德载京兆万年人中进士第又擢才识兼茂科贤良异等宪宗时历考功员外郎坐与宰相韦贯之善出为开州刺史穆宗立为翰林侍读学士再迁中书舍人文宗时为相初在开州有盛山诗十二篇一宿云亭二隐月岫三茶岭四梅溪五流盃渠六盘石磴七桃塢八竹嵒九琵琶台十胡卢沼十一绣衣石榻十二上土瓶泉盛山开州也开州随巴东郡之盛山县武德元年改为开州】

韦侯昔以考功副郎守盛山人谓韦侯美士考功显曹盛山僻郡夺所宜处纳之恶地以枉其材韦侯将怨且不释矣或曰不然夫得利则跃跃以喜不利则戚戚以泣【跃跃合杭本无下跃字以下句偶之非是不利不下或有得字】若不可生者岂韦侯谓哉【谓哉上或有之字】韦侯读六艺之文以探周公孔子之意【艺下或无之字探杭作深子下或无之字皆非是】又妙能为辞章可谓儒者夫儒者之於患难苟非其自取之其拒而不受於怀也若筑河堤以障屋溜其容而消之也若水之於海水之於夏日其翫而忘之以文辞也若奏金石以破蟋蟀之鸣虫飞之声况一不快於考功盛山一出入息之闲哉未几果有以韦侯所为十二诗遗余者其意方且以入谿谷【或无方字】上岩石追逐云月不足日为事读而歌咏之【歌咏或作咏歌】令人欲弃百事往而与之游不知其出於巴东以属胸?也【胸?说文虫名汉中有胸?县地下湿多此虫因以为名胸从肉句声考其义当作润蠹唐书音蠹闰刘禹锡音屈忍汉书胸音劬通典曰开州汉之胸?地也】于时应而和者凡十人【樊谓考下文只六人一曰和者十人而时集闷下者六人耳】及此年韦侯为中书舍人侍讲六经禁中【诸本作及此年阁本作明年杭本作时年谓此时之年也韦以元和十一年刺盛山韩以长庆二年作序阁本作明年由时字讹也今按作明年则非实作时年则不词当从诸本作及此年则无可疑矣诸本禁中下有名处厚字元和十五年三月处厚以侍讲学士讲诗关雎书洪范于太液亭长庆二年四月为中书舍人】和者通州元司马为宰相【元和十年三月稹为通州司马长庆二年二月同平章事】洋州许使君为京兆忠州白使君为中书舍人【元和十三年十二月

居易为忠州刺史长爱元年十二月为中书舍人】李使君为谏议大夫【景俭字寬中元和中为忠州刺史长庆元年八月为谏议大夫不言某州使君者连上忠州文也泽之云景险时为楚州疑有脱误】黔府严中丞为秘书监【元和十四年二月以商州刺史严暮为黔中观察使长庆元年入为秘书卒】温司马为起居舍人【温造时为武陵司马今诸本皆亡州名亦疑脱误】皆集阙下【和者下六人诸本亦各书其名云元司马名稹许使君名康佐白使君居易李使君景俭严中丞武温司马造方以阁杭本并上文名处厚共删十四字云蜀本侧书稹康佐居易景俭造五名独严不书其名今考严谓严暮时为秘书监乐天集有制词可考诸本改作严武蜀本又作少监皆非也李景俭自楚州召还温造自朗州召还今皆不着其郡亦阙文也】於是盛山十二诗与其和者【山下或有之字】大行於时联为大卷家有之焉慕而为者将日益多则分为别卷韦侯俾余题其首

石鼎联句诗句【阁杭无此篇洪庆善曰张文潜本校与诸本特异盖原於蔡文忠也然增损太多不知得於何本今姑以杭蜀本为正 今按张本多可取当附见以备参考 洪兴祖云石鼎联句诗或云皆退之所作如毛穎传以文滑稽耳轩辕寓公姓弥明寓公名侯喜师服皆其弟子也余曰不然公与诸子嘲戏见於诗者多矣皇甫湜不能诗则曰倚摭粪壤间孟郊思苦则曰肠肚镇煎燂樊宗师语澁则曰辞慳义卓阔止於是矣不应讥诮轻薄如是之甚也且序云衡山道士轩辕弥明貌极丑白须黑面长颈而高结喉中又作楚语年九十余此岂亦退之自谓邪予同年李道立云尝见唐人所作贾岛碣云石鼎联句所称轩辕弥明即君也岛范阳人弥明衡山人岛本浮屠而弥明道士附会之妄无可信者独仙传拾遗有弥明传虽祖述退之之语亦亦有是人矣联句若以为公作则若出一口矣今读其刘侯句不及弥明远甚何至是邪盖闻君子损已以成人之美未闻抑人以取胜也其曰吾不解世俗书见孔武仲杂记】

元和七年十二月四日衡山道士轩辕弥明自衡下来【下或作山】旧与刘师服进士衡湘中相识将过太白知师服在京夜抵其居宿【知下师服张本作刘或无夜字】有校书郎侯喜新有能诗声夜与刘说诗弥明在其侧貌极丑白须黑面长颈而高结喉中又作楚语【蔡张本皆作长颈而结喉无高与中字唐子西曰结古髻字也高结当句断汉陆贾传尉佗魁结顔曰读为椎髻云一撮之髻其形如椎高结语原此今按古语自有城中好高结不必引椎结也但道士之首加冠不作椎结读结为髻而以喉属下句者虽有据而非是盖长颈故见其结喉之高而此高结喉中又作楚语也不然则当从蔡张本删高中二字】喜视之若无人弥明忽轩衣张眉指鑪中石鼎谓喜曰子云能诗能与我赋此乎【云或作之又无能诗二字非是】刘往见衡湘闲人说云年九十余矣【张本年上有其字无矣字】解捕逐鬼物拘囚蛟螭虎豹不知其实能否也【方无解字解张作能拘囚张作罔两不上方有然字而无其字或无否字】见其老颇貌敬之不知其有文也闻此说大喜即援笔题其首两句【张无说字即方作既】次传於喜喜踊跃即缀其下云云【於下两喜字张本并作侯方无下字】道士哑然笑曰【哑乌格切】子诗如是而已乎即袖手竦肩倚北墙坐【袖杭蜀本作抽倚或作旁或无坐字】谓刘曰吾不解世俗书子为我书【解或作能後同子为上或有弟字我书下有吾句字】因高吟曰龙头缩菌蠢豕腹涨彭亨初不似经意【不似张本作似非疑当乙作似不】诗旨有似讥喜二子相顾慙骇【二子张作二人】欲以多穷之即又为而传之喜喜思益苦【或无思字】务欲压道士每营度欲出口吻【或无欲字】声鸣益悲操笔欲书【张作

而书】将下复止竟亦不能奇也毕即传道士道士高踞大唱曰刘把笔吾诗云云【或无诗字张本作刘进士把笔则又高吟云云】其不用意而功益奇【此从张本下四字或作益切奇出非是或疑其当作若】不可附说语皆侵刘侯【或无侯字】喜益忌之刘与侯皆已赋十余韵弥明应之如响皆颖脱含讥讽夜尽三更二子思竭不能续因起谢曰尊师非世人也某伏矣愿为弟子不敢更论诗【夜尽三更诸本在不能续之下下更有一子二字此从张本方从杭蜀本文粹无益忌至讥讽二十四字从思竭不能续五字但有喜字属上句又尽作益二子二字下便连因起谢张本又以尽为盖而一本并无尽益盖三字今按方本简严诸本重复然简严者似於事理有所未尽而重复者乃得见其曲折之详但今恐有漏落故且从诸本及张本而方本固在其中但方本语侵刘喜刘既书姓喜不当独书名恐刘下本有侯字而下文别有喜字之误也诸本喜益忌之之下复云刘与侯皆已赋千余韵语亦太冗张本夜尽三更四字属於含讥讽之下固善然似不若移於喜益忌之之下此皆未敢自以为然读者详之非世人也或无世人或作非世人能出也张本某下有等字伏或作服】道士奋曰【奋下或有髯字或有目字或有然字今按恐或有髯字】不然章不可以不成也又谓刘曰把笔来吾与汝就之【或无来字或无吾与汝就之五字】即又唱出四十字为八句书讫使读读毕谓二子曰章不已就乎二子齐应曰就矣【张无即字出或作书非是讫使方作止即下读字张本作之属上句方无不字】道士曰此皆不足与语【此或作子】此宁为文邪吾就子所能而作耳【就下或无子字作下或有之字耳或作矣】非吾之所学於师而能者也吾所能者子皆不足以闻也独文乎哉吾语亦不当闻也【吾所能或作吾所闻语下张本有子字】吾闭口矣二子大惧皆起立牀下拜曰【张无皆字】不敢他有问也愿闻一言而已先生称吾不解人闲书敢问解何书请闻此而已道士寂然若无闻也【方无敢问解何书五字请闻下十三字张本但存寂然二字无十一字】累问不应二子不自得即退就座道士倚墙睡鼻息如雷鸣二子怛然失色不敢喘【喘上张本有少字】斯须曙鼓动冬冬【音形】二子亦困遂坐睡【或无遂坐睡三字】及觉日已上惊顾覓道士不见【上张本作出方无惊字】即问童奴奴曰【童张本作僮奴曰上张有僮字】天且明道士起出门若将便旋然奴怪久不返即出到门覓无有也【张无到门字覓下有之字】二子惊惋自责若有失者闲遂诣余言余不能识其何道士也尝闻有隐君子弥明岂其人耶韩愈序

石鼎聯句诗【或无此题】

巧匠斲山骨剝中事煎烹【师服】直柄未当权塞口且吞声【喜】龙头缩菌蠢豕腹胀彭亨【弥明】外苞乾蘚文中有暗浪惊【师服】在冷足自安【方从杭蜀文粹作安自足既无文理对偶又差方本误改多类此】遭焚意弥贞【喜】谬当鼎鼐间妄使水火争【弥明】大似烈士胆圆如战马缨【师服】上比香炉尖下与镜面平【喜】秋瓜未落蒂冻芋强抽萌【弥明】一块元气闭细泉幽窦倾【师服】不值输写处焉知怀抱清【喜】方当洪鑪然益见小器盈【弥明】眈眈无刃迹【庄子眈眈然在继缴之中注视貌华绀切】团团类天成【师服】遥疑龟负图出曝晓正晴【喜】旁有双耳穿【双或作只】上为孤髻櫜【诸本此下无弥明字今按此似二子讥道士之词恐实非弥明语】或讶短尾铍又似无足铛【师服】可惜寒食球掷此傍路坑【喜】何当出灰地【徐也切】无计离鉶罍【弥明】陋质荷斟酌狭中愧提擎【师服】岂能煮仙药但未污羊羹【喜】形模妇女笑度量儿

童轻【弥明】徒示坚重性【示或作尔】不过升合盛【师 过或作合合或服 作斗盛或作成】傍似废穀仰【傍或作仍】侧见折轴横【喜】时於蚯蚓窍微作苍蝇鸣【弥明】以兹翻溢愆【以兹或作忽罹】实负任使诚【师服】常居顾盼地敢有漏泄情【喜】宁依暖热弊不与寒凉并【弥明】区区徒自效琐琐不足呈【喜诸本此下无喜字】回旋但兀兀开阖惟铿铿【师 铿丘服 耕切】全胜瑚琏贵空有口传名岂比俎豆古不为手所撻【除庚切博雅曰揅也淮南子子路撻溺而受牛谢注撻举也平上声通洪本一作振】磨砢去圭角浸润着光精【着附也】愿君莫嘲诮此物方施行【四韵并弥明所作 又年谱云或谓轩辕寓公性弥明寓公名盖以文滑稽耳是不然刘侯虽皆公门人然不应讥诮如是之甚且言弥明形貌声音之陋亦岂公自谓邪而列仙传又有弥明传要必有是人矣 今按此诗句法全类韩公而或者所谓寓公姓名者盖轩辕反切近韩字弥字之义又与愈字相类即张籍所讥与人为无实駁杂之说者也故窃意或者之言近是洪氏所疑容貌声音之陋乃故为幻语以资笑谑又以乱其事实使读者不之觉耳若列仙传则又好事者因此序而附着之尤不足以为据也】

东雅堂昌黎集注卷二十一

卷二十二

<集部,别集类,汉至五代,东雅堂昌黎集注>

钦定四库全书

东雅堂昌黎集注卷二十二

祭文

祭田横墓文【田横初为汉将灌婴败於垓下亡走梁归彭越高祖即位惧诛与其徒五百余人入海居岛中高帝闻齐人贤者多附横恐後有乱乃使使赦横罪而召之横与其客二人乘传诣洛阳至尸乡廐置遂自刭令客奉其头从使者驰奏高帝流涕以王者礼葬横既葬二客穿其冢旁皆自刭从之其余客在海中者闻横死亦皆自杀晁太史无咎尝取公此文於续楚辞而系之曰唐宰相如董晋亦未足言而晋为汴州才奏愈从事愈始终感遇语称陇西公而不姓後从裴度亦自谓度知已然度亦终不引愈共天下事故愈踟躇发愤太息於区区之横以谓夫苟如横之好士天下将有贤於五百人者至焉】

贞元十一年九月愈如东京道出田横墓下【十一年诸本或作十九年月下有十一日字如东京或作东如京洪庆善曰东京洛阳也公以贞元十一年出长安至河阳而後如东都也十九年秋则公为御史是冬即贬阳山安得以九月出横墓下唐都长安亦不得云东如京也方从阁杭蜀本作东如京云田横墓在偃师尸乡洛阳东三十里今公自河阳道横墓下以入洛故云东如京也今按洪庆善作如东京及考岁月皆是方氏亦以京为洛阳但据三本必欲作东如京为误耳今且未须别考它书只以其所引田横墓在洛阳东者论之则自墓下而走洛阳乃是西向安得言东如京乎况唐都长安谓洛阳为东京则可直谓之京则不可其理又甚明若据元和郡国志则河阳西南至河南府八十里其大势亦不得云东如京也此又三本谬误之一证故复表而出之】感横义高能得士【下或有心字】因取酒以祭为文而吊之其辞曰事有旷百世而相感者余不自知其何心非今世之所稀孰为使余歔歔而不可禁余既博观乎天下曷有庶几乎夫子之所为死者不复生嗟余去此其从谁【死者或作死而生方作来皆非是】当秦氏之败乱得一士而可王何五百人之扰扰而不能脱夫子於劒鋌抑所宝之非贤亦天命之有常【宝之或作宝者天或作大】昔阙里之多士孔圣亦云其遑遑【合抗无其字非是】苟余行之不迷虽颠沛其何伤自古死者非一夫子至今有耿光【非阁杭作皆非是】踧陈辞而荐酒魂髣髴而来享【集韵灵良反按享字古今人用多作上声惟前汉礼乐志郊祀诗云发梁扬羽申以商造兹新音永久长声气远溘凤鸟翔神夕掩虞盖孔享享作平声退之叶韵盖有所本也】

欧阳生哀辞【欧阳名詹字行周泉州晋江人也卒年四十余集十卷行世新史於艺文立传

欧阳詹世居闽越自詹已上皆为闽越官至州佐县令者累累有焉闽越地肥衍有山泉禽鱼之乐虽有长材秀民通文书吏事与上国齿者未尝肯出仕今上初故宰相常袞为福建诸州观察使治其地【治上或有往字非是】袞以文辞进有名於时又作大官临莅其民乡县小民有能诵书作文辞者袞亲与之客主之礼【吕汲公本如此方从阁杭苑粹辞进下即属乡县至者袞下又有故宰相字下乃属有名至其民又属亲与云云颠倒错乱全无文理而方云三本如此不当轻改其蔽如此今定从吕本方主下有人字乡县作县乡则尚有可取云】观游宴飧必召与之【宴或作讌与读为预或作预或疑与如字而之下当有俱字】时未几皆化翕然【化新传作仕非是按袞传建中初起为福建观察使始闽人未知学袞至为设学校使为文章亲加讲导与为客主均礼观游燕享与焉由是俗一变岁贡士与内州等】詹于时独秀出袞加敬爱诸生皆推服闽越之人举进士繇詹始【贞元八年詹与公同登第退之同年进士此言闽人举进士自詹始及观林蕴泉山铭叙则谓闽川贞元以前未有文进者也因廉使李邕公錡兴启庠序请独孤常州及为记中有辞云缦胡之纓化为青衿其兄藻与友欧阳詹继登正第以其年考之则藻之登第又在詹之前然长溪薛令之以中宗神龙二年?第则又在藻之前矣退之谓由詹始岂考之未详耶】建中贞元闲余就食江南未接人事往往闻詹名闻巷间詹之称於江南也久【下或有矣字】贞元三年余始至京师举进士闻詹名尤甚【余下或有年十九字闻或作则或云当并出则闻二字亦有理】八年春遂与詹文辞同考试登第始相识自後詹归闽中余或在京师他处不见詹久者惟詹归闽中时为然其他时与詹离率不历岁移时则必合合必两忘其所趋久然後去故余与詹相知为深詹事父母尽孝道仁於妻子於朋友义以诚气醇以方容貌嶷嶷然【嶷音逆】其燕私善谑以和其文章切深喜往复善自道读其书知其於慈孝最隆也十五年冬余以徐州从事朝正于京师【公为徐州节度推官】詹为国子监四门助教将率其徒伏阙下举余为博士会监有狱不果上【或无监字监或作詹】观其心有益於余将忘其身之贱而为之也呜呼詹今其死矣詹闽越人也父母老矣舍朝夕之养以来京师【以或作而】其心将以有得於是而归为父母荣也【有得或作在得或无於是字而有复出将以有得字】虽其父母之心亦皆然詹在侧虽无离忧其志不乐也詹在京师虽有离忧其志乐也若詹者所谓以志养志者欤詹虽未得位其名流於人人其德行信於朋友【或作友朋】虽詹与其父母皆可无憾也詹之事业文章李翱既为之传故作哀辞以舒余哀【之传或作之说或作之志故上或有余字非是】以传于後以遗其父母而解其悲哀以卒詹志云【悲哀或作哀悲】今按上文已连有两哀字不应如此重复或当删去此哀字詹或作其】求仕与友兮远违其乡父母之命兮子奉以行友则既获兮禄实不丰以志为养兮何有牛羊事实既修兮名誉又光父母忻忻兮常若在旁命虽云短兮其存者长终要必死兮愿不永伤友朋亲视兮药物甚良【亲视或作视疾】饮食孔时兮所欲无妨【孔或作既】寿命不齐兮人道之常【齐一作高】在侧与远兮非有不同山川阻深兮魂魄流行祀祭则及兮勿谓不通哭泣无益兮抑哀自强【益或作救】推生知死兮以慰孝诚呜呼哀哉兮是亦难忘【哉下或无兮字】

题哀辞後【或删此四字作题欧阳生哀辞後崔羣及詹皆与公同年刘伋姓名仅见于此他无所闻】

愈性不喜书自为此文惟自书两通其一通遗清河崔羣羣与余皆欧阳生友也【友上或有之字】哀生之不得位而死哭之过时而悲其一通今书以遗彭城刘君伉君喜古文【或无书字或无伉字下君字一作伉】以吾所为合於古诣吾庐而来请者八九至而其色不怨志益坚【或无志字】凡愈之为此文盖哀欧阳生之不显荣於前【哀一作痛】又惧其泯灭於後也今刘君之请未必知欧阳生其志在古文耳【其志上或有之志字】虽然【下或有苟爱吾文必求其义八字八字下又或有则进知於欧阳生矣必时观十一字】愈之为古文岂独取其句读不类於今者邪思古人而不得见学古道则欲兼通其辞通其辞者本志乎古道者也【乎或作於方从三本无道字以上下文考之无道字即不成文理矣】古之道不苟誉毁於人【此下或有然则吾之所为文皆有实也十一字】刘君好其辞则其知欧阳生也无惑焉

独孤申叔哀辞【申叔字子重年二十一举进士又二年用博学宏词为校书郎又三年居父丧未练而歿盖贞元十八年也柳子厚有独孤君墓碣皇甫持正有伤独孤赋而公作辞哀之公当与崔羣书天人好恶之说与此语意一同盖出太史公之伯夷论也】

衆万之生谁非天邪明昭昏蒙谁使然邪行何为而怒居何故而怜邪【怒或作怨或作思怒下或有邪字居或作为】胡喜厚其所可薄而不足於贤邪将下民之好恶与彼苍悬邪【或无苍字】抑苍茫无端而黜寓其间邪【寓下或有於字】死者无知吾为子恻而已矣如有知也子其自知之矣【或无自字或无之字或无自字而有之字】濯濯其英晔晔其光如闻其声如见其容【此句或作如处其旁非是或云以容叶光用古韵也】乌虓远矣何日而忘【乌虓或作呜呼】

祭穆员外文【为崔侍御作晁本篇首题云维年月日故人博陵崔愬谨以清酌之奠祭于亡友穆六端公之灵方云岂穆员邪旧传员卒检校员外郎杜亚留守东都辟为从事皆与此文合新传员终侍御史故晁本称端公也穆员字与直怀州河内人宣州观察使寧之子工为文崔侍御名愬无传】

於乎建中之初予居于嵩携扶北奔【或作归】避盗来攻晨及洛师相遇一时顾我如故眷然顾之【如或作无眷或作睠】子有令闻我来自山子之峻明【峻或作俊】我钝而顽道既云异谁从知我我思其厚不知其可【知其或作知而或作可而】於後八年君从杜侯我时在洛亦应其招【贞元五年十二月以杜亚为东都留守亚辟员为从事检校员外郎愬时亦为亚所辟】留守无事多君子僚罔有疑忌维其嬉游草生之春鸟鸣之朝我辔在手君扬其镳君居于室我既来即或以啸歌【啸或作咏】或以偃侧诲余以义复我以诚【复我或作我复今按下文云无非德声则此二句专指穆也当作复我】终日以语【以或作与】无非德声主人信谗有感其下杀人无罪诬以成过入救不从反以为祸赫赫有闻王命三司察我于狱相从系縲曲生何乐直死何悲【曲或作直直或作曲二何或皆作可皆非是】上怀主人【主或作王非是】内闵其私【闵或作悯或作关皆非是】进退之难君处之宜【君或作居非是】既释于囚【令狐运为东京牙门将亚恶其为人会盗刼输绢於洛北运适畋近郊亚意其为之命员及从事张弘靖鞠其事无之亚恕囚员等员由此知名】我来徐州道

之悠悠思君为忧我如京师君居父丧哭泣而拜言词不通我归自西君反吉服晤言无他往复其昔【其疑当作如】不日而违重我心恻自後闻君母丧是丁痛毒之怀六年以并【一作经】孰云孝子而殒厥灵今我之至入门失声【失或作哭】酒肉在前君胡不餐升君之堂不与我言於乎死矣何日来还

祭郴州李使君文【公贞元十九年冬出为阳山令过郴州识李使君有李员外寄纸笔及义鱼诗即所谓获纸笔之双贸投义鱼之短韵也其生平契分皆具此文笔墨闲録云祭李郴州文尤雄奇】

维年月日将仕郎守江陵府法曹参军韩愈谨以清酌庶羞之奠敬祭于故郴州李使君之灵【文苑此篇首题云维元和元年岁次丙戌二月乙未朔二十四日戊午将仕郎云云使君员外三兄之灵考之唐历皆合】古语有之白头如新倾盖若旧顾意气之何如何日时之足究【何或作曷】当贞元之癸未【或作酉 今按癸未者贞元十九年贬阳山时也】惕皇威而左授伏荒炎之下邑嗟名颓而位仆历贵部而西迈迹清光於暂覲【於或作而】言莫交而情无由【莫或作若或作若而下无情字】既不贾而奚售哀穷遐之无徒【遐或作荒穷遐或作遐荒徒或作图】挈百忧以自副辱问讯之绸缪?饱饥而愈疚接雄词於章句窥逸迹於篆籀【直右切】苞黄甘而致贻获纸笔之双贸【即李员外寄纸笔云莫怪殷勤谢虞卿正着书】投义鱼之短韵【即公义鱼十八韵招张功曹】媿韬瑕而举秀埃新命於衡阳费薪刍於馆候【郴在衡山之阳贞元二十一年公以顺宗赦徙掾江陵待命於郴云】空大亭以见处憩水木之幽茂逞英心於纵博沃烦肠以清酎【以一作於】航北湖之空明覲鳞介之惊透宴州楼之豁达衆管啾而竝奏【啾或作湫选闲居赋管啾啾而竝奏】得恩惠於新知脱穷愁於往陋【穷或作冤】辍行谋於俄顷见秋月之三穀逮天书之下降犹低回以宿留【上音秀下音溜前汉宿留海上史记宿留之数日无所见】念睽离之在期谓此会之难又授綈紵以托心【吴季札聘郑见子产如旧相识与之缟带子产献紵衣焉见左氏襄公二十九年】示兹诚之不谬【授或作援】傥後日之北迁约穷欢於一昼虽掾俸之酸寒要拔贫而为富何人生之难信捐斯言而莫就始讶信於暂疎遂承凶於不救【承或作成於一作而】见明旌之低昂【明诸本作铭此从阁本字见檀弓郑注云神明之旌】尚迟疑於别袖忆交酬而迭舞奠单盃而哭柩美夫君之为政不桀志於谗构【桀或作饶或作挠从手皆非是】遭唇舌之纷罗独陵晨而孤雌【陵一作凌】彼憊人之浮言虽百车其何诟【车或作年今按後汉书冯衍出妻书云词语百车韩盖用此作年非是】洞古往而高观固邪正之相寇幸窃覩其始终敢不明白而蔽覆神乎来哉辞以为侑尚飨

祭薛助教文【公达字大顺详见公所志墓云】

维元和四年岁次己丑後三月二十一日景寅【丙寅作景寅避唐讳也】朝散郎守国子博士韩愈【散墓志石本作议】太学助教侯继谨以清酌之奠祭于亡友国子助教薛君之灵【继下或有等字薛君之灵晁本作河东薛君七官之灵】呜呼吾徒学而不见施設禄又不足以活身天於此时夺其友人同官太学日得相因奈何永违祗隔数晨笑语为别恸哭来门【来或作东】藏棺蔽帷欲见无缘皎皎眉目在人目前酌以告诚庶几有神呜呼哀哉尚飨

祭虞部张员外文【张季友也公同王涯崔羣许季同庾承宣邢册等六人者皆与张页元八年同年进士时陆贄典贡举故文有司我明试时惟邦彦之语详见公志其墓云】

维年月日愈等谨以清酌庶羞之奠敬祭于亡友张十三员外之灵【文苑作元和十年晁本作维元和十年月日中书舍人王涯考功郎中知制诰韩愈礼部侍郎崔羣京兆尹许季同考功员外郎庾承宣河中节度判官殿中侍御史邢册等六人皆张季友之同年也】呜呼往在贞元俱从宾荐司我明试时维邦彦各以文售幸皆少年羣游旅宿其欢甚焉出言无尤有获同喜他年诸人莫有能比倏忽逮今二十余岁存皆衰白半亦辞世外纏公事内迫家私中宵兴叹无复昔时如何今者又失夫子【今者或作於今】懿德柔声永絶心耳庐亲之墓终丧乃归阳瘡避职妻子不知分司宪台风纪由振遂迁司虞以播华问不能老寿孰究其因托嗣於宗【托嗣或作嗣托】天维不仁酒食备设灵其降止论德叙情以视诸谏尚飨

祭河南张员外文【贞元十九年冬公与张署自御史俱出南方为令明年顺宗即位俱徙江陵故凡道涂经涉唱和契阔皆具此文公方从晋公讨蔡祭其在元和十二年八月欵张之行治则详於公志】

维年月日彰义军行军司马守太子右庶子兼御史中丞韩愈谨遣某乙以庶羞清酌之奠祭于亡友故河南县令张十二员外之灵【或无守太子右庶子字】贞元十九君为御史余以无能同诏竝峙【或作峙选潘岳关中诗列营某峙注峙立也亦作峙】君德浑刚标高揭已有不吾如唾犹泥滓余戇狂狂【戇音蠢】年未三纪乘气加人无挟自恃彼婉变者实憚吾曹侧肩帖耳有舌如刀我落阳山以尹颺猱君飘临武山林之牢岁弊寒凶雪虐风饕颠於马下【雪虐杭本作啸虎以颠於马下言之由虎声惧也风饕谓虎贪风而啸不已虎近於虐讹自此也饕或作号今按杭本全然不成文理以上语岁弊寒凶言之八字相偶当为雪虐明甚】我泗君洮夜息南山同卧一席守隶防夫觥顶交跬【顶或作项非是】洞庭漫汗黏天无壁风涛相逐【呼回切】中作霹雳追程盲进颿船箭激【颿或作帆或作飘】南上湘水屈氏所沈【上或作之】二妃行迷泪踪染林山哀浦思鸟兽叫音余唱君和百篇在吟君止于县我又南踰把 相饮後期有无期宿界上一又相语自别几时遽变寒暑【遽或作复或作徧】枕臂欹眠加余以股仆来告言虎入廐处无敢惊逐以我 去【音蒙驴子】君云是物不骏於乘虎取而往来寅其徵【寅或作夤今按寅为辰名夤乃寅缘之义当改作寅说见下条】我预在此与君俱膺猛兽果信恶禱而凭【兽蜀本作首李本校作孟首不知得之何本也葛鲁卿云 不骏虎取之则亨矣不待禱而有凭也今按洪谢本皆作孟首谓正月孟春之首也张言来寅其徵以虎为寅神故言来岁寅月当有徵验孟首果得归也然且作猛兽亦通】余出岭中君蒞州下偕掾江陵非余望者郴山奇变其水清写泊砂倚石有遘无舍【楚词云重华不可遘注逢也 遘吾故切】衡阳放酒熊咆虎嘯不存令章罚筹蝟毛【不存或作存不罚或作罪唐人会饮以筹记罚刘梦得诗罚筹长树蠹是也今按令章谓酒令违令则以筹记其罚也】委舟湘流往观南岳云壁潭潭【云或作天】穹林攸擢避风太湖七日鹿角【太或作大鹿角洞庭湖中地名元微之有鹿角诗湖旁至今有鹿角巡检司也】鉤登大魮怒颊豕狗【狗或作豹非是或云狗豕声狗许角切】禽盘炙酒羣奴余啄走官阶下首下尻高【前汉尻益高苦刀切】下马伏涂从事是遭予徵博士君以使已【元和元年六月公召

为国子博士署掾江陵半年邕管奏为判官不往】相见京师过愿之始分教东生君掾雍首【元和二年公分教东都署为京兆府司录参军雍州名书黑水西河惟雍州 雍於用切】两都相望於别何有解手背面遂十一年君出我入如相避然生濶死休【生濶死休或作生死休咎非是】吞不复宣刑官属郎引章许夺【或作奋许方作许夺 今按夺谓争执不与犹今言定夺公事也墓志云守法争议棘棘不阿即此事也方本无义或本亦非】权臣不爱南昌是幹【今按墓志张自刑部出刺?州然则昌当作康】明条谨狱氓獠户歌【獠音老】用迁澧浦为人受瘥【署自?州改澧州刺史民税出杂产物与钱尚书有经数观察使牒州徵钱倍数经署曰刺史可为法不可贪官害民留牒不肯从竟以代罢瘥病也】还家东都起令河南屈拜後生愤所不堪屡以正免身伸事蹇竟死不升孰劝为善丞相南讨【元和十六年以宰相裴度为淮西宣慰处置使南讨淮蔡】余辱司马议兵大梁【时宣武军节度使韩弘为诸军都统使将出讨公诣弘禀事】走出洛下哭不凭棺奠不亲弔不抚其子葬不送野望君伤怀【望君或作定居非是】有陨如浮铭君之绩纳石壤中【或作下】爰及祖考纪德事功【纪或作已事或作着事功作着功於理亦顺但下文便有外着後世则重出着字又似可疑姑从旧本作事盖纪其德纪其事纪其功也又恐或是序字以似而误然无所据不敢辄改也】外着後世鬼神与通君其奚憾不余鉴衷呜呼哀哉尚飨祭左司李员外太夫人文【谓与其子同僚必公为职方员外郎时也】

维年月日某官某等谨以清酌庶羞之奠敬祭于某县太君郑氏尊夫人之灵【某等或作某乙等】胄于茂族配此德门克成厥家享有全福为妇为母再朝中宫搢绅推荣宗党是则某等幸随令子同服官僚庶展哀诚式陈牢醴尚飨

祭薛中丞文【一本同李逢吉孟简张惟素张贾祭薛中丞存城也薛尝劾浮屠鉴虚罪抵死表李位无罪事见旧史本传甚详】

维年月日【文苑作元和九年】某官某乙等谨以清酌庶羞之奠祭于亡友故御史中丞赠刑部侍郎薛公之灵公之懿德茂行可以励俗清文敏识足以发身宗族称其孝慈友朋归其信义累升科第亟践班行左掖南台【北齐号御史台为南台】共传故事诗人墨客争讽新篇羽仪朝廷辉映中外长途方骋大限俄穷圣上轸不慙之悲具僚兴云亡之叹况某等忘言斯久知我俱深青春之游白首相失来陈薄奠詎尽哀诚呜呼哀哉尚飨

祭裴太常文【裴之讳字皆不可考】

维年月日愈等谨以庶羞清酌之奠敬祭于故太常裴二十一兄之灵【文苑作元和九年晁本月日下具给事中李逢吉给事中孟简吏部侍郎张惟素吏部侍郎张贾比部郎中史馆修撰韩愈等五人】朝廷之重莫过乎礼虽经策具存而精通盖寡自郊丘故事宗庙时宜大君之所旁求丞相之所卒问羣儒拱手宗祝醉心兄皆指陈根源斟酌通变莫不允符天旨克协神休至乎公卿冠昏士庶丧祭疑皆响答问必实归从我者足为轨仪异我者无逃指笑动为时法言比古经【此一作必】独立一朝高视于古而又驱驰朋执僇俛宗亲檐石之储常空於私室【檐诸本多作顔旧本多作檐公秋怀诗用甌字按後汉明帝纪生无檐石之储檐字

本此郭璞方言注甌石之储实用甌字前汉蒯通扬雄传皆只作儻货殖传酱十儻顔曰儻人儻之也一儻两甌丁滥切】方丈之食每盛於宾筵赠必固辞求无不应孰云具美而不永年某等早接游从实钦道义致诚薄奠以诀终天呜呼哀哉尚飨

潮州祭神文五首【晁本第一首题作祭湖神文第二首题作又祭止雨文第三题祭城隍文第四题祭界石神文第五不立题皆元和十四年夏秋作】

维年月日潮州刺史韩愈谨差掇潮阳县尉史虚已以特羊庶羞之奠告于太湖神之灵愈承朝命为此州长今月二十五日至治下凡大神降依庇贶斯人者皆愈所当率徒属奔走致诚亲执祀事於庙庭下今以始至方上奏天子思虑不能专一冠衣不净洁与人吏未相识知牲糒酒食器皿犒弊【犒一作损 糒先旅切又音所犒仓胡切】不能严清又未卜日时不敢自荐见使掇潮阳县尉史虚已以告神其降鉴尚飨

维年月日潮州刺史韩愈谨以清酌脍修之奠祈于太湖神之灵【礼记大享尚殿修注云捶脯也脍或作时今按若作时则修当作羞 脍丁贯反】曰稻既稔矣而雨不得熟以获也【或无以获字非是】蚕起且眠矣而雨不得老以簇也岁且尽矣稻不可以复种而蚕不可以复育也农夫桑妇将无以应赋税继衣食也非神之不爱人【或无之字爱下一有此字】刺史失所职也百姓何罪使至极也神聪明而端一听不可滥以惑也刺史不仁可坐以罪惟彼无辜惠以福也划𪔐云陰卷月日也【月日或作日月非是 划忽麦切𪔐力支切又音丽】幸身有衣口得食给神役也【口上或有而字得或作有】充上之须脱刑辟也选牲为酒以报灵德也吹擊管鼓侑香洁也拜庭跪坐【庭或作廷】如法式也不信当治疾殃殛也神其尚飨

维年月日潮州刺史韩愈谨以柔毛刚鬣清酌庶羞之奠祭于城隍之神闲者以淫雨将为人灾无以应贡赋供给神明上下获罪罚之故乃以六月壬子奔走分告乞晴于尔明神【下或再出尔字属下句】明神闵人之不辜若飨若答【飨或作响】糞除天地山川清风时兴白日显行蚕谷以登人不咨嗟【咨或作疵】惟神之恩夙夜不敢忘怠谨卜良日躬率将吏荐兹血毛清酌嘉羞【一作肴】侑以音声以谢神贶其飨之【或作兹或作鉴之】

维年月日潮州刺史韩愈谨遣耆寿成?以清酌少牢之奠告于界石神之灵【此五字或作界石之神】曰惟封部之内山川之神克庥于人【庥或作庇】官则置立室宇备具服器奠飨以时淫雨既霁蚕谷以成织妇耕男忻忻衍衍是神之庥庇于人也敢不明受其赐谨选良月吉日斋洁以祀神其鉴之尚飨【鉴之或作鉴兹】

维年月日潮州刺史韩愈谨以清酌庶羞之奠祭于大湖之神惟神降依兹土以庇其人今兹无有水旱雷雨风火疾疫为灾各宁厥宇以供上役长吏免被其谴赖神之德夙夜不敢忘谨具食饮躬斋洗奏音声以献以乐以谢厥赐不敢有所祈尚飨

东雅堂昌黎集注卷二十二

卷二十三

钦定四库全书

东雅堂昌黎集注卷二十三

祭文

袁州祭神文三首【晁本首篇题曰祭城隍文次题祭仰山神祈雨文次题又祭仰山神文元和十五年夏作】

维年月日袁州刺史韩愈谨告于城隍神之灵【或无袁字下同】刺史无治行无以媚于神只【以上或无无字】天降之罚以久不雨苗且尽死刺史虽得罪【下或有死字今按死字不当用又上句已有不应重出盖因上句而误也】百姓何辜宜降疾咎于某躬身【或无躬字国语靡王躬身公用此也】无令鰥寡蒙兹滥罚谨告

维年月日袁州刺史韩愈谨以少牢之奠祭于仰山之神曰神之所依者惟人人之所事者惟神今既大旱嘉谷将尽人将无以为命神亦将无所降依不敢不以告若守土有罪宜被疾殃於其身百姓可哀宜蒙恩闵以时赐雨使获承祭不怠神亦永有饮食谨告

维年月日袁州刺史韩愈谨以少牢之奠祭于仰山之神曰田谷将死而神膏泽之百姓无所告而神恤之刺史有罪而神释之敢不有荐也尚飨

祭柳子厚文【子厚以元和十四年十月五日卒于柳州公其月自潮即袁明年自袁召为国子祭酒此文袁州作也故刘梦得祭子厚文有云退之承命改牧宜阳亦驰一函候於便道其後序柳集又云凡子厚行已之大方有退之之志若祭文在祭文盖谓此也】

维年月日韩愈谨以清酌庶羞之奠祭于亡友柳子厚之灵【维年月日文苑作维某年岁次庚子五月壬寅朔五日景午柳下或有君字】嗟嗟子厚而至然邪自古莫不然我又何嗟人之生世如梦一觉【故效切下既觉同】其间利害竟亦何校当其梦时有乐有悲及其既觉岂足追惟凡物之生不愿为材【为或作谓非是】牺尊青黄乃木之灾【见庄子语】子之中弃天脱羈【羈音紮】玉佩琼琚大放厥辞富贵无能磨灭谁纪子之自着表表愈伟【表表或作表奏非是】不善为斲血指汗颜巧匠旁观【或作观旁非是】缩手袖间子之文章而不用世乃令吾徒掌帝之制子之视人自以无前一斥不复羣飞刺天【飞或作非】嗟嗟子厚今也则亡【也则或作有今】临絶之音一何琅琅徧告诸友以寄厥子不鄙谓余亦托以死凡今之交观势厚薄余岂可保能承子托非我知子子实命我犹有鬼神宁敢遗堕【宁或作予】念子永归无复来期设祭棺前矢心以辞呜呼哀哉【或无此四字】尚飨

祭湘君夫人文【公以元和十五年九月拜国子祭酒未离袁州时作】

维元和十五年岁次庚子十月某日朝散大夫守国子祭酒护军赐紫金鱼袋韩愈谨使前袁州军事判官张得一【此上四十四字或只作维年月日国子祭酒韩愈谨令张得一今从石本】以清酌之奠敢昭告于湘君湘夫人二妃之神前岁之春愈以罪犯黜守潮州【或作阳今以石本】惧以谴死且虞海山之波雾瘴毒为灾以殒其命【或无之字】舟次祠下是用有祷于神神享其衷赐以吉卜曰如汝志蒙神之福启帝之心去潮即袁【十四年十月自潮徙袁】今又获位於朝复其章绶【十五年九月自袁召为国子祭酒复赐金紫】退思往昔实发梦寐凡卅年於今乃合【卅或作三方从石本此盖言卅年前常有梦寐非以贬日言之也今按上文但言前岁之祷则实发梦寐者但谓不敢忘前岁之吉卜耳此卅字未详其义恐亦石本之误也】夙夜忧惕敢忘神之庇【忧或作悚】伏以祠宇毁顿【一作损】凭附之质丹青之饰暗昧不圭【或作暗昧不佳或作昧暗不蠲今从石本圭与蠲同音集韵蠲洁也明也通作圭诗吉蠲为饔韩诗作吉圭周礼蜡氏令州里除不蠲注读如吉圭为饔之圭陆音曰旧读为圭吕氏春秋饮食必蠲洁高诱亦读作圭此类非一今作佳由圭字讹也】不称灵明【或作明灵今从石本】外无四垣堂陛颓落牛羊入室居民行商不来祭享辄敢以私钱十万修而作之【万下诸本有祈于邦伯四字今从石本】旧碑断折【断一作中】其半仆地文字缺灭几不可读谨修而树之【或无谨字】庙成之後将求玉石仍刻旧文因铭其陰以大振显君夫人之威神以报灵德俾民承事万世不怠惟神其鉴之尚飨

始将既修树旧碑仍刻其文於新石因铭其陰旧碑石既多破落文不可尽识移之於新或失其真遂不复刻【此四十二字石本附祭文後诸本皆有之方云此盖後人以碑本附入阁杭皆无之今按此必公所自记故石本有之当附於此方但以阁杭本阙遂直刊去亦可惜也今从诸本而次一字书之】祭竇司业文【竇名牟长庆二年卒公尝志其墓此文公自称兵部侍郎则是年未使王庭湊前作也】

维年月日兵部侍郎韩愈谨以清酌庶羞之奠祭于故国子司业竇君二兄之灵惟君文行夙成有声江东魁然厚重长者之风一举於乡遂收厥功屡佐大侯以调兵戎【调去声】诏曰予虞汝为郎中乃令洛阳岁且四终惟刑之慎掌正隶僮命守高平【泽州高平郡】命副儒宫【副或作制】朱衣银鱼象服以崇锡荣考妣孝道上穷官不满能亦云达通踰七望八年孰非翁【或作逾七八年孰非望公方从阁杭苑云竇卒年七十四】在君无憾我意不充君之昆弟【牟兄弟五人常牟羣庠玠】三以辞雄【常字中行大历十四年登第弟玠字汝封元和二年登第及牟为三雄矣】刺史郎中四继三同【谓牟庠相继为泽州刺史四继三同则常牟羣庠皆为之也】於士大夫可谓显融我之获见实自童蒙既爱既劝【爱既或作受诱非是】在麻之蓬自视雏鷇【音寇】望君飞鸿四十年余事如梦中【诸本皆如此阁杭苑及南唐本作事半如梦云古梦音平去声通石崇诗周公不足梦与可以守至冲叶今按事半如梦语意碎澁不如诸本之浑全而快健前人误改当以重押中字之故不知公诗多不避也】分宰河洛媿立竝躬俱官於学以纖临洪惠许不酬【许或作诗今按惠许谓上文爱劝而又称许也】报德以空死生莫接孰明我衷於祭告情文以自攻呜呼哀哉尚飨

祭侯主簿文【此谓侯喜也蜀本注继字非 详观公此文当知其为侯喜作公贞元十七年与喜同渔于温洛尝有诗云吾党侯生字叔?呼我持竿钓温水故此又有我钓我游莫不我随之语尝荐喜於汝州刺史卢郎中又尝荐之於陆员外惨观其荐词亦与此文惟子文学今谁过之之意相表里又公集中端有赠侯主簿喜诗用是知其非继而喜也其曰吏部侍郎韩愈即长庆二年自兵部转吏部时作】

维年月日吏部侍郎韩愈谨遣男殿中省进马佶【退之诸子有名昶者长庆四年进士登第小说中亦载其为集贤校理曰符曰爽曰殿中省进马虽载於集而他处不见唯符见於孟郊张籍诗中耳】致祭于亡友故国子主簿侯君之灵呜呼惟子文学今谁过之子於道义困不舍遗【困或作罔舍或作拾皆非是】我狎我爱人莫与夷自始及今二纪于兹我或为文笔俾子持唱我和我问我以疑我钓我游莫不我随我寝我休莫尔之私朋友昆弟情敬异施惟我於子无适不宜弃我而死嗟我之衰相好满目少年之时日月云亡【或作人之云亡】今其有谁谁不富贵而子为羈我无利权虽怨曷为子之方葬我方斋祠【方葬或作云葬】哭送不可谁知我悲呜呼哀哉尚飨

祭竹林神文【公祭文二其一祭竹林神其二祭曲江龙皆以旱祷其後贺雨表亦云季夏以来雨泽不降臣职司京邑祈祷实频谓此皆长庆三年为京尹时作也】

维年月日京兆尹兼御史大夫韩愈谨以酒脯之奠再拜稽首告于竹林之神曰天子不以愈为愚不能使尹兹大衆二十三县之人今农既勤於稼有苗盈野而天不雨将尽槁以死农将无所食鬼神将无以为飧国家之礼天地百祀神只不失其常【或无祀字】惠天之人不失其和【惠天下或有下字系从阁杭本 今按此人字当为民字以避讳而用人字也下句同】人又无罪何为造兹旱虐以罚也【虐阁杭蜀本在罚字下非是】将俾尹者不仁不明不能承帝之勅以化正其下闻无香惟腥【闻音问】神于惠罚无差【神于或作神之】施罪瘠于尹愈身是甘是宜雨则时降神无爽其聪明永飨于人无媿尚飨

曲江祭龙文

维年月日京兆尹兼御史大夫韩愈谨以香果之奠敢昭告于东方青龙之神天作旱灾嘉谷将槁乃於甲乙之日依準古法作神之象斋戒祀祷神其享佑之时降甘雨【时或作将非是】以惠兹人急急如律令

祭马仆射文【马十二名总字会元扶风人退之长庆三年冬自京兆尹复为兵部侍郎又迁吏部侍郎其为京兆也有举马总自代状今祭文称吏部侍郎则总以是年冬死也】

维年月日吏部侍郎韩愈谨以清酌庶羞之奠敬祭于故仆射马公十二兄之灵惟公弘大温恭全然德备天故生之其必有意将明将昌实艰初试佐戎滑台斥由尹寺【贞元十三年四月以姚南仲镇滑台辟总为从事十六年监军使薛盈珍诬奏南仲不法总坐贬为泉州司马】适彼瓯闽? 跋蹶【一作蹶?鱼列切 音兀蹶音致】颠而不踈【乌未切】乃得其地

于泉于?始执郡符遂殿交州【殿军後也】抗节番禺【上音潘下音愚】去其螟蠹蚩越大苏【蠹或作蝥】擢亚秋官朝得硕士人谓其崇我势始起东征淮蔡相臣是使【十二年十月以宰相裴度为彰义军节度使仍充淮西宣慰使】公兼邦宪以副经纪【十二年以总兼御史大夫充淮西行营诸军宣慰副使】殲彼大魁厥勲孰似丞相归治留长蔡师【吴元济诛总留蔡州为彰义留後奏改彰义为淮西十二月以总检校工部尚书蔡州刺史充淮西节度使】茫茫黍稷昔实棘茨鸛鸣雀乳不见泉鸛惟蔡及许旧为血仇命公并侯【十三年五月以总为许州刺史忠武军节度陈许潞等州观察处置等使潞旧属淮西故云并侯】耕借之牛束其弓矢礼让优优始诛郢戎【郢音运】厥墟腥臊公往涤之兹惟乐郊【十四年二月诛东平节度使李师道三月以总检校刑部尚书为郢州刺史天平节度郢曹濮等州观察等使诗曰适彼乐郊】惟东有獬【獬狂犬也淮南子獬狗不自投於河 獬音制又居例切】惟西有虺【虺蜥也许黠切】颠覆朋邻我余有几【七月沂州军乱杀节度使王遂长庆元年七月卢龙军乱囚节度使张弘靖成德乱杀节度使田弘正二年正月魏博节度使田希自杀三月武宁军节度使崔羣为军中所逐余有或作有余 今按此用左氏身其余几之语或本非是】崒崒中居【崒音律崒慈恤切】斩其脊尾岱定河安惟公之黠帝念厥功还公于朝陟于地官且长百僚【十二月以总检校尚书左仆射守户部尚书】度彼四方孰乐可据顾瞻衡钧【或作钧衡】将举以付惟公积勤以疾以忧及其归时当谢之秋贺门未归【门或作问 今按此用庆者在门之语或本非是】吊庐已萃未燕于堂已哭于次昔我及公实同危事且死且生誓莫捐弃归来握手曾不三四曾不濡翰酬酢文字曾不醉饱以劝酒馘【侧吏切】奠以叙哀其何能致呜呼哀哉尚飨

吊武侍御所画佛文【或无吊字武侍御一以为武少仪谓公尝为太学弹琴诗序少仪时为司业後以太常少卿兼御史中丞使南诏在元和五年一以为武儒衡据李翱集墓志云故相郑余庆尹河南奏授伊阙尉及郑公留守东都在元和五六年间然姓氏及官御史皆同未知孰是然题曰侍御其文亦曰侍御後说若近之云】

御史武君当年丧其配【御史一作侍御】歛其遗服栲珥鞶帨于篋【鞶或作繁方云繁小囊鞶大带也 今按仪礼士昏礼庶母及门内施鞶注鞶囊也所以盛帨巾然则繁鞶字通】月旦十五日则一出而陈之抱婴儿以泣有为浮屠之法者造武氏而谕之曰是岂有益耶【阁杭作也非是】吾师云人死则为鬼鬼且复为人随所积善恶受报【所下一有其字】环复不穷也【环一作旋】极西之方有佛焉其土大乐【西下或无之字】亲戚姑能相为图是佛而礼之愿其往生莫不如意武君怆然辞曰吾儒者其可以为是既又逢月旦十五日复出其篋实而陈之【其篋或无其字】抱婴儿以泣且殆而悔曰【或无且字或本且字在悔字下】是真何益也吾不能了释氏之信不义安知其不果然乎【或无乎字】於是悉出其遗服栲佩合若干种就浮屠师请图前所谓佛者浮屠师受而图之韩愈闻而吊之曰哲哲兮目存【哲哲或作皙皙】丁宁兮耳言忽不见兮不闻【见下或有不有字或无兮字】莽谁穷兮本源图西佛兮道予勲以妄塞悲兮慰新魂【新上或有斯字】呜呼奈何兮吊以兹文祭故陕府李司马文【李汉之父邢雍王会七世孙长庆元年二月卒详见公所志邢墓邢薄经切一本无故陕府三字】

维年月日守国子祭酒赐紫金鱼袋韩愈谨以清酌之奠祭于故陕府左司马李公之灵曰公学以为耕文以为获发愤孤身复续厥家【孤或作苦续或作绩】选于吏部亟以科进历临大邑惟政有声【惟或作为】遂丞宗正日朝帝庭出辅陕都吏畏僚慕子妇诸孙盈于室堂公姑悦喜【姑或作始非是】五福具有大夫士家孰不荣羨如何不常以至大故呜呼哀哉愈以守官不获吊送昏姻之好以哀以悲敬致微礼公其歆之【歆或作昭】尚飨

祭十二兄文【公从兄岌也公之皇祖讳叡素有孙八人其孙曰会曰介曰愈曰俞曰岌见於世系表及公集者此五人又有弇者以殿中侍御史死于平凉之盟其二人则无所考见岌以元和元年六月卒于虢州以其年九月葬于州十里文所谓归女教男反骨本原公盖有异时归葬于先原之意】

月日从父弟某官某乙谨以清酌庶羞之奠敢昭告于十二兄故虢州司户府君之灵【或无故字】呜呼维我皇祖有孙八人惟兄与我後死孤存奈何於今【一作今日】又弃而先生不偕居疾药不亲斂不摩棺瘞不绕坟趋奔束制【奔或作生非是】生死亏恩归女教男反骨本原其不有年以补我愆长号送哀以荐此文尚飨【尚上或有呜呼二字】

祭郑夫人文【夫人韩会之妻而公之嫂也公少孤而育于其嫂文言其俯育之恩至矣公既为之服葦而祭之以文此贞元十一年往河阳时作】

维年月日愈谨於逆旅备时羞之奠再拜顿首敢昭祭于六嫂荥阳郑氏夫人之灵【维年月日晁本作贞元九年岁次癸酉九月朔日或无谨於三字】呜呼天祸我家降集百殃我生不辰三岁而孤【大历五年公父仲卿卒公时三岁】蒙幼未知鞠我者兄【李翔退之行状云生三岁父歿养於兄会舍】在死而生实维嫂恩未亂一年【亂毀齿也周礼未亂者不为奴注男八岁女七岁而亂亂初靳切又初谨切】兄宦王官提携负任去洛居秦念寒而衣念饥而殮疾疹水火无灾及身【疹或作疹疹音戾】劬劳闵闵保此愚庸年方及纪【旧史云大历十二年五月起居舍人韩会坐元载贬官退之是时年十一从至贬所复志赋谓当岁行之未复从伯氏以南迁是也其兄没南方从嫂归葬河阳故李汉集序云先生生於大历戊申幼孤随兄播迁韶岭兄卒鞠於嫂氏辛勤来归】荐及凶屯兄罹谗口承命远迁【远或作南大历十二年宰相元载得罪四月会坐党与自起居舍人贬韶州刺史】穷荒海隅天阔百年【会卒于韶年四十二】万里故乡幼孤在前相顾不归泣血号天微嫂之力化为夷蛮水浮陆走丹旆翩然至诚感神返葬中原既克反葬遭时艰难百口偕行【口或作日云从阁杭蜀本今按百日偕行无理当从口为是然或以祭老成文有就食江南零丁孤苦之语疑不得有百口不知此亦通良贱而言阖门之衆耳未必实计百人也】避地江濱【家于宣州建中二年中原多故退之避地江左即复志赋所谓值中原之有事兮将就食於江南是也】春秋霜露荐敬苹蘩以享韩氏之祖考曰此韩氏之门视余犹子海化淳淳爰来京师【贞元二年公自宣州游京师】年在成人屡贡于王名乃有闻念兹顿颡【顿或作钝汉书陈平传士之顽顿嗜利无耻者顔读顿曰钝】非训曷因感伤怀归陨涕熏心苟容躁进不顾其躬禄仕而还以为家荣奔走乞假东西南北孰云此来乃睹灵车有志弗及长负殷勤呜呼哀哉昔在韶州之行受命于元兄【于或作於】曰尔幼养于嫂丧服必以葦今其敢忘天实临之【贞观中魏

徵令狐德茶等议嫂叔服云或有长年之嫂遇提孩之叔劬劳鞠养情若所生分饥共寒契濶偕老其在生也爱之同於骨肉及其死则推而远之求之本原深所未谕且事嫂见称载籍非一郑仲虞则恩礼甚笃顔洪都则竭诚致感马援则见之必冠孔汲则哭之为位察其所尚岂非先觉嫂叔旧无服今请服小功五月制可公幼养於嫂服葦以报可为士大夫之法矣李汉序公文集及李习之状亦云】呜呼哀哉日月有时归合塋封终天永辞絶而复苏伏惟尚飨

祭十二郎文【老成率府参军韩介之子也介二子曰百川曰老成起居舍人会无子以老成为後老成生湘滂百川死公乃命滂归後其祖介公及会介皆仲卿子至是会介百川皆死矣故文云吾上有三兄皆不幸早世承先人後者在孙惟汝在子惟吾又云去年东野往吾书与汝盖贞元十八年有送东野序即是年为十九年此文必其秋冬作十二月则公谪阳山矣斯文盖公所谓喜往复善自道者在当时无对後二百七十年欧阳文忠公为其父作泂冈阡表始足以追配公此作览者当自知之】

年月日【或无日字文苑作贞元十九年五月二十六日】季父愈闻汝丧之七日乃能衔哀致诚使建中远具时羞之奠告汝十二郎之灵【文苑郎下有子字今按郎子是当时语虽不必存亦不可不知也今谩补之】呜呼吾少孤及长不省所怙惟兄嫂是依中年兄没南方【会责守韶州卒于贬所】吾与汝俱幼从嫂归葬河阳既又与汝就食江南零丁孤苦未尝一日相离也吾上有三兄皆不幸早世承先人後者在孙惟汝在子惟吾两世一身形单影只嫂常抚汝指吾而言曰韩氏两世惟此而已汝时尤小当不复记忆吾时虽能记忆亦未知其言之悲也吾年十九始来京城其後四年而归视汝又四年吾往河阳省坟墓【往上或无吾字】遇汝从嫂丧来葬又二年吾佐董丞相于汴州【相下或有幕字贞元十三年董晋帅汴州】汝来省吾止一岁请归取其孥明年丞相薨吾去汴州汝不果来是年吾佐戎徐州【是岁秋张建封辟公为徐州节度推官】使取汝者始行【佐上或有又字者上或有使字】吾又罢去【十六年五月张建封卒公西归洛阳】汝又不果来吾念汝从于东东亦客也不可以久图久远者莫如西归【或有两图字一属上句非是】将成家而致汝呜呼孰谓汝遽去吾而没乎【谓或作为而下或有先字】吾与汝俱少年以为虽暂相别终当久相与处故舍汝而旅食京师以求斗斛之禄诚知其如此虽万乘之公相吾不以一日辍汝而就也去年孟东野往吾书与汝曰吾年未四十而视茫茫而髮苍苍而齿牙动摇【邵太史曰文用助字柳子厚论当否不论重复檀弓曰南宫绌之妻之姑之丧退之亦曰吾年未四十而视茫茫而髮苍苍而齿牙动摇近时六一文安东坡二先生知之

蜀人史彦升云退之祭文视荒荒今俗本作茫茫非是陈后山诗平陈郑毛视荒荒本此也今按古书如荒忽茫忽之类皆一字也意义多相近当存之】念诸父与诸兄皆康强而早世如吾之衰者其能久存乎【存或作在】吾不可去汝不肯来恐旦暮死而汝抱无涯之戚也【去或作知】孰谓少者没而长者存强者夭而病者全乎呜呼其信然邪其梦邪【或无其梦邪三字】其传之非其真邪信也吾兄之盛德而夭其嗣乎汝之纯明而不克蒙其泽乎少者强者而夭没长者衰者而存全乎未可以为信也梦也传之非其真也【非上或有者字】东野之书耿兰之报何为而在吾侧也呜呼其信然矣吾兄之盛德而夭其嗣矣汝之纯明宜业其家者不克蒙其泽矣【业或作荣】所谓天者诚难测而神者诚难明矣【明或作得非是】所谓理者不可推而壽者不可知矣【壽或作年】虽然吾自今年来苍苍者或化而白矣

【苍下或无者字】动摇者或脱而落矣毛血日益衰志气日益微【志气或作气志】几何不从汝而死也死而有知其几何离其无知悲不几时而不悲者无穷期矣汝之子始十岁【十或作一老成二子曰湘曰滂滂以季子出继则湘固宜十岁也】吾之子始五岁少而强者不可保如此孩提者又可冀其成立邪呜呼哀哉呜呼哀哉汝去年书云比得软脚病往往而剧【比或作此非是】吾曰是疾也江南之人【南下或无之字】常常有之未始以为忧也【忧下或无也字】呜呼其竟以此而殒其生乎抑别有疾而至斯乎【斯下或有极字】汝之书六月十七日也东野云汝没以六月二日耿兰之报无月日【或作日月】盖东野之使者不知问家人以月日如耿兰之报不知当言月日【或无如字言或作时今按陆德明经典释文序论当时语音之讹有日而如靡异则此如字即而字之转耳不知当言月日者盖】

【言耿兰之报所以无月日者由其不知赴告之体当具月日以报也】东野与吾书乃问使者【东上或有盖字】使者妄称以应之耳【称一作传】其然乎其不然乎【或无其不然乎一语】今吾使建中祭汝吊汝之孤与汝之乳母彼有食可守以待终丧则待终丧而取以来如不能守以终丧则遂取以来其余奴婢并令守汝丧【或作葬】吾力能改葬终葬汝於先人之兆然後惟其所愿【或无终葬二字愿下或有焉字】呜呼汝病吾不知时汝没吾不知日生不能相养以共居歿不得抚汝以尽哀斂不凭其棺窆不临其穴【凭上临上或并有得字】吾行负神明而使汝夭【行或作何】不孝不慈而不得与汝相养以生相守以死一在天之涯一在地之角生而影不与吾形相依死而魂不与吾梦相接吾实为之其又何尤彼苍者天曷其有极自今已往吾其无意於人世矣当求数顷之田於伊颍之上以待余年【或作尽今按或当作待尽余年】教吾子与汝子幸其成长吾女与汝女待其嫁如此而已呜呼言有穷而情不可终汝其知也邪其不知也邪呜呼哀哉【或无此句】尚飨

祭周氏侄女文【韩俞之女适四门博士周况於公为侄女元和十一年卒其详见公所志墓云】

维年月日十八叔叔母具时羞清酌之奠祭于周氏二十娘子之灵【或无子字俞为开封尉女名好好】嫁而有子女子之庆【元和三年周况登第公以好好妻之生一男一女】纒疾中年又命不永【卒时年二十七】今当长归与一世违凡汝亲戚孰能不哀撰此酒食以与汝诀汝曾知乎我念曷阒尚飨

祭滂文【滂公之侄孙老成之子也元和十四年公谪潮州滂与其兄湘皆侍行是岁冬公移袁州滂乃死于袁遂葬于袁之郭南其详见公所志墓也】

维年月日十八翁及十八婆卢氏以清酌庶羞之奠祭于二十三郎滂之灵曰汝聪明和顺出於辈流强记好文又少与比将谓成长以兴吾家如何不祥未冠而夭吾与卢氏痛伤可言【可或作何】思母之恩连呼以絕执兄之手勉以无悲情一何长命一何短权葬远地孤魂无依沥酒告情哀何有极尚飨

祭李氏二十九娘子文【公之侄孙女其李干妻也】

维年月日十八叔翁及十八叔婆卢氏遣昶以庶羞之奠祭于李氏二十九娘子之灵曰汝之警敏和静人莫及之【静或作舒】姿相丰端不见阙亏幼而孤露其然何为出从于人既相谐熙又暴以天神何所疵生杀减益竟谁主尸我哀汝母孰慰穷嫠我怜汝儿谁与抱持念此伤心不能去离奠以送汝知乎不知尚飨

祭张给事文【彻公之从子壻也详见公所志墓云】

维年月日兵部侍郎韩愈谨以清酌之奠祭于故殿中侍御史赠给事中张君之灵【御上或无侍字】惟君之先以儒名家逮君皇考【考名休尝佐宣武军】再振厥华乡贡进秀有司第之【贡或作举】从事元戎谨职以治遂拜郎官以职王宪不长其年飞不尽翰乃生给事松贞玉刚干父之业纂文有光屡辟侯府亦佐梁师前人是似耄吏嗟咨御史阙人夺之於朝大厦之构斧斤未操府迁幽都顽悖未孚繫君之赖乃奏乞留【长庆元年三月以张弘靖为卢龙节度使彻先为宣武从事累迁监察御史至是弘靖仍辟彻为卢龙判官时牛僧孺奏彻为真御史弘靖遣之而密奏幽州不廷日久今臣始至须强佐乃济行半道有诏以彻还之】乃迁殿中朱衣象版惟义之趋岂利之践虺豺发衅阖府屠割【或作剥】偿其恨犯君独高脱露刀成林【刀或作刃】弓矢穰穰千万为徒噪讙为狂君独叱之上不负汝为此不祥将死无所虽愚何知慙屈变色君义不辱杀身就德【七月军乱都知兵马使朱克融囚弘靖於蓊门馆杀幕僚等以彻长者不杀置彻於弘靖所居月余迁之别馆彻出门骂曰汝何敢反行且骂衆即击君以死】天子嘉之赠官近侍归於一死万古是记我之从女为君之配君於其家行实高世无所於葬輿魂东归【於葬或作掩葬輿或作与】诔以赠之莫知我哀呜呼哀哉尚飨

祭女壻女文【元和十四年正月公以论佛骨贬潮州女壻年十二死于商南层峯驿详见墓志及层峯驿诗女壻公第四女壻女加女居二反壻或从奴古本祭文与扩铭皆作女壻董彦远曰壻字传写之误盖古文如纷壻等字无从奴者公最好古名其女不应用俗字也今按壻壻通说已见第五卷李花诗】

维年月日阿爹阿八【南史人歌曰始兴王人之爹赴人急如水火荆土方言谓父为爹爹屠可切又陟斜切】使汝你以清酒时果庶羞之奠祭于第四小娘子壻子之灵呜呼昔汝疾极【或作亟】值吾南逐苍黄分散使女惊忧我视汝顔心知死隔汝视我面悲不能啼我既南行家亦随遣扶汝上輿走朝至暮天雪冰寒伤汝羸肌【天或作大汝或作女古本汝多作女通用】撼顿险阻不得少息不能食饮又使渴饥死于穷山实非其命不免水火父母之罪【谷梁传昭十九年子既生不免乎水火父母之罪也】使汝至此岂不缘我草葬路隅棺非其棺既瘞遂行谁守谁瞻魂单骨寒无所托依人谁不死於汝即冤我归自南乃临哭汝【元和十五年九月公自袁州入为国子祭酒】汝目汝面在吾眼傍汝心汝意宛宛可忘【宛宛或作冤冤诗宛在水中央郑注宛坐见】逢岁之吉致汝先墓【长庆三年十月四日公尹京兆发其骨归葬河阳】无惊无恐安以即路【以一作没】饮食芳甘棺輿华好【芳或作柔】归于其丘万古是保尚飨

东雅堂昌黎集注卷二十三

卷二十四

钦定四库全书

东雅堂昌黎集注卷二十四

碑志

李元宾墓铭【按今石刻首题云韩愈撰段季展书箕後题云十一年十二月建立疑立石在葬後】

李观字元宾【谢从古本删字字今文粹亦然然石本有之 此文今从石本】其先陇西人也【或无也字】始来自江之东【下或有食太学之禄五字】年二十四举进士三年登上第又举博学宏辞得太子校书一年【书下或有义字】年二十九客死于京师【于或作於】既斂之三日【或无之字】友人博陵崔弘礼葬之于国东门之外七里【友上或有其字葬上或有卖马字葬下或无之字】乡曰庆义原曰嵩原【庆义或作某乡嵩原或作某原】友人韩愈书石以志之辞曰【人下或有昌黎字辞上或有其字】

已虘元宾壽也者吾不知其所慕夭也者吾不知其所恶生而不淑孰谓其壽【谓其或作为之】死而不朽孰谓之夭【谓之或作为其】已虘元宾才高乎当世而行出乎古人【才或作文出或作过】已虘元宾竟何为哉竟何为哉【已虘元宾诸本无此再出四字方从石本今亦从之但方又云上竟字石本作意而邵公济尝叹其句法之妙谓欧公而下好韩氏学者皆未之见遂从其说定上字作志意之意下字作究竟之竟则予不识其何说也窃意若非当时误刻即是後來字半磨灭而读者不审遂传此谬好事者又从而夸大之使世之愚而好怪者遂为所惑甚可笑也】

崔评事墓铭

君讳翰字叔清博陵安平人【安平或作平安今深州有安平县】曾大父知道仕至大理司直大父玄同为刑部侍郎出刺徐相州【同或作童非是或无相字】父倚举进士天宝之乱隐居而终君既丧厥父攜扶孤老托于大江之南卒丧通儒书作五字句诗敦行孝悌诙谐纵谑卓诡不羈【卓诡或无此二字或作处世皆非是】又善饮酒江南人士多从之游贞元八年君生四十七年矣【以卒日考之七当作六】自江南应节度使王栖曜命于鄜州既至表授右卫胄曹参军实参幕府事直道正言补益弘多【弘或作尤】既去职遂家于汝州汝州刺史吴郡陆长源引为防御判官表授试大理评事十二年相国陇西公作藩汴州而吴郡为军司马【贞元十二年七月以董晋为宣武军节度使八月长源自汝州授检校礼部尚书充宣武军行军司马陇西公即晋也】陇西公以为吴郡之从则贤也【之从或作从事或并出

之字皆非是】署为观察巡官实掌军田凿浚沟斩茭茅【或作茆茆鳧葵也此兼水陆言之作茅自当】为陆田千二百顷水田五百顷【或无为字五百或作二千】连岁大穰军食以饶幕府以其功状闻【或无其字】使者未复命以十五年正月五日寝疾终于家年五十有六矣陇西公赙赠有加自始有疾吴郡率幕府寮属日一至其庐问焉其既甚也日再往问焉其终也往哭焉比小斂大斂三哭焉【方无大斂字今按上文并大斂计之乃得三哭方本非是】於斂之二十日其妻与其子以君之丧旋葬于汝州【与或作以或无于字】其二月某日遂葬于某县某乡某原君内仁九族外尽宾客於其所止其来如归苟亲矣虽不肖收之如贤苟贤矣虽贫贱待之如贵人是故其歿也其吊者与其哭者其声也必哀尽焉郑氏也有子二人女一人吾闻位不称德者有後【德者下或有其终字】呜呼君其终有後乎铭曰

朝之言嘻嘻夕之言怡怡偕入而出乘马驰【马下或有而字】一日不见而死吁其悲【其下或有可字】

施先生墓铭

贞元十八年十月十一日太学博士施先生士丐卒其寮太原郭伋买石志其墓【或无太原字】昌黎韩愈为之辞曰先生明毛郑诗通春秋左氏传善讲说【刘公嘉话拾遗言予尝与柳八韩十八诣施士丐听毛诗说维鹈在梁梁人取鱼梁也言鹈自合求鱼不合於人梁上取其鱼譬之人自无善事攘人之美者如鹈在人梁上焉则毛注失之矣又说山无草木曰帖所以言陟彼帖兮无可帖也以其无草木故以譬之又说甘棠勿翦勿拜召伯所憩拜言人心之拜小低屈也上言勿翦终言勿拜明召伯渐远人思不忘也毛注拜犹伐非也又说维北有斗不可挹酒浆言不得其人也毛都不注此新史云士丐撰春秋传未甚传後文宗喜经术宰相李石因言士丐春秋可读文宗曰朕见之矣穿凿之学徒为异同但学者如浚井得美水而已何必劳苦旁求然後为得耶】朝之贤士大夫从而执经考疑者继于门【继下或有往字】太学生习毛郑诗春秋左氏传者皆其弟子贵游之子弟时先生之说二经来太学帖帖坐诸生下恐不卒得闻【帖帖或作怡怡下又有然字非是】先生死二经生丧其师仕於学者亡其朋故自贤士大夫老师宿儒新进小生闻先生之死哭泣相吊归衣服货财先生年六十九在太学者十九年由四门助教为太学助教由助教为博士太学【由四下十八字此从诸本杭本无为太学助教由助教八字云盖言由四门助教至为博士於太学故也若从今文则下太学字赘矣今按此既言其在太学者十九年则所历官不应但一再迁而已当从诸本为是但下太学二字疑衍不然则或在博士上或在下文当去下然无所据不敢辄改姑存之以俟知者】秩满当去诸生辄拜疏乞留【下或有或乞迁三字】或留或迁凡十九年不离太学【杭本无凡下八字今按上文已云在太学者十九年则此八字诚为重复然欲去之则或留或迁语势未尽又不知公意果如何今亦论而阙之不敢定其去留也】祖曰旭袁州宜春尉父曰媼【丑略切】豪州定远丞【豪或作濠说已见前按此志在元和之前去水为是】妻曰太原王氏先先生卒子曰友直明州鄞县主簿【鄞或作鄞鄞县名前汉云杀鄞鄞二县长鄞县会稽县鄞莫切】曰友谅太庙斋郎系曰先生之祖氏自施父【施父鲁大夫见左氏桓九年】其後施常事孔子以彰【史记弟子列传施之常字子桓一无施字】雝为博士【汉书儒林传施雝字长卿宣帝时为博士】延为太尉【延顺帝阳嘉二年八月为太尉】太

尉之孙始为吴人曰然曰续【当作绩吴志朱然字义封本姓施氏然子绩字公绪】亦载其迹先生之兴公车是召纂序前闻于光有曜古圣人言其旨密微笺注纷罗颠倒是非【纷或作分】闻先生讲论如客得归【得或作有】卑让肫肫【中庸曰肫肫其仁郑注肫读如海尔谆谆之谆恳诚貌】出言孔扬今其死矣谁嗣为宗【为或作其】县曰万年原曰神禾高四尺者【檀弓孔子曰吾闻之古者墓而不坟今丘也东西南北之人也不可以弗识於是封之崇四尺】先生墓邪

考功员外卢君墓铭【或作表 公元和二年为国子博士时作】

愈之宗兄故起居舍人君【柳子厚先友记云韩会昌黎人善清言有文章名最高然以故多谤至起居郎贬官卒则起居舍人君会也子厚以为郎误矣】以道德文学伏一世【伏或作服】其友四人其一范阳卢君东美少未出仕【或无少字】皆在江淮间天下大夫士谓之四夔【永泰中会与卢东美张正则崔造为友好谈经济之畧尝以王佐自许时人号为四夔旧史载於崔造传新史亦具载之而摭言乃以何长师李华卢东美韩衢为四夔非是】其义以为道可与古之夔皋者侔故云尔【夔皋或作皋夔後同】或曰夔尝为相世谓相夔四人者虽处而未仕天下许以为相故云大历初御史大夫李栖筠由工部侍郎为浙西观察使当是时中国新去乱仕多避处江淮间【仕或作士】尝为显官得名声以老故自任者以千百数大夫莫之取独晨衣朝服【或无晨字】从骑吏入下里舍请卢君君时始任戴冠通诗书与其羣日讲说周公孔子以相磨砢浸灌婆娑嬉游未有舍所为为人意既起从大夫天下未知君者惟奇大夫之取人也不常必得人其知君者【知上或无其字】谓君之从人也非其常守必得其从後为太常博士监察御史河南府司録考功员外郎年若干而终在官举其职【若干或作五十四】夫人李姓陇西人君在配君子无违德【配上或有作字】君歿训子女得母道甚【或作甚得母道】後君二十年年六十六而终【二十或作若干十六或作十四】将合葬其子畅命其孙立曰乃祖德烈靡不闻然其详而信者宜莫若吾先人之友先人之友无在者起居文有季曰愈【文或作又】能为古文业其家是必能道吾父事业汝其往请铭焉【父下或有之字】立於是奉其父命奔走来告愈谓立曰子来宜也行不可一二举且吾之生也後不与而祖接不得详也【得下或有其字】其大者莫若衆所与观所与衆寡兹可以审其德矣乃祖未出而处也天下大夫士以为与古之夔皋者侔【大夫或作之】且可以为相其德不既大矣乎讲说周公孔子乐其道不乐从事於俗得所从不择外内奋而起【择或作释】其进退不既合於义乎铭如是可以示於今与後也欵立拜手曰唯唯君祖子輿濮州濮阳令父同舒州望江令夫人之祖延宗郢州司马父进成鄜州洛交令【君祖下二十四字或但言君祖某某官父某某官夫人之祖某某官父某某官夫人下或无之字】男三人畅申易女三人皆嫁为士人妻【士下或无人字】墓在河南缑氏县梁国之原【缑氏下七字或作某县某原 缑音沟】某年月日【或无此四字非是】元和二年二月十日云【十下或有四字】

施州房使君郑夫人殡表【房使君房武也武刺施州而夫人卒殡于江陵公时为江陵法曹而作继於河南铭兴元少尹房君墓即武也】

夫人之先出於周【或无之字 今按此篇之文平易明白宜有之字】以郑为氏因初侯【周厉王少子支封於郑是为成公其地华州郑县是也後世以国为氏】曾祖讳随祖讳玠厥考讳绛咸垂休归于房宗生九子左右黍稷祠春秋道顺德严显且裕宜壽而富今何谬【富或作贵】永贞冬至前四日寓殡坟此非其丘

清边郡王杨燕奇碑文【晁本作清边郡王杨公神道碑】

公讳燕奇字燕奇【字上或无奇字】弘农华陰人也大父知古祁州司仓烈考文海天宝中实为平卢衙前兵马使【卢下或有军字】位至特进检校太子宾客封弘农郡开国伯世掌诸蕃互市恩信着明夷人慕之禄山之乱公年几二十【燕奇开元二十六年生天宝十四年禄山反时燕奇年十八】进言於其父曰大人守官宜不得去【宜或作义】王室在难某其行矣其父为之请於戎帅遂率诸将校之子弟各一人间道趋阙变服诡行日倍百里天子嘉之特拜左金吾卫大将军员外置赐勲上柱国宝应二年春【二年或作二岁】诏从仆射田公平刘展【上元元年十一月宋州刺史刘展赴扬州扬州长史邓景山以兵拒之为展所败进陷杨润昇等州二年正月平卢兵马使田神功生禽展杨润平今云宝应误也】又从下河北大历八年帅师纳戎帅勉于滑州【大历八年三月水平节度使令狐彰卒以工部尚书李勉为永平军节度滑毫观察等使】九年从朝于京师【是年十一月汴宋节度使田神功入朝京师九年正月神功卒神功本传云大历二年来朝加检校尚书右仆射而此云九年未知孰是】建中二年城汴州【建中二年三月筑汴州城】功劳居多三年从攻李希烈先登贞元二年从司徒刘公复汴州【贞元四年十二月李希烈陷汴州兴元元年十一月宋毫节度使刘洽大破希烈之衆希烈遁归蔡州汴州平今云贞元二年误也刘公谓刘元佐】十二年与诸将执以城叛者归之于京师事平授御史大夫食实封百户赐缙彩有加【封下或有五字】十四年年六十一五月某日终于家自始命左金吾大将军凡十五迁为御史大夫职为节度押衙右厢兵马使兼马军先锋兵马使【右或作左】阶为特进勲为上柱国爵为清边郡王食虚邑自三百户至三千户真食五百户终焉【或无自字或无五字】公结髮从军四十余年【或作岁】敌攻无坚城守必完临危蹈难歔歔感发乘机应会捷出神怪不畏义死不荣幸生故其事君无疑行其事上无间言初仆射田公其母隔于冀州公独请往迎之经营贼城出入死地卒致其母田公德之约为父子故公始姓田氏田公终而後复其族焉嗣子通王属良祜以其年十月庚寅葬公于开封县鲁陵冈陇西郡夫人李氏祔焉【通王德宗之子谡以贞元中领宣武及河东节葬月或作二月或作三月或作八月或作十月燕奇卒於五月作二三月者误矣但八月十月皆有庚寅不知孰是大抵此碑多误不晓所以仆射田公田神功也神功以上元二年平刘展此作宝应二年旧传神功大历八年冬覲阙廷信宿而终此作九年皆差也】夫人清夷郡太守佑之孙渔阳郡长史献之女柔嘉淑明先公而殂有男四人女三人後夫人河南郡夫人雍氏某官之孙某官之女有男一人女二人咸有至性纯行【男一人女二人或作男二人女一人女上或有有字一亦无有字】夫人同仁均养亲族不知异焉君子於是知杨公之德又行於家也铭曰烈烈大夫【大夫或作丈夫】逢时之虞感泣辞亲从难于秦维兹爰始遂勤其事四十余年或裨或专攻牢保危爵位已躋既明且慎终老无隳鲁陵之冈蔡河在侧【在或作之】烝烝孝子思显勲绩斲石于此式垂後嗣

河南少尹裴君墓志铭

公讳复字茂绍【复或作稷唐世系表集古録皆作复】河东人曾大父元简大理正大父旷御史中丞京畿采访使父虬以有气略敢谏诤为谏议大夫【或无有字谏诤二字或作言或无诤字】引正大疑有宠代宗朝屡辞官不肯拜卒赠工部尚书【欧阳公跋怡亭铭云裴虬撰李阳冰篆李莒书铭在武昌江水中有小岛亭在其上铭刻於岛石虬代宗时为道州刺史按公此文云虬为谏议大夫不云为道州刺史唐史亦不见其事欧阳岂得之怡亭铭耶】公举贤良拜同官尉仆射南阳公开府徐州【贞元四年十一月以濠寿庐三州团练使张建封为徐泗濠节度使】召公主书记二迁至侍御史入朝历殿中侍御史累迁至刑部郎中【迁或作选非是】疾病改河南少尹輿至官若干日卒实元和三年四月二十三日享年五十夫人博陵崔氏少府监颀之女【颀音挺】男三人璟质皆既冠其季始六岁曰充郎【充或作彦世系表作望郎】卜葬得公卒之四月壬寅遂以其日葬东都芒山之陰杜翟村公幼有文年十四【时宝应元年】上时雨诗代宗以为能将召入为翰林学士尚书公请免曰愿使卒学【或无使字】丁後母丧上使临吊又诏尚书公曰【诏或作谓】父忠而子果孝吾加赐以厉天下终丧必且以为翰林【下或有学士字】其在徐州府能勤而有劳在朝以恭俭守其职居丧必有闻待诸弟友以善教馆嫠妹畜孤甥能别而有恩【而有或作而以】历十一官而无宅於都无田於野无遗资以为葬斯其可铭也已铭曰

裴为显姓入唐尤盛支分族离各为大家【此铭以家叶离方言罹谓之罗罗谓之罹盖古音通也今按诗免爰及楚词多此类】惟公之系德隆位细曰子曰孙厥声世继【子或作祖】晋阳之色【或作邑】愉愉翼翼无外无私幼壮若一何壽之不遐而禄之不多谓必有後其又信然耶

国子助教河东薛君墓志铭【石本有河东字或无然此後多从石本今亦从之石本首云朝议郎守国子博士韩愈撰】

君讳公达字大顺薛姓【字大顺或作字某】曾祖曰希庄抚州刺史赠大理卿祖曰元晖果州流溪县丞赠左散骑常侍【祖下十六字方云阁杭蜀本皆阙惟监本与石本同今按方氏所校专据三本而谓今本皆不足取今此数字乃三本所无而今有者若非偶有石本则必以为後人校增而不之信矣故知今本与阁杭蜀苑粹不同者未必皆无所自也观者详之】父曰播【元晖三子据摠播据开元十九年摠十八年播天宝十一年并登第】尚书礼部侍郎侍郎命君後兄据据为尚书水部郎中赠给事中【据或作授】君少气高为文有气力务出於奇以不同俗为主始举进士不与先辈揖作胡马及圆丘诗京师人未见其书皆口相传以熟及擢第补家令主簿佐凤翔军【或无及擢第三字贞元三年二月以凤翔留後邢君牙为凤翔尹凤翔陇西观察使至是表公违佐其军】军帅武人君为作书奏读不识句传一幕以为笑不为变【笑下或有君字】後九月九日大会射【会下或有命字】设标的高出百数十尺令曰中酬锦与金若干一军尽射莫能中【或无尽字能中下或有者字】君执弓腰二矢指一矢以兴【指或作挟阁本无指一矢三字令按下文三发三中考之阁本之谬明矣】揖其帅曰请以为公欢遂适射所一座皆起随之【或无皆字】射三发连三中【或无射字

】的坏不可复射中辄一军大呼以笑连三大呼笑帅益不喜即自免去後佐河阳军任事去害兴利功为多拜协律郎益弃奇与人为同今天子修太学官有公卿言诏拜国子助教分教东都生元和四年年?七二月十四日疾暴卒【?七石本如此下二十一日亦然方着其说而不及改今正之】君再娶初娶琅邪王氏後娶京兆韦氏【或无初娶以下十二字】凡产四男五女男生辄即死【或无产字即字】自给事至君後再絶皆有名【或无皆有名三字然三字之义未详而方氏亦不着石本之有无姑阙以俟知者】遗言曰以公仪之子已已後我【已已後我或作为已後今按此云已已者必其子之小字也】其年闰三月廿一日【廿说见上】弟试太子通事舍人公仪京兆府司録公干以君之丧归【试下七字或作某官京下五字或作殿中侍御史】以五月十五日葬于京兆府万年县少陵原合祔王夫人莹【以君下二十八字或作以君之丧葬京兆某县】铭曰

宦不遂【不下或有能字非是一作官不能达遂一作迁】归讥於时【讥或作议石本逸】身不得年又将尤谁世再絶而绍祭以不隳

监察御史元君妻京兆韦氏夫人墓志铭【诸本无京兆以上九字】

夫人讳丛字茂之姓韦氏【茂或作成今以名义推之当作茂】其上七世祖父封龙门公【後周骠骑将军晋州总管府长史韦通封龙门县公】龙门之後世率相继为显官【通子善嗣上谷太守善嗣子崇德太子谕德崇德子弼字国祜主客郎中莱济商三州刺史】夫人曾祖父讳伯阳自万年令为大原少尹副留守北都卒赠秘书监【或无北都字】其大王父迢以都官郎为岭南军司马卒赠同州刺史王考夏卿以太子少保卒赠左仆射【保下或无卒字】仆射娶裴氏臯女【或无仆射字】臯为给事中【为上或有少字非是】臯父宰相耀卿夫人於仆射为季女爱之选壻得今御史河南元稹【选上或有其字稹字微之河南人】稹时始以选校书秘书省中【校上或有授字非是】其後遂以能直言策第一拜左拾遗果直言失官又起为御史举职无所顾夫人固前受教於贤父母得其良夫又及教於先姑氏【固或作因父上或无贤字得上或有及字及或作受皆非是】率所事所言皆从仪法【言或作动】年二十七以元和四年七月九日卒卒三月得其年之十月十三日葬咸阳从先舅姑兆铭曰

诗歌硕人爰叙宗亲女子之事有以荣身夫人之先累公累卿有赫外祖【有或作於祖或作舅非是】相我唐明归逢其良夫夫妇独不与年而卒以夭实生五子一女之存铭于好辞以永於闻【好或作理】

东雅堂昌黎集注卷二十四

卷二十五

<集部,别集类,汉至五代,东雅堂昌黎集注>

钦定四库全书

东雅堂昌黎集注卷二十五

碑志

登封县尉卢殷墓志【孟郊诗有吊卢殷十首其一云登封草木深登封道路微日月不与光莓苔空生衣可怜无子翁虬蜉缘病肌挛卧岁时长涟涟但幽噫幽噫虎豹间此外相访稀至亲惟有诗抱心死有归河南韩先生後君作因依磨一片嵌岩书千古光辉盖谓公以河南令为卢作此志也时元和五年】

元和五年十月日范阳卢殷以故登封县尉卒登封年六十五【月下或有五字】君能为诗自少至老诗可録传者在纸凡千余篇无书不读然止用以资为诗【或无在纸二字以下或有自字】与谏议大夫孟简协律孟郊监察御史冯宿好期相推挽卒以病不能为官在登封尽写所为诗抵故宰相东都留守郑公余庆【抵或作投或无公守】留守数以白米周其家书荐宰相宰相不能用竟饥寒死登封将死自为书告留守与河南尹【房式也】乞葬已又为诗与常所来往河南尹韩愈曰为我具棺留守尹为具凡葬事韩愈与买棺又又为作铭十一月某日葬嵩下郑夫人墓中【嵩下或有山字】君始娶荥阳郑氏後娶陇西李氏生男辄死卒无子女一人【女上或有子字】学浮屠法不嫁为比丘尼云

兴元少尹房君墓志【房君武也公尝为其夫人郑氏作殡表今又志其墓】

房故为官族【官或作宦】称世有人自太尉瑄【瑄字次律河南人】以德行为相相玄宗肃宗【天宝十五年七月玄宗拜瑄吏部尚书同平章事至德二年五月罢广德元年卒赠太尉】名声益彰彻大行世号其门为太尉家宗族子弟皆法象其贤公曾祖讳玄静尚书膳部郎中历资简泾隰四州刺史太尉之叔父也【玄静父彦云有二子长曰玄基次曰玄静玄基子融天后朝正谏大夫同凤阁鸾台平章事融子瑄】祖讳肱为虢州司马父讳峦【或作栾】都水使者皆名能守家法公讳武字某以明经历官至兴元少尹谨飭畏慎年七十三以其官终幼壮为良子弟老为贤父兄历十二官处事无纖毫过差尝以殿中侍御史副丹阳军使其後为盩厔令施州刺史丹阳盩厔施州吏民至今思之【盩音輞厔音窒扶风县名水曲曰盩山曲曰厔前汉行幸盩厔五柞宫】娶荥阳郑氏女生男六人其长曰次卿次卿有大才不能俯仰顺时年四十余尚守京兆兴平尉然其友皆曰房氏有子也次曰次公次膺次回次衡次元始学而未仕女三人皆嫁为士人妻【士人或作人士】初公之在施州夫人卒焉殡於

江陵元和五年次卿与其羣弟奉公之丧自兴元至堂殡于伊水之南【公改葬服议殡於堂谓之殡】六年正月次公奉夫人之丧自江陵至遂以其月十四日合葬河南缙氏之高龙原公母弟式自给事中为河南尹孝友慈良尽费其财以奉公葬未葬之一月诏以河南为御史中丞领宣州观察使【中丞或作大夫】将行【或作往】召河南令韩愈泣谓曰吾兄之葬於是而吾为尹於是吾以为得尽其道於吾兄也今压於上命不得视吾兄之棺入此土也岂非天邪子与吾儿次卿游我重知子凡吾兄之终事将子是托焉愈既不获辞既助其凡役事退又为铭云

有位有年【年或作名】有弟有子从先人葬是谓受祉

河南少尹李公墓志铭【李素也据史李素无传于李錡传附见焉】

元和七年二月一日河南少尹李公卒年五十八【尹下或有陇西字或作陆浑】斂之三月某甲子葬河南伊阙鸣皋山下【或作八月丁亥朔十六日壬寅考之史亦合伊阙或作陆浑考唐志鸣皋实在陆浑】前事之月其子道敏哭再拜授使者公行状【公或作功非是】以币走京师乞铭於博士韩愈曰【於或作于】少尹将以某月日葬【月下或有某字】宜有铭其不肖嗣道敏杖而执事不敢违次不得跣以请愈曰公行应铭法【公方作功今按若从方本则此句无首而下句是又礼葬亦无所承其误明】子又礼葬敢不诺而铭诸【或无葬字或无而铭诸三字或无诺而二字皆非是】公讳素字某【或作字贞】生七岁丧其父贫不能家母夫人提以归教育於其外氏【育或作蓄于下或无其字】以明经选主虢之弘农簿又尉陕之芮城李丞相泌观察陕虢以材署运使从事以课迁尉京兆鄠【邑名古有扈国鄠音户】考满以书判出其他选主万年簿【伦上或无其字主或作注非是】而母夫人固在食其禄母夫人卒三年改尉长安迁监察御史奏贬九卿一人【贬或作败】改詹事丞迁殿中侍御史由度支员外郎选令万年【或无郎字选令万年或年迁万年令】公主夺驿田【主下或有簿字云簿如簿録之簿非是】京兆尹符县割畀之公不与改度支郎中使【度支或作屯田】侍郎介恃【或作特非是元和元年四日以兵部侍郎李巽为度支盐鐵转运使】不礼其属大夫士擅喜怒赏罚【或无擅字】公独入让不受刘辟平上以蜀赏高崇文尚书省以崇文幕府争盐井因军便不便命公使崇文【以崇或作与崇或无不便字】崇文命幕府唯公命从即其日事已疏奏【事已或作事以】侍郎外称其能竟坐前敢抗已衢州饥择刺史侍郎曰莫如郎李某【如郎下或有中字】遂刺衢州至一月迁苏州【迁下或有刺字时以杜康兼为苏州刺史兼曰李錡且反必且奏族臣上因留为吏部郎中而以素为苏州刺史】李錡前反权将之戍诸州者【或无权之二字】刺史至斂手无敢与敌【或无敢敌字或无敢字皆非是二年十月镇海节度使李錡反先是錡选腹心五人为所部五州镇将姚志安处苏州李深处常州赵唯忠处湖州丘自明处杭州高肃处睦州察刺史动静及将反各令杀其刺史】公至十二日錡反公将左右与贼战州门不胜贼呼入公端坐立责以义【端或作号非是】皆斂兵立不逼錡命械致公军将斩以徇及境錡适败缚【或无缚字】公脱械还走州【錡反素为志安所败生致於錡具桎梏钉于船舷未及京口十月润州大将张子良李逢仙等执錡素获免】贼急卒不暇走死民抱扶迎尽出【急卒一作竟平今按州字句絶贼即錡将之戍州作乱者以公至之速不及走死为州民执以迎公耳然民字以下必有

脱】

【误】天子使贵人持紫衣金鱼以赐居三年州称治拜河南少尹行大尹事【六年三月以河南尹郗士美为昭义军节度使以素为少尹行大尹事七年二月许孟容自兵部侍郎代素为尹】吕氏子灵弃其妻着道士衣冠【或无衣字】谢母曰当学仙王屋山去数月复出间诣公公立之府门外使吏卒脱道士冠给冠带送付其母黜属令二人以赃减民赋钱岁五千万【赃或作臧古通用然不知此句当如何读若臧字属上句即下文减赋别为一事若属下句即是以所没入之臧代民赋钱也但属上句者语意差滞耳千或作十】请缓民输期一月诏天下输皆缓一月公一断治不收声事常出名上曾祖弘泰简州刺史【弘或作纯】祖乾秀伊阙令父燮宣州刺史赠绛州刺史母夫人炖煌张氏其舅参有大名【氏下或有封西平郡太君六字参或作泰】公之配曰彭城刘氏夫人【公或作君氏夫人下或有封彭城县君五字】夫人先卒其葬以夫人祔夫人曾祖曰子玄祖曰餗皆有大名公之子男四人长曰道敏举进士其次曰道枢其次曰道本道易皆好学而文【或无其次曰道枢五字枢下或无其次曰三字道易上或有其次曰字】女一人嫁苏之海盐尉韦潜自简州而下皆葬鸣皋山下铭曰

高其上而坎其中【上下或有立字立或作丘或作山】以为公之宫奈何乎公

集贤院校理石君墓志铭【校理下或有京兆昭应尉五字洪左焉重胤于河阳公尝有诗及序送之至是卒公祭以文又铭其墓】

君讳洪字濬川其先姓乌石兰九代祖猛始从拓拔氏入夏居河南【九或作七下文七世为曾祖则此当作九拓拔或作跼跋广韵引周书王秉王兴并赐姓拓至氏又有拓拔氏初黄帝子昌意少子受封北土黄帝以土德王北俗谓土为拓谓石为拔故以拓拔为氏跋亦一作拔或说自云拓天而生拔地而长遂以为氏後魏孝文太和二十年改为元氏夏谓中夏也拓音托拔蒲拔切】遂去乌与兰独姓石氏而官号大司空【後魏孝文皇帝太和十八年迁都洛阳二十年尽改复姓故乌石兰止为石氏以河南为望後魏官氏志乌石兰氏改姓石氏有司空兰陵公石猛】後七世至行褒官至易州刺史於君为曾祖易州生婺州金华令讳怀一卒葬洛阳北山金华生君之考讳平为太子家令葬金华墓东而尚书水部郎刘复为之铭君生七年丧其母九年而丧其父能力学行去黄州録事参军【李翱尝有荐洪状谓明经出身曾任冀州纠曹黄字盖误也】则不仕而退处东都洛上十余年行益修学益进交游益附声号闻四海【或作方】故相国郑公余庆留守东都上言洪可付史笔李建拜御史【建字杓直元和三年十月高郢为御史大夫奏建为殿中侍御史建举洪自代】崔周祜为补阙【祜或作楨考周頌从示今按大雅文王诗从木当两存之】皆举以让宣歙池之使【卢坦】与浙东使【薛苹】交牒署君从事【君下或有为字】河阳节度乌大夫重胤间以币先走庐下【走下或有君字】故为河阳得【得上或有所字】佐河阳军【元和五年四月以乌重胤为河阳节度使表洪为府参军】吏治民寛考功奏从事考君独於天下为第一元和六年诏下河南徵拜京兆昭应尉校理集贤御书明年六月甲午疾卒年四十二娶彭城刘氏女故相国晏之兄孙生男二人八岁曰壬四岁曰申女子二人顾言曰葬死所七月甲申葬万年白虎

原既病谓其游韩愈曰子以吾铭【以或作与】铭曰生之艰成之又艰若有以为而止於斯

唐故江西观察使韦公墓志铭【诸题唐故或有或无或有铭字或无铭字皆从旧本石本多用大唐字 韦丹新史列之循吏传皆取公墓志及杜牧所作遗爱碑为之】

公讳丹字某姓韦氏【字某或作字文明】六世祖孝寬仕周有功以公开号於郾【孝寬名权裕以字行仕周为大司空封郾国公左氏郾人军其郊 郾音云】郾公之子孙世为大官【孝寬子津位内史侍郎户部侍郎判尚书事津子琨字玄理唐太子詹事封武阳县琨子幼平岐州参军幼平子抱贞梓州刺史】唯公之父政卒雒县丞赠虢州刺史公既孤以甥孙从太师鲁公真卿学太师爱之【或无太史爱之四字】举明经第选授峡州远安令以让其庶兄【峡或作硤考地理志当作峡】入紫阁山事从父熊通五经登科【登下或有明五经三字或无登字】历校书郎咸阳尉佐邠宁军【贞元四年七月以张献甫为邠宁节度使献甫表丹佐其府】自监察御史为殿中侍御史徵拜太子舍人益有名迁起居郎吴少诚袭许州拜河阳行军司马未行少诚死改驾部员外郎【河阳下或有军字或无未行二字少上或有适字】新罗国君死公以司封郎中兼御史中丞紫衣金鱼往吊立其嗣故事使外国者常赐州县官十员使以名上以便其私号私謁官公将行曰吾天子吏使海外国不足於资【或作贄】宜上请安有卖官以受钱邪即具疏所以上以为贤命有司与其费【或无以为贤三字】至郾州会新罗告所当立君死还拜容州刺史容管经畧招讨使始城容州周十三里置屯田二十四所【或无置字】化大行诏加太中大夫顺宗嗣位拜河南少尹行未至拜郑滑行军司马【军上或无行字】始至襄阳诏拜谏议大夫既至日言事不阿权臣謇然有直名遂号为才臣刘辟反围梓州诏以公为东川节度使御史大夫【或无诏字八月西川节度使韦皋卒度支副使刘辟自为留後九月徵辟为给事申不受诏议者欲释不问丹上疏以为今释辟不诛则朝廷可指臂而使者唯两京耳此外谁不为叛上善其言以丹为东川节度使兼御史大夫代李康】公行至汉中上疏言梓州在围间守方尽力不可易将徵还入议蜀事【徵上或有请字】刘辟去梓州因以梓州让高崇文【元和元年正月以左行营节度使高崇文讨辟三月丹至汉中表言崇文客军远辟无所资若与梓州级其士心必能有功四月以崇文为东川节度副使知节度使事】拜晋慈隰等州观察使御使【是月以丹为晋慈隰三州观察使】自扶风县男进封武阳郡开国公食邑二千户【或无邑字】将行上言臣所治三州非要害地不足张职为国家费不如属之河东便上以为忠【或无上以为忠四字疑或公自以前有上以为贤语涉重复故删其一不知当存何字也】一岁拜洪州刺史江南西道观察使以晋慈隰属河东【元和二年正月以宰相杜黄裳为河中晋絳慈隰节度使是日以丹为江西观察使】公既至则计口受俸钱委其余於官罢八州无事之食耆【洪江饶?吉信抚袁八州】以聚其材始教人为瓦屋取材于山召陶工教人陶聚材瓦於场度其费以为估不取赢利凡取材瓦於官业定而受其偿从令者免其赋之半逃未复者官与为之贫不能者畀之财【畀或作裨财或作材】载食与浆亲往劝之为瓦屋凡三千七百为重屋四千七百民无火忧暑湿则乘其高别命置南北市营诸军岁旱种不入土募人就功厚与之直而给其食业成人不病饥为长衢南北夹两营【或无长字】东西七里人去溲污气益苏【污或作汗】复作南昌县徙廐千高地因其废仓大屋马以不连死【马或作焉不或作为死或作廐新史作以废仓为新廐马息不死】明年筑堤扞江长十二里疏为斗门以走?水公去位之明年江水

平堤老幼泣而思曰【老上或有既退二字】无此堤吾屍其流入海矣灌陂塘五百九十八得田万二千顷凡为民去害兴利若嗜欲居三年於江西八州无遗便其大如其细可畧也【其大下九字阁杭李谢本作其大不可畧如是或作其大畧如是皆非是一无也字】卒有违令当死者公不果於诛杖而遣之去上书告公所为不法若干条【法字或有者字】朝廷方勇於治且以为公名才能臣治功闻天下不辨则受垢诏罢官留江西待辨使未至月余公以疾薨使至辨凡卒所告事若干条皆无丝毫实诏答卒百流岭南公能益明春秋五十八薨於元和五年八月六日公好施与家无剩财【剩或作贍】自校书郎至为观察使拥吏卒前走七州刺史与宾客处如布衣时自持卑一不易【或无如布衣时四字或四字在不易下卑下或无一字】娶清河崔氏故支江令諷之女【支或作枝】某官某之孙有子曰寘年十五明经及第嗣其家业後夫人兰陵萧氏中书令华之孙殿中侍御史恒之女皆先公终有女一【或无史字】凡公男若干人女若干人【或无女若干人四字杜牧作遗爱碑云有子三寘宙岫宙咸通中检校尚书左仆射同平章事充岭南节度岫终福建观察使寘无闻唐史世系表则着寘宙审而遗岫审大理评事】明年七月壬寅从葬万年县少陵原【或无县字】将葬其从事东平吕宗礼【宗礼即吕恭字敬叔温之弟】与其子寘谋曰我公宜得直而不华者铭传於後固不朽矣【方从阁杭蜀本无直而不华者五字及传于後固四字而复出得铭二字云晁氏本有此字殊不知嘉佑杭本已如此大抵方未尝见嘉佑本也一本云我公宜得铭得铭不朽矣】寘来请铭铭曰

武阳受业始於太师【即顏真卿】以官让兄自待不疑勤於紫阁取益以卑可谓有源卒用无疵慊慊为人【慊慊或作谦谦】矫矫为官爰及江西功德具完名声之下独处为难辨而益明仇者所叹【音滩】碑於墓前维昭美故纳铭墓中以识公墓【识式志切】

唐故河南府王屋县尉毕君墓志铭

毕氏出东平【毕氏本毕公高之後其後世为东平须昌人】历汉魏晋宋齐梁陈士大夫不絕【晋有毕湛为中书郎湛子卓字茂世大兴末为吏部郎北史毕敬衆子元宾父子相继为兖州刺史元宾六子祖圻祖髦祖归祖旋祖荣祖晖祖归子义畅祖荣子义允义允子僧要祖晖子义勰义云】入国朝有为司卫少卿贝邢庐许州刺史者曰憬【入或作人属上句憬河南偃师人武后时为司卫少卿】憬之子构【一作称非是构字隆择】累官至吏部尚书卒赠黄门监是为景公【新旧史有毕构传终於户部尚书世系表亦作户部然旧史毕誠传乃称吏部】景公生抗为广平太守抗安禄城?覆其宗赠户部尚书【生杭杭本抗作炕世系表作抗传作炕而世系官职亦不同覆其宗或作其宗覆焉】尚书生垧家破时垧始四岁【四或作七】与其弟增以俱小漏名籍得不诛为赏口赋中宝应二年河北平宗人宏以家财赎出之求增不得增长为河北从事兼官至御史中丞垧既至长安宏养於家教读书明经第【明经第一句当有脱字今按明上或经下当有中字或登字之类】宏死垧益壮始自别为毕氏历尉临涣安邑王屋年六十一以元和六年二月二日卒於官初罢临涣徐州节度张建封慕广平之节死【或作死节】闻君笃行能官请相见署诸从事【请上或有以币字署上或有遂字按诸字疑衍】摄符离令四年及尉王屋徐之从事有为河南尹者闻君当来喜谓人曰河南库岁入钱以千计者五六十万【入钱或作出入】须谨廉吏今毕侯来吾济矣继数

尹诸署於府者无不变【诸或作请】而毕侯固如初竟以其职死君睦亲善事过客未尝问有无既卒家无一钱凡棺与墓事【墓或作葬】皆同官与相识者事之娶清河张氏女【女下或有子字女子字疑皆因下文误入】生男四人曰鎬鉦録銳女子三人其长学浮屠法为比丘尼其季二人未嫁以其月二十五日後葬偃师之土娄铭曰

上古爱民为官求人苟可以任位加其身其後喜权人自求官退而缓者身後人先故广平死节而子不荷其泽王屋谨廉而神不福其谦呜呼天与人苟无伤其穴与坟

试大理寺事胡君墓铭

胡之氏别於陈【周武王封胡公满於陈其支子自称胡氏】明允先【允作作元】河东人世勤固【或作国】戴厥身【戴或作载】籍文谱进连伦惟明允加武资力牛虎柔不持吏夏阳【同州属邑】有施为去平阳【晋州郡名】民思悲河东土河陆原宜兹人肖厚完【或作後昆或作肖厚寬 今按厚完二字见晋语】五十七不足年孤儿啼死下官母弟证秩大夫【秩或作秋胡弟证元和九年以御史大夫帅振武十三年召还此下又云友韩愈司马徙岂十二年从征淮西时耶然则秋当为秩明矣】撫君遗哭泣书【撫或作石】友韩愈司马徙【公时为行军司马从裴度平蔡故云司马徙或谓公是时为太史司马徙谓司马迁父子耳以志无年月日故二说不同】作後铭系序初

襄阳卢丞墓志铭【或有唐故字】

范阳卢行简【卢下或有君字】将葬其父母乞铭於职方员外郎韩愈曰吾先世世载族姓名【世世或作五世卢植字子干涿郡涿人後汉北中郎将子毓字子家魏司空容城侯毓子挺字子笏泰山太守琕子志字子道军谿祭酒志子湛字子谅司空从事中郎湛子偃慕容氏营邱太守偃子邈范阳太守邈子玄字子贞後魏中侍郎玄子伯源字汤乌秘书监伯源子道将字祖业燕郡太守道将子怀仁字子友弘农太守】吾胄於跖拔氏之弘农守守後四代吾祖也【怀仁子彦卿东宫学士彦卿孙璲】为沂録事参军【沂下或有州字】五世而吾父也为襄阳丞始吾父自曹之南华尉历万年县尉【万年二字或作三】至襄阳丞以材任烦能持廉名去襄阳则署盐铁府出入十年常最其列【府下或有职字十下或有五字】贞元十三年终其家年六十七殯河南河陰【南下或有县字县字或在河陰下】吾母炖煌张氏也王父瓘为兖之金卿令【之或作州】先君歿而十三年夫人终年七十三从殯河陰【或没下无而字年下有而字】生子男三人居简金吾兵曹行简则吾其次也大理主簿佐江西军其幼可久女子嫁浮梁尉崔叔宝将以今年十月自河陰启葬汝之临汝之原【葬下或有于字临汝下或有县字汝原上或有临字】吾曰阴阳星历近世儒莫学独行简以其力余学能名一世舍而从事於人以材称葬其父母乞铭以图长存【或作图久长存】是真能子矣可铭也遂以铭【今按此与後篇张圆志文体特为横逸与诸篇不同亦其文之变也但此篇中称吾者皆述卢语而最後一吾字乃韩自吾似少兮别耳】弘农讳怀仁沂讳璲襄阳讳某今年实元和六年【沂下或有州字】

唐河中府法曹张君墓碣铭【李肇国史补云张圆佐韩弘旧史弘初秉节事无小大委之後乃奏贬圆多怨言及量移诱至汴州极欢而遣之行次八角店白日杀之然此志言遇盗死涂中亦未曾畧及贬谪之意则国史补未必可信也葬以元和五年二月庚午据长历二月无庚午若曰庚午则正月晦也】

有女奴抱婴儿来致其主夫人之语曰妾张圆之妻刘也【刘下或有氏字】妾夫尝语妾云吾常获私於夫子且曰夫子天下之名能文辞者【或无夫子字非是】凡所言必传世行後今妾不幸夫逢盗死途中【逢或作遇】将以日月葬妾哀其生志不就恐死遂沈泯【或作名】敢以其稚子汴见先生将赐之铭【汴下或有兒字或无将字】是其死不为辱而名永长存所以盖覆其遗胤子若孙【胤下或有若字】且死万一能有知将不悼其不幸於土中矣又曰妾夫在岭南时尝疾病泣语曰吾志非不如古人【或无人字】吾才岂不如今人而至於死於是邪若尔吾哀必求夫子铭是尔与吾不朽也愈既哭吊辞遂叙次其族世名字事始终而铭曰【吊下或有即字今按既辞而遂叙其事盖一辞而许此所谓礼辞者也】君字直之祖謹父孝新皆为官汴宋闲君尝读书为文辞有气有吏才尝感激欲自奋拔树功名以见世初举进士再不第因去事宣武军节度使得官至监察御史坐事贬岭南再迁至河中府法曹参军摄虞乡令有能名进摄河东令又有名遂署河东从事绛州阙刺史摄绛州事能闻朝廷元和四年秋有事适东方既还八月壬辰死於汴城西双邱年四十有七明年二月日葬河南偃师【日或作庚午考唐历二月无庚午葬下或有于字】妻彭城人世有衣冠祖好顺泗州刺史父泳卒蕲州别驾女四人男一人婴儿汴也是为铭

太原府参军苗君墓志铭

君讳蕃字陈师【汉有陈蕃故蕃字陈师】其先楚之族大夫亡晋而邑於苗世遂以苗命氏【楚若敖熊仪生子曰鬬伯比伯比生子良良生越椒字伯棼以罪诛其子贲黄贲晋晋邑之苗後以为氏】其後有守土上党者惠於民卒遂家壶关【县名属潞州】曾大父延嗣【延嗣父袭□高蹈不仕赠礼部尚书】中书舍人大父含液【延嗣二子含泽含液皆登第】举进士第官卒河南法曹父穎扬州録事参军君少丧父受业母夫人举进士第【贞元十一年登进士第】佐江西使有劳三年使卒【贞元十一年八月以路寰为江西观察使蕃佐其府十三年九月寰卒】後辟不肯留【後使李巽辟蕃蕃辞】独护其丧葬河南迁补太原参军【河东节度严绶表佐其府】假使职狱平货滋息吏斂手不敢为非年四十有二元和二年六月辛巳暴病卒其妻清河张氏以其年十二月丙寅【以历推之丙寅为其月十九日】葬君於洛阳平陰之原男三人执规执矩必复其季生君卒之三月君同生昆弟姊凡三人皆先死四室之孤男女凡二十人皆幼遗资无十金【汉以前以鎰名金汉以後以斤名金鎰者二十四两斤者十六两诸史传中或言百金或言万金皆以一斤为一金十金者十斤金也】无田无宫以为归无族亲朋友以为依也【宫或作家为依或无为字樊汝霖云按世系表苗袭□生延嗣延嗣生含液含液生穎穎生蕃蕃生着着生悋悋恪悋生台符悋生廷义又按登科记悋长庆二年悋大和五年恪八年台符大中八年廷义乾符三年皆相踵登第然有可疑者世系表以悋悋恪为蕃之孙志谓蕃卒於元和二年男女皆幼自元和二年至长庆二年甫十五年岂遂有孙登第耶然则世系表蕃之下所谓着者误矣疑悋悋恪即蕃之子而执规执矩

必复者蕃死时幼而未名特其小字云尔其後遂名悵恠也呜呼蕃死时其困如此其後子孙之盛则如此为善者可无怠矣】天将以是安施耶铭曰

有行以为本有文以为华恭以事其职而勤以嗣其家位卑而无年吁其奈何

东雅堂昌黎集注卷二十五

卷二十六

钦定四库全书

东雅堂昌黎集注卷二十六

碑志

唐朝散大夫赠司勳员外郎孔君墓志铭【或无郎字孔君名戡孔子三十六世孙时与公偕分司东都卒公为作此铭】

昭义节度卢从史有贤佐曰孔君讳戡字君胜【昭义君潞州也在河东今为昭德军贞元二十年八月以卢从史为昭义节度使表戡为书记】从史为不法君阴争不从则於会肆言以折之从史羞面颈发赤【颈一作顔】抑首伏气【伏或作吐方云叔孙通所谓伏抑首者也作吐非 今按汉传言伏抑首言伏地而抑首也此言伏气犹言屏气耳与汉传语异】不敢出一语以对立为君更令改章辞者前後累数十坐则与从史说古今君臣父子道顺则受从福逆辄危辱诛死曰【曰上或有且字】公当为彼不得为此从史常耸聽喘汗【常或作当非是】居五六岁益骄有悖语君争无改悔色【或作意亦通作也非是】则悉引从事空一府往争之从史虽羞退益甚君泣语其徒曰吾所为止于是不能以有加矣【以有或作有以】遂以疾辞去卧东都之城东酒食伎乐之燕不与当是时天下以为贤论士之宜在天子左右者皆曰孔君孔君云【或无者字皆上阁本有唯字或无复出孔君字或复出云字】会宰相李公镇扬州【元和三年九月以宰相李吉甫为淮南节度使】首奏起君君犹卧不应【犹或作独】从史读诏曰是故舍我而从人耶即诬奏君前在军有某事上曰吾知之矣奏三上乃除君卫尉丞分司东都诏始下门下给事中吕元膺封还诏书上使谓吕君曰吾岂不知戡也行用之矣明年元和五年正月将汝临汝之汤泉壬子王其县食遂卒年五十七公卿大夫士相吊於朝处士相吊於家君卒之九十六日诏缚从史送阙下数以违命流于日南【元和五年四月镇州行营招讨使吐突承璀缚从史送京师贬驩州司马欧文忠书从史祷聪明山记曰閱从史官属题名见孔戡与乌重裔俱列于後而退之记戡事云戡屡諫不聽卒为重裔所缚呜呼成败祸福之理甚明先事而言则罕见从事至而言则不及也自古败乱未始不由此也】遂诏赠君尚书司勳员外郎盖用尝欲以命君者信其志某年八月甲申从葬河南河阴之广武原【南下或有府字阴下或有县字广武原或作某地云唐河南府无河阴县 今按元和郡国志河南府有河陰县】君於为义若嗜欲勇不顾前後於利与禄则畏避退处如怯夫然始举进士第【士下或有及字】自金吾卫録事为大理评事佐昭义军【下或有帅字】军帅死【贞元二十年六月昭义节度使李长荣卒】从史自其军诸将代为帅【武无自其字】请君曰从史起此军行伍中凡枉幕府唯公无分寸私【分或作方非是】公苟留唯公之所欲为君不得已【君或作居】留一岁再奏自监察御史至殿中侍御史从史初听用其言得不败後不听信恶益闻君弃去遂败祖某某官赠某某官父某某官赠某某官【诸本作祖

如圭皇海州司户赠工部员外郎父岑父皇著作郎赠驾部员外郎方从蜀本云今本所纪父祖官职多误盖後人续增公诸志皆载三世此只言父祖已非考世系表及孔戣志此以如珪作如圭郎中作员外郎著作佐郎为郎又非也驾部乃戣赠官此以为其父所赠又非也今按此姑从方本无大利害但方诋诸本止载二世为不入例而其所据之本此志亦止载二世云驾部乃戣所赠官而戣实赠司勳皆非是世系戣志与此志文亦未知其孰为得失恐皆未足以判其是非也】君始娶弘农杨氏女卒又娶其舅宋州刺史京兆韦妃女皆有妇道凡生一男四女皆幼前夫人从葬舅姑兆次卜人曰今兹岁未可以耐从卜人言不耐君母兄戣尚书兵部员外郎母弟戣殿中侍御史以文行称朝廷将葬以韦夫人之弟前进士楚材之状授愈曰请为铭铭曰允义孔君兹惟其藏更千万年无敢坏伤【方从杭本无伤字今按此伤字诸本皆有文理音韵皆无可疑方氏特以杭本脱漏遂不之信寧使此铭为歇後语而不肯以诸本补之甚可怪也】

故中散大夫河南尹杜君墓志铭【或无散字君或作尹杜君名兼史有传公与兼皆尝佐张建封於徐州至是兼死河南尹而公为都官员外郎为铭】

杜氏自戴侯畿始分戴侯之子恕为幽州刺史今居京兆诸杜其後也【畿字伯侯京兆杜陵人魏河东太守丰乐戴侯有三子恕理寬恕字务伯弘农太守幽州刺史】其季寬孝廉郎中寬後三世曼为河东太守葬其父洹水之阳【或无之阳字寬字务叔举孝廉为郎中曾孙曼仕石赵为从事中郎河东太守洹水出汲郡隆虑县洹胡端切】其後世皆从葬洹水【下或有之阳字】及正伦为太宗宰相【曼玄孙君赐君赐子景字宣明州府交辟不就景子裕字庆延仕齐乐陵令四子正玄正藏正仪正伦高宗显庆元年三月以正伦同中书门下三品三年十一月罢今云太宗误也】犹封襄阳公【显庆二年二月封襄阳郡公】太宗始诏葬京兆襄阳公无子以兄正藏子志静後遂嗣襄阳公【或复出嗣襄阳公子】生侨为怀州长史弃官老沁水上为富家卒葬怀州武陟长史生损为左司郎中卒赠少大理【或作大理少卿】大理生廙【大理或作少卿】为郑州録事参军死思明乱赠吏部郎中公讳兼字某郎中第三子【廙三子曾左金吾兵曹参军冀太学博士少即兼也】举进士第【建中元年兼第进士】司徒北平王燧战河北掌书记累官至监察御史其後佐徐泗州军【贞元四年十一月张建封为徐州泗濠节度使表佐其府】遂至濠州刺史【本传载兼刺濠州日诬劾韦赏陆楚二人以罪杀之而子厚杜兼对乃取其在濠州能摈锤离令之讒今二事志皆不载岂以其善不足以掩恶故略之耶抑志与传异故叙其族出历官卒之年月日与夫生娶而已也】徐泗州军乱以兵甲三千人防淮道不絶【晁本如此诸本甲三千人四字皆在下文金鱼之下而鱼下复有兵字殊无理甲字亦疑衍或当在兵字上姑阙以俟知者】有功加御史中丞赐紫衣金鱼入为刑部郎中以能官拜苏州刺史既辞行上书曰李錡且反必且奏族臣上固爱其才书奏即除吏部郎中【或无中字】遂为给事中出为商州刺史金商防御使改河南少尹行大尹事半岁拜大尹元和四年十一月二十二日无疾暴薨年六十明年二月甲午从葬怀州夫人常山郡君张氏彭州刺史赠礼部侍郎薨之女【薨音既】生子男三人柔立为天长主簿词立为壽州参军谊立为顺宗挽郎女一人【顺上或无为字】将葬公之母兄太学博士冀与公之夫人及子男女谋曰葬宜有铭凡与我弟游而有文者谁乎遂来请铭铭曰杜氏大家世有显人承继绵绵以及公身始为进士乃笃朋友及作大官【及或作作乃作】

克施克守纂辞奋笔涣若不思公牒盈前笑语指麾禄以给求食以会同不蓄不收库廩虚空事在于人【在于一作不在】日远日忘何以传之刻此铭章

唐银青光禄大夫守左散骑常侍致仕上柱国襄阳郡王平阳路公神道碑铭【夫下一无守字仕下诸本无上柱国襄阳郡王七字平阳或作阳平从石本考唐世系表当从平阳碑铭或作碑文今按此篇多从石本按石本其首云朝议郎守国子博士上骑都尉韩愈撰银青光禄大夫守吏部尚书上柱国荥阳县开国侯郑余庆书将仕郎右拾遗内供奉使绯鱼袋陈祐篆额其後云元和七年岁次壬辰十月丙子朔十五日庚寅云此可以补刊本之阙字有异同今附于下】

惟路氏远有代序自隋尚书兵部侍郎讳袞四代而至冀公【代或并作世石本袞或作充阁本世表作袞袞封阆乡公袞子文昇平爱秦三州刺史封宜城县公昇子元愬揄次今元愬子太一太原令】冀公讳嗣恭以小邑萧关令发闻【今下或有闻字】开元受赐更名【赐或作锡嗣恭其初名剑客以世?为邳尉席豫黜陟河朔表为萧关令徙神鸟姑臧二县考绩上上为天下最玄宗以为可嗣汉鲁恭因赐今名字?范】书于太史治行灵州【治或作始永泰元年闰十月嗣恭由户部侍郎为朔方节度使】终功南邦【大历七年正月以嗣恭为江西观察使八年九月循州刺史哥舒光反杀岭南节度使吕崇贵十月以嗣恭兼岭南节度使往往征之十一月克广州斩晃】享有丕祉绍开厥家官至兵部尚书封冀国公【以平岭南功转检校兵部尚书】薨赠尚书右仆射司空【或无司空字】公讳应字从衆冀公之嫡子【嗣恭二子恕应】用大臣子谨饬擢至侍御史着作郎选刺?州【选或作迁贞元初以应为?州刺史】割余零都作县安远以利人属【余或作隸人或作民下同】凿败滩石以牛轆梗陶甃而城罢人屡筑诏嗣冀封又加尚书屯田郎中进服色遂临于温筑堤岳城横阳界中二邑得上田除水害【土田或作上苗】拜尚书兵部郎中兼御史中丞淮南军司马改刺庐州又甃其城人不岁苦【人或作民苦或作苦】入为尚书职方郎中兼御史中丞佐盐铁使使江东有功用半岁历常州迁至宣歙池观察使【永贞元年十二月自常州除观察使】进封襄阳郡王【或作公非是】至则出仓米下其估半以廩餼人蜀辟诛【蜀辟或作刘辟或蜀下别出刘字】行军千五百人於蜀李錡将反以闻置乡兵二千人錡反命将期以卒救湖常州牢江东心錡以无助败缚作响山亭营军于左右权丞相善之鑱其说响山石【响山宣州山名】居宣五年以疾去位校其仓得石者五十万余【或无者字】府得钱千者八十万公之为州逢水旱喜贱出与人【人或作民下同】岁熟以其得收常有赢利【赢或作余】故在所人不病饥而官府蓄积元和六年天子悯公疾不可烦以职即其处拜左散骑常侍以其禄居其岁九月望薨於东都正平里第年六十七【岁上或无其字年上或有享字】明年葬京兆万年少陵原夫人荥阳郑氏祔既其子临汉县男贯与其弟赏贞谋曰宜有刻也【既下或有而字】告於叔父御史大夫鄜坊丹延观察使恕因其族弟进士羣以来请铭遂以其事铭曰

冀公之封维艰就功襄阳继大启庆自躬於?泊温厥绪既作以及职方遂都邦伯朝夕人事【人或作民】下完上实师於其乡邻寇逼屈营军响山墻屋修施【修诸本皆然方弃不録而直作循字】褒公刻表【功或作嘉】丞相之辞受代而家叙疏及迺病不能廷食禄卒齿凡

代大家【凡代一作凡世】维难其保既显既愿【或作硕】戒於终咎伊我襄阳克慎以有延畀後承【或作丞】莫不率守有墓於原维树在经【在或作有】以告无期博士是铭【博士或作传世 按公是时正为博士或本非是】

乌氏庙碑铭【乌重胤之父也许孟容尝为作神道碑】

元和五年天子曰卢从史始立议用师於恒【元和五年三月成德节度使王士贞卒其子承宗自为留後上欲革河北世袭之弊从史时为昭仪节度使遭父丧因左军中尉吐突承璀说上请发本军讨承宗由是复起从史委其成功十月诏削夺承宗官爵以承璀为诏讨宣慰使命恒州四面藩镇各进兵共讨】乃阴与寇连夸谩凶骄出不逊言其执以来其四月中贵人承璀【七罪切】即诱而缚之其下皆甲以出操兵趋譚牙门都将乌公重胤当军门叱曰天子有命从有赏【从下或有者字】敢违者斩於是士皆敛兵还营卒致从史京师壬辰诏用乌公为银青光禄大夫河阳军节度使兼御史大夫封张掖郡开国公【重胤自昭仪都制兵马使路州左司马拜银青光禄大夫怀州刺史河阳三城怀州节度使兼御史大夫】居三年河阳称治诏赠其父工部尚书且曰其以庙享【其以或作以其】即以其年营庙於京师崇化理军佐窃议曰先公既位常伯【谓工部尚书】而先夫人无加命号名差卑於配不宜语闻诏赠先夫人刘氏沛国太夫人八年八月庙成三室同宇祀自左领府军而下作主于第【三室同宇史记渭阳五帝庙同宇韦昭曰谓上同下异也宇一作牢非今按後汉以来帝私庙制皆为同堂异室】乙巳升於庙乌氏着於春秋谱於世本【世本十五卷録黄帝以来帝王诸侯伯卿大夫系氏名号】列於姓苑在莒者存【左氏昭二十三年莒子庚与虐而好剑乌存率国人逐之】在齐有余枝鸣皆为大夫【齐下或有者字余下或有有字左氏襄二十四年齐人城郕之岁其夏齐乌余以廩邱奔晋昭二十一年冬十月齐乌枝鸣戌宋一本云在齐有余枝鸣者为大夫】秦有获为大官【史记秦武王时力士任鄙乌城皆为大官】其後世之江南者家鄱阳处北者家张掖【乌氏後魏乌洛侯之裔国邑在汉东二十余里贞观初贡献内属代为功臣因官徙地今为张掖人】或入夷狄为君长唐初察为左武卫大将军实张掖人其子曰令望为左领军卫大将军孙曰蒙为中郎将是生赠尚书讳承玘字某【赠下或有工部字玘或作洽新史承玘有传字德润重胤传亦云承玘子也温公考异尝加辨正宋樊本皆作承玘盖许孟容尝为承玘碑石本犹传於世新传皆本此也】乌氏自莒齐秦大夫以来皆以材力显及武德已来始以武功为名将家开元中尚书管平卢先锋军属破奚契丹【属或作屡 今按属亦连属之意北狄有五一契丹二奚三室韦四黑水五渤海】从战捺祿走可突干【诸本多作突干或作汗子今从许碑定从干云可突干契丹之勇将也新传奚契丹入寇承玘破於捺祿山又战白城承玘按队出其右斩首万计可突干奔北捺奴葛切】渤海扰海上【或无扰海字】至马都山吏民逃徙失业【樊汝霖云或谓破走可汗千渤海上追之至马都山吏民逃徙失业盖因可突干入寇而然止是一事今按许孟容作乌承洽神道碑示渤海王武艺出海滨至马都山屠城邑公以本营士马防遏要害则是捺祿走可突干而马都山拒武艺二字不同或者之论过矣新史据孟容神道碑及公庙碑而作司马温公考异以新史为误恐考异未见孟容碑刻耳】尚书领所部兵塞其道壅原累石【累或作垒】绵四百里深高皆三丈寇不得进民还其居岁罢运钱三千万余黑水室韦以骑五千来属麾下【黑水室韦二国名黑水即靺鞨】边威益张其後与耿仁智谋说史思明降【至德二载安庆

绪兵败走保邳郡史思明判官耿仁智说思明归唐思明然之以所部十三郡及兵八万降十二月以思明为归义王范阳节度使】思明复叛尚书与兄承恩谋杀之事发族夷尚书独走免【许碑承恩承玘之从父兄也】李光弼以闻诏拜冠军将军守右威卫将军检校殿中监封昌化郡王石岭军使【石岭或作佐领杭蜀粹与许碑新传皆作石岭】积粟厉兵出入挑战以疾去职贞元十一年二月丁巳薨於华陰高平里年若干【许碑年九十六】即葬於其地二子大夫为长【大夫重裔】季曰重元为某官铭曰

乌氏在唐有家於初左武左领【或作右领】二祖绍居中郎少卑属於尚书不偿其劳乃相大夫授我戎节制有壇壝【制有或作有其壇或作疆】数备礼登【方无数字登下有坛字今按数备礼登数字乃名位不同礼亦异数之数言制数既备礼亦增崇也袁氏庙碑所谓数以立庙亦是此意若如方木即上句已言授节不应至此始言登坛况登坛又与立庙不相关乎】以有宗庙作庙天都以致其孝右祖左孙【蜀本文苑作左祖右孙今按庙制以西为上方本为是】爰飨其报云谁无子其有无孙【其有或作孰其】克对无羞【克或作光】乃惟有人念昔平卢为艰为瘁大夫承之危不弃义四方其平土有迨息来覲来斋以馈黍稷

唐故河东节度观察使荥阳郑公神道碑文

河东节度使赠尚书右仆射郑公葬在荥阳索上【今郑州荥阳有索水即高帝与项羽战於京索者也】元和八年六月庚子太史尚书比部郎中护军韩愈刻其墓碑曰司马氏迁江南有郑豁者仕慕容垂国为其太子少保【豁字君明魏将作大匠五世孙仕垂为太常少卿】其孙简当拓拔魏为荥阳太守【豁子温燕太子詹事生三子晔号北祖恬号中祖简号南祖】後简者号其族为南祖南祖之郑入唐有为利之景谷令者曰嘉范【简生季騊騊子晒晒四世孙嘉范】於公为曾祖是生抚俗为泗之徐城令徐城生公之父曰洪卒官凉之户曹参军【凉之或作凉州】公讳儋少依母家陇西李氏举止异凡儿其舅吏部侍郎季卿谓其必能再立郑氏【季或作李谓下或有曰字或谓作曰其必作必其】稍长能自课学【课或作谋今按蜀志出师表自谋字文选亦作自课恐公用此语也】明左氏春秋以进士选为太原参军事【大历四年第】对直言策拜京兆高陵尉考府之进士能第上下以实不奸樊仆射泽以襄阳兵战淮西公以参谋留府能任後事【兴元元年正月以樊泽为山南东道节度使泽奏儋为参军】户曹殁於凉凉地入西戎自京谷徐城三世皆未还荥阳葬公解官举五丧为三墓葬索东徐城墓无表公能幼长哀感【公能下或有使字或无哀字云自少而长求之不置也今按心字当属下句】心求不置以得旧人以告其处其後为大理寺太常博士迁起居郎尚书司封吏部二郎中能官举其名德宗晚节储将於其军以公为河东军司马能以无心处嫌闲卒用有就【闲或作问非是或无卒字有就或作其说非是】贞元十六年将说死即诏授司马节度河东军【考严绶传将说李说也或无即诏字马下或无复出节字】除其官为工部尚书太原尹兼御史大夫北都留守【贞元十六年十月河东节度使李说卒儋自本军行军司马除检校工部尚书充太原尹北都留守河东节度使】公之为司马用寬廉平正得吏士心及昇大帅【昇或作升帅作作师】持是道不变部将有因贵人求要职者公不用老而有功无势而远者削四邻之交贿省姁媼之大燕【姁或作夸】校讲民事施罢不竣日用能以十月成政氓征就寬【氓或作赋或作民】军给以饶十七年疾废朝夕八月庚

成薨享年六十一天子为之不能临朝者三日【或无能字】赠尚书右仆射即以其年十月辛卯葬索上疾比薨医问交道比葬吊赠赐使者相及凡河东军之士与太原之氓吏【军下或无之字或作之军氓或作民】及旁九郡百邑之鰥寡【河东节度府管汾辽沁岚石忻代宪凡九州】外夷狄之统於府者闻公之薨皆哭曰吾其如何公与宾客朋游饮酒必极醉【与或作为】投壶博奕穷日夜若乐而不厌者【若或从阁蜀本作苦】平居帘阁据几终日不知有人别自号白云翁【令狐楚尝为太原从事唐志有表奏十卷自号白云孺子盖以媚儻也】名人魁士鲜不与善好乐後进及门接引皆有恩意【与善属上句好乐属下句蜀本以善为其而连好乐为句又云名人魁士吕氏春秋传】始娶范阳卢士女生仁本仁约仁载皆有文行二季进进士皆早死仁本为後子独存不乐举选年三十余始佐河阳军後娶赵郡李氏生三女二夫人凡三男五女长女嫁辽东李繁繁亦名臣子有才学遗命二夫人各别为墓不合葬系曰

士常患势卑【常或作尝下同】不能推功德及人常患贫【患下或有势字】无以奉所欲得若郑公勤一生以得其位而曾不得须臾有焉虽然观其所既立其可知已呜呼哀哉

魏博节度观察使沂国公先庙碑铭【或有田氏字欧阳公曰自天圣以来学者多读韩文而患集本舛讹惟予家本更按时人共传号为善本及後集録古文得韩文之刻石如罗池黄陵庙碑之类以校予家集本舛谬犹多若田弘正碑尤甚盖由诸本不同往往妄加改易今以碑校印本初未必误多为校讎者妄改易之乃知文学之传久而转失其真者多矣则校讎之际决於取舍不可不谨也今各参注于下石刻後题云朝议大夫安定胡证书并篆额京兆府廨有此碑】

元和八年十一月壬子上命丞相元衡【武元衡】丞相吉甫【李吉甫】丞相绦【李绦】召太史尚书比部郎中韩愈至政事堂传诏曰田弘正始有庙京师朕惟田弘正先祖父厥心靡不向帝室讫不得施乃以教付厥子维弘子衎训事嗣朝夕不怠【事嗣或作嗣事下或有于字此篇今亦从方氏据石本】以能迎天之休显有不功维父子继忠孝【弘正父廷玠大历中为沧州刺史恒州李宝臣幽州朱滔联兵攻击欲兼其土宇廷玠固守卒能保全朝廷嘉之迁洛州改湘州建中初田悦领魏博节度使志图凶逆召廷玠为副盖悦父承嗣与廷玠为从昆弟也及悦奸谋败露廷玠曰尔藉伯父遗业可守朝廷法度坐享富贵何苦与恒郛同为叛臣若狂志不悛可先杀我乃谢病不出三年愤鬱而卒】予维宠嘉之是以命汝愈铭钦哉惟时臣愈承命悸恐明日诣东上合门拜疏辞谢不报退伏念昔者鲁僖公能遵其祖伯禽之烈周天子实命其史臣克作为駉駉泮閼之诗【駉音佻】使声於其庙以假鲁灵【假音格】今天子嘉田侯服父训不违用康靖我国家【服上或有能字靖或作静】盖宠铭之所以休宁田氏之祖考而臣适执笔隶太史【或无隶字】奉明命其可以辞谨案魏博节度使银青光禄大夫检校工部尚书兼魏州大司马长史御史大夫沂国公田弘正【川或作博或无兼字元和七年十月以弘正为银青光禄大夫检校工部尚书魏州大督府长史兼御史大夫上柱国沂国公充魏博等州节度使观察处置支度营田等使】北平卢龙人故为魏博诸将【弘正始名兴季安时为衙内兵马使】忠孝畏慎田季安卒【季安高祖璟平州人官都水使者璟二子守义延恽延恽安东都护府司马守义二子承嗣延琳承嗣子绪绪子季安季安

子怀諫廷琳子悦廷恠子廷玠元和十年八月季安卒】其子幼弱用故事代父人吏不附迎弘正於其家使领军事【季安卒怀諫自知军务时年十一以弘正为都知兵马使怀諫幼弱军政皆决於家僮蒋士则数以爱憎移易诸将诸将愤怒咸曰兵马使吾帅也即诣其家迎之弘正拒之不可】弘正籍其军之衆与六州之人还之朝廷悉除河北故事比诸州故得用为帅已而复赠其父故沧州刺史兵部尚书母夫人郑氏梁国太夫人得立庙祭三代曾祖都水使者府君祭祖室祖安东司马赠襄州刺史府君祭二室兵部府君祭东室其铭曰

唐继古帝海外受制【此据石本外或作内受或作臣】狎於太宁【狎或作洽】燕盜以惊羣党相维河北失平号登元和大圣载营风挥日舒咸顺指令櫜櫜魏土婴儿戏兵【婴儿谓怀諫】吏戎愁毒莫保腰颈【或作领】人曰田侯其德可倚叫噪奔趋乘门请起田侯摄事奉我天明【天或作王左传范氏中行氏反易天明注言不事君也又云二三子顺天明公语出此】束縛弓戈考校度程提墀籍户【提或作堤】来复邦经帝钦良臣曰维锡予嗟我六州始复故初告庆于宗以降命书【于宗或作宗庙以降或作降以】旌节有韬豹尾神旗囊兜戟纛【囊或作橐蜀本作囊石本同但省文耳今按囊谓弓服橐乃囊之无底者非兵仗也当从石门】以长魏师田侯稽首臣愚不肖迨兹有成祖考之教帝曰俞哉维汝忠孝予思乃父追秩夏卿嬪德娠贤梁国是荣【嬪配也言梁国配兵部之德娠孕也左氏後缙方娠娠贤谓生田弘正也嬪匹诣切娠之刃切又音身】田侯方庙相方视址见於蓍龟祖考咸喜暨暨田侯【暨暨果毅也礼戎容暨暨暨音忌】尔有文武讫其外庸可作承辅【承或作丞】咨汝田侯勿亟勿迟覲飡式时尔祖尔思【飡或作向尔祖尔思或作祖考之思或作尔祖之思】

卷二十七

钦定四库全书

东雅堂昌黎集注卷二十七

碑志

刘统军碑【公尝志统军刘昌裔墓矣今又铭其碑此篇并从方所据石本为正可疑者别见诸本作唐故右龙武统军刘公墓碑】

唐故陈许军节度使金紫光禄大夫检校尚书兼御史大夫右龙武统军彭城郡开国公食邑二千户赠潞州大都督刘公讳昌裔字光後【许下或无军字方从石本】薨既葬【元和八年十一月昌裔卒九年九月葬河南】将反机於京舍於墓次【机或作枢或作几或作主京下有师字】故吏文武士门人送客讫事会哭将退咸顾恋牵连一口言曰自我公薨至葬凡所以较德焯勤者【焯之药切明也一或作悼一作卓】莫不粗完隐卒崇终有都督之诏【昌裔卒有诏赠潞州大都督】日事时功以着不可诬【可下或有以字】有太史之状太常之状【太常上或有有字】有谥【昌裔谥威公】有诔有幽堂之铭又如即外碑刻文以显诗之其於传无已岂不益可保于是相许诺以告其孤纵【昌裔四子纵其长也】纵哭【或无哭字】舍杖拜曰纵不敢违则相与刻铭文曰

刘处彭城本自楚元【汉高帝季弟楚元王交之後】阳曲之别繇公祖迁【昌裔曾祖承庆为朔州刺史祖巨敖为太原晋阳令乐其土俗占籍太原之阳曲曰自我为此邑人可也何必彭城】公曾祖考为朔州守祖令太原仍世北边乐其高寒弃楚不还逮於公身三世晋人【赵德夫云石本三世作一世上文祖今太原作考令太原善其篇首既言阳曲之别由公祖迁则为晋人非再世矣碑当时所立不应差其世次莫可晓也今按刘志在後卷所述世次尤详与再世之云皆不合亦石本不足信之一验也】公生而异魁顔钜鼻幼如舒退少长好事西戎乘势盗有河外公虽家居为国喑噫【上於金切下乌界切】来告边帅【或作师】可破之计杨琳为横巴蜀靡靡【考代宗起大历三年泸州刺史杨子琳反昌裔说子琳事通监亦可考新书作杨惠琳误矣】公由游寄单船谕诏【尔雅士特舟所注单船】折其尾毒【其尾毒或作旗纛尾】不得动摇琳後来降公不有功终琳之已还卧民里【昌裔说边将不售去入三蜀杨琳之乱蜀人苦之昌裔单船往说琳大历四年二月琳遣使诣阙谢罪以琳为峡州团练使以昌裔为从事後琳死客河朔间】盖古有云人职其忧无事於职而与国谋德宗之始为曲环起奋笔为檄强寇气死【建中初曲环为邠陇两军都知兵马使其收濮州也辟昌裔为判官为环檄李纳割晓大义环上其藁德宗异之】决败算成效於屈指环有许师【贞元二年七月环自汾陇行营节度使陈许节度使昌裔从府还】公遂佐之苏民轹敌【轹或作战或作朝】多出公画累拜郎中进兼中丞虽在陪贰天子所凭蔡卒幸丧围我许郛新

师不牢匡勦将逋【匡勦急走貌又遽也 匡曲羊切勦如羊切】公为陈方【或作力】应变为械与之上下寇无所赖【方云或云此当脱一句非也今按此篇文体整齐无奇句为韵者或说是也不然则衍与之上下一句未果孰是也石本之不足信此又显然亦屡辨之矣】遂至遁败【贞元十五年八月环卒淮西吴少诚遣兵掠临颍陈州刺史上官说知陈许留後遣大将王今忠将兵杀之皆为少诚所虏丙午以说为陈许节度使少诚遂围许州说欲弃城走昌裔时为营田副使止之城中兵足以辦贼但閤城勿战贼气自衰吾以全制其敝蔑不克矣昌裔募勇士千人凿城出击大破之城由是全】以功迁陈实许之半【许州围解昌裔以功拜陈州刺史】声驾元侯以势自憚【贞元十六年七月少诚进击蔡州行营招讨使韩全义败于澠水与诸道兵皆走保陈州求舍昌裔登城谓曰天子命公讨蔡州何为来陈且贼不敢至我城下君其舍外无恐明日从十余骑持牛酒抵全义营劳军全义不自意迎拜叹服】复入居许为军司马【贞元十八年以昌裔为陈许行军司马】脱权下威土心益归卒嗣环职【贞元十九年六月说卒以昌裔检校工部尚书兼许州刺史充陈许节度使】弃恶从德乃与蔡通涂其榛棘稚耄嬉遨【或作游】连手歌讴上无可怨外无与讎既长事官峻之大夫【峻诸本作浚今按此一字亦可疑未详其说】其偿未塞仆射以都【封彭城郡公再加检校尚书右仆射偿或作赏以或作已 今按上句有未字此当作已然二字通用者亦多姑从旧】及癸巳岁秋涌水出流过其部破民庐室【元和八年五月许州大水坏庐居舍漂溺居人六月徵昌裔还京师】公即疏言此皆臣????防断不补渍民於泉【渍或作僨】臣耄且疾宜即大罚上曰 害【或作菑 今按 害灭除字本秦刻】大臣其来允余之思其可止哉驿隶走呼有中使来公迎於驿遂行不回六月降热上下歊赭【歊或作?赭大赤也字见楚词大招 赭许极切】公鞭公驱去马以輿公病日恶不能造阙仆卧在宅【始宪宗恶昌裔自立欲召之宰相李吉甫曰陛下乘人愁苦可召也六月以东都留守韩皋代之诏昌裔还京师至长乐驿知帝意因请归私第许之称风眩】闵有加锡命为统军龙武之右兼官左相百僚长首【昌裔至天子以为恭即其家拜检校尚书左仆射兼右龙武统军知军事】冬十一月日将南至公遂薨殂年六十二奏闻怛悼俾官临吊悲不听朝赠督潞州存歿之赉於数为优明年九月东葬金谷公往有命匪後人卜

衢州徐偃王庙碑【徐偃王事见史记後汉书博物志元和姓纂然後汉书云楚文王灭之楚词亦云荆文寤而徐亡按周穆王时无楚文王春秋时无徐偃王辨见於楚词补注中石刻云朝廷郎守尚书考功郎中知制诰昌黎韩愈撰福州刺史元锡书元和十年十二月九日立】

徐与秦俱出柏翳为嬴姓【史记秦本纪大业之子曰大费是为柏翳舜赐姓嬴氏伯翳二子大廉之後为秦若木之後为徐是为俱出柏翳也 嬴余轻切】国於夏殷周世咸有大功【秦本纪又曰大廉玄孙孟戏中衍殷帝大戊以为御而妻之自太戊以下中衍之世遂世有功以佐殷国故嬴姓多显遂为诸侯若本玄孙费昌当夏桀之时去夏归商为殷御以败桀于鸣条是有大功也殷或作商今从石本此篇内同疑者别见】秦处西偏专用武胜【中衍曾孙曰戎胥轩】

【轩生仲遯遯生飞廉廉生恶来来生女防防生旁皋皋生大几几生大骆骆生非子周孝王以为附庸邑之于秦是为处西偏也】遭世衰无明天子遂虎吞诸国为雄【国或作侯】诸

国既皆入秦为臣属秦无所取利上下相贼害卒僨其国而沈其宗【僨犹亡也尔雅云僨僵也庄子一僨一起沈其宗谓其族也 僨方运切又甫运切】徐处得地中文德为治【文或作又今以上文秦用武胜者推之此宜作文】及偃王诞当国益除去刑争末事凡所以君国子民待四方一出於仁义当此之事周天子穆王无道意不在天下【穆王名满左昭十二年云穆王欲肆其心周行天下将皆必有车辙马迹焉】好道士说得八龙骑之西游【列子曰周穆王驾白骏之乘西征崑仑八骏骅骝绿耳赤冀白羲渠黄踰轮盗骊山子】同王母宴於瑶池之上歌讴忘归【穆天子传云穆王见西王母觴于瑶池之上母为天子謡曰白云在天山陵自出道理悠远山川间之将子无死尚能一来天子答曰予归东土和理诸夏万民均平吾顾见汝比及三年将复而野石本无宴字 今按无宴字不成文以它本补】四方诸侯之争辩者无所质正咸宾祭於徐【祭方从杭作寮云今庙中有传刻庆历中石本亦作寮 今按宾寮无理明甚况庆历石本非当时物尤不足据而左传有宾祭字当从诸本作祭为是】赆玉帛死生之物於徐之庭者三十六国得朱弓赤矢之瑞【博物志云偃王欲舟行上国乃通沟陈蔡之间得朱弓赤矢以为得天瑞遂因名为弓自称偃王江淮诸侯服从者三十六国朱弓一作象犀】穆王闻之恐遂称受命命造父御【造父穆王御飞廉玄孙也 造七到切父音甫】长驱而归【史记秦本纪造父以善御幸於周穆王得骥温骊骅骝绿耳之驷西巡狩乐而忘归徐偃王作乱造父为穆王御长驱归周救乱】与楚连谋伐徐【以史记世系表考之穆王所与连谋伐徐者殆楚熊胜也】徐不忍鬪其民北走彭城武原山下百姓随而从之万有余家偃王死民号其山为徐山凿石为室以祠偃王偃王死虽走失国【失下或有其字】民戴其嗣为君如初驹王【礼记邾娄考公之丧徐君使容居来吊舍曰先君驹王西讨驹王徐之先也】章禹【左氏昭三十二年吴灭徐徐子章禹断其发以奔楚章禹宗十一世孙】祖孙相望自秦至今【秦或作奉】名公巨人寄迹史书【史或作文】徐氏十望其九皆本於偃王而秦後迄兹无闻家天於柏翳之绪非偏有厚薄於仁与暴之报自然异也衢州故会稽太末也【太末春秋时姑蔑也至汉改焉唐号曰龙邱越絶书姑末今太末後汉吴有龙邱苕者隐居太末 太音闕】民多姓徐氏支县龙邱有偃王遗庙武曰偃王之逃战不之彭城之越城之隅弃玉几研於会稽之水【选绿苔鬚髯乎研上南越志生研石上注研与砚同】或曰徐子章禹既执於吴徐之公族子弟散之徐扬二州间【公或作宗】即其居立先王庙云开元徐姓二人【徐坚字元固徐峤字巨山】相属为刺史帅其部之同姓改作庙室载事于碑後九十年当元和九年而徐氏放复为刺史放字达夫前碑所谓今户部侍郎其大父也春行视农至于龙邱有事于庙思惟本原曰故制犒朴下窄【犒仓梧切或作桷】不足以揭?妥灵【揭音羯又邱杰切】而又梁桷赤白陟剥不治【选期不陟陟陟坏落也陟池耳切又徒可切】图像之威?昧就灭【?音饒玉篇云深黑也】藩拔级夷庭木委 【或作缺 今按缺正字 俗体然唐人多用之姑从其旧】祈甿日慢祥庆弗下【日方云洪以石本定作由 今按由义未详姑从诸本作日】州之羣支【羣支或作支郡或作羣吏皆非是】不获荫庥余惟遗绍而尸其上不即不图以有资聚罚其可辞乃命因故为新衆工齐事惟月若日工告讫功大祠於庙宗乡咸序应【乡或作御】是岁州无怪风剧雨民不夭厉谷果完实民皆曰耿耿祉哉【耿耿祉哉或作祉哉祉哉方从阁本无祉字而不言石本之有无又云耿当读从炯今从诸本】其不可诬乃相与请辞京师归而鑱之於石辞曰

徐杰以颠徐由逊縣【逊或作邈】秦鬼久饥徐有庙存婉婉偃王【婉音苑】惟道之耽以

国易仁为笑于顽自从擅命其实几姓历短冒长【冒或作言】有不偿亡课其利害孰与王当【与方从洪氏石本作尝今从诸本】姑蔑之墟太末之里【今徐州有姑蔑城左传哀公十三年越伐吴王孙弥庸自泓上观之见姑蔑之旗曰吾父之旗也杜预注姑蔑越地】谁思王恩立庙以祠王之闻孙世世多有唯临兹邦庙土实守坚峤之後达夫廓之王歿万年如始祔时王孙多孝世奉王庙达夫之来先慎诏教尽惠庙民不主於神维是达夫知孝之元太末之里姑蔑之城庙事时修仁孝振声宜宠其人以及後生嗟嗟维王虽古谁亢【古或作死亢协韵苦郎切】王死於仁彼以暴丧【暴方作常而不言石本今从诸本】文追作谏刻示范茫【示或作石方云石本如此而不敢从今亦不敢从也】

袁氏先庙碑【袁滋履历并详本传碑特其耳唐书新传以滋为袁范之後则又误矣】

袁公滋既成庙明岁二月自荆南以旗节朝京师【岁或作年方云考之史袁滋以元和十一年朝京师旗或作旌】留六日得壬子春分率宗亲子属用少牢于三室既事退言曰呜呼远哉维世传德袭训集余乃今有济今祭既不荐金石音声使工歌诗载烈象容其奚以饬稚昧於长久唯敬系羊豕幸有石【即所谓丽牲之碑祭义云祭之日君牵牲入庙门丽于碑丽系也】如具着先人名迹【着或作者】因为诗系之语下於义其可虽然余不敢必属笃古而达於词者遂以命愈愈谢非其人不获命则谨条袁氏所以出与其世系里居起周历汉魏晋拓拔魏周隋入国家以来【或作已来拓音托拔蒲拨切注见廿卷集贤院校理墓志铭】高曾祖考所以劬躬煮後委祉於公公之所以奉将承应者有槩有详而缀以诗其语曰周树舜後臣【语或作诗树或作封後下或有为字】陈公子有为大夫食国之地袁乡者其子孙世守不失因自别为袁氏春秋世陈常压於楚与中国相加尤疏袁氏犹班班见可谱【或作可见于谱】常居阳夏【陈阳夏汉世淮阳国前汉发兵拒之阳夏注今亳州也夏音贾】夏至晋属陈郡【或无郡字】故号陈郡袁氏博士固【辕固】申儒遏黄【汉儒辕固齐人窦太后好老子书召问固固曰此家人言耳太后怒曰安得司空城旦书乎袁固以治诗孝景时为博士与黄生争论景帝前黄生曰汤武非受命乃弑固曰不然夫桀纣虐乱天下之心皆归汤武汤武不得已而立非受命为何】唱业於前至司徒安怀德於身【袁安後汉时仕终司徒】袁氏遂大显连世有人终汉连魏晋【终或作纷非是】分仕南北始居华阴为拓拔魏鸿胪鸿胪诹恭生周梁州刺史新县孝侯诹颢【新下或有安字字颖或作频】孝侯生隋左卫大将军诹温去官居华阴武德九年以大老至薨始葬华州【塋或作毫】左卫生南州诹士政南州生当阳令诹伦於公为曾祖当阳生朝散大夫石州司马诹知玄司马生赠工部尚书咸宁诹晔是为皇考袁氏旧族而当阳以通经为儒位止县令石州用春秋持身治事为州司马以终咸宁备学而贯以一文武随用谋行功从出入有立不爵於朝比三世宜达而窒归成後人数当於公公惟曾大父大父皇考比三世存不大夫食【或无再出大父字有公字大父或作大夫比或作妣皆非是】歿祭在子孙唯将相能致备物世弥远礼则益不及在慎德行业治图功载名以待上可无细大无敢不敬畏无早夜无敢不思成于家进於外以立于朝自侍御史历工部员外郎祠部郎中谏议大夫尚书右丞华州刺史【贞元十六年二月自尚书右丞出刺华州】金吾大将军【贞元二十一年三月召拜】由卑而鉅莫不官称遂为宰相以赞辨章【便章也史记便章百姓即平章耳】仍持节将蜀滑襄荆【永贞元年十月以滋为西川节度使元和元年十月徙义成军节度八年正月自户部尚书出为山南东道节度九

年九月徙荆南节度蜀谓西川滑为义成襄谓山南东道荆谓荆南】畧苞河山秩登禄富有庙祀具如其志又垂显刻【或作烈】以教无忘可谓大孝诗曰【诗下或有文字】

袁自陈分初尚蹇连【或作连连】越秦造汉博士发论司徒任德忍不锢人【忍一作思汉明帝时安为河南尹未尝以赃罪鞫人尝曰凡学仕者高则望宰相下则希牧守锢人于圣世所不忍为方云博士辕固司徒袁安也按左传陈有辕涛涂又有袁侨汉有辕固辕丰又有袁安盖两姓也杜预谓袁侨涛涂四世孙不知何以至汉复出两姓今按欧公集古録汉三老袁良碑亦云涛涂立姓为袁盖辕袁相通古字袁盎又通作爰亦非别为一姓也】收功厥後五公重尊【安章帝时为司徒二子京敞京子汤字仲河桓帝时太尉汤子逢字周阳灵帝时司空逢弟隗字次阳献帝时太传京弟敞字叔平安帝时司空凡四世五公焉】晋氏於南来处华下鸿胪孝侯用适操舍南州勤治取最不懈当阳耽经唯义之畏石州烈烈学专春秋懿哉咸宁不名一休趋难避成与时泛浮是生孝子天子之宰出把将符羣州承楷【把或作祀或作持羣或作都】数以立庙【数或作教说见乌氏庙碑】禄以备器由曾及考同堂异置柏板松楹其筵肆肆【筵或作业】维袁之庙孝孙之为顺势即宜以諏以龟以平其巖屋墙持持孝孙来享来拜庙庭陟堂入室亲登筵鋤【或作鉏】肩髀肱髀【髀臂节也礼记其礼太牢则以牛左肩臂髀折九个仪礼臂髀肱髀肱也仪礼两肱?肺设局髀髀禽兽骨也四者皆所荐之羞 髀奴报切又女朱切肱音柏髀音格】其樽玄清降登受胙於庆尔成【尔或作示非是】维曾维祖维考之施于汝孝嗣以报以祇凡我有今非本曷思刻诗牲系【或作系牲】维以告之

清河郡公房公墓碣铭【房后之死及葬志皆不载年月日启以贞元末为容管帅在容九年迁桂管坐中使事贬?州死元和十年也】

公讳启字某河南人其大王父融王父琯仍父子为宰相融相天后事远不大传琯相玄宗肃宗处艰难中与道进退薨赠太尉流声於兹父乘【琯三子宗偃御史中丞次乘幼孺复容州刺史】仕至秘书少监赠太子詹事公胚胎前光生长食息不离典训之内目濡耳染【濡或作濡或作揣方云濡亦染也今按濡而遇切字见仪礼然作濡亦通】不学以能始为凤翔府参军尚少人吏迎观望见咸曰真房太尉家子孙也不敢弄以事【或无观字】转同州澄城丞益自飭理同官惮伏【理或作治】卫宴使岭南黜陟【建中元年二月遣黜陟使洪经纶柳冕卫宴等一十人分行天下晏使岭南】求佐得公擢摘良奸南土大喜还进昭应主簿【进或作迁】裴胄领湖南表公为佐【贞元三年闰五月以国子司业裴胄为湖南观察使胄字胤叔河东闻喜人】拜监察御史部无遗事胄迁江西又以节镇江陵公一随迁佐胄【又或作为非是佐胄或作为佐】累功进至刑部员外郎赐五品服副胄使事为上介上闻其名徵拜虞部员外在省籍籍迁万年令果辨傲絶【辨或作辨 傲音激疾也】贞元末王叔文用事材公之为举以为容州经畧使【贞元二十一年五月以启为容州刺史兼御史中丞容管经畧事】拜御史中丞服佩视三品管有岭外十三州之地【州下或无之字容管所隶容辨白牢钦岩禺汤灋古等州】林蛮洞蜒【当作蠻南方夷也 蜒音诞】守条死要【伊肖切约誓也】不相渔劫税节赋时公私有余削衣贬食不立资遣以班亲旧朋友为义【朋或作为非是】在容九年迁领桂州【元和八年四月以启为桂管观察使】封清河郡公食邑三千

户中人使授命书应待失礼客主违言徵貳太仆【启徐桂州州邸赂吏部主者私得官告飞驿以授启既而宪宗自遣中使持诏赐启启畏使者邀重赂即曰先五日已得诏使者给请视因持之归以闻至七月贬启太仆少卿】未至贬?州长史而坐使者【启自陈献使者南口十五帝怒杀中使启未至京师贬?州长史始诏五管福建黔中道不得以口馈遗罢腊口等使九月丙午中官季建章坐受启赂杖一百处死癸未贬启?州长史启先赂建章口十五人既怨其发官告事乃具上言帝既杀建章并黜启】以卒卒官年五十九其子越能辑父事无失谨谨致孝既葬碣墓请铭铭曰

房氏二相厥家以闻条叶被泽况公其孙公初为吏亦以门庇佐使於南【谓佐卫宴】乃始已致既办万年命屏容服功绪卓殊氓獠循业【獠张绞切】维不顺随【不顺中使】失署亡资非公之怨铭以着之【非公或作非君】

唐故银青光禄大夫检校左散骑常侍兼右金吾卫大将军赠工部尚书太原郡公神道碑文【或无尚书以上二十八字】

公讳用字师柔太原人庄宪皇太后之弟【顺宗后弟】今天子之舅【宪宗舅】太师之子太尉之孙司徒之曾孙【王用父曰子顔生顺宗后后生宪宗宪宗元和元年赠太师用祖曰难得元和元年赠太尉用曾祖曰思敬元和元年赠司徒】元和元年上朝太后南宮大褒外氏自外高王父而下至外王父咸册登公师事载之史【高王上或有祖字】皇太后昆弟唯公一人【子顔二子重荣官至王傅次即用也】於是特拜银青光禄大夫太子少詹事【特或作时】未三月因迁大詹事赐勲上柱国爵封郡国於太原益掌廐苑之事公起外戚子弟秩卑年少岁余起居上班官尊职大朝夕两宫而能敬让以敏持以礼法不挟不矜宾接士大夫高下中度【士下或无大字】兴官耆事滋久愈谨【兴或作与耆或作嗜方云耆音指致也诗耆定尔功国语耆其股肱以从司马今按耆或疑即嗜字更详之】由是朝廷推贤所处号治转少府监太子宾客别职仍初【仍或作如初方从馆杭本作耐今按仍即如也耐字无理明甚可以见阁杭本之谬矣】迁左散骑常侍兼右金吾大将军皆以选进不专为恩【专有或有於字】十一年秋将以八月葬庄宪太后【元和十一年三月太后崩八月葬丰陵】前一月壬申以疾告薨春秋四十有七上罢朝二日为位以哭赠工部尚书十一月壬申葬於万年县落女原【落女或作落安】夫人河南胡氏号太原郡夫人有子六人女子一人葬得日公之姊婿京兆尹李儵【或作修考旧史当作儵】谓太子右庶子韩愈曰子以文常铭贤公卿【常或作章】今不可以辞应曰诺而为铭曰

有蟠氏国实出炎轩【按史记轩辕皇帝娶西陵之女曰螺祖为黄帝正妃生二子曰元嚣曰昌意元嚣生蟠极晋语云少典娶千有蟠氏生黄帝炎帝蜀山氏之诸侯也蟠音乔又音矫】蜀涂莘摯【史记黄帝之子昌意娶蜀山氏之女生高阳有圣德立为帝是为颡帝禹者皇帝之玄孙颡帝之孙也娶涂山氏之女生启书曰娶於涂山季历娶太任盖摯国任氏之中女诗曰摯仲氏任子昌立是为西伯西伯曰文王娶莘国氏之长女曰太姒诗曰命此文王于周于京纘女维莘列女传汤妃有莘氏之女生仲任外丙又云太任文王之母摯仲氏之中女王季娶以为妃摯因至莘一作华非是】正妃之门孰丰其川不羨其源王氏周胄【王氏周灵王

太子晋之後】官封继继【上继字或作相非是】实生圣女以母唐帝公惟后季天子吾甥
【吾或作其非是】卑躬慎德不与宠横方年未老后哀犹新如何不惠而殒其身刻文兹石
久载攸存【攸方作犹 今按文理当作攸又上句已有犹新字不应重出也】

东雅堂昌黎集注卷二十七

卷二十八

<集部,别集类,汉至五代,东雅堂昌黎集注>

钦定四库全书

东雅堂昌黎集注卷二十八

碑志

曹成王碑【曹成王碑造语法子云也退之性不喜书然尝云凡为文辞宜畧识字如此碑中用剗鞬鑢掀撇掇筴跣等字是也】

王姓李氏讳臯字子兰谥曰成其先王明以太宗子国曹絶复封传五王至成王【永隆元年十月明坐与太子贤通谋降封零陵王从黔州都督谢佑逼杀之二子俊□王南州别驾桀为黎国公垂拱四年并遇害神龙初以杰子胤为嗣曹王後备自南还诏停胤封而封备备卒开元十二年复封胤胤卒子戢嗣位左卫率府中郎将子臯嗣是为成王】成王嗣封在玄宗世盖於时年十七八绍爵三年而河南北兵作天下震扰王奉母太妃逃祸民伍得闲走蜀从天子【或无得字或无蜀从二字】天子念之自都水使者拜左领军卫将军【卫下或有大字】转贰国子秘书【自都水监使者三迁至秘书少监】王生十年而失先王【开元二十一年父戢卒】哭泣哀悲吊客不忍闻丧除痛刮磨豪习【痛下或有自字】委已於学稍长重知人情急世之要耻一不通侍太妃从天子于蜀既孝既忠持官持身内外斩斩【持身或作将身斩斩或作渐渐非是】由是朝廷滋欲试之於民上元元年除温州长史行刺史事江东新剗於兵【谓为兵所剗割也剗空胡切】郡旱饥民交走死无吊【交或作皆今按唐人语多用交字如陆宣公奏议云交駭物听交下不存济者之类意犹曰即今云尔】王及州不解衣下令拊鎖扩门【拊音剖扩苦莫切扩一作横】悉弃仓实与民活数十万人【活下或有者字或无十字】奏报升秩少府【或无报字府下或有监字时大饥有官粟数十万斛臯欲行賑救掾吏叩头乞候上旨臯曰人日不再食且死安暇禀命若我一身活数千人命利莫大焉於是开仓尽散之以擅贷之罪飞章自劾天子嘉之答以优诏就加少府监】与平袁贼【宝应元年八月台州人袁晁反诏河南道副元帅李光弼讨之四月晁卒与及也易系辞其孰能与於此与音预】仍徙秘书兼州别驾部告无事【兼方作处云考旧传合今按成王本以温州长史行刺史事今两奏功而得处州别驾又不行州事则於地望事权皆为左降矣以事理推之不应如此疑方本误而诸本作兼者为是盖以旧官仍兼本州别驾以宠之尔下文又云部告无事则谓温州前此旱饥而今始无事也又云迁真于衡则是自行刺史事而为真刺史也其间不应复有处州一节明矣旧史亦承集误不足为据】迁真于衡【真或作镇】法成令修治出张施【或作弛】声生势长【上声】观察使噎媚不能出气【时辛京杲为湖南观察使噎乌结切媚音墨冒寐三音】诬以过犯御史助之【助或作劾】贬潮州刺史杨

炎起道州相德宗还王于衡【或无于字大历十二年四月贬吏部侍郎杨炎为道州司马十四年五月德宗即位八月召炎为相炎还臯于衡】以直前谩【或无前字】王之遭诬在理念太妃老将惊而戚【理或作治】出则囚服就辩入则拥笏垂鱼坦坦施施【诗邱中有麻将其来施施注舒行也】即贬于潮以迁入贺及是然後跪谢告实初观察使虐使将国良往戍界【方云阁杭蜀本察使下有残字而无国字将国良王国良也马大年所得柴氏善本无残字良下有往字以虐字属下句云良不愿往而辛强使之也然按旧史云前使贪残新史亦云前帅贪虐国良以富获谴则马说为非是国良只称良犹南霁云只称云李光颜只称颜也下文亦可并考今按文势则马说为是虐使亦古语新史所载疑亦以碑语料其如此耳今从马说但国良初见当全书二名其後乃可单出如霁云光颜亦先全书後乃单出也】良以武冈叛戍衆万人【戍或作成】歛兵荆黔洪桂伐之二年尤张於是以王帅湖南【建中元年四月以臯为湖南观察使】将五万士以讨良为事王至则屏兵投良以书中其忌讳良羞畏乞降狐鼠进退【羞或作为狐史作首鼠或作疑】王即假为使者从一骑蹕五百里【蹕敕教切】抵良壁鞭其门大呼我曹王来受良降良今安在良不得已错愕迎拜【愕或作迂方云集韵愕逆各切相遇惊也或作□隶作還後汉寒朗传二人错□不能对新旧史亦谓愕眙不敢动则此用愕字为正】尽降其军太妃薨王弃部随丧之河南葬及荆被诏责还【责或作遣】会梁崇义反王遂不敢辞以还【建中二年臯丁母艰奉丧至江陵二月山南东道节度使梁崇义反乃授臯起复左卫大将军复还湖南】升秩散骑常侍【或无常侍字】明年李希烈反【或无李下四字】迁御史大夫授节帅江西以讨希烈【建中三年十月淮宁军节度使李希烈反以臯为江西观察使兼御史大夫】命至王出止外舍禁无以家事关我裒兵大选江州羣能着职【江方作洪州或作南方云考新旧史皆作洪今按洪州即江西帅治所若只大选洪州乃是未曾出门一步无足书者选兵江州盖为北向进讨之势故其下文遂攻蕲州道里亦便史承集误不足据当从诸本作江为是不然则以州为南犹胜作洪州也着直畧切】王亲教之抔力勾卒羸越之法【抔新书作团方作抔羸或作羸】

【方云樊泽之马大年皆曰作羸非是羸谓秦也越谓勾践伐吴之兵法也今按抔徒官切团也楚词云团果抔兮古字通用而新书从今字也然秦纪越语世家皆无抔力勾卒之文不知诸家之说何所据唯苏氏古史见之则恐或是反用此碑语也抔或疑是搏字亦未有据但抔力无理其误无疑耳或疑杜牧之有以力抔力之语然杜後出韩公不当用其语也今参考姚令威集注云商子农战篇凡治国者惠民之散不可抔也是以圣人作一以抔之又曰抔民力以待外事然後患可以去而王可致则抔力知其为秦法也左传哀公十七年越子伐吴吴子御之笠泽夹水而阵越子为左右勾卒杜预注云勾卒鉤伍相着别为左右屯则勾卒知其为越法也】曹诛五畀【五或作伍畀或作卑方云曹五字见马融广成颂曹伍相保是也马大年云曹诛五畀败则诛及其曹有获则分畀其伍樊泽之云畀凡数音如字贱也音脾偿也音俾使也音婢形下大也音班水名或云音舛然集韵所无新书臯自将五百人教以秦兵团力法聯其赏罚弛张如一即约此碑语而为文也】舰步二万人【舰御敌船释名上下重板曰舰音檻】以与贼還【吾故切遇也义见二十二卷祭张员外文】囁锋蔡山踣之【囁谓一举尽裔礼记无囁炙踣僵也时希烈兵栅广济之蔡山不可攻臯声言西取蕲州引舟师泝流而上贼闻以羸师保栅悉军行江北与臯直西去蔡山三百余里臯遣步士悉登舟顺流而攻蔡山拔之囁楚快切踣蒲墨切】剋蕲之黄梅【臯既拔蔡山间一日贼救至遂大败乃取蕲

州降将李良又攻黄梅杀贼将韩霜露黄梅蕲州县名
剡乌丸切】大鞬长平【鞬说文云奕也长平地名
鞬如又切一音柔】鍬广济【说文鍬两刃木柄可以刈草广济蕲州县名
鍬普活切】掀蕲春【掀举也蕲春亦蕲州县名
掀音轩】撒蕲水【撒击也选撒波而济水蕲水亦蕲州县名撒普灭切或误作撒】
掇黄冈【黄冈县名属黄州】筴汉阳【广韵筴箬也鍼箭具汉阳县名属沔州 筴古业切又
音夹】行跣汉川【跣蹋也庄子跣黄泉而登大皇?川县名属沔州今汉阳地汉水岐流也
跣音紫汉测驾切汉川一作汶水非是】还大膊蕲水界中【或无中字左成二年杀而膊诸
城上注膊磔也音博又音粕】披安三县拔其州斩伪刺史【拔或作诛或作株马本作诛左
传云又披其邑安三县安州三县也其州安州也兴元元年七月臯遣伊慎王愕将兵围安州
州城阻湓水为固攻之累不下希烈遣甥刘戒虚以步骑八千援之臯命李伯潜分师迎击于
应山俘之遂下安州斩其刺史王嘉祥】标光之北山【光州有光山县无北山恐误
标匹遥切】 随光化【 大食也说文云歠也随光化二县名并属隋州 他合切】搆其
州【搆或作搆广成颂散毛族搆羽羣李贤曰搆古酷切字从手即古搅字】十抽一推【後
山谈丛云唐令民二十成丁以下为推宋次道云推者稚也避高宗讳而改耳吕缙叔云推者
稚也独髻为椎盖传写误耳唐人初不讳嫌名也陈以吕说为是按史记汉书陆贾传有魑结
字注读为椎髻故唐令以椎为未冠之称此云十抽一推者十椎而取其一以为兵即杜诗所
谓无丁而选中男者也然唐志但云十六为中而无椎字会要亦然未详其说】救兵州东北
属乡还开军受降【属或作厉今按厉乡当属亳州去安州尚远当作属】大小之战三十有
二取五州十九县【五州谓蕲黄安沔隋也旧史云凡下州四县十七按地理志蕲四县安六
县黄三县隋四县凡十七县传止书其取蕲安黄隋故云四州十七县公又书沔州汉阳汉川
二县故云五州十九县县下一有之字】民老幼妇女不惊市买不变【民下或有之字】田
之果谷下无一迹加银青光禄大夫工部尚书改户部再换节临荆及襄【贞元元年四月以
臯为荆南节度使三年闰五月以臯为襄州刺史山南东道节度使】真食三百王之在兵天
子西巡于梁【兴元元年二月车驾幸梁州】希烈北取汴郑【建中四年十二月希烈?汴州
】东略宋围陈西取汝薄东都【薄或作亳非是】王坐南方北向落其角距贼死咋不能入
寸尺亡将卒十万尽输其南州【亡或作土非是 咋仄革切声大也】王始政於温终政於襄
恒平物估贱歛贵出民用有经一吏轨民使令家听户视奸宄无所宿【一吏方从杭蜀本作
吏一云一当如壹民而重威之壹吏一轨民用吉日辰良体也使令疑衍一字宿上或无所字
非是 今按方说一字是也但因沈存中说吉日辰良一句遂更不问是非每有讹舛悉以迁就
如此以一吏为吏一则无理之尤耳宄或作冗】府中不闻急步疾呼治民用兵各有条次世
传为法任马彝将慎将锷将潜偕尽其力能【任至潜九字或作任马彝伊慎王锷将方云潜
李伯潜也时马彝掌幕府故不言将今从之偕尽其力能一作偕能尽其功偕上或有王字其
力方作力其非是 今按能字合在尽字上】薨赠右仆射【贞元八年三月卒赠右仆射】元
和初以子道古在朝更赠太子太师道古进士司门郎【贞元五年道古登第宪宗即位以道
古为司门员外郎进士上或有中字下或有第迁字】刺利随唐睦徵为少宗正兼御史中丞
以节督黔中【元和八年十月自宗正卿除御史中丞充黔中观察使】朝京师改命观察鄂
岳蕲沔安黄【元和十一年道古自黔中朝京师以为六州都团练观察使】提其师以伐蔡
且行泣曰先王讨蔡实取沔蕲安黄寄惠未亡【寄或作其】今余亦受命有事于蔡【受或

作授】而四州适在吾封【州或作邑四州谓沔蕲安黄】庶其有集先王薨於今二十五年吾昆弟在【皐三子象古复古道古】而墓碑不刻无文其实有待子无用辞乃序而诗之【诗或作请或无之字皆非是】辞曰

太支十三曹於弟季【弟或作第】或亡或微曹始就事【微或作徵二或字并作既或无下一句曹始封於贞观二十一年时太宗十三子三早卒二贬死泰与愔亦皆迁降也】曹之祖王畏塞絕迁【曹方作明宋景文云岂有人作铭而名其祖者当作曹方云明坐太子贤事降零陵王徙黔州都督谢佑逼杀之今按铭文四字未详其义疑畏如畏厌溺之畏塞如其行塞之塞言见杀於闭塞之中而封絕於迁谪之时也方说近是而别图云明徙黔州都督则不知明但徙黔州而为都督所杀遂误以都督属上句也】零王黎公不闻仅存【按新史明子俊嗣王杰黎国公皆为武后所杀】子父易封三王守名【按史中宗神龙初以杰子胤为嗣曹王後明少子备自南还诏停胤而封备备薨复封胤所谓子父易封也胤薨子戡嗣自备至戡所谓三王守名也】延延百载以有成王成王之作一自其躬文被明章武荐峻功苏枯弱强赧其奸狴【苏枯弱强或作吹枯苏僵广韵云赧啮也音恳】以报于宗以昭于王【或无此一句】王亦有子【或云语下脱一句按公为铭不必尽偶句用韵刘昌裔王仲舒碑可见今按刘碑脱句前已论之不可为法王碑虽可为例然彼文从韵协无可疑者而此篇下文亦不可晓不知其果然否耳】处王之所唯旧之视蹶蹶陞陞

【蹶居卫切诗良士蹶蹶下陞字方作陞云陞陞犹阶而升也今按方说无理作陞陞则韵协故且从之然其义亦不可晓大抵此篇多不可晓今姑阙之】实取实似刻诗其碑为示无止

息国夫人墓志铭【其曰葬河南河阳以其事乞铭於其邻韩愈则李栾实河南人耳栾无传】

贞元十五年灵州节度使御史大夫李公讳栾【贞元九年十二月灵州节度使杜希全卒十年正月以本军行军司马李栾为留後十一年五月以栾为节度使】守边有劳诏曰栾妻何氏可封息国夫人元和二年李公入为户部尚书薨夫人遂专家政公之男五人女二人而何氏出者二男一女夫人教养嫁娶如一虽门内亲戚不觉有纖毫薄厚御僮使【僮下或有仆字非是】治居第生产皆有条序居卑尊间【卑尊或作尊卑】无不顺适命服在躬承祀孔时年若干元和七年甲子日南至以疾卒明年八月庚寅葬河南河阳夫人曾祖某绥州刺史祖某潞州别驾父某晋州録事参军二男勘左威卫仓曹参军【仓或作胄】成左清道率府録事参军戡强以肃成敏以和【或无戡下八字】女子嫁兴元参军郑博古将葬戡与成以其事乞铭於其邻韩愈愈乃为铭曰

男主外事治不为易【主或作女非是】施於其家难甚吏治【难治或作甚难非是】又况公侯族大而贵夫人是专厥声惟懿昔在贞元有锡自天【锡或作息方云盖以国封言之非也】后封备服以畴时勲【时或作以】婉婉夫人有籍宫门克承其後以嫁以婚随葬东土在河之阳遥望公坟而不同藏

试大理评事王君墓志铭【王荆公云退之善为铭如王适张彻铭尤奇也】

君讳适姓王氏好读书怀奇负气不肯随人後举选见功业有道路可指取有名节可以戾契致【取下有字或作而或本无之

戾力结切契诘结切字本作隼通俗文云隼多节目谓之隼隼方言作误诟贾谊传隼诟亡节今按取下有字当属上句言功业可指取而有之名节可以戾契而致之也不然则当作而】困於无资地不能自出乃以干诸公贵人借助声势诸公贵人既志得皆乐熟软媚耳目者不喜闻生语一见辄戒门以絶【门下或无以字】上初即位【谓宪宗】以四科募天下士【元和元年四月试博通坟典达於教化科才识兼茂明於体用科达於吏理可使从政科军谋宏远堪任将帅科】君笑曰此非吾时邪即提所作书缘道歌吟趋直言试既至对语惊人不中第益困久之闻金吾李将军年少喜士可撼【李惟简宪宗时为金吾卫大将军年少上或有惟简字或无年字士或作事】乃踏门告曰【踏或作踏】天下奇男子王适愿见将军白事一见语合意往来门下卢从史既节度昭义军张甚【张去声】奴视法度士欲闻无顾忌大语有以君生平告者即遣客钩致君曰狂子不足以共事立谢客李将军由是待益厚奏为其卫曹参军充引驾仗判官尽用其言将军迁帅凤翔【元和六年五月以惟简为凤翔陇州节度使】君随往改试大理评事摄监察御史观察判官栲垢爬痒民获苏醒居岁余如有所不乐一旦载妻子入阆乡南山不顾【弘农胡县有阆乡汝南西平有阆亭前汉以胡阆乡邪里聚为戾园注云阆字本从灵其後转讹误作门中受耳 阆音闻】中书舍人王涯独孤郁吏部郎中张惟素比部郎中韩愈【比上或有太史字】日发书问讯顾不可强起不即荐明年九月疾病輿医京师【或无疾字】其月某日卒年四十四十一月某日即葬京城西南长安县界中曾祖爽洪州武宁令祖微右卫骑曹参军父嵩苏州崑山丞妻上谷侯氏处士高女【或无高女二字非是 今按侯高事见李翱文集】高固奇士自方阿衡太师世莫能用吾言再试吏再怒去发狂投江水初处士将嫁其女惩曰吾以齟齬穷【下或有瘁字】一女怜之必嫁官人不以与凡子君曰吾求妇氏久矣唯此翁可人意且闻其女贤不可以失即谩谓媒姬吾明经及第且选即官人侯翁女幸嫁若能令翁许我请进百金为姬谢诺许白翁【诺许或作许诺】翁曰诚官人邪取文书来君计穷吐实姬曰无苦翁大人不疑人欺【大或作丈】我得一卷书粗若告身者我袖以往翁见未必取眎幸而听我行其谋【行或作施】翁望见文书衔袖【或作轴】果信不疑曰足矣以女与王氏生三子一男二女男三岁夭死女嫁亳州永城尉姚挺其季始十岁铭曰

鼎也不可以柱车马也不可使守闾【淮南子柱不可以摘齿筐不可以持屋马不可以服重牛不可以追速公取此意】佩玉长裾【长或作曳】不利走趋祗系其逢不系巧愚不谐其须【或作愿非是】有衒不祛钻石埋辞以列幽墟

扶风郡夫人墓志铭【夫人马畅之妻】

夫人姓卢氏范阳人亳州城父丞序之孙吉州刺史彻之女嫁扶风马氏为司徒侍中庄武公之冢妇【马遂字洵美贞元三年拜司徒侍中十一年薨赠太传谥庄武】少府监西平郡王赠工部尚书之夫人【遂二子彙畅畅元和五年终少府监赠工部尚书】初司徒与其配陈国夫人元氏惟宗庙之尊重继序之不易【序或作绪】贤其子之才求妇之可与齐者内外亲戚曰【亲下或有戚字】卢某旧门承守不失其初其子女闻教训有幽闲之德为公子择

妇宜莫如卢氏媒者曰然卜者曰祥夫人适年若干【或作十四】入门而媪御皆喜既馈而公姑交贺克受成福母有多子为妇为母莫不法式天资仁恕左右媵侍常蒙假与颜色人人莫不自在杖婢使数未尝过二三虽有不悻【虽下或无有字】未尝见声气元和五年尚书薨夫人哭泣成疾後二年亦薨年四十有六九年正月癸酉祔于其夫之封长子殿中丞继祖孝友以类【子下诸本有敖字或作谷或作?晁本作长子继祖殿中丞孝友嗣类本或孝友上有承考二字方云此碑谓少府监者马畅也畅子继祖公尝志其墓新旧传畅只有此一子世系表燧之子彙畅彙子赦馭畅子亦只有继祖岂继祖先名敖邪或敖字当删今按马少监墓志云君讳继祖则方说得之仍当更从晁本删敖字但以其兄弟连名考之则又疑作敖为是而其下或有承考二字者乃言敖能继北平承少传而孝友似之也少监志云讳继祖或是反用此志误本补足而世系表又承集误然不可考姑从晁本而并着其所疑如此云】葬有日言曰吾父友惟韩丈人视诸孤其往乞铭以其状来愈读曰尝闻乃公言然吾宜铭铭曰

陰幽坤从维德之恒【胡登切】出为辨强乃匪妇能淑哉夫人夙有多誉来嫔大家不介母父【或作父母】有事宾祭酒食祇饬协于尊章畏我侍侧【章或作卑汉广川王传背尊章顏注犹言舅姑也作卑非是畏我侍侧此句未详畏我或作我之亦未安或疑畏当作慰】及嗣内事亦莫有施齐其躬心小大顺之夫先其归其室有邱【夫先其归或作不失其归或作夫其先归今按下文有合葬字作夫先为是其室或作有室】合葬有铭壺彝是收【壺苦本切宫中道诗室家之壺】

殿中侍御史李君墓志铭

殿中侍御史李君名虚中字常容其十一世祖冲贵显拓拔世【旧注云据元和姓纂虚中乃冲八世孙】父恽河南温县尉娶陈留太守薛江童女生六子君最後生爱於其父母年少长【少或作以或无少字】喜学学无所不通最深於五行书【今世有李虚中命书】以人之始生年月日所直日辰支干相生胜衰死王相【或作相王并去声读】斟酌推人壽夭贵贱利不利辄先处其年时百不失一二其说汪洋奥美【或作义】关节开解万端千绪参错重出学者就传其法初若可取卒然失之【卒千忽切】星官历翁莫能与其校得失进士及第【贞元十一年虚中登第】试书判入等补秘书正字【秘书下或有省字】母丧去官卒丧选补太子校书河南尹奏疏授伊阙尉佐水陆运事【贞元十六年九月以张式为河南尹水陆转运使奏虚中为佐】故宰相郑公余庆继尹河南以公为运佐如初【元和元年十一月以故相郑余庆代式】宰相武公元衡之出劔南【元和二年十月以宰相武元衡为西川节度使】奏夺为观察推官授监察御史【今诸葛武侯碑阴元和四年二月二十九日题名有观察使推官监察御史衷行李虚中在焉其碑裴度时为元衡书记所作】未几御史台疏言行能高不宜用外府即诏为真御史半岁分部东都台迁殿中侍御史元和八年四月诏徵既至宰相欲白以为起居舍人经一月疽发背六月乙酉卒年五十二其年十月戊申葬河南洛阳县距其祖渑池令府君侨墓十里【渑池县名史记秦王与赵王饮于渑池渑音泯】君昆弟六人先君而歿者四人其一人尝为郑之荥泽尉【尝或作常非是】信道士长生不死之说既去官絶不营人事故四门之寡妻孤孩与荥泽之妻子衣食百须皆由君出自初为伊阙尉佐河南水陆运使换两使经七年不去所以为供给教养者及由蜀来辈类御史皆乐在朝

廷进取君独念寡稚求分司东出呜呼其仁哉君亦好道士说於蜀得秘方能以水银为黄金服之冀果不死将疾谓其友卫中行大受韩愈退之【谓或作为非是】曰吾梦大山裂流出赤黄物如金左人曰是所谓大还者今三矣【三下或有年字】君既歿愈追占其梦曰山者艮艮为背裂而流赤黄疽象也大还者大归也其告之矣妻范阳卢氏郑滑节度使兼御史大夫羣之女【羣字戴初范阳人贞元十六年四月为义成节度使】与君合德亲戚无退一言【退一或作一退或疑无字在退下】男三人长曰初協律【或无協字或疑律下有郎字】次曰彪其幼曰还适三岁女子九人铭曰

不羸其躬以尚其後人【羸或作羸独孤郁墓铭曰年再不羸惟後之成义同此也】

卷二十九

钦定四库全书

东雅堂昌黎集注卷二十九

碑志

唐故朝散大夫商州刺史除名徙封州董府君墓志铭【董溪即晋之子也史附晋传谓讨王承宗为行营粮料使坐盗军资流封州至长沙赐死志不详其事止曰死湘中讳之也公诗有送董溪壻陆畅云我实门下士力薄蚋与蚊受恩不即报永负湘中坟谓溪流封州死湘中也公尝佐董晋幕中观其铭辞意在言外既微而显诚太史氏之笔哉】

公讳溪字惟深丞相赠太师陇西恭惠公第二子【陇西公董晋也生四子全道全潏全素全泐溪即全潏也】十九岁明两经获第有司沈厚精敏未尝有子弟之过宾接门下推举人士侍侧无虚口退而见其人淡若与之无情者太师贤而爱之父子间自为知己诸子虽贤莫敢望之太师累践大官【大或作久非是】臻宰相致平治终始以礼号称名臣晨昏之助盖有赖云太师之平汴州【师下或无之字】年考益高挈持维纲锄削荒蕪【蕪丝节淮南子明月之珠不能无蕪音耒蕪或作顽】纳之太和而已其囊筐细碎无遗漏繫公之功上介尚书左仆射陆公长源【长源字泳之是岁八月自前汝州刺史为宣武行军司马】齿差太师标望絶人闻其所为每称举以戒其子杨凝孟叔度以材德显名朝廷【或作於朝】及来佐幕府【佐或作往凝自左司郎中为检校吏部郎中观察判官叔度自殿中侍御史为检校金部员外郎度支判官】诣门请交屏所挟为【或作屏弃所挟】太师薨【贞元十五年二月晋卒】始以秘书郎选参军京兆府法曹【选或作迁】日伏阶下与大尹争是非大尹屡黜已见【大或并作太】岁中奏为司録参军与一府政【与音预】以能拜尚书度支员外郎迁仓部郎中万年令兵诛恒州【成德军也】改度支郎中摄御史中丞为粮料使【元和四年十月以神策军中尉吐突承璀为镇州行营招讨处置使征王承宗以溪及于臯谟为东道行营粮料使】兵罢【元和五年七月赦承宗】迁商州刺史粮料吏有忿争相牵告者事及於公因徵下御史狱【因方作显云汉韩安国传由此显结於汉当用此义今按此召对狱耳与方所引者不类当只作因】公不与吏辨一皆引伏受垢除名徙封州元和六年五月十二日死湘中年四十九【州下方本无年月日但於湘中下云年若干今以晁本定按唐书元和七年立遂王为太子亦与下又相应二年粮料吏有忿争相告言五月溪臯谟皆坐赃数千缗勅贷死流臯谟春州溪封州行至潭州并遣中使赐死权德輿传亦云董溪于臯谟以运粮使盗粮料流岭南宪宗悔其轻诏中使半道杀之】明年立皇太子有赦令许归葬【元和七年七月立遂王宥为太子大赦天下】其子居中始奉丧归元和八年十一月甲寅葬于河南河南县万安山下太师墓左夫人郑氏祔公凡再娶皆郑氏女生六子四男二女长曰全正慧而早死次曰居中好学善为诗张籍称之次曰从直【下或有次字】曰居敬尚小长女嫁吴郡陆畅其季女後夫人之子公之母弟全素孝慈友弟公坐事弃同官令归公歿比葬三年哭泣如

始丧者大臣高其行白为太子舍人将葬【将葬下方有中字云以上文考之无者为是然世系表全素太子中书舍人通作中舍一云中书舍人又安知全素不自舍人迁中舍邪 今按中字有则前後皆当有无则皆当无不应前无而後有也审如方说此志亦必是未迁时作况它本自有无中字者今姑从之不必曲为之说也】舍人与其季弟澥问铭於太史氏韩愈【元和八年正月公为比部郎中史馆修撰】愈则为之铭辞曰物以久弊或以殒毁

【殒音斲】考致要归孰有彼此由我者吾不我者天斯而以然其谁使然

贞曜先生墓志铭【先生孟郊也湖州武康人以诗名康人谓孟诗韩笔故公志及铭皆以诗称之】

唐元和九年岁在甲午八月己亥【己或作乙考唐历是月无乙亥也】贞曜先生孟氏卒无子其配郑氏以告愈走位哭【走或作赴位或作泣】且召张籍会哭明日使以钱如东都供葬事诸尝与往来者咸来哭吊【尝或作常】韩氏遂以书告兴元尹故相余庆【元和元年三月以故相郑余庆为山南西道节度使】閏月【是岁閏八月】樊宗师使来吊告葬期【时宗师自太子舍人持母丧在东都】徵铭【下或有於愈字】愈哭曰呜呼吾尚忍铭吾友也夫兴元人以币如孟氏贐【人或作尹】且来商家事【家事谓孟郊家事公集有与郑余庆书云再奉示问皆缘孟家事又云樊宗师在东都经营孟家事不啻如已其言大抵与此志合】樊子使来速铭曰不则无以掩诸幽乃序而铭之先生讳郊字东野父庭玢【音彬】娶裴氏女而选为崑山尉生先生及二季酆郢而卒先生生六七年【天宝十年郊生】端序则见长而愈蹇【则见或作有法】涵而揉之【或作足】内外完好色夷气清可畏而亲及其为诗别目鉅心【别利伤也荀子不苟篇廉而不别鉅长针也说文綦鍼也

别居卫切鉅时橘切】刃迎缕解【刃或作物】钩章棘句掐擢胃肾【胃肾或作皆尽 掐音沼掐揜也广韵引周书师乃掐揜】神施鬼设闲见层出唯其大翫於词而与世抹掇【或作采掇从阁杭南唐本云字林抹掇扫也汉谷永传末杀灾异】人皆劫劫我独有余有以後时开先生者曰【开或作闻】吾既挤而与之矣【挤或作侪】其犹足存邪年几五十始以尊夫人之命来集京师从进士试既得即去【贞元十二年吕渭知举郊登第年五十四】间四年又命来选为溧阳尉【又下或有以字溧音栗】迎侍溧上【溧阳有投金濑平陵城林薄蒙翳下有积水郊闲往坐水旁裴回赋诗而曹务多废令白府以假尉代之分其半俸】去尉二年而故相郑公尹河南奏为水陆运从事【陆下或有转字元和元年十一月以郑余庆为河南尹水陆转运使李翱分司洛中与郊善荐之余庆以为判官】试協律郎亲拜其母於门内【或无内字】母卒五年而郑公以节领兴元军【元和九年三月以余庆为兴元尹】奏为其军参谋试大理评事挈其妻行之兴元【或无之兴元字】次于阆乡【阆音闻详见前卷大理评事王君墓志】暴疾卒年六十四买棺以斂以二人輿归酆郢皆在江南【酆郢家湖州武康县湖属江南】十月庚申樊子合凡赠贐而葬之洛阳东其先人墓左【樊子樊宗师】以余财附其家而供祀【或无而供祀字有以俟字或无供祀字有俟字】将葬张籍曰先生揭德振华於古有光【或无古有光字】贤者故事有易名况士哉【杭本无贤者下十字】如曰贞曜先生则姓名字行有载不待讲说而明【待或作从非是】皆曰然遂用之初先生所与俱学同姓简【简字几道】於世次为叔父由给事中观察浙东【元和九年九月简自给事中为浙东观察使】曰生吾不能举死吾知恤其家铭曰

於戏贞曜维执不猗维出不訾【或无戏字执或作持或无维执不猗一句或此句在维出不訾之下訾凡数义集韵云思也毁也思不称意也惟前汉书訾读与赀同顔师古注多财也若曰不赀则贫也猗亦二义诗那云猗欻叹辞也节南山云有寔其猗郑氏注倚也若曰不猗则无所倚也东野以贫出仕而中立不倚卒至於无所施为止用昌其诗铭意如是而已】维卒不施以昌其诗【苏子瞻尝举此以问王定国当昌其身耶昌其诗也来诗下语不契作诗答之有云昌身如饱腹饱尽还腹饥昌诗如膏面为人作容姿不如昌其气鬱鬱老不衰虽云老不衰却怀安所之不如昌其志志一气自随养之塞天地孟轲不吾欺公谓东野昌其诗而东坡乃云不如昌其志盖苏尝读东野诗有未足当韩豪之句不为所取也】

唐故秘书少监赠绛州刺史独孤府君墓志铭【独孤郁有传事多出此志】

君讳郁字古风河南人【河南洛阳人】常州刺史赠礼部侍郎宪公讳及之第二子【及字至之代宗时官常州刺史二子朗郁】宪公躬孝践行笃实而辨於文劝飭指诲以进後生【旧史公传大历贞元闲文士多尚古学效杨雄董仲舒之述作而独孤及梁肃最称渊奥愈从其徒游鋭意钻仰欲自振於一代】名声垂延绍德惟克君生之年宪公歿世【大历十二年四月二十九日卒年五十三时郁始二岁】与其兄朗【朗即用晦】畜於伯父氏【郁始生而孤与朗育於伯父汜】始微有知则好学问咨稟教飭不烦提谕月开日益卓然早成年二十四登进士第【贞元十二年郁与朗同来举进士时郁年二十二十四年郁乃登第】时故相太常权公掌出诏文【时权德舆为中书舍人人知制诰】临一时【望或作迎】登君於门归以其子【归或作妻】选授奉礼郎杨於陵为华州署君镇国军判官奏授協律郎【晁本无奉礼至奏授十八字】朋游益附华问弥大元和元年对诏策拜右拾遗【元和元年四月应材识兼茂明於体用科中第三辛酉为右拾遗】二年兼职史馆【兼史馆修撰】四年迁右补阙诏中贵人承璀【七罪切】将兵诛王承宗河北君奏疏谏召见问状有言动听其後上将有所相不可於衆君与起居舍人李约交章指摘事以不行五年迁起居郎为翰林学士愈被亲信有所补助权公既相君以嫌自列【元和五年九月德舆同平章事郁以嫌自列守本官起居郎】改尚书考功员外郎复史馆职【郁以德舆故辞翰苑宪宗曰德舆乃有此佳壻因诏宰相高选世族故杜琮尚岐阳公主然帝犹谓不如德舆之得郁也因拜为考功员外郎充史馆修撰判院事】七年以考功知制诰入谢因赐五品服八年迁驾部郎中职如初权公去相复入翰林【元和八年德舆罢相一月复以郁为翰林学士】九年以疾罢寻迁秘书少监【元和九年以疾辞内职十月改秘书少监】即闲于郊【谓屏居鄠县闲下或有居字】十年正月病遂殆甲午輿归卒於其家赠绛州刺史【晁本有上五字本或系於年四十下方并无】年四十男子二人长曰某早死次曰天官始十岁【传云子庠字贤府丧父始十岁此云天官岂小字耶】有至性闻呼父官与闻吊客至辄号泣以絶女子一人夫人天水权氏赠太子太保贞孝公皐之承孙【承孙字未详】故相今太常德舆之女胤庆配良是似是宜【是似方作是以今按是似是宜承上句言胤庆而似配良而宜也方似作以非是】四月己酉其兄右拾

遗朗以丧东葬河南寿安之甘泉乡家莹宪公墓侧【家或作冢】将以五月壬申窆【彼验切】谓愈曰子知吾弟久【知或作与久或作友】敢属以铭铭曰

於右风褱顺而里方【诗绣衣朱褱谓衣领之在外者於下或有乎字
今按上篇四言不应首句为三字此乃杂言或有此三字句也
褱布谷切又音博】不耀其章其刚不伤戴美世令【戴或作载令或作命
今按此言戴前人之美而世其令德也】而年再不羸惟後之成

唐故虞部员外郎张府君墓志铭【张府君卒葬之年月日志皆不书以公祭文考之公时在京师以考公郎知制诰季友归葬长安公於是乎祭之且志其墓时元和十年也】

尚书虞部员外郎安定张君讳季友字孝权年五十四病卒东都明年【明下或无年字或作月】兄子涂与其弟庾揆等【庾揆或作庚揆】护柩归葬长安县马额原夫人北海唐氏之封前事涂进韩氏门伏哭庭下曰【或无曰字】叔父且死几於不能言矣张目而言曰【张目方从杭本无目字云後汉严光传良久张目熟眎然此恐当从杭本为正 今按方知古有张目字而必以杭本为正殊不可晓今从诸本】吾不可无告韩君别藏而不得韩君记犹不葬也涂为书致吾意已而自署其末与封敢告以请愈既与为礼发书云云其末有复语千万永诀八字【或无末有字】名日月与封【日月一作月日】皆孝权迹孝权与余同年进士【贞元八年中进士第八与公同年】其上世有髡者当字文时为车骑大将军鄜城太守卒葬河北谥曰忠公至孝权间五世矣孝权大父讳孝先【或作奉先】太子通事舍人父讳庭光赠绥州刺史绥州之卒【杭本史下无绥州字非是】孝权盖尚小母曰太原县君卒【卒上或有复出县君字】既葬孝权守墓树松柏三年而後归选为河南府文学【或无府字】去官徐州使拜章请为判官【贞元十六年六月以张建封之子愔为徐州团练使】授协律郎孝权始不痛絶诏下大悔即诈称疾不言三年元和初徐使死【元和元年十一月愔卒】孝权疾即日已试判入高等授鄆县尉【鄆胡古切】明年故相赵宗儒镇荆南以孝权为判官拜监察御史经二年拜真御史明年分司东台转殿中【转殿中侍御史】按皇甫氏子母病不侍走京师求试职宰相怒曰吾故皇甫氏御史助所善相戏法侮我皇甫媼何疾【媼母老称也汉书常从王媼负贯酒 媼音 衄】衄未决皇甫母病果死得解迁留司虞部员外郎【谓分司东都也】孝权为人孝谨与人语恐伤之而时疑疑有立【疑鱼立切】与孝权游者极衆而独以其死累余可尚也已是为铭【此下或注铭亡二字或注疑阙铭词字】唐故检校尚书左仆射右龙武军统军刘公墓志铭【一本检校上有金紫光禄大夫字仆射下有兼御史大夫字统军下有知军事上柱国彭城郡开国公食邑二千户赠潞州大都督字公既为刘统军作此志又为作碑铭碑铭见前二十七卷】

公讳昌裔字光後本彭城人曾大父讳承庆朔州刺史大父巨敖好读老子庄周书为太原晋阳令再世宦北方【宦或作官】乐其土俗遂着籍太原之阳曲曰自我为此邑人可也何必彭城父讼【或作诵】

今按名讼无理疑避讳而改】赠右散骑常侍公少好学问始为儿时重迟不戏【迟音穉】恒若有所思念计画及壮自试以开吐蕃说于边将不售入三蜀从道士游久之蜀人苦杨琳寇掠公单船往说琳感歛虽不即降约其徒不得为虐【唐史昌裔传云入蜀杨惠琳反昌裔说之惠琳之乱在夏州岁月相远惠琳事详见崔宁传】琳降公常随琳不去琳死脱身亡沈浮河朔之间建中中曲环招起之【按新传曲环方攻濮州表为判官】为环檄李纳【建中

二年七月平卢淄青节度李正己卒子纳自称为留後】指摘切刻纳悔恐动心恒魏皆疑惑气懈【恒谓成德节度使李惟岳魏谓魏博节度使田悦】环封奏其本德宗称焉环之会下濮州战白塔救宁陵襄邑【二县并属宋州】擊李希烈陈州城下【兴元元年闰十月李希烈遣将翟崇晖悉衆围陈州宋亳节度使刘洽遣陇右幽州节度使曲环将兵三万救之十一月败崇晖於州西擒之以献】公常在军间环领陈许军公因为陈许从事以前後功劳累迁检校兵部郎中御史中丞营田副使吴少诚乘环丧引兵叩城留後上官说咨公以城守【说或作浼与旧史合】所以能擒诛叛将【擒或作检 今按此谓安国宁谋以城降贼昌裔密计斩之当作擒】为抗拒令敌人不得其便围解拜陈州刺史韩全义败引军走陈州求入保公自城上揖谢全义曰公受命诣蔡何为来陈公无恐贼必不敢至我城下明日领骑步十余抵全义营全义惊喜迎拜叹息殊不敢以不见舍望公改授陈许军司马上官说死拜金紫光禄大夫检校工部尚书代说为节度使命界上吏不得犯蔡州人曰俱天子人奚为相伤少诚更有来犯者捕得缚送曰妄称彼人公宜自治之少诚慙其军【公志李邢亦曰尹慙其庭中人汉袁盎为吴相告归道逢丞相申屠嘉下车拜谒丞相从车上谢盎还愧其吏公所谓慙其军慙其庭中人语出此耳】亦禁界上暴者两界耕桑交迹吏不何问【何或作呵汉贾谊传大譴大呵卫绾传不孰何顔曰何即问也何上或有可字亦非是今按过秦论云陈利兵而谁何顔注云问之曰此为谁人何人也亦此义】封彭城郡开国公就拜尚书右仆射元和七年得疾视政不时八年五月涌水出他界过其地防穿不补没邑屋流杀居人拜疏请去职即罪诏还京师【始昌裔代说为节度也宪宗恶其自立欲召之而重生变宰相李吉甫曰陛下乘人心愁苦可召也遂以韩臯代之至长乐驿知帝意因称风眩卧第岁中卒史与志少异志为之讳耶】即其日与使者俱西大热旦暮驰不息疾大发左右手辔止之公不肯曰吾恐不得生谢天子上益遣使者劳问勅无亟行至则不得朝矣天子以为恭即其家拜检校左仆射右龙武军统军知军事十一月某甲子薨年六十二【某下或有日字下同】上为之一日不视朝赠潞州大都督命郎吊其家【郎下或有中字】明年某月某甲子葬河南某县某乡某原公不好音声不大为居宅於诸帅中独然夫人邠国夫人武功苏氏子四人嗣子光禄主簿纵学於樊宗师士大夫多称之长子元一朴直忠厚便弓马【便或作使非是】为淮南军衙门将次子景阳景长皆举进士葬得日相与选使者哭拜阶上使来乞铭铭曰

提将之符尸我一方配古侯公维德不爽【楚辞厉而不爽些注楚人谓羹败曰爽爽平声】我铭不亡後人之庆【庆读若羌离骚云庆夭悴而丧荣沈存中云古人谐声如庆字多与章字協韵孝孙有庆万壽无疆黍稷稻粱农夫之庆是也集韵并入平声】

卷三十

钦定四库全书

东雅堂昌黎集注卷三十

碑志

唐故监察御史卫府君墓志铭【其弟中行字大受贞元九年第进士至是为兵部郎中元和十年也公此志自与其弟中行别下至可餌以不死造语雄奇所谓唯陈言之务去者也】

君讳某字某【或作讳之玄字造微】中书舍人御史中丞讳某之子【某或作晏】赠太子洗马讳某之孙【某或作璿按元和姓纂晏三子长之玄次中立次中行汪彦章云王仲位本谓北卫中立墓志中立字退之非之玄也】家世习儒学词章昆弟三人俱传父祖业从进士举君独不与俗为事【不下或有兴字云读去声非是或疑此与字当作以更详之】乐弛置自便【弛或作施】父中丞薨既三年与其弟中行别曰若既克自敬勤及先人存趾美进士【贞元九年中行登第】续闻成宗唯服任遂功为孝子在不怠我恨已不及假令今得不足自贵【或作贵作贯 贯音射又音世】我闻南方多水银丹砂杂他奇药燠为黄金

【燠於刀切】可餌以不死今於若丐我我即去遂踰岭厄【厄於革切塞也一作 厄】南出药贵不可得以干容帅【贞元二十一年五月以房启为容管经略使】帅且曰若能从事於我可一日具许之得药试如方不效曰方良是我治之未至耳留三年药终不能为黄金而佐帅政成以功再迁监察御史帅迁于桂【元和八年四月以启为桂管监察使】从之帅坐事免【是岁七月启以罪降为太仆少卿】君摄其治历三时夷人称便新帅将奏功君舍去南海马大夫使谓君曰【十二月以马摠为岭南节度使】幸尚可成两济其利君虽益厌然不能无万一冀至南海未几竟死年五十三子曰某【某或作景微】元和十年十二月某日归葬河南某县某乡某村祔先莹【某县某乡某村诸本作伊阙县伊国乡高都村】於时中行为尚书兵部郎【或无於字郎下或有中字】号名人而与余善请铭铭曰

嗟惟君笃所信【信音新汉武悼李夫人赋申以信兮班固通幽赋云苟无实其孰信】要无有弊精神以弃余贾於人【贾音古】脱外累自贵珍讯来世述墓文

唐故河南令张君墓志铭【贞元十九年公与张君同自监察御史以言事黜张为郴州临武公为连州阳山二年俱徙江陵至是张卒公既志其墓又文以祭且及铭墓之意可谓厚矣】

君讳署字某河间人大父利贞有名玄宗世为御史中丞举弹无所避由是出为陈留守【本郑所并陈之留邑秦并天下以宋亦有留故加陈以别之】领河南道采访处置使【开元二十二年十一月初置十道采访处置使】数岁卒官皇考讳郇以儒学进官至侍御史【郇或

作询】君才质有气形貌魁硕长於文词以进士举博学宏词为校书郎【署贞元二年进士第】自京兆武功尉拜监察御史为幸臣所谗【幸臣李实也】与同辈韩愈李方叔三人俱为县令南方【时三人俱为监察御史贞元十九年冬三人皆以言事得罪贬为县令详见题注下】二年逢恩俱徙掾江陵【贞元二十一年正月顺宗即位大赦张与公俱量移江陵】半岁邕管奏君为判官【贞元二十一年八月路恕为容管经略使表署判官】改殿中侍御史不行拜京兆府司录【贞元二十一年十月李鄠为京兆尹表署为府司录参军】诸曹白事不敢平面视共食公堂抑首促促就哺歔揖起趋去无敢阑语【促促或作旦旦促如龔龔之促本或作妮妮阑或作闲】县令丞尉畏如严京兆事以办治【办或作干】京兆改凤翔尹以节镇京西【元和二年二月以鄠为凤翔尹凤翔陇右节度使表署为判官】请与君俱改礼部员外郎为

观察使判官帅他迁【元和四年三月以鄠为江东节度使】君不乐久去京师谢归用前能拜三原令岁余迁尚书刑部员外郎守法争议棘棘不阿【诸本无议字及下棘字而云晁本校增此二字阿或作挠今按欧公尝疑此上有脱字不知晁氏以何本校也详其文理当有此字故从之】改?州刺史民俗相朋党不诉杀牛【或无不诉字】牛以大耗又多捕生鸟雀鱼鼈可食与不可食相买卖时节脱放期为福祥君视事一皆禁督立絶【祥下或有事字或无视事二字或但有事字】使通经吏与诸生之旁大郡【吏或作史】学乡饮酒丧婚礼张施讲说民吏观听从化大喜度支符州折民户租岁徵縣六千屯比郡承命惶怖立期日唯恐不及事被罪君独疏言治迫岭下民不识蚕桑月余免符下民相扶携守州门叫謹为贺改澧州刺史民税出杂产物与钱尚书有经数观察使牒州徵民钱倍经君曰刺史可为法【疑必有脱误或为字当作守】不可贪官害民留嚙不肯从竟以代罢观察使使剧吏案簿书【吏或作史】十日不得毫毛罪改河南令而河南尹适君平生所不好者君年且老当日日拜走仰望堦下不得已就官数月大不适即以病辞免公卿欲其一至京师君以再不得意於守令恨曰义不可更辱又奚为於京师间竟闭门死年六十【或无闭门二字】君娶河东柳氏女二子昇奴胡师将以某年某月某日葬某所其兄将作少监昔请铭於右庶子韩愈【昔或作者李迥赴襄阳送行诗有着作郎张昔】愈前与君为御史被谗俱为县令南方者也最为知君铭曰谁之不如而不公卿奚养之违以不久生【以一作而】唯其颀颀以世厥声

凤翔陇州节度使李公墓志铭【一本上有唐故字度下有观察使开府义同三司检校户部尚书赠尚书左仆射字李惟简父宝臣见蕃镇传志所载多与传合】

公讳惟简【或作某】字某司空平章事赠太傅之子【太傅李宝臣本范阳内属奚族】太傅初姓张氏【故范阳张鎰高畜之为假子遂冒姓张名忠志】肃宗时举恒赵深冀易定六州战卒五万人马五千匹以归听命天子嘉之赐姓曰李更其名宝臣【名下或有曰字】立其军号之曰成德由是姓李氏【宝应元年十一月忠志以伪恒阳节度使挈其所管五州降于河东节度使辛云京以忠志为成德军节度使仍统其所管州赐姓李名宝臣】太傅薨【建中二年正月宝臣卒赠太傅】公兄弟让嗣【宝臣三子惟诚惟岳惟简】公竟弃其家自归京师及兄死家覆有司设防守【惟岳叛惟简以家僮票士百余奉母郑归京建中三年闰正月成德兵马使王武俊杀惟岳传首京师德宗拘惟简於客省防伺甚峻】德宗如奉天守

卒出公即驰归与母韩国夫人郑氏拜诀属家徒随走所幸道与贼遇七鬪乃至【建中四年十月德宗幸奉天惟简将赴难谋於郑郑曰尔父立功河朔位宰相身未尝至京师兄死於人手尔入朝未识天子不能效忠吾不子汝矣督其行曰儿能死王事吾不朽矣乃斩关出道更七战得及行在】有功迁太子谕德加御史中丞【帝见惟简厚抚之拜太子谕德累迁禁军将军从浑瑊率师讨贼频战屡捷加御史中丞】从幸梁州天黑失道识焦中人声得见德宗於盩厔西【盩厔雍县名属凤翔 盩音輶厔音窒义见二十五卷兴元少尹墓志铭】上曰卿有母可随我耶【可或作何】曰臣以死从卫及幸还録功封武安郡王【或作公考之史当作王】号元从功臣【四月诏奉天随从将士并赐号元从功臣】图其形御阁而以神威将军居北军卫【迁左神威卫大将军居或作为卫或作御】久乃加御史大夫丁韩国忧去官累迁神威大将军加工刑二曹尚书天威统军又改户部尚书金吾大将军【元和初检校户部尚书改为左金吾卫大将军充街使】有长上万国俊者【上或作尚新史蜀本作上 今按长上盖卫卒之号犹今言长入也当从蜀本】以军势夺兴平人地吏惮莫敢治及公为金吾兴平人曰久闻李将军为人公平庶能直吾屈即齎县牒来见公发视立杖国俊废之以地还兴平人闻者莫不称叹於是天子以公材果可任用治人将兵无所不宜元和六年即以公为凤翔陇州节度使户部尚书兼凤翔尹【五月以惟简为凤翔尹凤翔陇州节度使】陇州地与吐蕃接旧常朝夕相伺更入攻抄人吏不得息公以为国家於夷狄当用长算边将当承上旨谨条教【或作务非是】蓄财谷完吏农力以俟不宜规小利起事盗恩禁不得妄入其地益市耕牛铸鑄钁鋤【诗痔乃钱鑄注田器也钁大鋤也鋤大鋤也 鑄音博钁山监切又所鎡切鋤陟初切又仕菹切鋤陟玉切】给农之不能自具者丁壮兴励【兴或作愈】岁增田数十万亩连八岁五种俱熟公私有馀贩者负入褒斜【梁州记万石城沂汉上七里有褒谷南口曰褒北口曰斜选右界褒斜 斜余遮切】船循渭而下首尾相继不絶十三年公与忠武军节度使司空光顔【李光顔】邠宁节度使尚书钊【郭钊】俱来朝上为之燕三殿【唐麟德殿有三面故曰三殿】张百戏公卿侍臣咸与【音预】既事勅还公因进曰臣幸得宿卫四十余年【或无得字】今年老斥外任【斥或作许或作诉】不胜慕恋愿得死輶下天子加慰遣焉还镇告疾其夏五月戊子薨年五十五讣至上悼愴罢朝遣郎中临吊赠尚书左仆射以其年十一月景申【丙申作景避唐讳也】葬万年凤栖原【万年下或有县字】夫人博陵郡崔氏河阳尉镐之孙大理评事可观之女贤有法度【贤下或有而字】公有四子长曰元孙三原尉次曰元质彭之蒙阳尉曰元立兴平尉曰元本河南参军皆愿敏好善元立元本皆崔氏出葬得日嗣子元立与其昆弟四人请铭於韩氏曰先人尝有托於夫子也愈曰太傅功在史氏记仆射以孤童囚羈京师【或无记字童下或有子字今按翟方进传无者为是】卒能以忠为节自显取爵位立名绩使天下拭目观父母与荣焉既忠又孝法宜铭【或无法字】铭曰

太传之显自其躬兴仆射童羈孰与之朋遭国之难以节自发致其勤艰以复考烈孝由忠立爵名随之铭此玄石维昧之诒

唐故中散大夫少府监胡良公墓神道碑【此篇从方氏石本疑者别出 蜀本注牛僧儒撰墓志陈鸿撰谥张籍撰行状欧阳公集古録有胡良公碑跋云良者韩之门人张籍妻父也今按方本无中散大夫良五字又它神道碑不着墓字唯此有之亦变例也】

少府监胡公者讳珣字润博年七十九以官卒明年八月十四日葬京兆奉先【八月或作七月无十四日字】夫人天水赵氏祔焉其子逞乃巡遇述迁造【或无乃字或无巡字】与公媚广文博士吴郡张籍以公之族出行治历官寿年为书【出下或有处文二字非是】使人自京师南走八千里至闽南两越之界上请为公铭刻之墓碑於潮州刺史韩愈曰胡姓本出安定後徙清河於今为宗城属贝州【河下或有复出清河字宗城县名武德九年属贝州】大父讳秀武后时以文材徵为麟台正字【垂拱元年二月改秘书省为麟台】父宰臣用进士卒官平阳冀氏令【或无官字】赠潭州大都督公早孤能自劝学立节概【劝或作勤】非其身力不以衣食凡一试进士二即吏部选皆以文章占上第乐为俭勤自刻削不干人以矫时弊及为富平尉一时称其断决建中四年侍郎赵赞为度支使【建中三年五月以中书舍人赵赞为户部侍郎判度支】荐公为监察御史主馈给渭桥以东军洗手奉职不以一钱假人贼平有司考核群吏多坐贬死【考核一作核考或无贬字或无死字】独公以清苦能检飭无漏失迁河南仓曹魏公贾耽以节镇郑滑【贞元二年九月以贾耽为郑滑节度使辟珣佐其府】以公佐观察事检校尚书工部员外郎以刚直齟齬不阿忤权贵除猷陵令【猷陵高祖陵】居陵下七年市置田宅务种树为业以自给教授子弟【业下或无以字杭并无以自给字子弟或作弟子】贞元十一年吏部大选以公考选人艺学以劳迁奉先令以治办迁尚书膳部郎中改坊州刺史州经乱无孔子庙公至则命筑宫造祭器率博士生讲读以时【生下或有徒字】如法以祠人吏聚观叹息迁舒州刺史州岁大熟麦一茎数种间里歌舞之【或无舞字】考功以闻迁尚书驾部郎中数以事犯尚书李巽【事上或有公字】巽时主盐铁事富骄恃势以语丞相【丞或作宰】由是退公为凤翔少尹巽死迁少大理改少詹事元和十二年朝廷以公年老能自祗力事职不懈可嘉拜少府监兼知内中尚【百官志少府监从三品掌百工技艺之政摠中尚左尚右尚】明年以病卒【或无病字非是】公始以进士孤身旅长安致官九卿为大家七子皆有学守女嫁名人年几八十坚悍不衰事可传载可谓成德【谓或作为非是】铭曰

竭竭胡公【竭丘竭切】既果以方挟艺射科每发如望【平声】人求於人我已为之自始讫终不降色辞因官立事随有可载发迹馈军【或作运】遭谗府界去居陵下为吏为隐坊舒之政于兹有靳【或作叹】守官驾部名昇已屈【昇或作升已或作民】跻于少府甚宜秩物不配其有君子耻之少府古卿公优止之刻文碑石以显公行维公後人【维公或作维彼】无怠嗣庆

唐故相权公墓碑【权德舆宪宗朝拜同平章事新旧史有传所载加详於志云】

上之元和六年其相曰权公讳德舆字载之【元和五年九月以德舆同中书门下平章事】其本出自殷帝武丁武丁之子降封於权权江汉问国也【权故城在南郡当阳县】周衰入楚为权氏【唐韵云权始出天水本颍颿之後楚武王使鬬缙尹权後因氏焉】楚灭徙秦而居天水略阳符秦之王中国其臣有安丘公翼者【翼字子良略阳人与太原王赞俱为符坚谋主坚即伪位拜给事中後为右仆射封安丘公】有大臣之言【坚伐晋翼力谏不从坚遂大败】後六世至平凉公文诞【翼子宣褒事姚秦为黄门侍郎宣褒四世之孙荣隋开府仪同三司鄜城郡公荣子文诞】为唐上庸太守荆州大都督长史焯有声烈【焯或作绰】平

凉曾孙诤倕【文诞子崇本匡城令崇本子无待成都尉无待子倕 倕音垂】赠尚书礼部郎中以艺学与苏源明相善【源明京兆武功人初名预字弱夫肃宗时终秘书少监】卒官羽林军録事参军於公为王父郎中生赠太子太保诤皐以忠孝致大名【皐字士繇天宝末安禄山为河北按察使表皐为从事察禄山有异志诈死奉其母南去及渡江禄山已反由是名闻天下】去官累以官徵不起【代宗徵皐为起居舍人以疾辞李季卿黜陟江淮奏皐节行改著作郎复不起】追谥贞孝【大历二年四月十四日皐卒於润州年四十六元和中谥贞孝】是实生公公在相位三年【元和五年九月相八年五月罢】其後以吏部尚书授节镇山南【元和十一年十月以德輿检校吏部尚书充山南西道节度使】年六十以薨赠尚书左仆射谥文公【元和十三年八月以病乞还卒於道以薨以或作六考旧史当作以】公生三岁知变四音【知或作能】四岁能为诗七岁而贞孝公卒来吊哭者见其顔色声容皆相谓权氏世有其人及长好学孝敬祥顺贞元八年以前江西府监察御史徵拜博士【贞元初江西观察使李兼辟德輿为判官再迁监察御史府罢八年正月除太常博士】朝士以得人相庆改左补阙章奏不絶讥排奸幸【贞元八年八月司农大卿裴延龄以巧诈除户部侍郎判度支德輿上疏论其奸不省】与阳城为助转起居舍人【贞元十年四月迁】遂知制诰凡撰命词九年以类集为五十卷天下称其能十八年以中书舍人典贡士拜尚书礼部侍郎【贞元十七年冬以本官知礼部贡举十八年真拜礼部侍郎】荐士於公者其言可信不以其人布衣不用即不可信虽大官势人交言一不以缀意奏广岁所取进士明经在得人不以员拘转户兵吏三曹侍郎太子宾客【贞元二十一年六月转户部侍郎元和初历兵部吏部侍郎後坐郎吏误用官缺改太子宾客】复为兵部迁太常卿【元和四年五月迁】天下愈推为钜人长德时天子以为宰相宜参用道德人因拜礼部尚书同中书门下平章事【元和五年宰相裴垪寝疾九月德輿同平章事】公既谢辞不许其所设张举措必本於寛大以几教化多所助与【或作为或无此一字 今按助与如後救于頔事之类是也作为非是】维匡调娱不失其正中於和节不为声章因善与贤不矜主已【矜或作务】以吏部尚书留守东都【元和八年正月罢相守本官七月以检校吏部尚书为东都留守】东方诸帅有利病不能自请者公常与疏陈不以露布【不以或无不字露布或作布露】复拜太常【元和九年十月除】转刑部尚书考定新旧令式为三十编举可长用【或无长字先是诏许孟容蒋乂等删定格勅成三十卷表上留中不出德輿请下刑部与侍郎刘伯刍代考定复为三十卷十年十月奏请行用从之】其在山南河南勤于选付治以和简人以宁便以疾求还十三年某月甲子道薨于洋之白草奏至天子 伤【 或作痛】为之不御朝郎官致赠锡官居野处上下吊哭皆曰善人死矣其年某月日【月下或有某字】葬河南北山在贞孝东五里公由陪属升列年除岁迁以至公宰人皆喜闻若已与有无忌嫉者于頔坐子杀人失位自囚亲戚莫敢过门省顾朝莫敢言者【頔音迪顾下或有者字朝上或有在字】公将留守东都【公下或有时字】为上言曰【下或有于字】頔之罪既贯不竟宜因赐寛诏上曰然公为善行谕之頔以不忧死【元和七年正月司空同平章事于頔使其子太常丞敏重赂梁正言求出镇正言诈渐露敏索其赂不得诱其奴支解之弃溷中事觉頔率其子殿中少监孝友等素服诣建福门请罪頔左迁恩王傅仍絶朝谒敏流雷州孝友等皆贬官八年七月德輿将留守东都为言之】前後考第进士及庭所策试士踵相蹶为宰相達官与公相先後其余布处台阁外府凡百余人自始学至老未病未尝一日去书不观【或无未病二字】公既以能为文辞擅声於朝【或无能字】多铭卿大夫功德然其为家不视簿书【视或作案】未尝问有亡

费不待余【问下或有其字诸本侍作侍或作储】公娶清河崔氏女其父造尝相德宗号为名臣【德宗贞元元年正月以崔造平章事至十二月罢德或作代按宰相表当作德宗】既葬其子监察御史璩累然服丧来有请【德舆二子璩字大圭璩字大玉服丧或作丧服或无来字】乃作铭文【或无铭字】曰

权在商周世无不存【无或作次】灭楚徙秦嬴刘之闲甘泉始侯以及安丘诋诃浮屠【苻坚尝游东苑命沙门道安同辇翼谏曰臣闻天子法驾侍中陪乘清道而行进止有度道安毁形贱士不宜参秽神舆】皇极之扶贞孝之生凤鸟不至【或作至世】爵位岂多半涂以税【以或作已】寿考岂多四十而逝惟其不有以惠厥後是生相君为朝德首行世祖之文世师之【祖或作师师或作推或作祖】流连六官【谓吏户礼兵刑工】出入屏毗无党无讎举世莫疵人所憚为【或作焉】公勇为之其所竞驰公绝不窥【其或作人竞作共绝不作有今按作绝不与上文勇字相应】孰克知之【克或作先】德将在斯刻诗墓碑以永厥垂

平淮西碑【并序 据旧史元和十二年八月宰相裴度为淮西宣慰处置使兼彰义军节度使请公为行军司马淮蔡平十二月随度还朝以功授刑部侍郎仍诏撰平淮西碑其词多裴度事时先入蔡州擒吴元济李愬功第一愬不平之愬妻唐安公王也出入禁中因诉碑辞不实诏令磨公文命段文昌重撰史所载如此原公之意大抵以度能固帝意故诸将不敢首鼠遂能平蔡意多归功於指踪者也帝亦重失武臣心故诏文昌然史臣之赞裴度必取公之铭曰凡此蔡功惟断乃成则世固自有公论也文昌文见姚铉文粹李商隐有惜韩碑诗长篇甚美有公之斯文不示後曷与三五相攀追之句东坡有临江驿小诗云淮西功业冠吾唐吏部文章日月光千载断碑人脍炙不知世有段文昌则二公之文不待较而明矣陈无已曰龙图孙学士觉喜论文谓退之淮西碑叙如书铭如诗又云少游谓元和圣德诗於韩文为下与淮西碑如出两手盖其少作也 李商隐读韩碑诗元和天子神武姿彼何人哉轩与羲誓将上雪列圣耻坐法宫中朝四夷淮西有贼五十载封狼生豳豳生黑不据山河据平地长戈利矛日可麾帝得圣相相曰度贼斫不死神扶持腰悬相印作都统陰风惨淡天王旗愬武古通作爪牙仪曹外郎载笔随行军司马智且勇十四万衆犹虎貔入蔡缚贼献太庙功无与比恩不訾帝曰汝度功第一汝从事愈宜为辞愈拜稽首蹈且舞金石刻画臣能为古者世称大手笔此事不系於职司当仁自古有不让言讫屡颌天子颐公退斋戒坐小阁濡染大笔何淋漓点窜尧典舜典字涂改清庙生民诗文成破体书在纸清晨再拜铺丹墀表曰臣愈昧死上咏神圣功书之碑碑高三丈字如斗负以灵龟蟠以螭句奇语重喻者少谗之天子言其私长绳百尺拽碑倒麤砂大石相磨治公之斯文若元气先时已入人肝脾汤盘孔鼎有述作今无其器存其辞呜呼圣皇及圣相相与烜赫流淳熙公之斯文不示後曷与三五相攀追愿书万本颂万过口角流沫右手抵传之七十有三代以为封禅玉检明堂基】

天以唐克肖其德圣子神孙继继承承於千万年敬戒不怠全付所覆四海九州罔有内外悉主悉臣高祖太宗既除既治高宗中睿休养生息至于玄宗受报收功极炽而丰物衆地大孽牙其间肃宗代宗德祖顺考以勤以容大愿适去稂莠不薶【诗以薶荼蓼 薶奴豆切除田草也】相臣将臣文恬武嬉习熟见闻以为当然睿圣文武皇帝【下或有陛下字非是元和三年正月受尊号】既受羣臣朝乃考图数贡【或无乃字数色阻切】曰呜呼天既全付予有

家今传次在予予不能事事其何以见于郊庙羣臣震慑奔走率职【或无奔率二字】明年平夏【永贞元年八月夏绥银节度留後李惠琳叛元和元年三月兵马使张承全讨斩之】又明年平蜀【永贞元年八月剑南节度使韦臯卒行军司马刘辟自称留後元和元年九月东川节度使高崇文擒辟以献】

蜀下方有西川字云刘辟求都统三川方围梓州而败乱固不及他郡也今按既围梓州则乱已及东川矣方说非是】又明年平江东【元和二年十月镇海军节度使李錡反大将张子良执錡以献】又明年平泽潞遂定易定【元和五年十月义成节度使张茂昭以易定二州归於有司】致魏博贝卫澶相【元和七年十月魏博节度使田弘正以所管六州归于有司澶澶渊也说文澶渊水在宋左氏盟于澶渊澶音蟬】无不从志皇帝曰不可究武【究或作穷】予其少息九年蔡将死蔡人立其子元济以请不许【元和九年间八月彰义节度使吴少阳卒其子元济摄蔡州刺史匿丧以病闻自领军务表请主兵上不许】遂烧舞阳犯叶襄城【城上或有等字洪云此谓叶与襄城耳等字非是】以动东都放兵四劫皇帝历问於朝一二臣外【或作外臣杭苑无外字今按此句若作外臣则当时朝臣自以伐蔡为不可非独外臣也若作一二臣则当时举朝之臣皆以伐蔡为不可又非独一二人也考之下文所谓一二臣同不为无助者又正指武元衡裴度一二人赞伐蔡之谋者而言则此乃谓唯一二臣以为可而其外群臣皆以为不可耳诸本作外臣及无外字皆非是唯作臣外者得之】皆曰蔡帅之不廷授于今五十年【帅或作师于或作於】传三姓四将【广德元年七月以李忠臣为淮西节度使也贞元二年四月以陈奇十月以吴少诚为之是为三姓大历十四年三月忠臣为其将李希烈所逐自为节度忠臣希烈少诚少阳是为四将】其树本坚兵利卒顽不与他等因抚而有顺且无事大官臆决唱声万口和附并为一谈【并或作并】牢不可破皇帝曰惟天惟祖宗所以付任予者庶其在此予何敢不力【天上或有夫字非是或无何字】况一二臣同不为无助【不上或有固字】曰光顔汝为陈许帅【元和九年十月以陈州刺史李光顔为忠武节度使忠武管陈许二州】维是河东魏博合阳三军之在行者汝皆将之【元和十年正月命宣武等十六道进军讨元济以光顔等分掌行营二月命神策军合阳镇遏将索日进以泾原兵六百人会李光顔合阳左冯翊合阳县合或作泾非是】曰重胤汝故有河阳怀今益以汝【元和九年八月以河阳节度使乌重胤为汝州刺史充河阳怀汝节度使徙隶汝州】维是朔方义成陕益凤翔延庆七军之在行者汝皆将之【义成管郑滑二州陕益即剑南东西川延属鄜坊丹延节度使庆属邠宁节度使延庆本或作鄜延宁庆】曰洪汝以卒万二千属而子公武往讨之【元和十年九月以宣武节度使韩弘为淮西诸军都统弘请使子公武以兵万三千会蔡下归财与粮以济诸军属下或有集字或在公武下皆非是】曰文通汝守寿【元和十年二月以左金吾大将军李文通为寿州团练使】维是宣武淮南宣歙浙西四军之行于寿者汝皆将之【西下或有徐泗字四或作五皆非是行上或有在字】曰道古汝其观察鄂岳【元和十一年以黔州观察使李道古为鄂岳观察使】曰愬汝帅唐邓随【元和十一年十二月以太子詹事李愬为唐邓随节度使】各以其兵进战曰度汝长御史其往视师【谓度为御史中丞故云长元和十年五月上遣度诣行营宣慰察用兵形势】曰度惟汝予同【汝下有一与字】汝遂相予【元和十年六月以度为中书侍郎同平章事】以赏罚用命不用命曰弘汝其以节都统诸军【节下或有度字诸方作讨今按前辈有引左传讨其军寔为讨军之证者恐未必然若必作讨则秦之罽刻石自有遂发讨师之语而晋官有都督征讨诸军事皆足为证不必引左传却不相似也但公所作韩弘碑但云都统

诸军则作讨者为误矣不可以偶有旁证而强引以从之也】曰守谦汝出入左右汝惟近臣其往抚师【元和十一年十一月上命知枢密梁守谦宣慰因留监其军汝惟或作惟汝】曰度汝其往衣服饮食予士无寒无饥【或无服饮字或无服字有饮字或无衣服字寒下或无无字】以既厥事遂生蔡人赐汝节斧通天御带卫卒三百【元和十二年八月度赴淮西诏以神策军三百人卫从赐以犀带】凡兹廷臣汝择自从惟其贤能无惮大吏【元和十二年七月度以宰相出为淮西宣慰处置使度奏刑部侍郎马摠为副使右庶子韩愈为行军司马判官书记】庚申予其临门送汝【度行上御通化门送之】曰御史予闵士大夫战甚苦自今以往非郊庙祠祀其无用乐【或无其字】顔胤武合攻其北大战十六得栅城县二十三降人卒四万【或无人字此谓降其民与卒也故下语皆不再出人卒字今按庄子云人卒虽衆公语亦有自也】道古攻其东南八战降万三千【降下或有卒字】再入申破其外城【元和十二年道古攻申州克其外郭】文通战其东十余遇降万二千愬入其西得贼将辄释不杀【元和十二年五月淮西骑将李佑率士卒刈麦於张柴村李愬令廌史用诚生擒以归待以客礼】用其策战比有功【比或作皆】十二年八月丞相度至师【或作帅非是】都统弘贲战益急顔胤武合战益用命元济尽并其衆洄曲以备【四月蔡人董昌龄以鄆城降李光顔引兵入据之元济甚惧时董重质将骑军守洄曲元济悉发亲近及守城卒诣重质以拒之洄或作回今按洄与史合】十月壬申愬用所得贼将自文城因天大雪疾驰百二十里用夜半到蔡破其门取元济以献尽得其属人卒辛巳丞相度入蔡【度建彰义军节将降卒万余人入城】以皇帝命赦其人淮西平大飨赉功师还之日因以其食赐蔡人凡蔡卒三万五千其不乐为兵愿归为农者十九【或无归字】悉纵之斩元济京师【济下或有於字十一月丙戌朔御兴安门受淮西之俘以元济徇两市斩之於独柳树】册功弘加侍中愬为左仆射帅山南东道【制加愬检校尚书左仆射襄州刺史充山南东道节度襄邓隋唐复郢均房观察使凉国公】顔胤皆加司空【李光顔乌重胤并检校司空光顔封武威郡公重胤邠国公】公武以散骑常侍帅鄜坊丹延【以宣武军都廌韩公武为检校左散骑常侍鄜州刺史鄜坊丹延节度使】道古进大夫文通加散骑常侍丞相度朝京师进封晋国公【或无国字】进阶金紫光禄大夫以旧官相【度归京师十二月制加彰义军节度申光蔡澠观察使充淮西宣慰处置等使朝议大夫门下侍郎平章事兼蔡州刺史蔡州平策勲进度金紫光禄大夫依前门下侍郎弘文馆大学士仍赐上柱国封晋国公食邑三千户】而以其副摠为工部尚书领蔡任【以蔡州留後马摠检校工部尚书为蔡州刺史彰义节度使】既还奏羣臣请纪圣功被之金石皇帝以命臣愈【或无以字】臣愈再拜稽首而献文曰唐承天命遂臣万邦【或作方】孰居近土袭盗以狂往在玄宗【在方作居云唐人多以在为居公本政亦曰居我其周从是也今按以在为居亦草书之误本政居字已论於本篇方说非是】崇极而圯河北悍骄【安史既平燕赵魏相继而起】河南附起【谓汴蔡之属居河南者】四圣不宥【肃代德顺】屡兴师征有不能尅益戍以兵夫耕不食妇织不裳输之以车为卒赐粮外多失朝旷不岳狩百隶怠官事亡其旧【百隶怠官或作百司隶官亡或作忘】帝时继位【宪宗】顾瞻咨嗟惟汝文武孰恤予家既斩吴蜀旋取山东【吴蜀或作蜀吴取或作出】魏将首义六州降从淮蔡不顺自以为强提兵叫譟欲事故常始命讨之遂连奸邻陰遣刺客来贼相臣【元和十年六月宰相武元衡入朝东平李师道遣刺客暗中突出射之】方战未利内惊京师群公上言【公或作臣】莫若惠来帝为不闻与神为谋乃相同德【乃或作及非是】以乞天诛乃敕顔胤愬武古通咸统於弘【谓以韩弘为都统】各奏汝功【奏

或作走非是】三方分攻【三方即上所言顏胤武攻其北道古攻其东南文通战其东也】五万其师大军北乘厥数倍之常兵时曲【元和十年五月光顏大破贼党於时曲】军士蠹蠹既翦陵云【元和十一年九月光顏奏拔陵云棚】蔡卒大窘胜之邵陵【胜或作遂又作翦】郾城来降自夏入秋复屯相望【入或作及复或作复】兵顿不励告功不时帝哀征夫命相往厘士饱而歌马腾於槽试之新城贼遇败逃尽抽其有聚以防我西师跃入道无留者額額蔡城【书罔昼夜額額注肆恶无休息額与额同】其壇千里【壇或作疆】既入而有莫不顺俟帝有恩言相度来宣诛止其魁释其下人【释其或作释于】蔡之卒夫投甲呼舞蔡之妇女迎门笑语蔡人告饥船粟往哺蔡人告寒赐以缁布【赐以或作诏赐非是】始时蔡人禁不往来今相从戏里门夜开始时蔡人进战退戮今旰而起左殫右粥【旰或作眠殫或作餐旧本皆作殫今按还予授子之粢兮传云餐粢也史记餐未及下咽酒未及濡唇汉书令其裨将传餐则餐字亦有义公祭郑夫人文念寒而衣念饥而餐同以衣对餐也或当作餐】为之择人以收余惫【收或作牧】选吏赐牛教而不税蔡人有言始迷不知今乃大觉羞前之为蔡人有言天子明圣不顺族诛顺保性命汝不吾信视此蔡方孰为不顺往斧其吭【古郎切】凡叛有数声势相倚吾强不支汝弱奚恃其告而长而父而兄【或作及汝父兄】奔走偕来【或作来偕】同我太平淮蔡为乱天子伐之既伐而饥天子活之始议伐蔡卿士莫随既伐四年大小并疑不赦不疑由天子明凡此蔡功惟断乃成既定淮蔡【或作淮蔡既定】四夷毕来【力知切至也还也左氏于思于思弃甲复来】遂开明堂坐以治之

卷三十一

<集部,别集类,汉至五代,东雅堂昌黎集注>

钦定四库全书

东雅堂昌黎集注卷三十一

碑志

南海神庙碑【此碑石刻其首云使持节袁州诸军事守袁州刺史韩愈撰使持节循州诸军事守循州刺史陈谏书并篆额其後云元和十五年十月一日建欧阳公云昌黎集类多讹舛惟南海碑不舛者以石刻人家多有故也石刻与刊本异者今注于下苏内翰尝移书杨康公使迁庙文登因古庙而新之杨不从故苏诗云退之仙人也游戏於斯文笑谈出奇伟鼓舞南海神神或作东】

海於天地间为物最鉅自三代圣王莫不祀事考於传记而南海神次最贵在北东西三神河伯之上号为祝融【太公金匱云南海之神曰祝融东海之神曰勾芒北海之神曰颺顓西海之神曰蓐收今按东海神名阿明南海祝融西海巨乘北海禺强亦见养生杂书然公言南海神次最贵则是据太公书矣】天宝中天子以为古爵莫贵於公侯故海岳之祝【或作祀】牺帛之数放而依之所以致崇极於大神今王亦爵也而礼海岳尚循公侯之事虚王仪而不用非致崇极之意也由是册尊南海神为广利王【天宝十载正月封东海广德王南海广利王西海广润王北海广泽王册诏也】祝号祭式与次俱昇【或作升武德贞观之制四海年别一祭各以五郊迎气日祭之祀官以当界都督刺史充至是封王分命卿监十三人取三月十七日一时备礼兼册制祭其祭仪具开元礼】因其故庙易而新之在今广州治之东南海道八十里扶胥之口黄木之湾常以立夏气至命广州刺史行事祠下事讫驿闻而刺史常节度五岭诸军仍观察其郡邑【唐制岭南为五府而岭南节度使观察四府事】於南方事无所不统地大以远故常选用重人既贵而富且不习海事又当祀时海常多大风将往皆忧戚既进观顾怖悸故常以疾为解【或作辞】而委事於其副其来已久故明宫斋庐上雨旁风无所盖障牲酒瘠酸取具临时水陆之品狼藉笾豆荐裸兴俯不中仪式吏滋不供【滋或作兹供从石本作恭误】神不顾享盲风怪雨【或谓秘阁本盲作蟲字见吕氏春秋考石本只作盲月令盲风至注疾风也山海经符阳之山多怪雨风云之所出也】发作无节人蒙其害元和十二年始诏用前尚书右国子祭酒鲁国孔公为广州刺史兼御史大夫以殿南服【天宝十二载七月以孔戣为岭南节度使殿定也诗殿天子之邦按戣传先是奉诏祷南海神多令从事代祠戣每受诏自犯风波而往韩愈在潮州作诗以美之传所谓诗岂公此作耶殿丁练切】公正直方严中心乐易砥慎所职治人以明事神以诚内外单尽不为表襮至州之明年将夏祝册自京师至吏以时告公乃斋戒视册誓群有司曰册有皇帝名乃上所自署其文

曰嗣天子某谨遣官某敬祭【唐制岳渎以上祝版御署附中使送往其上或有具字或作且字官上或有某字今按其上宜有且字然石本无之不欲增也官上某字石本无之或以为用左传其官臣偃之语】其恭且严如是敢有不承明日吾将宿庙下以供晨事明日吏以风雨白不听於是州府文武吏士凡百数交谒更諫皆揖而退公遂陞舟风雨少弛櫂夫奏功云陰解駁日光穿漏波伏不兴省牲之夕载阳载陰将事之夜天地开除月星明概【几利切说文稠也选何晏景福殿赋概若幽星之纚连李善音古爱切蜀本作概非是】五鼓既作牵牛正中【月令季春之月旦牵牛中上文言立夏行事正此时也】公乃盛服执笏以入即事文武宾属俯首听位各执其职牲肥酒香罇爵静洁降登有数神具醉饱【具或作其】海之百灵秘怪慌惚毕出蜿蜿虵虵来享饮食【慌或作恍虵虵或作蜒蜒享或作慕 蜿音鸳蜒音延】阖庙旋舳【音卢】祥飈送颿【与帆同】旗纛旄麾飞扬晦藹铙鼓嘲轰高管噉噪【音叫】武夫奋櫂工师唱和穹龟长鱼踊跃後先乾端坤倪轩豁呈露祀之之岁【祀之石本作祝令按祝当作祀其理甚明或疑误刻今改从诸本】风灾熄灭人厌鱼蟹五谷胥熟明年祀归【祀诸本石本皆同方作祝误】又广庙宫而大之治其庭坛改作东西两序斋庖之房百用具修明年其时公又固往不懈益岁仍大和耄艾歌咏始公之至尽除他名之税罢衣食於官之可去者四方之使不以资交以身为帅燕享有时赏与以节公藏私蓄上下与足於是免属州负逋之缗钱廿有四万米三万二千斛【廿有四万或作十有八万廿方误作二十三或作八】赋金之州耗金一岁八百困不能偿皆以丐之【丐一作正】加西南守长之俸【西南或作四面】诛其尤无良不听令者由是皆自重慎法人士之落南不能归者与流徙之胄百廿八族用其才良而廩其无告者其女子可嫁与之钱财令无失时【嫁下或有者字石本无方误也时或作所】刑德并流方地数千里不识盗贼山行海宿不择处所事神治人其可谓备至耳矣【或无其字或无耳字】咸愿刻庙石以着厥美而系以诗乃作诗曰

南海陰墟【陰或作之】祝融之宅即祀于旁帝命南伯吏愔不躬正自今公明用享锡右我家邦【右或作佑】惟明天子惟慎厥使我公在官神人致喜海岭之陬既足既濡胡不均弘俾执事枢公行勿迟公无遽归匪我私公神人具依【今按此文石本今最易得而方本失考者凡五条然则它云石本者恐亦不能无谬也】

处州孔子庙碑【此篇方从石本碑记不载年月日第云朝散大夫国子祭酒赐紫金鱼袋韩愈撰公为祭酒在元和十五年】

自天子至郡邑守长通得祀而徧天下者唯社稷与孔子为然而社祭土稷祭谷【为或作焉然字属下句而社方无而字句上方有而字皆非是】句龙与弃乃其佐享非其专主又其位所不屋而坛岂如孔子用王者事巍然当座以门人为配【杜牧云称夫子之尊莫如韩吏部盖公作此碑云社稷不屋而坛孔子用王者事巍然当座以门人为配也张文潜曰庙貌之设起於後世如祭天地亦不屋而坛耳开元二十七年八月追諡孔子文宣王南面而坐以顔子配享】自天子而下北面跪祭【跪祭或作拜跪荐祭】进退诚敬礼如亲弟子者句龙弃以功孔子以德固自有次第哉自古多有以功德得其位者不得常祀句龙弃孔子皆不得位而得常祀然其祀事皆不如孔子之盛【不如或作无如】所谓生人以来未有如孔子者【人或作民以或作已孔或作夫】其贤过於尧舜远者此其效欤【邵太史曰欧阳公平生尊用

韩退之於其学无少异然退之处州孔子庙碑云云永叔作谷城县夫子庙记乃云后之人徒见官为立祠而州县莫不祭之夫子之尊由此为盛甚者乃谓生虽不得位而歿有所享以为夫子荣谓有德之报虽尧舜莫若何其谬论者欤是欧阳以退之为谬矣虽然韩与欧其尊夫子之心则一也严氏曰孟子之文杜牧之云自古称夫子者多矣称夫子之德莫如孟子称夫子之尊莫如韩吏部】郡邑皆有孔子庙或不能修事虽设博士弟子或役於有司名存实亡失其所业独处州刺史邺侯李繁至官【繁邺侯泌之子】能以为先既新作孔子庙又令工改为顔子至子夏十人像【令或作命顔子或作顔回】其余六十子【子上或有二字】及後大儒公羊高左丘明孟轲荀况伏生毛公韩生董生高堂生扬雄郑玄等数十人【贞观二十一年诏左丘明公羊高毛萇郑玄伏胜高堂生等二十二人春秋行释奠之礼而无孟轲荀况韩生董生扬雄等伏生即伏胜毛公即毛萇韩生名婴董生名仲舒高堂生能言礼见汉儒林传】皆图之壁选博士弟子必皆其人又为置讲堂【又为字或在其中字下置或作设】教之行礼肄习其中置本钱廩米令可继处以守庙成躬率吏及博士弟子入学行释菜礼【菜或作奠欧阳曰释奠菜祭之略者也古者士之见师以菜为挚故始入学者必释菜以礼其先师其学官四时之祭乃皆释菜释奠有乐无尸而释菜无乐则又其略也】耆老叹嗟其子弟皆兴於学邺侯尚文其於古记无不贯達故其为政知所先後可歌也已乃作诗曰

惟此庙学邺侯所作厥初庠下【庠音卑又音婢】神不以宇生师所处【生或作先】亦窘寒暑乃新斯宫神降其猷讲读有常不诫用劝揭揭元哲【揭居谒切又音杰又音羯】有师之尊羣圣严严大法以存像图孔肖咸在斯堂以瞻以仪俾不惑忘【惑或作或】後之君子无废成美琢词碑石以赞攸始

柳州罗池庙碑【此篇方从石本罗池神子厚也其碑石本首云尚书吏部侍郎赐紫金鱼袋韩愈撰中书舍人史馆修撰赐紫金鱼袋沈传师书其後云朝议郎桂管观察使试太常寺协律郎上柱国陈曾篆额长庆元年正月十一日桂管都防御先锋兵马使朝散大夫试左卫长史孙季雄建立欧阳集古録罗池碑後题云长庆元年正月建按穆宗实録长庆二年二月传师为中书舍人史馆修撰九月愈迁吏部时愈未为吏部沈亦未为舍人当是长庆二年则二君官正与此碑同其书元年正月盖传模者误按旧史公传云南人妄以柳宗元为罗池神而愈撰碑以寔以盖以是罪公而新史书其事於子厚传无所褒贬元佑七年六月诏赐唐柳州刺史罗池神庙为灵文之庙以郡人言其雨阳应祈故也田表圣书其碑陰云子厚终於柳州以精多魄强为罗池之神昌黎叙其事而铭之大意谓子厚宏深之量昭明之识当为星辰为岳渎胡为在柳州之陋为神其所以推尊甚大石敏若此世以公此文为语怪非也士有抱负不克施遭流落以死为明神烈鬼巍峨庙食理也李卫公甯海上死矣其精魄凜然尚能使犬鼠余党破胆於梦中不然退之岂矫诬柳州以求异乎晁氏曰此非铭罗池神之文吊宗元之文也】

罗池庙者故刺史柳侯庙也柳侯为州【元和十年三月以永州司马柳宗元为柳州刺史】不鄙夷其民动以礼法三年民各自矜奋【下或有曰字 今按宜有曰字然石本无之不欲补也】兹土虽远京师吾等亦天氓今天幸惠仁侯若不化服我则非人於是老少相教语莫违侯令凡有所为於其乡闾及於其家皆曰吾侯闻之得无不可於意否莫不忖度而後从事凡

令之期民劝趋之无有後先必以其时於是民业有经公无负租流逋四归乐生兴事宅有新屋步有新船【步或作涉柳子厚铁炉步志曰江之浒凡舟可泝而上下曰步今按孔戣志亦有泊步字】池园洁修猪牛鸭鸡肥大蕃息子严父诏妇顺夫指嫁娶葬送各有条法出相弟长入相慈孝先时民贫以男女相质久不得赎尽没为隶我侯之至按国之故以佣除本悉夺归之大修孔子庙城郭巷道皆治使端正【巷道或作道巷】树以名木柳民既皆悦喜尝与其部将魏忠谢宁欧阳翼饮酒驿亭【尝或作常】谓曰吾弃於时而寄於此与若等好也明年吾将死死而为神後三年为庙祀我及期而死【元和十四年十月宗元卒】三年孟秋辛卯【长庆三年也】侯降于州之後堂欧阳翼等见而拜之其夕梦翼而告曰馆我於罗池其月丙辰庙成大祭过客李仪醉酒慢侮堂上得疾扶出庙门即死明年春魏忠欧阳翼使谢宁来京师请书其事于石余谓柳侯生能泽其民死能惊动福祸之以食其土【福祸或作祸福】可谓灵也已作迎享送神诗遗柳民俾歌以祀焉而并刻之柳侯河东人讳宗元字子厚贤而有文章尝位於朝光显矣已而摈不用其辞曰

荔子丹兮蕉黄【蕉下或有叶字或有子字】杂肴蔬兮进侯堂侯之船兮两旗度中流兮风泊之待侯不来兮不知我悲侯乘驹兮入庙慰我民兮不嘖以笑鵝之山兮柳之水桂树团团兮白石齿齿侯朝出游兮暮来归春与猿吟兮秋鹤与飞【或作秋与鹤飞今按欧公以此句为石本之误沈存中云非也倒用鹤与两字则语势愈健如楚词云吉日辰良也但此石本团团字初误刻作团圆後鑄改之今尚可见则亦石本不能无误之一证也】北方之人兮为侯是非千秋万岁兮侯无我违福我兮寿我驱厉鬼兮山之左下无苦湿兮高无乾秔稌充羨兮【秔音庚稌徒古切又音土】蛇蛟结蟠我民报事兮无怠其始自今兮钦于世世

黄陵庙碑【此篇方从石本曾子开曰湘水出全潇水出道二水至永合而为一以入洞庭黄陵庙在潇湘之尾洞庭之口孙氏曰庙在潭州之湘陰县北八十里或云在岳州首题云通议大夫守尚书兵部侍郎上柱国赐紫金鱼袋韩愈撰正议大夫守潭州刺史兼御史中丞湖南都团练观察安抚使上柱国赐紫金鱼袋沈传师书今本多误据欧阳公集古録云当以碑为正】

湘旁有庙曰黄陵【笔墨闲録云黄陵庙碑首言湘旁即龟策传言江旁老人也】自前古以祠尧之二女舜二妃者庭有石碑【石或作古或无此字】断裂分散在地其文剥缺考图记言汉荆州牧刘表景升之立【表字景升东汉末为荆州刺史】题曰湘夫人碑今验其文乃晋太康九年又其额曰虞帝二妃之碑非景升立者秦博士对始皇帝云湘君者尧之二女舜妃者也【事见史记秦始皇廿七】刘向郑玄亦皆以二妃为湘君而离骚九譌既有湘君又有湘夫人王逸之解以为湘君者自其水神而谓湘夫人乃二妃也从舜南征三苗不及【或作返据下文当作及】道死沅湘之间山海经曰洞庭之山帝之二女居之郭璞疑二女者帝舜之后【石本书璞作朴唐人多然下文揭阳亦作榻阳】不当降小水为其夫人【小水或作小君考山海经作小水是也】因以二女为天帝之女以余考之璞与王逸俱失也尧之长女娥皇为舜正妃故曰君其二女女英自宜降曰夫人也故九譌辞谓娥皇为君谓女英帝子【帝上或有为字】各以其盛者推言之也礼有小君君母明其正自得称君也【或无君母二字】书曰舜陟方乃死传谓舜昇道南方以死【昇或作升】或又曰舜死葬苍梧二妃从

之不及溺死沅湘之间余谓竹书纪年【纪年书名晋太康元年汲郡人发冢得之起夏殷至魏哀王以竹简写之故谓之竹书】帝王之没皆曰陟陟昇也谓昇天也书曰殷礼陟配天言以道终其德協天也书纪舜之没云陟者与竹书周书同文也其下言方乃死者所以释陟为死也地之势东南下如言舜南巡而死宜言下方不得言陟方也以此谓舜死葬苍梧於时二妃从之不及而溺者皆不可信【溺下或有死字】二妃既曰以谋语舜脱舜之厄成舜之圣尧死而舜有天下为天子二妃之力宜常为神食民之祭今之渡湖江者莫敢不进礼庙下【湖或作潮非是又或作湘】元和十四年春余以言事得罪黜为潮州刺史其地於汉南海之揭阳【汉地理志南海郡有唐为潮州揭阳县至石本揭作揭音竭】厉毒所聚惧不得脱死过庙而禱之其冬移袁州刺史明年九月拜国子祭酒【元和十四年十月以赦令量移袁州明年九月自袁州召为国子祭酒】使以私钱十万抵岳州愿易庙之圯桷腐瓦於刺史王堪【刺史王堪上或有州字】长庆元年刺史张愉自京师往与愉故善【与上或有余字今按此合有余字然石本无之不欲补也】谓曰丐我一碑石载二妃庙事且令後世知有子名愉曰诺既至州报曰碑谨具遂篆其事俾刻之

唐故江南西道观察使中大夫洪州刺史兼御史中丞上柱国赐紫金鱼袋赠左散骑常侍太原王公神道碑铭【王仲舒为连州司户公令连之阳山仲舒观察江西公为袁州刺史公既为作燕喜亭记修滕王阁记今志其墓又书神道碑新史并取公碑志作传】

王氏皆王者之後在太原为姬姓【或无之字周灵王太子晋以直谏废为庶人时人号曰王家因以为氏】春秋时王子成父败狄有功【左氏文十一年鄭瞞侵齐王子成父获其弟曰荣如】因赐氏厥後世居太原至东汉隐士烈【烈字彦方东汉有传】博士徵不就居祁县【後汉徵君霸始居太原霸子殷别居祁县】因号所居乡为君子【下或有乡字】公其君子乡人也魏晋涉隋世有名人国朝大王父玄暕【古限切】历御史属三院止尚书郎【三院谓侍御史殿中侍御史监察御史玄暕终比部员外郎】生景肃守三郡终傅凉王生政襄邓等州防御使鄂州采访使赠吏部尚书公尚书之弟某子公讳仲舒字弘中【蜀作讳弘中字某後墓志同今按上句已有公字此不当再出当删然无别本可据姑存之】少孤奉母夫人家江南读书着文其誉蔼鬱当时名公皆折官位辈行【下浪切】愿为交贞元初射策拜左拾遗【贞元十年十二月仲舒中贤良方正直言极谏科起拜拾遗】与阳城合遏裴延龄不得为相德宗初怏怏无奈久而嘉之【或无而字之或作其下又有直字】其後入合德宗顾列谓宰相曰第几人必王某也果然月余特改右补阙【或无右字】迁礼部考功吏部三员外郎在礼部奏议详雅省中伏其能【伏或作服】在考功吏部提约明故吏无以欺同列有恃恩自得者衆皆媚承公嫉其为人不直视【或作人字】由此贬连州司户【贞元十九年王叔文用事弘中自吏部员外郎责连州司户】移夔州司马又移荆南因佐其节度事【或无事字】为参谋【为荆南节度裴均参谋】得五品服放迹在外积四年元和初收拾俊贤徵拜吏部员外郎未几为职方郎中知制诰友人得罪斥逐後其家亲知过门缩颈不敢视公独省问为计度论议直其冤由是出为峡州刺史【峡或作硤友人杨凭也】转庐州未至丁母夫人忧服除又为婺州时疫旱甚人死亡且尽公至多方救活天遂雨疫定比数年里闾完复制使出巡人填道迎显公德【显或作颂】事具闻就加金紫转苏州变其屋居以絶火延堤松江路害絶阻滯【火上或有其字阻或作沮】秋夏赋调自为书与人以期吏无及门

而集政成为天下守之最【政或作化】天子曰王某之文可思最宜为诰有古风岂可久以吏事役之复拜中书舍人既至京师侪流无在者视同列皆邈然少年益自悲而谓人曰岂可复治笔砚於其间哉上若未弃臣宜用所长在外久周知俗之利病【或无利字非是】俾治之当不自愧宰相以闻遂得观察江南西道【元和十五年六月除江西观察使】奏罢榷酤钱九千万【千或作十】军息之无已掌吏坏产犹不释囚之公至脱械不问人遭水旱赋窘公曰我且减燕乐絶他用钱可足乎遂以代之【或无足字代下无之字】罢军之息钱【息上或有日字】禁浮屠诳诱坏其舍以葺公宇三年法大成钱余於库粟余廩【廩上或有於字】人享於田庐讴謡於道途天子复思且徵以代虚吏部左丞位以待之长庆三年十一月十七日薨於洪州年六十二上哀恻辍朝赠左散骑常侍某日归葬於某处【长庆四年二月葬河南葬下或无於字】某既以公之德刻而藏之墓矣子初又请诗以揭之【仲舒七子初哲贞弘泰复洄既上或无某字某或作愈】词曰

生人之治本乎斯文有事其末而忘其源切近昧陋道由是堙有志其本而泥古陈当用而迂乖戾不伸较是二者其过也均有美王公志儒之本達士之经秩秩而积涵涵而停鞞为华英【鞞为诸本作鞞而华英作英华】不矜不盈孰播其馨孰发其明介然而居士友以倾敷文帝阶擢列侍从以忠远名有直有讽辨遏坚恳【或作圣邈】巨邪不用秀出班行乃动帝目帝省竭心恩顾日渥翔于郎署騫于禁密发帝之令简古而蔚不比于权以直友冤敲撼挫握竟遭斥奔久淹于外历守大藩所至极思必悉利病萎枯以膏燠喝以醒【喝或作阳】坦之敞之必絶其径浚之澄之使安其泳帝思其文复命掌诰公潜谓人此职宜少岂无凋郡庸以自效上藉其实【藉或作籍】俾统于洪逋滯攸除奸讹革风祛蔽于目释负于躬方乎所部【乎或作平】禁絶浮屠风雨顺易秔稻盈畴人得其所乃恬乃讴【所或作饶讴或作謡】化成有代思以息劳虚位而埃奄忽滔滔【奄忽或作勿随】维德维绩志于斯石日远弥高【方云此铭有美王公不用韵末章三语分两韵例又异也今按铭之卒章绩石二句虽自叶韵而末句高字仍与劳滔韵叶非有异也】

卷三十二

钦定四库全书

东雅堂昌黎集注卷三十二

碑志

司徒兼侍中中书令赠太尉许国公神道碑铭【韩弘新史有传多取碑词传间有误处当以碑为正盖淮西之役弘为行营都统公为行军司马其知弘非一日也】

韩姬姓以国氏【国下或有为字 今按以国氏春秋传语唐韵云韩姓出自唐叔虞之後曲沃桓叔之子万食邑於韩因以为氏】其先有自颍川徙阳夏者【夏音假】其地於今为陈之太康【秦灭韩以其地为颍川郡阳夏隋改为太康】太康之韩【新旧史皆言弘滑州匡城人】其称盖久然自公始大着公讳弘公之父曰海为人魁伟沈塞以武勇游仕许汴之间寡言自可与人交衆推以为钜人长者【交或作校以上文自可言之作不与人交为是今以下文长者言之又似作不与人校为是更详之钜上或无为字或无以钜人三字而为上有之字或并无以为钜人四字】官至游撃将军赠太师娶乡邑刘氏女生公是为齐国太夫人夫人之兄曰司徒玄佐【复出夫人字或作齐国】有功建中贞元之间【功下或有於字】为宣武军帅有汴宋亳颍四州之地兵士十万人公少依舅氏读书习骑射事亲孝谨侃侃自将【侃侃或作侃字侃与侃同】不纵为子弟华靡邀放事【纵或作从】出入敬恭军中皆目之尝一抵京师就明经试退曰此不足发名成业复去从舅氏学将兵数百人【兵下或有将字】悉识其材鄙怯勇指付必堪其事司徒叹奇之士卒属心【属之欲切】诸老将皆自以为不及【或无皆字】司徒卒【贞元八年二月玄佐卒】去为宋南城将【玄佐卒年四月以其子士宁代为使九年十二月军乱逐士宁以副使李万荣为使弘出为宋州南城将】比六七岁汴军连乱不定贞元十五年刘逸淮死【九月刘卒】军中皆曰此军司徒所树必择其骨肉为士卒所慕赖者付之【肉下或有而字】今见在人莫如韩甥且其功最大而材又俊即柄授之而请命於天子天子以为然遂自大理评事拜工部尚书代逸淮为宣武军节度使【弘事逸淮为都知兵马使逸淮死汴军怀玄佐之惠以弘长厚共请为留後环监军请表其事朝廷许之自试大理评事检校工部尚书充宣武军节度副大使知节度事】悉有其舅司徒之兵与地【其舅或作舅氏】当此时陈许帅曲环死而吴少诚反【或无而字】自将围许求援於逸淮?之以陈归汴使数辈在馆公悉驱出斩之选卒三千人会诸军撃少诚许下少诚失势以走河南无事公曰自吾舅歿五乱於汴者吾苗薶而髮栳之几尽【苗薶而髮栳之淮南子语 薶呼豪切】然不一揃刈不足令震駭【不下或无一字駭或作骇】命刘锬以其卒三百人待命于门数之以数与於乱【上数上声下数入声与音预】自以为功并斩之以徇血流波道自是讫公之朝京师廿有一年莫敢有讙呶叫号于城郭者【讙音欢呶尼交切】李师古作言起事【作或作诈】屯兵于曹以吓滑师且告假道公使谓曰汝能越吾界

而为盗邪【盗上或无为字】有以相待无为空言滑师告急【师或作帅前滑帅字疑亦当作师急或作及】公使谓曰吾在此公无恐【无上或有安字】或告曰翦棘夷道兵且至矣请备之公曰兵来不除道也不为应【为下或有之字】师古诈穷变索迂延旋军少诚以牛皮鞬材遗师古师古以盐资少诚潜过公界觉皆留输之库曰此於法不得以私相馈田弘正之开魏博【元和七年十月以田弘正为魏博节度使】李师道使来告曰【元和元年閏六月东平帅李师古卒其弟师道代之】我代与田氏约相保援今弘正非其族【非其或作其非非是】又首变两河事亦公之所恶我将以成德合军讨之敢告公谓其使曰我不知利害知奉诏行事耳若兵北过河我即东兵以取曹【兵以或作以兵非是】师道惧不敢动弘正以济诛吴元济也命公都统诸军【元和十年九月以弘充淮西行营都统使】曰无自行以遏北寇公请使子公武以兵万三千人会讨蔡下归财与粮以济诸军卒擒蔡奸【三千淮西碑作二千】於是公为侍中而以公武为鄜坊丹延节度使【元和十二年十一月録平淮西功加弘检校司徒兼侍中封许国公罢都统公武检校左散骑常侍充节度使】师道之诛公以兵东下进围考城克之遂进迫曹曹寇乞降郢部既平公曰吾无事於此其朝京师天子曰大臣不可以暑行其秋之待公曰君为仁臣为恭可矣遂行既至献马三千匹绢五十万匹【五十或作七十】他锦纨绮纈又三万金银器千而汴之库廩钱以贯数者尚余百万绢亦合百余万匹马七千粮三百万斛兵械多至不可数初公有汴【初公下或有之字】承五乱之後掠赏之余且歛且给恒无宿储【无上或有恒字】至是公私充塞至於露积不垣册拜司徒兼中书令【弘三上章坚辞戎务愿留京师奉朝请八月守司徒兼中书令】进见上殿拜跪给扶赞元经体【元下或有老字非是】不治细微天子敬之元和十五年今天子即位公为冢宰【元和十五年正月穆宗即位以弘摄冢宰】又除河中节度使【元和十五年六月以本官为河中尹河中晋绛节度观察等使】在镇三年以疾乞归复拜司徒中书令【长庆三年请罢戎镇三表从之十月依前守司徒兼中书令】病不能朝以长庆二年十二月三日薨於永崇里第年五十八天子为之罢朝三日【年五十八或作年八十考新旧史定从今本或无天子为之四字】赠太尉赐布粟【或作布帛按旧史实赐米千石赐下或有之字】其葬物有司官给之京兆尹监护明年七月某日葬于万年县少陵原京城东南三十里楚国夫人翟氏祔子男二人长曰肃元某官次曰公武某官肃元早死【或作歿】公之将薨公武暴病先卒公哀伤之月余遂薨无子以公武子孙绍宗为主後汴之南则蔡北则郢二寇患公居间为已不利卑身佞辞【卑或作毕】求与公好荐女请昏使日月至既不可得则飞谋钓谤以间染我公先事候情【至既或作既至非是不可下或无得字钓或作鈎染或作谍先事候情或作先得事情侯或作後】坏其机牙奸不得发王诛以成最功定次孰与高下公子公武与公一时俱授弓钺处藩为将疆土相望公武以母忧去镇公母弟充自金吾代将渭北【元和十二年十一月以公武为渭北鄜坊节度使十四年十一月以母忧去官十五年正月以弘弟充代公武镇渭北】公以司徒中书令治蒲于时弟充自郑滑节度平宣武之乱以司空居汴【长庆二年七月汴州逐节度李愿立牙将李芥为留後充自义成节度徙镇宣武八月汴州监军斩芥降充入汴州诏加充检校司空】自唐以来莫与为比公之为治严不为烦止除害本不多教条与人必信吏得其职赋入无所漏失人安乐之在所以富公与人有畛域【畛或作軫非是】不为戏狎人得一笑语重於金帛之赐其罪杀人不发声色问法何如不自为轻重【或无自为字非是】故无敢犯者其铭曰在贞元世汴兵五獬【居例切狂犬也】将得其人衆乃一愒【愒息也与憩同诗不尚愒焉】

謁丘例切】其人为谁韩姓许公礪其梟狼【礪陟格切】养以雨风桑穀奋张厥壤大丰贞元元孙【贞元皇帝之孙宪宗】命正我字公为臣宗处得地所河流两壩【壩江河边地前汉坐侵庙壩为宫壩而缘切】盗连为群雄唱雌和首尾一身公居其间为帝督奸察其嚙呻与其睨眊【淮南子视焉无眊邪视也睨音诣眊音苟】左顾失视右顾而踞【巨几切】蔡先郢鉏三年而墟槁乾四呼终莫敢濡常山幽都【常山成德军幽都幽州也】孰陪孰扶【陪或作悖或作倚】天施不留其讨不通许公预焉其赍何如【赍或作赖】悠悠四方既广既长无有外事朝廷之治许公来朝车马干戈相乎将乎威仪之多将则是矣相则三公释师十万归居庙堂上之宅忧【上谓穆宗】公让太宰养安蒲坂【元和十五年六月出镇河中】万邦絶等有弟有子提兵守藩一时三侯人莫敢扳【春秋传扳引而立之与攀同又音班】生莫与荣歿莫与令刻文此碑以鸿厥庆

柳子厚墓志铭【此志作於袁州公之志子厚详矣其祭文推许尤厚刘梦得序子厚集曰子厚之丧昌黎韩退之志其墓且以书来吊曰哀哉若人之不淑吾尝评其文雄深雅健似司马子长崔蔡不足多也安定皇甫湜於文章少推许亦以退之之言为然】

子厚讳宗元七世祖庆为拓跋魏侍中【或无拓跋二字】封济陰公【庆字更兴河东解人仕周为宜州刺史封平齐县公】曾伯祖奭为唐宰相与褚遂良韩瑗俱得罪武后死高宗朝【高或作中朝或作时】皇考讳镇以事母弃太常博士求为县令江南其後以不能媚权贵失御史【肃宗平贼镇上书言事擢左卫率府兵曹佐郭子仪朔方府三迁殿中侍御史以事触窦参贬夔州司马】权贵人死乃复拜侍御史号为刚直所与游皆当世名人【游上或无与字】子厚少精敏无不通達逮其父时虽少年已自成人能取进士第崭然见头角【崭士或切又士减切】衆谓柳氏有子矣其後以博学宏词授集贤殿正字【或作授校书郎柳集可考或本非是此下或有蓝田尉三字今按三字下文已见不当重出】僞杰廉悍议论证据今古【或作古今】出入经史百子踔厉风发【踔勅角切】率常屈其座人名声大振一时皆慕与之交诸公要人争欲令出我门下交口荐誉之贞元十九年由蓝田尉拜监察御史顺宗即位拜礼部员外郎遇用事者得罪例出为刺史【或作贞元十九年拜监察御史王叔文韦执谊用事拜尚书礼部员外郎且将大用遇叔文等败例出为御史今按方本得婉微之体它本则几乎骂矣疑初本直书後乃更定也若从初本则上文须补蓝田尉三字】未至又例贬州司马【州上或有永字永贞元年八月宪宗即位贬叔文渝州司户参军九月宗元与同辈七人皆坐王叔文党同贬宗元邵州刺史十一月道贬永州司马】居闲益自刻苦务记覽为词章泛滥停蓄为深博无涯涘而自肆於山水间【水下或有之字】元和中尝例召至京师又偕出为刺史而子厚得柳州【元和十年三月以永州司马柳宗元为柳州刺史】既至叹曰是岂不足为政邪因其土俗为设教禁州人顺赖其俗以男女质钱约不时赎子本相侔则没为奴婢子厚与设方计悉令赎归其尤贫力不能者令书其佣足相当则使归其质观察使下其法於他州比一岁免而归者且千人衡湘以南为进士者皆以子厚为师其经承子厚口讲指画为文词者悉有法度可观【东坡至广州寄二子诗云莫学柳仪曹诗书教蛮獠事本於此】其召至京师而复为刺史也中山刘梦得禹錫亦在遣中当诣播州子厚泣曰播州非人所居而梦得亲在堂吾不忍梦得之穷无辞以白其大人且万无母子俱往理请於朝将拜疏愿以柳易播虽重得罪死不恨遇有以梦得事白上者梦得於是改刺连州【白上或作

上白改下或无刺字】呜呼士穷乃见节义今夫平居里巷相慕悦酒食游戏相徵逐谄谀强笑语以相取下握手出肺肝相示指天日涕泣誓生死不相背负真若可信一旦临小利害仅如毛髮比反眼若不相识落陷穽不一引手救反挤之【救下或有而字】又下石焉者皆是也此宜禽兽无知所不忍为而其人自视以为得计闻子厚之风亦可以少媿矣【少上或无以字】子厚前时少年勇於为人不自贵重顾藉谓功业可立就故坐废退既退又无相知有气力得位者推挽故卒死於穷裔【死或作厄】材不为世用道不行於时也【道上或有而字】使子厚在台省时自持其身已能如司马刺史时亦自不斥斥时有人力能举之且必复用不穷【时有或作而有能或作解或能下复出解字皆非是】然子厚斥不久穷不极虽有出於人其文学辞章必不能自力以致必传於後如今无疑也【力以或作以力或作以力而无致必二字皆非是】虽使子厚得所愿为将相於一时以彼易此孰得孰失必有能辨之者子厚以元和十四年十一月八日卒年四十七以十五年七月十日归葬万年先人墓侧【十一月八日或作十月五日七月上或有秋字或无十日字】子厚有子男二人长曰周六始四岁季曰周七子厚卒乃生【咸通四年右常侍萧仿知举试谦光赋澄心如水诗中第者二十五人柳告第三人韩绶第八人告即子厚之子字用益绶即退之之孙】女子二人皆幼其得归葬也费皆出观察使河东裴君行立【费或作资】行立有节槩立然诺【下立字或作重】与子厚结交子厚亦为之尽竟赖其力葬子厚於万年之墓者舅弟卢遵遵涿人【涿或作可或作为】性谨慎学问不厌自子厚之斥遵从而家焉【或无焉字】逮其死不去既往葬子厚又将经纪其家庶几有始终者铭曰

是惟子厚之室既固既安以利其嗣人【下既字或作且】

唐故昭武校尉守左金吾卫将军李公墓志铭【李道古曹成王皐之子公尝铭曹成王碑新史附皐传後而载荐柳贲事少加详焉】

公讳道古字某曹成王子【成王三子象古道古复古】其先王明以太宗子王曹絕辄复封五世而至成王成王讳皐【王讳上或无成字非是】有功建中贞元间以多才能行赏诛为名至今追数当时内外文武大臣成王必在其间【或无成王字数所矩切】公以进士举及第【贞元五年登第】献文輿三十卷拜校书郎集贤学士四迁至宗正丞宪宗即位选擢宗室迁尚书司门员外郎以选为利随唐睦州刺史迁少宗正元和九年以御史中丞持节镇黔中【贞元八年十月自宗正少卿出为黔中观察使】十一年来朝迁镇鄂州【贞元十一年鄂岳观察使柳公绰为飞譖上闻会道古自黔中来朝即以为鄂岳沔蕲安黄团练观察使代公绰】以鄂岳道兵会平淮西以功加御史大夫十三年徵拜宗正转左金吾上即位以先朝时尝信妄人柳泌能烧水银为不死药荐之【泌或作贲经云新旧史李干墓志石本皆作泌】泌以故起閭閻氓为刺史不效贬循州司马其年九月三日【月下或有十字】以疾卒于贬所年五十三长庆元年诏曰左降而死者还其官以葬遂以其年某月日葬于东都某县【其年或作某年月上无某字】公三娶元配韦氏讳修修生子紘【修或并作循】紘为进士学【或作举】女贡嫁崔氏夫人隋雍州牧郕公【郕音云】叔裕五世孙【叔裕字孝寬京兆杜陵人周大象二年十一月卒赠雍州牧】父士佺【且缘切】蓬山令次配崔氏讳药【白芷其叶谓之药药乙角切又音药】生綽绍綽女会嫁郑氏季毗夫人父昭尝为京兆尹

【大历三年五月昭自左散骑常侍为尹】今夫人韦氏无子父光宪光禄卿其葬用古今礼以元配韦氏夫人祔而葬次配崔氏夫人於其域异墓【或无用古今礼至而葬十四字非是】公宗室子生而富贵【或无生字非是】能学问以中科取名善自倾下以交豪杰身死卖宅以葬铭曰

太支於今其尚有封【太或作本非是太谓太宗也尚或作上】当公弟兄【或作兄弟】未续又亡其迁于南年及始衰谁黜不复【谁或作虽】而以丧归海丰弥弥万里于畿载其始终以哀表之

唐故朝散大夫尚书库部郎中郑君墓志铭【公在江陵与郑羣同官诗有郑羣赠簟即其人至是铭之】

君讳羣【君或作公】字弘之世为荥阳人其祖於元魏时有假封襄城公者【郑伟字子直西魏大统中封襄城郡公】子孙因称以自别【此下或有君其後也四字今按下文有君其季也此有则不应重出】曾祖匡时晋州霍邑令祖千寻彭州九陇丞父廸鄂州唐年令娶河南独孤氏女生二子君其季也以进士选【以上或有君字】吏部考功所试判为上等授正字自鄆县尉拜监察御史佐鄂岳使【鄆县属京兆府】裴均之为江陵【贞元十九年五月均自荆南行军司马为本军节度使均字君齐河东开喜人】以殿中侍御史佐其军均之徵也【之徵或作户徵非是元和三年四月召均为尚书左仆射】迁虞部员外郎均镇襄阳【九月加均同平章事为山南东道节度使】复以君为襄府左司马刑部员外郎副其支度使事均卒李夷简代之【元和六年四月以夷简代均镇襄阳五月均卒】因以故职留君岁余拜复州刺史迁祠部郎中【迁上或有方字非是】会衢州无刺史方选人君愿行【或无会字或无方字君愿行作行愿者】宰相即以君应诏治衢五年复入为库部郎中行及扬州遇疾居月余【或无居字】以长庆元年八月二十四日卒春秋六十即以其年十一月二十二日从葬於郑州广武原先人之墓次君天性和乐居家事人与待交游初持一心未尝变节有所缓急曲直薄厚踈数也【数音朔】不为翕翕热亦不为崖岸斩絶之行【热或作然斩或作崱】俸禄入门与其所过逢吹笙弹箏饮酒舞歌诙调醉呼连日夜不厌费尽不复顾问【或无此上六字】或分挈以去一无所爱惜不为後日毫髮计留也遇其空无时客至清坐相看或竟日不能设食【看或作对看下或无或字】客主各自引退亦不为辞谢与之游者自少及老未尝见其言色有若忧叹者岂列御寇庄周等所谓近於道者邪其治官守身又极谨慎不挂於过差去官而人民思之身死而亲故无所怨议哭之皆哀又可尚也初娶吏部侍郎京兆韦肇女【肇京兆人大历中为中书舍人累上疏言得失为元载所恶左迁京兆少尹载卒除吏部侍郎卒】生二女一男长女嫁京兆韦词次嫁兰陵萧儋【词或作嗣宗儋或作赞】後娶河南少尹赵郡李则女生一女二男其余男二人女四人【四或作一】皆幼嗣子退思韦氏生也铭曰

再鸣以文进涂辟【再鸣谓进士及书判拔萃也】佐三府治謁厥蹟【三府谓鄂岳江陵襄府】郎官郡守愈着白【官或作中】洞然浑朴絶瑕谪【朴或作璞】甲子一终反玄宅

唐故朝散大夫越州刺史薛公墓志铭【薛戎元稹为神道碑而公志其墓公尝为河南与薛为代故志及之】

公讳戎字元夫【河中宝鼎人】其上祖懿为晋安西将军实始居河东公之四世祖嗣汾陰公讳德儒【汾陰河中县也後名宝鼎】为隋襄城郡书佐以卒【隋上或无为字】襄城有子二人皆贵【二人宝积宝胤】其後皆蕃以大而其季尤盛官至邠州刺史邠州讳宝胤有子九人【续纯绚绾绘紘縉绦縑】皆有名位其最季讳縑为河南令以卒【縑或作谦世系表作縑】河南有子四人其长讳同卒官湖州长史赠刑部尚书尚书娶吴郡陆景融女有子五人【人丹戎放朗】皆有名蹟其達者四人【人温州刺史丹庐州刺史戎浙东观察使放江西观察使】公於伦次为中子仁孝慈爱忠厚而好学不应徵举沈浮闾巷间不以事自累为贵【戎少有学术不求闻達居於毗陵之阳羨山年四十余不易其操】常州刺史李衡迁江西观察使曰【使下或有日字无日字】州客至多莫贤元夫吾得与之俱足矣即署公府中职公不辞让【李衡为常州刺史能以礼下戎贞元八年二月衡自湖南移镇江西辟为从事使者三返乃应】年四十余始脱褐衣为吏衡迁给事中齐映自桂州以故相代衡为江西公因留佐映治【贞元八年六月以桂管观察使故相齐映代衡镇江西召衡为给事中映重戎留之桂或作睦考传当作桂治或作始属下文非是】映卒【贞元十一年七月映卒戎复归阳羨】湖南使李巽福建使柳冕交表奏公自佐诏以公与冕【贞元十一年三月以柳冕为福建观察使表戎为判官】在冕府累迁殿中侍御史冕使公摄泉州冕文书所条下有不可者公辄正之冕恶其异於已怀之未发也遇马摠以郑滑府佐忤中贵人贬为泉州别驾冕意欲除摠附上意为事使公按置其罪公叹曰公乃以是待我我始不愿仕者正为此耳不许冕遂大怒囚公於浮图寺而致摠狱事闻远近值冕亦病且死不得已俱释之冕死後使至奏公自副【冕卒阎济美代冕使福建奏戎为团练副使】又副使事於浙东府【济美使浙东戎又副之】转侍御史元和四年徵拜尚书刑部员外郎【给事中穆质有直气爱戎称於朝因拜刑部员外郎】迁河南令历衢湖常三州刺史所至以廉贞寬大为称朝廷嘉之某年拜越州刺史兼御史中丞浙东观察使【某年或作元和十二年正月二十二日方云前已云元和四年此不当复出年号它铭亦无书除授月日者或本非是史下方无兼字】至则悉除去烦弊俭出薄入以致和富部刺史得自为治无所牵制四境之内竟岁无一事公笃於恩义尽用其禄以周亲旧之急有余颁施之内外交无疎远皆家归之疾病去官长庆元年九月庚申至於苏州以卒春秋七十五【卒上或有病字】奏至【或无此二字】天子为之罢朝赠左散骑常侍使临吊祭之士大夫多相吊者【大夫或作人】以其年十一月庚申葬于河南偃师先人之兆次以韦氏夫人祔【其或作明】公凡再娶先夫人京兆韦氏後夫人赵郡李氏皆先卒子男二人曰沂【或作沂世系表作沂】曰洽长生九岁而幼七岁矣女四人皆已嫁愈既与公诸昆弟善又尝代公令河南【公尝令河南与薛为代】公之葬也故公弟集贤殿学士尚书刑部侍郎放属余以铭【故字疑当在上文公之字上刑或作兵】其文曰薛氏近世莫盛公门公伦五人咸有显闻公之初志不以事累【或作不累以事】僂俛以随亦贵於位无怨无恶中以自宝【或作中人以自此文四句一韵古音宝与寿叶宝或作贵或作实】不能百年曷足谓寿公宜有後有二稚子其佑成之公食庙祀

卷三十三

钦定四库全书

东雅堂昌黎集注卷三十三

碑志

楚国夫人墓志铭【夫人许国公韩弘妻也夫人之葬以长庆二年三月时公武尚执丧不变许国以是年十二月薨则公武已死矣许国之志详焉】

楚国夫人姓翟氏故检校御史大夫宋州刺史良佐之女今司徒兼中书令许国公之妻【或无今字】前鄜坊节度使散骑常侍兼御史大夫公武之母【坊或作州非是鄜音孚】夫人在家以孝友聪明为父母所偏爱选所宜归以适韩氏韩氏族大且贵又太尉刘公甥【刘玄佐之甥又或作父非是公下或有之字】内外尊显夫人入门上下莫不赞贺【或作美】事皇姑齐国太夫人【太夫人弘母刘氏也玄佐之妹】肃恭诚至奉养不怠皇姑以夫人能尽妇道称之六亲【能上或有为字】其事夫义以顺其教子爱以公司徒公曰我之能守贵富不危溢者楚国有助焉耳大夫领梁偏师卒就蔡功受节居藩为邦家令人父母之教然也夫人以元和十四年十一月一日薨于鄜之公府春秋若干大夫委节去位奉丧以居东都诏起之【起上或有再字】辞以羸毁不仕即命又加喻勉固不变【固下或有守字】天子嗟叹之长庆二年三月某日葬夫人于洛阳北山夫人生二子长曰肃元为太子司议郎以卒赠尚书主客郎中其次大夫公武也铭曰

翟氏之先盖出宗周【元和姓纂云翟黄帝之後代居翟地後为晋所灭】璜显於魏【翟璜佐魏文侯】以佐文侯高陵相汉【汉成帝时翟方进封高陵侯】义以家酬【翟义也】迁于南阳始自郎苗逮魏晋宋代不絶史以至夫人太守之子司徒之妻大夫之母公居河东【公或作父非是】子在鄜時【史记秦文公梦黄蛇自天下属地其口止於鄜衍於是作鄜時祭白帝今之鄜州盖取名於此】为王屏翰有壤千里公曰姑止以承我祀子曰母兮莫我抚已【莫我或作莫慰】文驷雕轩往来有炜莫尊於母莫荣於妻从古迄今孰盛与夷用昭厥裔篆此铭诗

唐故国子司业窦公墓志铭【公尝有送窦平从事序谓其族人殿中侍御史牟合东都之交游能文者赋诗以赠之必此司业公也序称殿中侍御史而志不载若可疑焉考志载其两佐东都留守则序所谓合东都之交游即司业明矣】

国子司业窦公讳牟字某【京兆金城人或作字贻周】六代祖敬远尝封西河公大父同昌司马比四代仍袭爵名【代或作世】同昌讳胤生皇考讳叔向官至左拾遗溧水令赠工部

尚书尚书於大历初名能为诗文及公为文亦最长於诗孝谨厚重举进士登第【孝谨厚重又作孝爱谨厚贞元三年进士】佐六府五公八迁至检校虞部郎中【或无虞部字】元和五年真拜尚书虞部郎中转洛阳令都官郎中泽州刺史以至司业年七十四【牟生於天宝八年】长庆二年二月丙寅以疾卒其年八月某日葬河南偃师先公尚书之兆次初公善事继母家居未出学问於江东尚幼也名声词章行于京师人迟其至【迟音穉义见一卷岐山下诗】及公就进士且试其辈皆曰莫先窦生于时公舅袁高为给事中【高字公颐沧州东光人贞元初为给事中】方有重名爱且贤公然实未尝以干有司【尝下或有有字】公一举成名而东遇其党必曰非我之才维吾舅之私其佐昭义军也遇其将死【贞元二十年六月昭义军节度使李长荣卒】公权代领以定其危後将卢从史【贞元二十年八月以昭义兵马使卢从史为节度使】重公不遣奏进官职公视从史益骄不逊伪疾经年輦归东都【輦?车也吕氏春秋下輦命封夏后之後於杞前汉皇后輦驾 輦音预】从史卒败死【元和五年六月从史为其都知兵马使乌重裔所缚送京师贬驩州司马卒】公不以觉微避去为贤告人公始佐崔大夫纵留守东都【贞元二年九月以吏部侍郎崔纵为东都留守奏牟为府巡官】後佐留守司徒余庆【元和五年六月以河南尹郑余庆为东都留守奏牟为府判官】历六府五公【牟初为东都留守巡官历河阳昭义从事 为留守判官】文武细麤不同自始及终於公无所悔望有彼此言者【或无者字】六府从事几且百人有愿奸易险贤不肖不同公一接以和与信卒莫与公有怨嫌者其为郎官令守【令守疑当作守令谓守法令也】慎法寬惠不刻教诲於国学也严以有礼扶善遏过【遏或作盖过或作恶汉路温舒传遏过者谓之妖言】益明上下之分【或无益字】以躬先之恂恂恺悌得师之道公一兄三弟常羣庠巩常进士【常字中行大历十四年进士】水部员外郎朗夔江抚四州刺史羣以处士徵【羣字丹列以处士隐居毗陵贞元十六年十月吏部侍郎韦夏卿为京兆尹荐羣徵拜左拾遗】自吏部郎中拜御史中丞【元和二年正月以武元衡同平章事举羣代已为御史中丞】出帅黔容以卒【元和三年十月贬黔中观察使八年四月迁容管经略使九年召还至衡州卒】庠三佐大府【庠字胄卿贞元二十一年五月韩皋出镇武昌奏庠为推官元和三年二月皋移镇浙西以庠为副使又为宣歙副使】自奉先令为登州刺史巩亦进士【巩字友封元和二年登第】以御史佐淄青府【元和十四年三月以薛平为平卢淄青节度使表巩自副】皆有材名公子三人长曰周余好善学文【或作好学善文或作好古善文】能谨谨致孝述父之志曲而不黜次曰某【下或有少字】曰某皆以进士贡女子三人愈少公十九岁【公大历三年生至是年五十五故云少公十九岁少或作以非】以童子得见於今四十年始以师视公而终以兄事焉公待我一以朋友不以幼壮先後致异公可谓笃厚文行君子矣其铭曰后缙窦逃闵腹子夏以再家窦为氏【昔有过浇灭夏后相后缙万娠逃归自窦生少康少康二子曰杼曰龙龙居有仍遂为窦氏】圣愕旋河犊引比【史记云孔子不得用於卫将西见赵简子至于河闻窦鸣犊舜华之死临河而叹曰美哉水洋洋乎邱之不济此命也夫】相婴拨汉纳孔轨【拨或作发窦太后从兄子婴相武帝武帝太后好黄老而婴隆推儒术贬道家言此云拨汉纳孔轨盖谓拨汉家黄老之习而纳之孔子之道】後去观津而家平陵【而或作西 观音贯】遥遥厥绪夫子是承【何昌?为吏部有姓闵者求官自曰子骞後昌?笑曰遥遥华胄遥遥字出此】我敬其人我怀其德作诗孔哀质于幽刻唐正议大夫尚书左丞孔公墓志铭【孔戣新旧史皆有传】

孔子之後三十八世有孙曰戮字君严【孔子後三十五世曰务本务本子如珪如珪子岑父岑父五子载戡戮戡戮】事唐为尚书左丞【长庆二年以戮为尚书左丞】年七十三上上书去官【上上或无三字】天子以为礼部尚书禄之终身而不敢烦以政【长庆三年戮累表请老诏戮以礼部尚书致仕优诏褒美如汉徵士故事】吏部侍郎韩愈常贤其能【或无韩字】谓曰公尚壮上三留奚去之果【留下或有公字】曰吾敢要君吾年至一宜去吾为左丞不能进退郎官唯相之为二宜去【方从杭本无至字云洪引龚胜邠汉俱乞骸骨答诏古者有司年至则致事今大夫年至矣恐未必然今按洪所引汉事文理甚明方以欲从杭本之故遂以为未必然而不取殊不可晓今正之一本乙君吾二字语尤健但如此则君下却少一吾字不敢辄补耳又郎官或作郎中】愈又曰古之老於乡者将自佚非自苦闻井田宅具在亲戚之不仕与倦而归者不在东阡在北陌可杖屨来往也今异於是公谁与居且公虽贵而无留资何恃而归曰吾负二宜去尚奚顾子言愈面叹曰公於是乎贤远於人【於是或作是於

於音乌或无贤字皆非是】明日奏疏曰臣与孔戮同在南省数与相见【相上或有孔戮字今按上下文孔戮字多此不宜有 数音朔】戮为人守节清苦论议正平【或作平正平或作直】年才七十筋力耳目未觉衰老忧国忘家用意至到如戮辈在朝不过三数人陛下不宜苟顺其求不留自助也不报明年长庆四年正月己未公年七十四告薨於家赠兵部尚书公始以进士【建中元年戮第进士】佐三府官至殿中侍御史元和元年以大理正徵累迁江州刺史谏议大夫事有害於正者无所不言加皇太子侍读改给事中言京兆尹阿纵罪人诏夺京兆尹三月之俸【三上或无尹字戮为给事中江西观察使李少和坐赃狱寝不下博陵崔易简杀从父兄鞠状具京兆尹左右三翻其情戮慷慨正论贬少和杀易简夺尹三月俸】权知尚书右丞明年拜右丞【或作拜左丞或两皆作左戮元和中未尝为左丞盖权知右丞事踰年而正除右丞长庆二年还自广州乃为左丞耳新旧史戮传皆误南海碑石本可考也而山谷本於为尚书左丞之上从蜀本增一复字盖於元和两次除授皆已误作左丞故又误谓长庆为再除也陈齐之又去拜右丞三字皆非】改华州刺史明州岁贡海虫淡菜蛤蚶可食之属自海抵京师道路水陆逋夫积功岁为四十三万六千人奏疏罢之【改华州刺史或在罢贡海物之下华州乃输贡之途此疏专为逋夫而言也新史亦可考或无可食二字】下邽令笞外按小儿【外按或作按外 今按唐会要每岁冬以鹰犬出近畿习狩谓之外按使领徒数百恃恩恣横郡邑烦扰元和九年裴寰为下邽令疾其扰人但据文供饷使者归乃譖寰有慢言上大怒宰相武元衡中丞裴度恳救甚切即此事也小儿事见顺宗实录】系御史狱公上疏理之诏释下邽令而以华州刺史为大理卿【邽音圭】十二年自国子祭酒拜御史大夫岭南节度等使【元和十二年七月岭南节度使崔咏卒帝谓裴度曰尝论罢蚶菜者谁欤今安在是可为朕求之度以戮对庚戌以戮为节度使】约以取足境内诸州负钱至二百万悉放不收蕃舶之至泊步有下碇之税【步水岸渡处碇锤舟石与碇同 碇丁定切】始至有鬲货之燕犀珠磊落贿及仆隶公皆罢之【贿或作财】絶海之商有死于吾地者官藏其货满三月无妻子之请者尽没有之【没下或无有字】公曰海道以年计往复何月之拘苟有验者悉推与之无筭远近厚守宰俸而严其法岭南以口为货其荒阻处父子相缚为奴公一禁之【缚或作传或无公一禁之四字】有随公吏【吏上或有之字】得无名儿蓄不言官有讼者公召杀之山谷诸黄世自聚为豪观吏厚薄缓急【观下或有察字非是自贞元中黄洞诸蛮叛久不平】或叛或从容桂二管【容管经略使杨旻桂管观察使裴行立】利其

虏掠请合兵讨之冀一有功有所指取当是时天子以武定淮西河南北【武定或作定武非是】用事者以破诸黄为类向意助之【类或作愿非是】公屡言远人急之则惜性命相屯聚为寇缓之则自相怨恨而散此禽兽耳【恨下或有焉字无而散字或焉字在散字下此上或有况字或无耳字】但可自计利害不足与论是非天子入先言遂歛兵江西岳鄂湖南岭南会容桂之吏以讨之被雾露毒相枕藉死百无一还安南乘势杀都护李象古【元和十四年十月安南军乱杀都护李象古】桂将裴行立容将杨旻皆无功数月自死【月或作日非是】岭南嚣然祠部岁下广州祭南海庙庙入海口为州者皆憚之不自奉事常称疾命从事自代唯公岁常自行【常自或作自常非是事见本集南海神庙碑云】官吏刻石为诗美之【诗或作词】十五年迁尚书吏部侍郎公之北归不载南物奴婢之籍不增一人长庆元年改右散骑常侍二年而为尚书左丞曾祖讳务本沧州东光令祖讳如珪海州司户参军赠尚书工部郎中皇考讳岑父秘书省著作佐郎赠尚书左仆射公夫人京兆韦氏父种大理评事有四子长曰温质四门博士遵孺遵宪温裕【下温或作遵方云作温与传合盖晚年皆从温世系表云四子皆从温非也今按上文长子已名温质则非晚年从温也岂以嫡庶为异耶然非要切不必强解】皆明经女子长嫁中书舍人平阳路隋其季者幼公之昆弟五人载戢戢【音衢】公於次为第二公之薨戢自湖南入为少府监【长庆元年正月戢自湖南观察又为少府监】其年八月甲申戢与公子葬公于河南河陰广武原【河陰县名属河南】先公仆射墓之左铭曰

孔世卅八【卅或作三十此铭皆以四言为句作三十者非今按卅依字当作?苏合切】吾见其孙白而长身【白或作自非是】寡笑与言其尚类也【或作耶】莫与之伦德则多有请考于文

故江南西道观察使赠左散骑常侍太原王公墓志铭【或有中大夫洪州刺史兼御史中丞十二字王弘仲尝为连州司户公为连之阳山令尝为作燕喜亭记後为江南西道观察使公时刺袁州又为作滕王阁记至是铭其墓又为神道碑然则公於弘中可谓厚矣邵氏闻见録曰孔子作经使後世读易者如无春秋读书者如无诗其法固不知也独韩退之作王仲舒碑又作志苏子瞻作司马君实行状又作碑其事同其词各异庶几知之矣碑见二十一卷】

公讳仲舒字弘中【并州祈人】少孤奉其母居江南游学有名贞元十年以贤良方正拜左拾遗改右补阙礼部考功吏部三员外郎贬连州司户参军改夔州司马佐江陵使改祠部员外郎复除吏部员外郎【或无复字吏部员外下或无郎字】迁职方郎中知制诰出为峡州刺史【峡州说已见前】迁庐州未至丁母忧服阕改婺州苏州刺史【阕或作缺改或作除】徵拜中书舍人既至谓人曰吾老不乐与少年治文书【乐或作宜文书下或有事字】得一道有地六七郡为之三年贫可富乱可治身安功立无愧於国家可也日日语人丞相闻问语验即除江南西道观察使兼御史中丞至则奏罢?酒钱九千万以其利与民【千或作十与民或作丐贫民方云诸本以後语误入釀户非尽贫民今按丐贫民一语下文已有不应再出方本是也但其说非是除酒?盖与民共之使得自釀非直以钱九千万与釀户也】又罢军吏官债五千万悉焚簿文书【或无文字】又出库钱二千万以丐贫民遭旱不能供税者禁浮屠及老子为僧道士【禁或作学今按作学非是但下文自有浮屠老子字此不应重出且其

文理亦不明白疑此自浮至为六字亦是衍文去之则文理通畅矣但无本可证不敢删耳】不得於吾界内因山野立浮屠老子像【界下或无内字山或作出立或作去皆非是】以其诳巧渔利夺编人之产【其字疑衍编或作经 今按以民为人盖避讳当作民乃是下求人利害与人吏约放此】在官四年数其蓄积钱余於库米余於廩朝廷选公卿於外将徵以为左丞【或无以字】吏部已用薛尚书代之矣【长庆三年十一月以尚书左丞薛放代仲舒镇江西】长庆三年十一月十七日未命而薨年六十二天子为之罢朝赠左散骑常侍远近相吊以四年二月某日葬于河南某县先茔之侧公之为拾遗朝退天子谓宰相曰第几人非王某邪是时公方与阳城更疏论裴延龄诈妄士大夫重之为考功吏部郎也下莫敢有欺犯之者非其人虽与同列未尝比数收拾故遭谗而贬在制诰【在或作及知二字】尽力直友人之屈【友人盖杨凭凭尹京兆日御史中丞李夷简劾凭江西奸赃贬临贺尉云屈一作冤】不以权臣为意又被谗而出元和初婺州大旱人饿死户口亡十七八【或无口字】公居五年完富如初按劾羣吏奏其赃罪州部清整加赐金紫其在苏州治称第一公所至辄先求人利害废置所宜【利或作之李云古本无利字神道碑周知俗之病亦无利字 今按下文云废置所宜则此句合有利字古本偶皆脱漏不足为据】闭合草奏又具为科条与人吏约事备【下或有悉字或有复出事字 今按文势疑当有悉字在备字上】一旦张下民无不拚叫喜悦或初若小烦旬岁皆称其便公所为文章无世俗气其所树立殆不可学曾祖讳玄矰比部员外郎【或无讳字下同】祖讳景肃丹阳太守考讳政【或作某】襄邓等州防御使鄂州采访使赠工部尚书【工或作吏】公先妣渤海李氏赠渤海郡太君【或无太字】公娶其舅女有子男七人初哲贞弘泰复洄初进士及第哲文学俱善其余幼也长女壻刘仁师高陵令次女壻李行修尚书刑部员外郎【修或作循或无郎字】铭曰

气鋭而坚又刚以严哲人之常【又或作文哲或作若皆非是】爱人尽已不倦以止乃吏之方与其友处顺若妇女何德之光墓之有石我最其迹万世之藏【之有或作中之最或作撮或作载方云集韵最撮之省文 今按方说非也史汉功臣传末总计其功皆以最字起之】

殿中少监马君墓志【或有铭字】

君讳继祖【继祖始生德宗赐名退而笑曰是有二义谓之索系组事见国史补】司徒赠太师北平庄武王之孙【北平王马燧也】少府监赠太子少傅讳畅之子【燧二子彙畅畅娶卢氏生二子长敖次继祖】生四岁以门功拜太子舍人积三十四年五转而至殿中少监年三十七以卒有男八人女二人始余初冠应进士贡在京师【贡一作举】穷不自存【不下或有能字】以故人稚弟拜北平王於马前【贞元三年平凉之盟马燧预议韩弇时以殿中侍御史为判官死焉其年罢燧兵奉朝请京师弇公之兄也】王问而怜之因得见於安邑里第王軫其寒饥赐食与衣【食上方无赐字今按无赐字即不成文方说非是食衣并读如字】召二子使为之主其季遇我

特厚少府监赠太子少傅者也姆抱幼子立侧【仪礼姆纁笄宵衣在其右注姆妇人年五十无子出而不复嫁能以妇道教人者若今时乳母矣 姆莫捕切又莫豆切】眉眼如画髮漆黑肌肉玉雪可念殿中君也【方云画胡麦切左思娇女诗眉目璨如画 今按画当音胡卦切左

诗叶韵故尔髮下或有如字非是念或作怜妬记云王丞相於青疎台中观有两三儿骑羊皆端正可念黄鲁直亦尝用玉雪可念语】当是时见王於北亭犹高山深林钜谷【或无钜谷二字】龙虎变化不测杰魁人也退见少傅翠竹碧梧【碧或作苍】鸾鹄停峙能守其业者也【业或作恭非是】幼子姁好静秀瑶环瑜珥兰茁其芽【茁邹滑切又侧劣切】称其家儿也後四五年吾成进士【公贞元八年登第】去而东游哭北平王於客舍【十一年五月公东归河阳八月燧卒】後十五六年吾为尚书都官郎分司东都而分府少傅卒哭之【分府此见当时分司官之称号或无此二字非是元和五年畅卒自贞元十一年至是凡十六年】又十余年至今哭少监焉【长庆初继祖卒】呜呼吾未耄老自始至今未四十年而哭其祖子孙三世于人世何如也【句末六字疑衍】人欲久不死而观居此世者何也【李本云晁以道乙居字今按此篇末两三句不可晓疑而字当作亦而何下当有如字盖误写着上文也然无别本可证姑阙以俟知者】

东雅堂昌黎集注卷三十三

卷三十四

<集部,别集类,汉至五代,东雅堂昌黎集注>

钦定四库全书

东雅堂昌黎集注卷三十四

碑志

南阳樊绍述墓志铭【欧阳文忠公云退之与樊绍述作铭便似樊文诚不虚语据宗师元和九年尚为前太子舍人未使南方也见公与郑相公书元和十二年因在京师未出刺绛州也见示郊诗及荐状自绛还朝当在长庆初年序不载其卒之年月或法不必载邪】

樊绍述既卒且葬【绍述河中人】愈将铭之从其家求书得书号魁纪公者三十卷曰樊子者又三十卷春秋集传十五卷表牋状策书序传记纪志说论今文赞铭凡二百九十一篇【志上或无纪字】道路所遇及器物门里杂铭二百二十赋十诗七百一十九【二十或作又十今以艺文志考之皆有其目独铭赋诗亡焉所谓表牋状策等文凡二百九十一篇曰樊宗师集二百九十一卷数同而以卷为篇疑志之字误也】曰多矣哉古未尝有也然而必出於已不袭蹈前人一言一句又何其难也【国史补云元和之後文章则学奇於韩愈学澁於樊宗师退之作樊墓志称其为文不剽袭观绛守居园池记诚然亦大奇甚矣本朝王晟刘忱皆为之注解如瑶翻碧激嵬眼倾耳等语皆前人所未道也欧阳公跋绛守居园池记云元和文章之盛极矣其奇怪至於如此又诗曰尝闻绍述绛守居偶来登览周四隅异哉樊子怪可吁心欲独去无古初穷荒探幽入无有一语诘曲百盘纡孰云已出不剽袭句断欲学盘庚书云云】必出入仁义其富若生蓄万物必具海含地负放恣横从【子容切】无所统纪然而不烦於绳削而自合也呜呼绍述於斯术其可谓至於斯极者矣生而其家贵富长而不有其藏一钱【长而或作而长】妻子告不足顾且笑曰我道盖是也【盖下疑有如字】皆应曰然无不意满尝以金部郎中告哀南方【或无尝字元和十五年正月宪宗崩宗师以全部郎中告哀南方】还言某师不治罢之以此出为绵州刺史【师或作帅方无出字以下文又出观之宜有】一年徵拜左司郎中又出刺绛州【或无刺字】绵绛之人至今皆曰於我有德以为谏议大夫命且下遂病以卒年若干【病以或作以病】绍述讳宗师父讳泽尝帅襄阳江陵官至右仆射赠某官【兴元元年正月樊泽为山南东道节度使贞元二年闰五月徙镇荆南八年二月自荆南复为山南东道节度使十二年加检校右仆射十四年九月卒于镇赠司空】祖某官讳泳【泳试大理评事累赠兵部尚书】自祖及绍述三世皆以军谋堪将帅策上第以进【开元中泳举草泽科建中元年泽举贤良方正直言极谏科元和三年四月宗师举军谋宏远堪任将帅科】绍述无所不学於辞於声天得也【得下或有地字或有地出字皆非是】在衆若无能者尝与观乐问曰何如曰後当然已而果然【後上或有某字非是】

铭曰

惟古於词必已出降而不能乃剽贼【或作脱】後皆指前公相袭从汉迄今用一律寥寥久哉莫觉属【觉或作学非是】神徂圣伏道絶塞既极乃通发绍述文从字顺各识职有欲求之此其躅

中大夫陕府左司马李公墓志铭【邢七子汉其一也即公之壻新旧史有传可考故志云汉韩氏壻也故子为铭】

公讳邢【薄经切】字某雍王绘之後【绘或作会新旧史作绘太祖景皇帝之第五子也为隋夏州总管雍於衆切】王孙道明唐初以属封淮阳王又追王其祖父【追王之王字音旺】曰雍王长平王【下或有长平生淮阳五字绘子??子道玄武德元年六月封道玄淮阳王追封绘曰雍?为河南王】淮阳生景融【生一作王】景融亲益疎不王生务该务该生思一思一生岌【鱼及切】比四世官不过县令州佐然益读书为行为士大夫家岌为蜀州晋原尉【原或作康】生公未晬以卒【子生一岁曰晬说文周年也】无家母抱置之姑氏以去姑怜而食之【食音嗣】至五六岁自问知本末因不复与羣儿戏常默默独处曰吾独无父母不力学问自立不名为人年十四五能闇记论语尚书毛诗左氏文选凡百余万言凜然殊异姑氏子弟莫敢为敌浸传之闻诸父【敌或作娇非是之闻或作闻之】诸父泣曰吾兄尚有子耶迎归而坐问之应对横从无难【从子容切去声】诸父悲喜顾语羣子弟曰吾为汝得师【语或作谓或无曰字无吾字】於是纵学无不观以朝邑员外尉选鲁公真卿第其所试文上等【文下或有为字试书判拔萃为上等】擢为同官正尉曰文如李尉乃可望此其後比以书判拔萃【或无比字】选为万年尉为华州録事参军争事於刺史去官为陆浑令河南尹郑余庆荐之朝【元和十年十月郑余庆为河南尹】拜南郑令尹家奴以书抵县请事公走府出其书投之尹前尹慚其廷中人曰令辱我令辱我【汉张耳传李良素贵起慚其从官又袁盎还愧其吏公此文与刘昌裔志皆用此或无复出令辱我三字】且曰令退遂怨之拾掇三年无所得【或无所字】拜宗正丞宰相以文理白为资州刺史公喜曰吾将有为也谗宰相者言之上曰【或无者字非是】是与其故故得用改拜陕府左司马【陕虢节度使卫中行辟佐其府】公又喜曰是官无所职吾其不以吏事受责死矣长庆元年正月丙辰以疾卒春秋七十三【或无正月字而云李本作正月盖正月十八日也今按是年辛丑岁丙辰非岁名则为日名而在月下为是方知日辰所直而不以李本补正月字不可晓也】公内外行完洁白奋厉再成有家士大夫谈之夫人博陵崔氏朝邑令友之之女其曾伯父玄暉有功中宗时【长庆四年六月玄暉为凤阁侍郎同平章事神龙元年率羽林兵诛张易之昌宗迎太子监国是为中宗】夫人高明遇子妇有节法进见侍侧肃如也七男三女邠为澄城主簿其嫡激鄜城令【激下或有为字】放芮城尉汉监察御史【汉字南纪元和七年进士时为监察御史终於宗正少卿】滹沱潘皆进士【滹字经野沱字正武潘字子及皆登进士第潘大中初为礼侍滹所简切沱音光】及公之存内外孙十有五人五月庚申葬华阴县东若干里汉韩氏壻也故予与为铭其词曰愈下而微既极复飞其自公始公多孙子将复庙祀【庙或作其今按唐会要礼官议户部尚书韦损四代祖所立私庙子孙官卑其祠久废今损官三品準令合立三庙此以邢之先尝有王封而後世官卑不得立庙故云将复庙祀也然唐制

亦非古而本庙立法尤踈略唯苏魏公尝议立庙与袭爵之法相为表里其说为善惜乎当时不施行也】

故幽州节度判官赠给事中清河张君墓志铭【张彻为范阳府监察御史其帅张弘靖也志不出弘靖姓名若有所讳焉耳彻死于乱具载之史其言多出公志】

张君名彻字某以进士【彻中进士第在元和四年】累官至范阳府监察御史长庆元年今牛宰相为御史中丞【元或作一考之史当作元年陈齐之云常疑牛僧孺之为人观此语则知韩公亦不喜其人矣然牛宰相三字或作今宰相牛公未知孰是】奏君名迹中御史选诏即以为御史其府惜不敢留遣之而密奏幽州将父子继续不廷选且久今新收臣又始至【长庆元年二月幽州节度使刘总请去位三月以总为大平军节度使张弘靖为幽州节度使代总】孤怯须强佐乃济发半道有诏以君还之仍迁殿中侍御史加赐朱衣银鱼【仍或作乃】至数日军乱怨其府从事尽杀之而囚其帅且相约张御史长者毋侮辱辄蹙我事无庸杀置之帅所【蹙音历母一或作无我事下或有无罪二字长庆元年七月幽州军乱囚节度使张弘靖於蓟门馆杀判官韦雍张宗元崔仲卿等以彻长者不杀置之於蓟门馆】居月余闻有中贵人自京师至君谓其帅公无□此土人上使至可因请见自辨幸得脱免归【或无免字】即推门求出守者以告其魁魁与其徒皆骇曰必张御史张御史忠义必为其帅告此【史下或无张字及无告此二字按告字疑当作言】余人不如迁之别馆【今按余人二字疑衍而下文不如迁之别馆自为一句盖述其言如此下文又云即与衆出君乃记其事也但无所考不敢辄删耳或云余人字不必去其曰迁之别馆盖言今当如此耳亦通】即与衆出君【与或作以】君出门骂衆曰汝何敢反前日吴元济斩东市昨日李师道斩於军中同恶者父母妻子皆屠死肉餒狗鼠鸱鸮【新史书彻事大抵出公此志其所书骂贼语凡削六字改一字笔削固史氏事然而改餒为饱则不若公语且有来处此前汉陈余所谓以肉餒虎也】汝何敢反汝何敢反行且骂衆畏恶其言不忍闻【畏下或有皆字非是或在畏上则或有之】且虞生变即擊君以死君抵死口不絶骂衆皆曰义士义士或收瘞之以俟事闻天子壮之赠给事中其友侯云长佐郢使请於其帅马仆射【马总】为之选於军中得故与君相知张?李元实者【?或作泰】使以币请之范阳范阳人义而归之以闻诏所在给船輦传归其家赐钱物以葬长庆四年四月某日其妻子以君之丧葬于某州某所【四年方云旧本或作二年或作三年按郢帅马总也总以二年秋迁右仆射明年夏召还当作二年或三年也今按方说虽如此而其所定之本却作四年今姑从之盖或丧归踰年马既召还乃克葬也】君弟复亦进士【元和元年复中进士】佐汴宋得疾变易丧心惊惑不常君得闲即自视衣褥薄厚【褥或作衾】节时其饮食而而匕筯进养之【或无养字今按养字去声礼曰以其饮食忠养之】禁其家无敢高语出声医饵之药其物多空青雄黄【空青山出铜处铜精熏则生空青腹中空如杨梅者胜雄黄出武都山块方数寸明彻如鸡冠者佳】诸奇怪物剂钱至十数万营治勤剧皆自君手不假之人家贫妻子常有饥色祖某某官父某某官【祖某父某或作祖踐父休】妻韩氏礼部郎中某之孙汴州开封尉某之女於余为叔父孙女君常从余学选於诸生而嫁与之孝顺只修羣女效其所为男若干人曰某女子曰某铭曰

呜呼彻也世慕顾以行子揭揭也噎暗以为生子独割也为彼不清作玉雪也仁义以为兵用

不缺折也【缺折或作折缺】知死不失名得猛厉也自申于闇明莫之夺也【闇明当作明闇说见下条】我铭以贞之不肖者之咀也【咀当割切方本无者字或无之字方云此铭以彻揭割雪折厉夺咀为韵而行生清兵名闇贞复自为韵厉音烈闇当读如凉闇之闇今按方说多得之此铭盖法免置鱼丽等诗隔句用韵耳诗隔句用韵先儒所未知观公此铭则既识之矣但闇明二字乙之则韵自叶而义亦胜若如方说则虽读闇作?韵终不叶而义亦不通也】

河南府法曹参军卢府君夫人苗氏墓志铭【或无府苗氏三字或作范阳卢君夫人苗氏】

夫人姓苗氏讳某字某上党人曾大父袭夔赠礼部尚书大父殆庶赠太子太师【以宰相世系考之袭夔生殆庶延嗣殆庶生如兰晋卿袭夔殆庶所赠官疑晋卿仕至宰相而赠也】父如兰仕至太子司议郎汝州司马【或作别驾世系表作永王府谘议参军】夫人年若干嫁河南法曹卢府君讳贻有文章德行【府君字或复出河南或作范阳】其族世所谓甲乙者先夫人卒【或作卒先夫人】夫人生能配其贤歿能守其法男二人於陵浑女三人皆嫁为士妻【夫人长女壻河南侯氏主簿唐充次亡公其季女壻也】贞元十九年四月四日卒於东都敦化里年六十有九其年七月某日【其年或作其明年七或作八】祔于法曹府君墓在洛阳龙门山其季女壻昌黎韩愈为之志【之下或有铭字或有铭字而无之字又或作为其字】其词曰

赫赫苗宗族茂位尊或毗于王或贰于藩是生夫人【是或作厥】载穆令闻爰初在家孝友惠纯乃及于行克媲德门【乃及或作享乃克或作光】肃其为礼【为礼方作礼容今以下句为仁偶之方说非是】裕其为仁法曹之终诸子实幼茕茕其哀介介其守循道不违厥声弥劭【或作既克其家厥问愈劭】三女有从二男知教闾里叹息母妇思效岁时之嘉嫁者来宁累累外孙【累累或作累累】有携有婴扶牀坐膝嬉戏謹争既壽而康既备而成不歉于约不矜于盈伊昔淑哲或图或书嗟咨夫人孰与为俦刻铭寘墓以赞硕休【铭或作石寘或作志书俦休以古韵叶已见溪堂诗】故贝州司法参军李君墓志铭【参军李翱习之之祖习之尝自为其皇祖实录其行治皆如志所书翱之实录终曰先祖有美而不知不明也知而不传不仁也翱欲传惧文章不足以称颂道德光耀来世是以顿首欲假辞於执事者亦惟不斥其愚而为之传焉意翱乞公铭之辞也】

贞元十七年九月丁卯【七或作八月下或有一日字】陇西李翱合葬其皇祖考贝州司法参军楚金皇祖妣清河崔氏夫人于汴州开封县某里【开封县某里或作陈留县安丰里後开封字同】昌黎韩愈纪其世着其德行以识其葬【识或作志】其世曰【其世或作其词】由梁武昭王六世至司空【至或作有】司空之後二世为刺史清渊侯【凉武昭王名暕字玄感晋安帝时自称西凉公子翻翻子宝宝子冲後魏後文时封清渊县侯卒赠司空冲暕曾孙也今云六世恐误冲子延实都督青州刺史延实子彬袭祖爵清渊县侯卒赠齐州刺史子桃枝袭封】由侯至于贝州凡五世【一作六世桃枝玄孙诏谘议参军诏子楚金】其德行曰事其兄如事其父其行不敢有出焉【或无曰字】其夫人事其姒如事其姑【姒或作姊】其於家不敢有专焉其在贝州其刺史不悦於民【刺上或无其字据李翱集刺史严正

晦也】将去官民相率謹譁手瓦石胥其出擊之【胥或作須或作需或无其字史记赵世家大后盛气胥之入又廉颇传胥後令注胥犹須也】刺史匿不敢出州县吏由别驾已下不敢禁司法君奮曰是何敢尔【或无何字或无尔字】属小吏百余人持兵仗以出【仗或作杖】立木而署之曰刺史出民有敢观者杀之木下民闻皆惊相告散去後刺史至加擢任【加下或有礼字】贝州由是大理其葬曰【或作日山谷李谢以古本定与上文其世曰其德行曰为一例】翱既迁贝州君之丧于贝州殡于开封遂迁夫人之丧于楚州八月辛亥至于开封圻于丁巳坟于九月辛酉窆于丁卯【窆或作窆】人谓李氏世家也侯之後五世仕不遂【一无後字五字】蘊必发其起而大乎四十年而其兄之子衡【惟幀子五人衡其第二子也贞元七年自常州刺史镇湖南八年徙镇江西召为给事中】始至户部侍郎君之子四人官又卑翱其孙也有道而甚文固於是乎在【或无固字甚文字出左传楚子西曰光又甚文观翱实録亦可见其甚文矣鲁直诗云习之实録葬皇祖斯文如女有正色云云】

处士卢君墓志铭【公前铭卢君夫人兹又铭其子於陵故言愈於处士妹壻也为其志且铭云】

处士讳於陵其先范阳人父贻为河南法曹参军河南尹与人有仇诬仇与贼通收掠取服法曹曰我官司也我在不可以为是廷争之以死河南怒命卒摔之【卒或作牵摔昨没切】法曹争尤强遂并收法曹竟奏杀仇籍其家而

释法曹法曹出径归卧家念河南势弗可败气愤弗食欧血卒东都人至今犹道之处士少而孤母夫人怜之【贻娶苗氏太师晋卿兄如兰女】读书学文皆不待强教卒以自立在母夫人侧油油翼翼不忍去时岁母夫人既终育幼弟与归宗之妹经营勤甚未暇进仕也年三十有六元和二年五月壬辰以疾卒有男十岁曰义女九岁曰孟又有女生处士卒後未名【孟下或无又字】於其年九月乙酉其弟浑以家有无葬以车一乘於龙门山先人兆愈於处士妹壻也为其志且铭其後曰

贵兮富兮如其材得何数兮名兮寿兮如其人岂无有兮彼皆逢其臧子独迎其凶兹命也邪兹命也邪

故太学博士李君墓志铭【学或作常】

太学博士顿丘李于【一本作干】余兄孙女壻也【或无女字】年四十八【于大曆元年生】长庆三年正月五日卒其月二十六日穿其妻墓而合葬之在某县某地子三人皆幼初于以进士【元和十年于中进士第年四十】为鄂岳从事【十一年李道古为鄂岳观察使辟于为从事】遇方士柳泌【或作贲】从受药法服之往往下血比四年病益急乃死【柳泌说已见前乃或作及非是】其法以鉛滿一鼎【一有以物字】按中为空实以水银【实以或作以实】盖封四际烧为丹沙云余不知服食说自何世起杀人不可计而世慕尚之益至此其惑也在文书所记及耳闻相传者不说【或无相字】今直取目见亲与之游而以药败者六七公以为世诚工部尚书归登殿中御史李虚中刑部尚书李逊弟刑部侍郎建襄

阳节度使工部尚书孟简东川节度御史大夫卢坦金吾将军李道古此其人皆有名位世所共识工部既食水银得病自说若有烧铁杖自颠贯其下者【颠或作颠】摧而为火射窍节以出狂痛号呼乞絶其茵席常得水银【茵或作?或无常字】发且止唾血十数年以毙殿中疽发其背死刑部且死谓余曰我为药误其季建一旦无病死襄阳黜为吉州司马余自袁州还京师襄阳乘舸邀我於萧洲屏人曰我得秘药不可独不死今遗子一器可用枣肉为丸服之别一年而病其家人至【其一作有】讯之曰前所服药误方且下之【所服下或有之字】下则平矣病二岁竟卒卢大夫死时溺出血肉痛不可忍乞死乃死【肉方作害今按古书肉或作□今淮南子及内经灵枢尚存此体疑此别本害字乃□之讹而方考之不详也乃死一作乃絶万或作及或无死字皆非是】金吾以柳泌得罪食泌药五十死海上此可以为诫者也薪不死乃速得死谓之智可不可也五谷三牲盐醯果蔬人所常御人相厚勉必曰强食今惑者皆曰五谷令人夭不能无食当务减节盐醯以济百味【济或作齐】豚鱼鸡三者古以养老反曰是皆杀人不可食一筵之饌禁忌十常不食二三不信常道而务鬼怪临死乃悔後之好者又曰彼死者皆不得其道也我则不然始病曰药动故病病去药行乃不死矣及且死又悔呜呼可哀也已可哀也已【孔毅夫杂说云张籍哭退之诗云为出二侍女合弹琵琶箏白乐天思旧诗云退之服硫黄一病竟不痊退之尝讥人不解文字饮而自败於女妓乎作李博士墓志戒人服金石药而自饵硫黄邪又後山嗟哉行亦云韩子作志还自屠白笑未竟人复吁正谓此耳】

卷三十五

钦定四库全书

东雅堂昌黎集注卷三十五

碑志

卢浑墓志铭【浑河南法曹参军第二子而公妻弟也然有铭无志焉】

前汝父母右汝兄【兄上或有弟字或作後有汝兄浑於陵弟也兄弟惟二人】汝从之居视汝如生迁汝居兮日月之良【迁汝或作汝迁于三字】汝居孔固兮後无有殃如不信兮视此铭章【此或作於】

虢州司户韩府君墓志铭【韩氏自魏安定桓王茂五世孙为叡素尝为桂州刺史四子长仲卿为武昌令赠尚书右仆射次少卿太白云感槩重诺死於节义次云卿礼部侍郎公为科斗书後记云叔父当大历世文词独行中朝即云卿也季绅卿涇阳令尝为扬州録事参军太白谓工古文而能官者公与兄会介仲卿之子也俞弇云卿之子也岌绅卿之子也岌为虢州司户故公志云桂州君之孙司録君之子其系明甚李太白为武昌德政碑亦言桂州君四子名讳长少皆与此志合惟唐史世系表乃以桂州君为有七子无少卿而有晋卿季卿子卿升卿果何据而然未有公之家世而适误漏者也史至是何以取信後世哉】

安定桓王五世孙叡素为桂州长史化行南方【长或作刺考世系表李太白去思颂公墓志行状皆作长史】有子四人最季曰绅卿文而能官尝为扬州録事参军事故宰相崔圆【或无参军二字上元元年二月以崔圆为扬州大都督府长史淮南节度使】圆狎爱州民丁某至顾省其家家大衙会日司録君趋以前大言曰请举公过公与小民狎至至其家害於政【或无复出至字】圆惊谢曰録事言是圆实过乃自署罚五十万钱由是迁涇阳令破豪家水碾利民田顷凡百万君讳岌桂州君之孙司録君之子亦以能官名少而奇壮而强老而通【阁本无而强老三字方以为脱】以元和元年六月十四日卒年五十七【元或作三】娶京兆田氏女【或无女字】男曰家女曰门曰都皆幼【或无曰门二字】初君乐虢之土田山水求掾其州去官犹家之既卒因以其年九月某日葬州北十里崔长史墓西【葬下或有于字】铭曰

凡兆于兹唯其家之材【或作财 今按此句未详当有脱误】盖归有时四门博士周况妻韩氏墓志铭【此志及张彻墓志皆以俞为开封尉唐宰相表以俞为开封令亦误矣】

四门博士周况妻韩氏讳好【或有复出好字】尚书礼部郎中讳云卿之孙开封尉讳俞之

女开封娶赵氏生二女三男【下开封字或作俞俞二女长嫁周况次嫁张彻三男无竞启余州来】开封卓越豪纵不治资业喜酒色狗马赵氏卒十一年而开封亦卒开封从父弟愈於时为博士【或无弟字旧本皆有 今按公父仲卿与开封之父云卿为兄弟则公与开封固从父兄弟也】乞分教东都生以收其孥於开封界中教畜之而归其长女于周氏况【于一作於元和元年况中进士第是岁公以好好适兄】况进士家世儒者【或无况字】曾祖讳延潭州长沙令祖讳晦常州参军父讳良甫左骁卫兵曹参军况立名行人士誉之韩氏嫁九年生一男一女年二十七以疾卒【疾或作病】葬长安城南凤栖原其从父愈於时为中书舍人【父下方有弟字 今按方本非是仪礼丧服篇有族曾祖父者曾祖之兄弟也其子为族祖父其孙为族父其曾孙为族兄弟有从祖祖父者祖父之兄弟也其子为从祖父其孙为从祖兄弟有世父叔父者父之兄弟也其子为从父兄弟今韩公於开封及虢州皆为从父弟矣於开封之女则公当为从祖父也此但云从父为脱一祖字方作从父弟尤误今无别本不敢辄增祖字且从诸本去弟字】为铭曰

夫失少妇【失或作丧】子失壮母归咎无处

韩滂墓志铭【公为袁州日二侄湘滂皆从之滂死於袁州故云权葬宜春郭南一里宜春袁州也世系表老成二子湘大理丞滂宝鸡丞接志滂年十九死则未尝仕也表复误矣】

滂韩氏子其先仕魏号安定桓王【王名茂滂九世祖也】滂父老成厚谨以文为韩氏良子弟未仕而死有二子滂其季也其祖韩介为人孝友一命率府军佐以卒二子百川老成老成为伯父起居舍人某後【或无复出老成字或无某字】起居有德行言词为世轨式滂既兄弟二人而率府长子百川早死无嗣【或无早字】其叔祖愈命滂归後其祖滂清明逊悌以敏读书倍文功力兼人【倍与背同倍文谓背本暗记也周礼注倍文曰讽韩语盖本此洪谱以为作文盖不考此而误改兼下文复有为文辞字亦不应重复如此也】为文词一旦奇伟骤长不类旧常吾曰尔得无假之人邪【或无得字无人字】退大喜谓其兄湘曰某违翁且踰年惧无以为见今翁言乃然可以为贺羣辈来见皆曰滂之大进不唯於文词为人亦然【或无文字词下或有於字】既数月得疾以死年十九矣【死或作卒滂贞元十八年生】吾与妻【公妻高平君卢氏】哭之伤心三日而敛既敛七日权葬宜春郭南一里【或无一字】呜呼其可惜也已【也一作之】铭曰

天固生之邪偶自生邪【或无之字】天杀也邪其偶自死邪【或无也字】莫不归於死壽何少多【归或作悲】铭以送汝其悲奈何女拏圻铭【公元和十四年以刑部侍郎谏佛骨忤上意出为潮州女拏道死商南层峰驿瘞之山下其年十一月二十四日移刺袁州明年九月召为国子祭酒过墓下题诗驿梁至是发其丧归葬于河南之河阳世墓之次云】

女拏【女加女书二切】韩愈退之第四女也惠而早死愈之为少秋官【为少或作少为非是元和十二年十二月公为刑部侍郎】言佛夷鬼其法乱治梁武事之卒有侯景之败【或无武字】可一扫刮絶去不宜使烂漫【刮或作削】天子谓其言不祥斥之潮州汉南海揭阳之地【或无汉字 揭其逝切又音竭】愈既行有司以罪人家不可留京师迫遣之【或无

可字】女孥年十二病在席【病或作疾或作在病无席字】既惊痛与其父诀又輿致走道【又一作父】撼顿失食饮节死于商南层峰驿【层峰或作密】即瘞道南山下五年愈为京兆【下或有尹字】始令子弟与其姆易棺衾归女孥之骨于河南之河阳韩氏墓葬之【葬上或有而字】女孥死当元和十四年二月二日【和下或有之字】其发而归在长庆三年十月之四日其葬在十一月之十一日铭曰

汝宗葬于是汝安归之惟永宁

河南缙氏主簿唐充妻卢氏墓志铭【公尝志卢君夫人苗氏之墓今志唐充妻卢氏即苗氏长女也充其长女壻公季女壻也】

夫人卢氏讳某兰陵太守景柔八世孙父贻卒河南法曹法曹娶上党苗氏太师晋卿兄女生三女三男【考苗夫人志当云二男】夫人最长法曹卒苗夫人嫁之唐氏充充明经【或无复出充字】宰相休憬曾侄孙出郾氏【今按郾绮戟反俗郾字与郾字相乱今流俗郾超字多作郾误也】外王父昂中书舍人夫人年若干嫁唐氏凡生男与女九人年四十二元和四年正月二十二日卒其年四月十五日葬河南府河南县之大石山下铭曰夫人本宗世族之後率其先猷令德是茂爰归得家九子一母【得或作其】婉婉有仪柔静以和命不侔身兹其奈何刻铭墓石以告观者【观或作亲 者之戈切与何叶吴才老读如此】

乳母墓铭【旧本作河南县令韩愈乳母李氏葬乳母且为之铭自公始】

乳母李徐州人【李下或有氏字】号正真入韩氏乳其儿愈【入或作为下或有家字】愈生朱再周月孤失怙恃【大历三年公生五岁而公父仲卿卒此云未再周月孤失怙恃 详退之祭嫂郑夫人云我生不辰三岁而孤此言未再周月孤失怙恃是虽入三岁而未及两周也】李怜不忍弃去【李下或有氏字】仇保益谨遂老韩氏及见所乳儿愈举进士第历佐汴徐军【见下或有其字徐下或有二州字】入朝为御史国子博士尚书都官员外郎河南令娶妇生二男五女【二或作三】时节庆贺辄率妇孙列拜进寿【节下或有受字辄上或有愈字】年六十四元和六年三月十八日疾卒【疾或作病或无疾字或作以疾卒】卒三日葬河南县北十五里愈率妇孙视窆封且刻其语于石纳诸墓为铭【语或作志】

东雅堂昌黎集注卷三十五

卷三十六

钦定四库全书

东雅堂昌黎集注卷三十六

杂文

瘞砚铭【铭或作文】

陇西李观元宾始从进士贡在京师【公与元宾皆贞元八年进士也】或貽之砚既四年悲欢穷泰未尝废其用凡与之试艺春官实二年登上第行于褒谷【此下或有间字褒斜地名】役者刘胤误坠之地毁焉乃匣归埋于京师里中昌黎韩愈其友人也赞且识云

土乎质陶乎成器复其质非生死类全斯用毁不忍弃【斯阁作期非是】埋而识之仁之义砚乎砚乎与瓦砾异

毛颖传【公作此传当时有非之者张籍书所谓戏谑之言谓亦指此旧史亦从而为之言曰讥戏不近人情是岂有识者哉柳子厚岂下人者乃独以为奇既书其後又答杨诲之书云足下所持韩生毛颖传来仆甚奇其书恐世人非之今作数百言知前圣不必罪俳也云云则文章因自有知音者哉李肇国史谓公此传其文尤高不下迁史谈薮亦谓此传似太史公笔子厚有读毛颖传後题见柳集二十一卷】

毛颖者中山人也【中山国名今定州】其先明眎【礼记兔曰明眎】佐禹治东方土【句】养万物有功因封於卯地死为十二神【治方作理土方作吐属下句云孔氏周书注曰土能吐生百谷义取此今按东方卯位此正为下文封於卯地死为十二神而言也然兔与卯皆不属土与方所引孔说不合又不见其所吐何者可养万物兼治东方为句语意亦似未足唯参同契云兔者吐生光则兔乃有吐义然似亦只与下文当吐而生之说相表里止是自吐其子而无吐养万物之意未见其必可据也若作治东方土而目为一句但以平水土而言则於语势无阙而下句养万物有功为奏庶鲜食之义意亦自明故今且从诸本其以十二物为十二神相承已久亦未见所从来并阙之以俟知者】尝曰吾子孙神明之後不可与物同当吐而生已而果然【当吐而生见本草】明眎八世孙【蜀本音奴鈎切尔雅兔子嬾郭注云俗呼曰?与?同论衡曰兔舐毫而孕及其生子从口而出名曰嬾嬾芳万切广雅云?兔子】世传当殷时居中山得神仙之术能匿光使物窃姁娥【事见淮南子】骑蟾蜍入月其後代遂隐不仕云居东郭者曰?【者下或有号东郭三字或有号东郭?而无曰字说文狡兔?战国策作逯音俊】狡而善走与韩卢争能卢不及卢怒与宋鹊谋而杀之醢其家【鹊或作?广雅曰韩卢宋鹊犬属字林?音鹊宋良犬也】秦始皇时蒙将军恬【制笔自恬始】南伐楚次中

山将大猎以惧楚【中山在秦东北非伐楚所当次也此固寓言然亦不为无失】召左右庶长与军尉【或无右字非是】以连山筮之【周礼三易之法夏曰连山】得天与人文之兆筮者贺曰今日之获不角不牙衣褐之徒缺口而长须八窍而趺居【趺音夫】独取其髦简牋是资天下其同书秦其遂兼诸侯乎【筮词皆用古韵诗析父予王之爪牙靡所止居古牙吾通髦与资亦然一云崔豹古今注蒙恬造笔以柘木为管鹿毛为柱羊毛为被非免毫也公岂它有所自邪今按髦资与居书叶今北人语犹谓毛为谟公作董生诗咨与书渔叶皆可证也】遂猎围毛氏之族拔其豪【或作毫非是下之毫同】载穎而归献俘于章台宫聚其族而加束缚焉秦皇帝使恬赐之汤沐而封诸管城号曰管城子【或无曰字】日见亲宠任事穎为人强记而便敏自结?之代以及秦事无不纂録阴阳卜筮占相医药方族氏山经地志字书图画九流百家天人之书及至浮图老子外国之说皆所详悉又通於当代之务官府簿书市井货钱注记惟上所使自秦皇帝【皇上或有始字】及太子扶苏胡亥丞相斯【相下或有李字】中车府令高【赵高为中车府】令下及国人无不爱重又善随人音心正直邪曲巧拙一随其人虽见废弃终默不泄【虽下或有後字】惟不喜武士然见请亦时往累拜中书令与上益狎上尝呼为中书君上亲决事以衡石自程【秦始皇纪天下之事无大小皆决於上上至以衡石量书日夜有程不中程不得休息石百二十斤也】虽宫人不得立左右独穎与执烛者常侍上休方罢穎与绛人陈玄弘农陶泓及会稽褚先生友善相推致其出处必偕上召穎三人者不待诏辄俱往上未尝怪焉後因进见上将有所任使拂拭之因免冠谢上见其髮秃又所摹画不能称上意【摹或作摹】上嘻笑曰【嘻或作喜非是】中书君老而秃不任吾用吾尝谓君中书君今不中书邪【君今君或作而】对曰臣所谓尽心者因不复召归封邑终于管城其子孙甚多散处中国夷狄皆冒管城惟居中山者能继父祖业

太史公曰毛氏有两族其一姬姓文王之子封於毛所谓鲁卫毛聃者也【左氏僖二十四年富辰之言】战国时有毛公毛遂【遂赵人平原君之客】独中山之族不知其本所出子孙最为蕃昌【或无为字】春秋之成见絶於孔子而非其罪及蒙将军拔中山之豪【或作毫非是】始皇封诸管城【诸或作之】世遂有名而姬姓之毛无闻穎始以俘见卒见任使【见或作幸】秦之灭诸侯穎与有功赏不酬劳以老见疎秦真少恩哉

下邳侯革华传【方云阁本无此篇刘龙图煜云或言此篇不类退之文及得本校果无赵璘因话録谓革华传称韩文公皆後人所诬是唐人已知其伪然杭本文粹皆録洪谓始録於欧公非也今按此当全篇删去】

遂穷文【予尝见文宗备问云颶頊高辛时宫中生一子不着完衣宫中号为穷子其後正月晦死宫中葬之相谓曰今日送却穷子自尔相承送之又唐四时宝监云高阳氏子好衣弊食麤正月晦巷死世作麤弃破衣是日祝於巷曰除贫也小宋云退之送穷文进学解毛穎传等诸篇皆古人意思未到可以名家矣然送穷文与扬子云逐贫赋大率相类张文潜曰公送穷文盖出子云逐贫赋然文采过逐贫矣晁无咎取公此文於续楚词系之曰愈以屡穷不遭时若有物焉为之故托於鬼諱彼穷我者车船饮食谢而远之而穷不可去也则烧车与船延之上座亦卒归於正之义焉】

元和六年正月乙丑晦主人使奴星【或有复出星字】结柳作车缚草为船载糗糗【糗或作与糗尔雅云麦也周礼糗餌粉餼糗粮也糗去久丘救二切糗之良切】牛系轭下引帆上樯【选万里连樯牛系轭下轭乙革切樯音墙】三揖穷鬼而告之曰闻子行有日矣【日下或无矣字】鄙人不敢问所涂窃具船与车备载糗糗【窃或作躬】日吉时良利行四方子饭一孟子啜一觴携朋挈俦去故就新驾尘骧风【骧音霍又廓郭二音】与电争先子无滞之尤我有资送之恩子等有意於行乎屏息潜听如闻音声若啸若啼?歔嚅嚅【?霍號切歔许勿切】毛髮尽竖竦肩缩颈疑有而无久乃可明若有言者曰吾与子居四十年余子在孩提吾不子愚子学子耕求官与名惟子是从不变于初门神户灵我叱我呵包羞诡随志不在他子迁南荒热烁湿蒸我非其乡百鬼欺陵太学四年朝齏暮盐惟我保汝人皆汝嫌自初及终未始背汝心无异谋口絶行语於何听闻云我当去是必夫子信谗有间於予也我鬼非人安用车船鼻齁臭香救【齁许切】糗糗可捐单独一身谁为朋俦子苟备知可数已不【已与以同以又与与同】子能尽言可谓圣智情状既露敢不回避【回或作曲】主人应之曰子以吾为真不知也邪子之朋俦非六非四【朋俦或作俦朋六或作三非是】在十去五满七除二各有主张私立名字握手覆羹【捩力结切】转喉触讳凡所以使吾面目可憎【目或作兒】语言无味者皆子之志也其名曰智穷【名上或有一字】矫矫亢亢恶圆喜方羞为奸欺不忍害伤其次名曰学穷傲数与名摘抉杳微【抉音於决切】高挹羣言执神之机又其次曰文穷【日文上或有名字】不专一能怪怪奇奇不可时施祇以自嬉又其次曰命穷影与形殊面丑心妍利居衆後责在人先又其次曰交穷磨肌戛骨吐出心肝企足以待眞我讎冤凡此五鬼为吾五患饥我寒我兴讹造讟能使我迷人莫能间朝悔其行暮已复然蝇营狗苟驱去复还言未毕五鬼相与张眼吐舌跳踉偃仆抵掌顿脚失笑相顾徐谓主人曰子知我名凡我所为驱我令去小黠大痴【淮南子人不小学不大迷不小慧不大愚又抱朴子凡人多以小黠而大愚洪驹父曰小黠大痴三国志自有全文】人生一世其久几何吾立子名百世不磨小人君子其心不同惟乖於时【惟或作虽非是】乃与天通携持琬琰易一羊皮饫於肥甘慕彼糠麩天下知子谁过於予虽遭斥逐不忍子踈谓予不信请质诗书主人於是垂头丧气上手称谢烧车与船延之上座【之或作入公此篇终云延之上座於是段成式作留穷词近世唐子西作留穷诗二者皆祖公之意而为之然成式後又作送穷辞焉】

鳄鱼文【鳄或作鰐朱居靖公秀水间居録云鳄鱼之状龙吻虎爪蟹目鼉鳞尾长数尺末大如箕芒刺成鈎仍有胶粘多於水滨潜伏人畜近以尾擊取盖犹象之任鼻也新旧传皆载公此文初公至潮问民疾苦皆曰恶谿有鳄鱼食民产且尽数日公令其属秦济以一羊一豚投谿水而祝之其夕有暴风震雷起湫水中数日水尽涸西徙六十里自是潮州无鳄鱼患潮州庙记所谓能驯鳄鱼之暴者此也欧阳文忠作陈文惠公神道碑书公通判潮州恶谿鳄鱼不可近公命捕得鸣鼓于市告以文而戮之其患并息潮人叹曰昔韩公谕鳄而听今公戮鳄而惧所为虽异其使异物丑类革化而利人一也吾潮间三百年而得二公幸矣】

维年月日【或作维元和十四年四月二十四日】潮州刺史韩愈使军事衙推秦济以羊一猪一投恶谿之潭水以与鳄鱼食而告之曰昔先王既有天下列山泽罔?擗刃以除虫蛇恶物为民害者【列新书作邈方云音力制切遮道也罔或作网或作纲方云庄子擗螫言刺也字从手之外或无之字】驱而出之四海之外及後王德薄不能远有【或无後王二字】则江

汉之间尚皆弃之以与蛮夷楚越【或无蛮字】况潮岭海之间去京师万里或【潮或作湖而无海字或作岭海而并无潮湖字 今按此言潮州乃岭海之闲去京师远也但公於潮州亦有祭太湖神文则只作湖岭亦通更详之】鳄鱼之涵淹卵育於此亦固其所今天子嗣唐位神圣慈武【今字阁本在子下非是】四海之外六合之内皆抚而有之况禹迹所揜扬州之近地刺史县令之所治出贡赋以供天地宗庙百神之祀之壤者哉鳄鱼其不可与刺史杂处此土也刺史受天子命守此土治此民而鳄鱼睥然不安谿潭【睥然方云左氏睥其目睥目出貌安上或有下字不或作而或无处字

今按此恐有脱误疑当云睥然不去据溪潭食民畜云云乃是更详之 睥何版切】据处食民畜熊豕鹿麋以肥其身以种其子孙与刺史亢拒争为长雄【亢拒或无亢字长雄汉薛宣传上党少豪俊易长雄】刺史虽弩弱亦安肯为鳄鱼低首下心【或作身或作中云洪谓中身也礼曰文子其中退然国语余左执鬼中注身也 今按二本皆通然意新史作心为近故从之】佻佻睨睨【睨目出兒本或作睨睨息咨反视也方云或校作睨睨穷视兒庄子睨睨然在徽纆之中 今按恐当作睨为是 佻悉枕切睨胡典切】为民吏羞以偷活於此邪【或作也】且承天子命以来为吏固其势不得不与鳄鱼辨鳄鱼有知其听刺史言【或无言字】潮之州大海在其南鲸鹏之大虾蟹之细无不容归以生以食鳄鱼朝发而夕至也今与鳄鱼约尽三日其率丑类南徙于海以避天子之命吏三日不能至五日五日不能至七日七日不能是终不肯徙也是不有刺史听从其言也不然则是鳄鱼冥顽不灵刺史虽有言不闻不知也夫傲天子之命吏不听其言不徙以避之与冥顽不灵而为民物害者皆可杀【与冥或无冥字而为或无而字】刺史则选材技吏民【或无吏字】操强弓毒矢以与鳄鱼从事必尽杀乃止其无悔

卷三十七

钦定四库全书

东雅堂昌黎集注卷三十七

行状 状

故金紫光禄大夫检校尚书左仆射同中书门下平章事兼汴州刺史充宣武军节度副大使知节度事管内支度营田汴宋亳颍等州观察处置等使上柱国陇西郡开国公赠太傅董公行状【题中或无支度二字】

曾祖仁琬皇任梁州博士祖大札皇赠右散骑常侍父伯良皇赠尚书左仆射【一本有皇任开州新浦县主簿九字公尝从晋於汴州为观察推官故知晋行治甚详唐史晋传皆取公行状为之其增修者不一二尔司马温公考异以为公作晋行状必扬美盖恶叙其为相时事止於此则其循默充位可知然其重谨亦可称也谈薮云董晋行状书李怀光事大似左氏】

公韩晋字混成河中虞乡万里人少以明经上第宣皇帝居原州【至德元载十月肃宗幸原州】公在原州宰相以公善为文任翰林之选闻【选下或有既以字】召见拜秘书省校书郎入翰林为学士三年出入左右天子以为谨愿赐绯鱼袋累升为卫尉寺丞出翰林以疾辞拜汾州司马崔圆为扬州诏以公为圆节度判官摄殿中侍御史【贞元二年二月以前汾州刺史崔圆为淮南节度使奏晋以本官摄御史充判官】以军事如京师朝天子识之拜殿中侍御史内供奉由殿中为侍御史入尚书省为主客员外郎由主客为祠部郎中先皇帝时兵部侍郎李涵如回纥【下没切】立可敦诏公兼侍御史赐紫金鱼袋为涵判官【大历四年五月兵部侍郎李涵如回纥奏晋为判官】回纥之人来曰唐之复土疆取回纥力焉【取一作假】约我为市马【市字絶句方以马字属上句而复出马字连下文为句非是】既入而归我贿不足我於使人乎取之【乎一作卒】涵惧不敢对视公公与之言曰我之复土疆尔信有力焉吾非无马而与尔为市为赐不既多乎【公与或作公为与上或无而字为赐或作为尔赐】尔之马岁至吾数皮而归资边吏请致诘也【至上或有五字而无吾字皆非是】天子念尔有劳故下诏禁侵犯【或无故字】诸戎畏我大国之尔与也莫敢校焉尔之父子宁而畜马蕃者非我谁使之於是其衆皆环公拜【是下或无其字】既又相率南面序拜皆两举手曰不敢复有意大国【两举或作举两此用庄子盗跖大怒两展其足也或无复字】自回纥归拜司勳郎中未尝言回纥之事迁秘书少监历太府太常二寺亚卿为左金吾卫将军今上即位【德宗即位】以大行皇帝山陵出财赋拜太府卿由太府为左散骑常侍兼御史中丞知台事三司使选擢才俊有威风始公为金吾未尽一月拜太府【未尽或作始尽】九日又为中丞朝夕入议事於是宰相请以公为华州刺史拜华州刺史潼关防御镇国军使朱泚之乱加御史大夫诏至于上所又拜国子祭酒兼御史大夫宣慰恒州【建中四年十二

月以晋为国子祭酒河北宣慰使】於是朱滔自范阳以回纥之师助乱人大恐【人下或有心字或有心字无大字】公既至恒州即日奉诏出兵与滔战大破走之还至河中李怀光反上如梁州【兴元元年三月李怀光反车驾幸梁州】怀光所率皆朔方兵公知其谋与朱泚合也患之造怀光言曰公之功天下无与敌【与上或有以字】公之过未有闻於人某至上所言公之情上寬明将无不赦宥焉乃能为朱泚臣乎彼为臣而背其君苟得志於公何有且公既为太尉矣彼虽宠公何以加此彼不能事君能以臣事公乎公能事彼而有不能事君乎彼知天下之怒朝夕戮死者也故求其同罪而与之比【或无故字】公何所利焉公之敌彼有余力不如明告之絕而起兵袭取之清宫而迎天子庶人服而请罪有司【罪下或有於字】虽有大过犹将擢焉如公则谁敢议语已怀光拜曰天赐公活怀光之命喜且泣公亦泣则又语其将卒如语怀光者将卒呼曰天赐公活吾三军之命拜且泣公亦泣故怀光卒不与朱泚当是时怀光几不反公气仁语若不能出口及当事乃更踈亮捷给其词忠其容貌温然故有言於人无不信【下或有之字】明年上复京师拜左金吾卫大将军由大金吾为尚书左丞又为太常卿【贞元二年七月以晋为尚书左丞被黜复拜太常卿】由太常拜门下侍郎平章事【五年正月以晋为门下侍郎平章事】在宰相位凡五年所奏於上前者皆二帝三王之道由秦汉以降未尝言【以或作已】退归未尝言所言於上者於人子弟有私问者公曰宰相所职系天下【句】天下安危宰相之能与否可见欲知宰相之能与否如此视之其可凡所谋议於上前者不足道也故其事卒不闻【或无复出天下二字】以疾病辞於上前者不记【或作已】退以表辞者八方许之拜礼部尚书【九年五月罢相改礼部尚书】制曰事上尽大臣之节又曰一心奉公於是天下知公之有言於上也初公为宰相时五月朔会朝天子在位公卿百执事在廷侍中赞百僚贺中书侍郎平章事竇参摄中书令当传诏疾作不能事【疾上或有辞字非是】凡将大朝会当事者既受命皆先日习仪于时未有诏公卿相顾公逡巡进此面言曰摄中书令臣某病不能事臣请代某事於是南面宣致诏词事已复位进退甚详为礼部四年拜兵部尚书【十二年以晋守兵部尚书充东都留守判东都尚书省东都畿汝州防御使】入谢上语问曰宴【谢下或有迁字问曰宴三字或作移时】复有入谢者上喜曰董某疾且损矣出语人曰董公且复相既二日拜东都留守判东都尚书省事充东都畿汝州都防御使【或无州字】兼御史大夫仍为兵部尚书由留守未尽五月【或无由字】拜检校尚书左仆射同中书门下平章事汴州刺史宣武军节度副大使知节度事管内支度营田汴宋毫颖等州观察处置等使汴州自大历来多兵事刘玄佐益其师至十万玄佐死子士宁代之畋游无度【或无畋游字无度或作无几考之传士宁每畋猎数日方还或本非是】其将李万荣乘其畋也逐之万荣为节度一年【度下或有使字】其将韩惟清张彦林作乱求杀万荣不克三年万荣病风昏不知事其子乃复欲为士宁之故监军使俱文珍与其将邓惟?执之归京师而万荣死诏未至惟?权军事公既受命遂行刘宗经韦弘景韩愈实从不以兵卫及郑州逆者不至郑州人为公惧或劝公止以待有自汴州出者言於公曰不可入公不对遂行宿圃田明日食中牟逆者至【者下或无至字非是】宿八角明日惟?及诸将至【及或作与】遂逆以入及郛三军缘道譟声庶人壮者呼老者泣妇人啼遂入以居初玄佐死吴凑代之【或无初字】及巩闻乱归士宁万荣皆自为而後命军士将以为常故惟?亦有志以公之速也不及谋遂出逆既而私其人观公之所为以告曰公无为惟?喜知公之无害已也委心焉进见公者退皆曰公仁人也闻公言者皆曰公仁人也环以相告故大和初玄佐遇军士厚士宁惧复加厚焉【惧下方有不字云士宁惧其无以继也若去不字则下

文皆衍 今按士宁万荣专命窃据故惧士卒之图已而复加厚焉寻上下文未见其惜费而薄之之意也况下文又加厚每加厚推之不字之衍甚明方说误矣】至万荣如士宁志及韩张乱又加厚以怀之至于惟?每加厚焉故士卒骄不能御【故士下或有宁字非是】则置腹心之士幕於公庭庑下挟弓执劔以须日出而入前者去日入而出後者至寒暑时至则加劳赐酒肉公至之明日皆罢之【明日二字或作时非是初玄佐增汴州兵至十万遇之厚万荣惟?每加厚焉尝介勇士伏幕下早暮番休晋一罢之】贞元十二年七月也八月上命汝州刺史陆长源为御史大夫行军司马杨凝自左司郎中为检校吏部郎中观察判官杜伦自前殿中侍御史为检校工部员外郎节度判官孟叔度自殿中侍御史为检校金部员外郎支度营田判官【朝廷以晋仁柔多可恐不能集事八月以汝州刺史陆长源为晋行军司马晋谦?简俭每事因循故乱兵粗安长源性刚刻多更张旧事晋初皆许之案成则命且罢以财赋叔度为人佻悦军中恶之】职事修人俗化嘉禾生白鹊集苍乌来巢嘉瓜同蒂联实【事下或有既字俗或作民苍乌旧本多作苍鸟家语苍鸟鴈也瑞应图有苍乌】四方至者归以告其帅小大威怀有所疑辄使来问有交恶者公与平之累请朝不许及有疾又请之且曰人心易动军旅多虞及臣之生计不先定至于他日事或难期犹不许十五年二月三日薨于位上三日罢朝赠太傅使吏部员外郎杨於陵来祭吊其子赠布帛米有加公之将薨也命其子三日斂既斂而行【或无既斂二字】於行之四日汴州乱【乙酉以长源为宣武军节度使是日兵乱杀长源叔度丘颖等】故君子以公为知人【知或作智】公之薨也汴州人歌之曰浊流洋洋有辟其郭闾道讙呼公来之初今公之归公在丧车又歌曰公既来止东人以完今公歿矣人谁与安【人谁或作其谁 今按外集作其非是】始公为华州亦有惠爱人思之公居处?无妾媵不饮酒不谄笑好恶无所偏与人交泊如也未尝言兵有问者曰吾志於教化享年七十六阶累升为金紫光禄大夫勲累升为上柱国爵累升为陇西郡开国公娶南阳张氏夫人後娶京兆韦氏夫人皆先公终四子全道溪全素澥全道全素皆上所赐名全道为秘书省著作郎溪为秘书省秘书郎全素为大理评事澥为太常寺太祝皆善士有学行【诸本溪作全溪澥作全澥考世系表董溪志溪澥皆无全字盖全道全素出於赐名也或无为大理评事五字】谨具历官行事状伏请牒考功【或无伏字】并牒太常议所諡牒史馆请垂编録谨状【或作状上】

贞元十五年五月十八日故吏前汴宋毫颖等州观察推官将仕郎试秘书省校书郎韩愈状与汝州卢郎中论荐侯喜状【或无荐字卢?也喜尝为?作复黄陂记公既已荐喜於卢汝州十八年陆惨佐主司权德舆又荐於陆惨後一年喜登第诚可谓知已矣】

进士侯喜

右其人为文甚古立志甚坚行止取舍有士君子之操家贫亲老无援於朝在举场十余年竟无知遇【或无知字】愈常慕其才而恨其屈与之还往岁月已多尝欲荐之於主司【或作有司】言之於上位名卑官贱其路无由观其所为文未尝不揜卷长叹【长或作而】去年愈从调选本欲携持同行适遇其人自有家事【或作难】迺遭坎轲又废一年及春末自京还怪其久絶消息【絶下一有无字】五月初至此自言为合下所知辞气激扬面有矜色曰侯喜死不恨矣喜辞亲入关羁旅道路见王公数百【王公下或有大人字或有贵人字】未

尝有如卢公之知我也比者分将委弃泥涂老死草野今胷中之气勃勃然复有仕进之路矣愈感其言贺之以酒谓之曰卢公天下之贤刺史也未闻有所推引盖难其人而重其事今子郁为选首其言死不恨固宜也古所谓知己者正如此耳身在贫贱为天下所不知独见遇於大贤乃可贵耳若自有名声又托形势此乃市道之事【乃下或有为字】又何足贵乎子之遇知於卢公真所谓知己者也士之修身立节而竟不遇知己前古已来不可胜数或日接膝而不相知或异世而相慕以其遭逢之难故曰士为知己者死【司马迁答任安书士为知己者死】不其然乎不其然乎【或无复出四字不其或作其不】合下既已知侯生而愈复以侯生言於合下者非为侯生谋也感知己之难遇大合下之德而怜侯生之心故因其行而献於左右焉谨状论今年权停举选状【德宗贞元十九年自正月至五月不雨分命祈祷山川秋七月戊午以关辅饥罢吏部选礼部贡举公时为四门博士抗疏论列其曰虽非朝官盖未为御史时也按登科记贞元二十年卒停举是公虽有此疏而上不从也】

右臣伏见今月十日勅今年诸色举选宜权停者【举选一作选举】道路相传皆云以岁之旱陛下怜闵京师之人虑其乏食故权停举选以绝其来者所以省费而足食也臣伏思之窃以为十口之家益之以一二人於食未有所费今京师之人不啻百万都计举者不过五七千人并其僮仆畜马不当京师百万分之一【分上或无万字】以十口之家计之诚未为有所损益又今年虽旱去岁大丰商贾之家必有储蓄举选者皆齎持资用以有易无未见其弊今若暂停举选或恐所害实深一则远近惊惶二则人士失业臣闻古之求雨之词曰人失职欤【公羊传威五年曰大雩者何旱祭也何休注云君亲之南郊自责曰政不一与民失职与以民为人避太宗讳】然则人之失职足以致旱今缘旱而停举选是使人失职而召灾也臣又闻君者阳也臣者阴也独阳为旱独阴为水今者陛下圣明在上虽尧舜无以加之而羣臣之贤不及於古又不能尽心於国与陛下同心助陛下为理有君无臣是以久旱以臣之愚以为宜求纯信之士骨鲠之臣忧国如家忘身奉上者超其爵位置在左右如殷高宗之用传说周文王之举太公齐桓公之拔甯戚汉武帝之取公孙弘【或无公字】清闲之余时赐召问必能辅宣王化销殄旱灾【王化或作主化】臣虽非朝官月受俸钱岁受禄粟苟有所知不敢不言谨诣光顺门奉状以闻伏听圣旨御史台上论天旱人饥状【公时为监察御史皇甫湜为公作神道碑曰贞元十九年关中旱饥人死相枕籍吏刻取怨先生列言天下根本民急如是请宽民徭役而免田租之弊专政者恶之出为连州阳山令盖谓此也公二十一年赴江陵途中寄三学士诗历言得罪之繇与湜言无异史以为言宫市出阳山误矣】

右臣伏以今年已来京畿诸县夏逢亢旱秋又早霜田种所收十不存一陛下恩踰慈母仁过春阳租赋之间例皆蠲免所徵至少所放至多上恩虽弘下困犹甚至闻有弃子逐妻以求口食拆屋伐树以纳税钱寒馁道涂【馁或作餒】毙踣沟壑有者皆已输纳无者徒被追徵臣愚以为此皆羣臣之所未言陛下之所未知者也臣窃见陛下怜念黎元同於赤子至或犯法当戮犹且宽而有宥之况此无辜之人岂有知而不救又京师者四方之腹心国家之根本其百姓实宜倍加忧恤今瑞雪频降来年必丰急之则得少而人伤缓之则事存而利远伏乞特勅京兆府应今年税钱及草粟等在百姓腹内徵未得者【腹或作复德宗十四年诏诸道州府应贞元八年至十一年两税及酒钱在百姓腹内者并除放今按腹内谓应纳而未纳者尝见国初时官文书犹有此语如今言名下也】并且停徵容至

来年蚕麦庶得少有存立臣至陋至愚无所知识【或无知字】受恩思効有见辄言无任恳款慙惧之至谨録奏闻谨奏

请复国子监生徒状【贞元十九年公为四门馆博士时奏请也】

国子监应三馆学士等準六典【唐六典三十卷开元十年起居舍又陆坚被诏撰玄宗手写六条曰理典教典礼典政典刑典事典至二十六年书成】国子馆学生三百人皆取文武三品已上及国公子孙从三品已上曾孙补充【已或作以下同】太学馆学生五百人皆取五品已上及郡县公子孙从三品已上曾孙补充【或无从字】四门馆学生五百人皆取七品已上及侯伯子男子补充

右国家典章崇重庠序近日趋竞末复本源至使公卿子孙耻游太学工商凡冗或处上庠今圣道大明儒风复振恐须革正以赞鸿猷今请国子馆并依六典其太学馆量许取常参官八品已上子弟充其四门馆亦量许取无资廕有才业人充如有资廕不补学生应举者请礼部不在收试限其新补人有冒廕者请牒送法司科罪缘今年举期已近伏请去上都五百里内特许非时收补其五百里外且任乡贡至来年春一时收补其厨粮度支先给二百七十四人今请準新补人数量加支給谨具如前伏听处分

唐故赠绛州刺史马府君行状【公尝志殿中少监马君继祖墓即北平庄武王之孙赠太子少傅畅之子尝言始余初冠应进士贡在京师穷不能自存以故人稚弟拜北平於马前王问而怜之軫其寒饥赐食与衣召二子使为之主焉今又为彙之行状彙即北平之长子也故其终亦曰愈既世通家详闻其世系事业今葬有期日从少府请掇其大者为行状托立言之君子而图其不朽焉公於马氏可谓厚矣据状贞元十九年作】

君讳某字某【讳某或作讳彙】其先为嬴姓当周之衰处晋为赵氏【其先本嬴姓伯益後伯益生大廉大廉四世孙中衍中衍四世孙仲湣仲湣生飞廉飞廉子季胜为赵氏季胜十世孙叔带去周事晋叔带五世孙夙】晋亡而赵氏为诸侯【夙九世孙浣自立为诸侯是为赵献侯】其後益大与齐楚韩魏燕为六国俱称王别子赵奢当赵时【或无时字】破秦军阙与有功号马服君子孙由是以马为氏【浣四世孙武灵王与六国俱称王武灵王子惠文王二十九年使别子赵奢擊秦大破秦军阙与下赐奢号马服君子孙以马为氏阙与地名】梁有安州刺史侍中赠太尉岫岫生乔卿任襄州主簿国乱去官不仕乔卿生君才隋末为蓊令【蓊或作蒯】燕王艺师之以有幽都之衆【罗艺字子世京兆云阳人隋大业十二年十二月举兵自称幽州总管】武德初朝京师拜武侯大将军【唐武德二年十月艺奉表归国诏封为燕郡王赐姓李氏六年二月艺请入朝】封南阳郡公卒葬大梁新里赵郡李华刻碑颂之君才生珉为玉钤卫仓曹参军事赠尚书左仆射生季龙为岚州刺史赠司空清河崔元翰铭其德於碑在新里司空生燧为司徒侍中北平王赠太傅谥庄武庄武之勲劳在策书君其长子也【燧二子长彙次畅】少举明经司徒公作藩太原【大历十四年闰五月以燧为河东节度使】授河南府参军建中四年司徒公使将武人子弟才力之士三百人朝行在扞卫献御服用物弓甲煮器幄幕奔走危难上嘉其勤【嘉或作喜】超拜太常丞赐章服迁少府

少监太仆少卿司徒公之薨也刺臂出血书佛经千余言期以报德庐墓侧植松柏终丧又拜太仆少卿疾病一年贞元十八年七月二十五日【七或作十】终于家凡年四十有五其弟少府监畅上印绶求追赠【一作赐】赠绛州刺史布帛百匹君在家行孝友待宾客朋友有信义其守官慎举职其朝献奉父命不避难其居丧有过人行初司徒公娶河南元氏封颖川郡夫人赠许国夫人许国薨少府始孩顾托以其侄为继室是为陈国夫人陈国无子【陈国无子或作夫人无子】爱君与少府如已生其薨也君与少府丧之犹实生已亲负土封其墓夫人荥阳郑氏王屋县令况之女有贤行侍君疾逾年不下堂食菜饮水药物必自择将进辄先尝方书本草恒置左右子男二人赦前左卫仓曹参军馱右清道率府胄曹参军女子二人在室虽皆幼侍疾居丧如成人愈既世通家详闻其世系事业今葬有期日从少府请掇其大者为行状托立言之君子而图其不朽焉复讎状【蜀本此状首云元和六年九月富平县人梁悦为父报仇杀人自投县请罪勅复仇杀人固有彝典以其申冤请罪视死如归自诣公门发於天性志在徇节本无求生宁失不经时从减死宜决杖一百配流循州於是史官职方员外郎韩愈献议云云公於时未为史官也此後人以史文增入阁本旧本皆无之事之首末已具载本篇旧史书於宪宗纪刑法志新史书於孝友张琬传按新史所书自太宗时至是复讎者凡七人原之者三不原者四梁悦其一也大抵杀人者死有国常典而贷死者出於一时之特敕公此议欲令凡事发具其事下尚书省集议酌宜而行礼刑两不失矣】

右伏奉今月五日勅【奉一作覩】复讎据礼经则义不同天徵法令则杀人者死礼法二事皆王教之端【端上或有大字】有此异同必资论辨宜令都省集议闻奏者朝议郎行尚书职方员外郎上骑都尉韩愈议曰伏以子复父讎见於春秋【公羊传定四年父不受诛子复讎可也】见於礼记【记檀弓子夏问於孔子曰居父母之仇如之何子曰寝苫枕干不仕弗与共天下也遇诸市朝不反丘而鬪】又见周官【周官调人凡杀人而义者今勿讎讎之则死】又见诸子史不可胜数未有非而罪之者也最宜详於律而律无其条【无下或有有字】非阙文也盖以为不许复讎则伤孝子之心而乖先王之训【一无而有字】许复讎则人将倚法专杀无以禁止其端矣夫律虽本於圣人然执而行之者有司也经之所明者制有司者也丁宁其义於经而深没其文於律者其意将使法吏一断於法【将或作特】而经术之士得引经而议也周官曰凡杀人而义者令勿讎讎之则死义宜也明杀人而不得其宜者子得复讎也此百姓之相讎者也公羊传曰父不受诛子复讎可也不受诛者罪不当诛也诛者上施於下之辞非百姓之相杀者也【杀下或无者字】又周官曰凡报仇讎者书於士杀之无罪言将复讎必先言於官则无罪也今陛下垂意典章思立定制惜有司之守怜孝子之心示不自专访议羣下臣愚以为复讎之名虽同而其事各异或百姓相讎如周官所称可议於今者或为官所诛【为官下或有吏字】如公羊所称不可行於今者又周官所称将复讎先告於士则无罪者若孤稚羸弱抱微志而伺敌人之便恐不能自言於官未可以为断於今也然则杀之与赦不可一例宜定其制曰凡有复父讎者事发具其事申尚书省尚书省集议奏闻【或无有字申或作由下二字今按此合有由字但下字当作申又或是上字耳更详之】酌其宜而处之则经律无失其指矣【或无律字】谨议

钱重物轻状【唐史食货志云自建中定两税而物轻钱重民以为患至是四十年当时为绢二疋半者为八疋大率加倍豪家大商积钱以逐轻重故农日困末业日增穆宗亦以货轻钱

重民困而不充诏百官议曰今宜使天下两税酒盐利上供及留州送使钱悉输以布帛谷粟云云此状大率与於陵议合】

右臣伏准御史台牒准中书门下帖奉进止【帖或作牒】钱重物轻为弊颇甚详求适变可以便人所贵缙货通行里闾宽息宜令百寮随所见作利害状者臣愚以为钱重物轻救之之法有四一曰在物土贡夫五谷布帛农人之所能出也工人之所能为也人不能铸钱而使之卖布帛谷米以输钱於官是以物愈贱而钱愈贵也【而钱或无而字】今使出布之乡租赋悉以布出縣丝百货之乡租赋悉以縣丝百货去京百里悉出草三百里以粟五百里之内及河渭可漕入愿以草粟租赋【草粟下或有米字】悉以听之则人益农【或作丰】钱益轻谷米布帛益重二曰在塞其隙无使之泄禁人无得以铜为器皿【或无四字】禁铸铜为浮屠佛像钟磬者蓄铜过若干斤者铸钱以为他物者皆罪死不赦禁钱不得出五岭【下或有复出五岭字】买卖一以银盗以钱出岭及违令以买卖者皆坐死【一无坐字】五岭旧钱听人载出如此则钱必轻矣三曰更其文贵之使一当五而新旧兼用之凡铸钱千其费亦千今铸一而得五是费钱千而得钱五千可立多也四曰扶其病使法必立【扶或作状非是】凡法始立必有病今使人各输其土物以为租赋则州县无见钱州县无见钱而谷米布帛未重则用不足而官吏之禄俸月减其旧三之一各置铸钱使新钱一当五者以给之轻重平乃止四法用钱必轻谷米布帛必重百姓必均矣谨録奏闻伏听勅旨谨奏

东雅堂昌黎集注卷三十七

卷三十八

<集部,别集类,汉至五代,东雅堂昌黎集注>

钦定四库全书

东雅堂昌黎集注卷三十八

表状

为韦相公让官表【宪宗纪元和九年十二月戊辰尚书右丞韦贯之同中书门下平章事公时以考功郎中知制诰代作】

臣某言伏奉今日制命以臣为尚书右丞同中书门下平章事非常之宠忽降於上天不次之恩遽属於庸品【属音之欲切】承命震骇心神靡宁顾已慙膺【他典切】手足失措臣某诚惶诚恐顿首顿首臣本非长才又乏敏识学不能通达经训文不足缘饰吏事【缘去声前汉公孙弘习文法吏事而缘饰以儒雅】徒知立志廉谨绝朋势之交处官恪?免请托之累因缘资序骤历台阁蒙生成於天地无裨补於涓尘忝冒以居涯分遂极常以盈满自诫方思退处里闾何意恩泽益深猥令超参鼎铉窃自惟度实不堪任臣某诚惶诚恐顿首顿首臣闻宰相者上熙陛下覆焘之恩下遂羣生性命之理以正百度以和四时澄其源而清其流统於一而应於万毫厘之差或致弊於寰海晷刻之误或遗患於历年固宜旁求隐士必得能者然後授之不可轻以付臣使人失望上累圣主知人之哲下乖微臣量已之义无补於理有妨於贤况今俊乂至多耆硕咸在苟以登用皆踰於臣伏乞特回所授以示至公之道天下幸甚【或有复出四字】

为宰相贺雪表【时武元衡张弘靖韦贯之等为相公知制诰】

臣某言臣伏以去岁冬间雨雪颇少今年春首宿麦未滋陛下深念黎甿屡形词旨神监昭达皇情感通春云始繁时雪遂降实丰穰之嘉瑞销疠疫於新年东作可期南亩有望此皆陛下与天合德视人如伤每发圣言则获灵贶见天人之相应知朝野之同欢臣等职在燮和慙无效用覩斯庆泽实荷鸿休

进顺宗皇帝实录表状【退之以元和八年守比部郎中史馆修撰而吉甫以九年十月卒则进实录在十年夏也】

臣愈言今之所以知古後之所以知今不可口传必凭诸史自虽二帝三王之盛若不存纪录则名氏年代不闻于兹功德事业无可称道焉顺宗皇帝以上圣之姿早处储副【大历十四

年五月德宗即位十二月以长子宣王诵为太子年十一】晨昏进见必有所陈二十余年未尝懈倦阴功隐德利及四海及嗣守大位【贞元二十一年正月即位年四十五】行其所闻顺天从人传授圣嗣陛下钦承先志绍致太平原大推功【原大或作原本】实资撰次去八年十一月臣在史职监修李吉甫授臣以前史官韦处厚所撰先帝实录三卷云未周悉令臣重修臣与修撰左拾遗沈传师直馆京兆府咸阳县尉宇文籍等共加采访并寻检诏勅修成顺宗皇帝实录五卷削去常事着其系於政者比之旧录十益六七忠良奸佞莫不备书苟关於时无所不录吉甫慎重其事欲更研讨比及身歿尚未加功臣於吉甫宅取得旧本自冬及夏刊正方毕文字鄙陋实惧尘玷【或作实积慙惧】谨随表献上臣愈诚惶诚恐顿首顿首谨言

右臣去月二十九日进前件实录今月四日宰臣宣进止其间有错误令臣改毕却进旧本者臣当修撰之时史官沈传师等采事得於传闻詮次不精致有差误圣明所鉴毫髮无遗恕臣不逮重令刊正今并添改讫其奉天功烈更加寻访已据所闻载於首卷【初德宗幸奉天仓卒闲顺宗尝亲执弓矢後先导卫备尝辛苦】俛所论着尚未周详臣所未知乞赐宣示庶获编录永传无穷谨录奏闻谨奏

为裴相公让官表【宪宗纪元和十年六月乙丑御史中丞裴度为中书侍郎同中书门下平章事公时为考功郎中知制诰代为此表】

臣某言伏奉今日制书以臣为朝议大夫守中书侍郎同中书门下平章事承命惊惶魂爽飞越俯仰天地若无所容臣某诚惶诚恐顿首顿首臣少涉经史粗知古今天与朴忠性惟愚直知事君以道无憚杀身慕当官而行不求利已人以为拙臣行不疑元和之初始拜御史旋以论事过切为宰臣所非移官府廷因佐戎幕【移或作出因或作乃元和初度为监察御史论权幸语反忤旨出为河南府功曹参军武元衡帅四川表为节度掌书记】陛下恕臣之罪怜臣之心拔居侍从之中遂掌丝纶之重【自西川召为起居舍人元和六年以司封员外郎知制诰拜中书舍人】受恩益大顾已益轻【大或作厚益轻或作愈轻】苟耳目所闻知心力所迫及少关政理辄以陈闻於裨补无涓埃之微而谗谤有丘山之积陛下知其孤立赏其微诚【或作尽诚】独断不谋獎待踰量【或作重】臣诚见陛下具文武之德有神圣之姿启中兴之宏图当太平之昌历勤身以俭与物无私威怒如雷霆容覆如天地实羣臣尽节之日才智效能之时圣君难逢重德宜报苦心焦思以日继夜苟利於国知无不为徒欲竭愚未免妄作陛下不加罪责更极宠光既领台纲【元和九年度为御史中丞】又毗邦宪【十年度为刑部侍郎】圣君所厚凶逆所讎阨於防虞几至毙蹠【元和十年六月王承宗李师道俱遣刺客杀宰相武元衡又擊度刃三进断靴刺背裂中单又伤首度坠沟中冒彊得不死】恩私曲被性命获全忝累祖先玷尘班列未知所措祗自内慙岂意陛下擢臣於伤残之余委臣以燮和之任忘其陋污使佐圣明此虽成汤举伊尹於庖厨【孟子云伊尹以割烹要汤】高宗登传说於版筑【孟子传说举於版筑之闲】周文用吕望於屠钓【离骚吕望之鼓刀兮遭文王而得举注云望屠於朝歌说苑望年七十钓於渭滨】齐桓起甯戚於饭牛【离骚甯戚之讴歌兮齐桓闻以该辅注云甯戚商贾宿齐东门外桓公夜出戚方饭牛叩角而商歌桓公闻用为客卿】雪耻蒙光去辱居贵以今準古拟议非伦陛下有四君之明行四君之事微

臣无四子之美获四子之荣岂可叨居以彰非据方今干戈未尽戢夷狄未尽宾麟凤龟龙未尽游郊藪草木鱼鼈未尽被雍熙当大有为之时得非常人之佐然後能上宣圣德以代天工如臣等类实不克堪伏愿博选周行旁及岩穴天生圣主必有贤臣得而授之乃可致理【或作集事】乞回所授以叶羣情无任恳欸之至

为宰相贺白龟状【一作表据表言伐蔡事当在元和十年宰相裴度张弘靖韦贯之也公元和十二年七月从裴度伐蔡十月克蔡州擒吴元济以献几与表言合云】

鄂岳观察使所进白龟【元和十一年以李道古为鄂岳观察使会平淮西得白龟以献】

右今日某宣进止示臣前件白龟者【止或作旨今玉堂宣?作进止下同今按陆公奏议亦可考】伏以祯祥之见必有从来物象既呈可以

推究古者谓龟为蔡【语曰臧文仲居蔡注云蔡周之守龟本出蔡地因以为名家语漆雕凭曰臧氏有守龟焉名曰蔡古者谓龟为蔡】蔡者龟也今始入贼地而获龟者是获蔡也白者西方之色刑戮之象也是必擒其帅而得地也提挈而来生致阙下此象既见其应不遥斯皆陛下圣德所施灵物来效太平之运其在於今臣等谬列台衡亲覩嘉瑞无任拚跃之至

冬荐官殷侑状【或无冬官字公尝有答殷侍御书云蒙示新注公羊春秋疑即侑也状荐堪御史太常博士元和十一年冬作十二年公送其副宗正少卿李孝诚使回鹘序云自太常博士迁虞部员外郎兼侍御史承命以行则是侑果因公之荐而为太常博士矣】

前天德军都防御判官承奉郎试大理评事兼监察御史殷侑

右伏準贞元五年六月十一日勅停使郎官御史在城者【诸本有停字无使字或无停字方引宋说云前天德军防御即所谓停使也】委常参官每年冬季闻荐者前件官兼通三传傍习诸经注疏之外自有所得久从使幕亮直着名朴厚端方少见伦比以臣所见堪任御史太常博士臣所谙知不敢不举谨録奏闻伏听勅旨

进王用碑文状【王用字师柔宪宗舅李修其姊壻也公时为右庶子为作碑时元和十一年十一月云】

故检校左散骑常侍兼右金吾卫大将军赠工部尚书王用神道碑文【用以元和十一年八月卒赠工部尚书是年十一月葬】

右京兆尹李絳【或作修】是王用亲表传用男沼等意请臣与亡父用撰前件碑文者伏以王用国之元舅位望颇崇岂臣短才所能褒饰不敢辞让辄以撰讫其碑文谨録本随状封进伏听进止【或作旨】其王用男所与臣马一匹并鞍銜白玉腰带一条臣并未敢受领谨奏

谢许受王用男人事物状【刘义好侠能歌诗闻公善接天下士步归之其後持公金数斤去曰此谀墓中人所得不若与刘君为寿公所受王用男人事物其义所谓谀墓中人所得者欤】

某官某乙【本或无此四字但云臣愈言今日品官云云
今按状体前合当具官不当言云臣某言】

右今日品官唐国珍到臣宅奉宣进止缘臣与王用撰神道碑文令臣领受用男诏所与臣马一匹并鞍銜及白玉腰带一条者臣才识浅薄词艺荒芜所撰碑文不能备尽事迹圣恩弘獎特令中使宣谕并令臣受领人事物等承命震悚再欣再跃无任荣拚之至谨附状陈谢以闻谨状

荐樊宗师状【宗师字绍述公荐之屡矣因东野之葬称其经营如已荐之郑余庆後又荐之於故相袁滋谓伏闻宾位尚有阙员今又以状荐於朝谓知贤不敢不论绍述死又为之铭极所称道其於朋友可谓信矣】

摄山南西道节度副使朝议郎前检校水部员外郎兼殿中侍御史赐绯鱼袋樊宗师【校下或有尚书字】

右件官孝友忠信称於宗族朋友可以厚风俗勤於艺学多所通解议论平正有经据可以备顾问谨洁和敏持身甚苦遇物仁恕有材有识可任以事今左右史并阙员外郎侍御史亦未备员若蒙擢授必有补益忝在班列知贤不敢不论谨録状上伏听处分

举钱徽自代状【元和十二年十二月公除刑部侍郎举徽自代徽字蔚章吴郡人尚书郎起之子以集考之公举自代凡六人为刑部举钱徽为袁州举韩泰为祭酒举张惟素为兵部举韦顗为京兆尹举马总为兵侍又举张正甫皆一时之贤也】

朝散大夫守太子右庶子飞骑尉钱徽

右臣伏準建中元年正月五日勅【正月或作五月】常参官授上後三日内举一人以自代者前件官器质端方性怀恬淡外和内敏洁静精微可以专刑宪之司参轻重之议况时名年辈俱在臣前擢以代臣必允衆望伏乞天恩遂臣诚请谨録奏闻谨奏

进撰平淮西碑文表【或无撰文二字元和十二年十月淮西平羣臣请刻石纪功十三年正月敕刑部侍郎韩愈撰文表云伏奉正月十四日敕牒本表後云三月二十五日自奉敕凡七十日矣旧史云淮西碑多叙裴度事时先入蔡州李愬功第一愬不平之时有石烈士者因仆碑得见上诉其事诏令磨愈文命翰林学士段文昌重撰文勒石详见碑注】

臣某言伏奉正月十四日勅牒【正月十四日勅牒或作某月日勅牒牒字非是】以收复淮

西【以或作已或无复字】羣臣请刻石纪功明示天下为将来法式【或无式字】陛下推劳臣下【或作推功劳臣】允其志愿使臣撰平淮西碑文者闻命震骇心识颠倒非其所任为愧为恐经涉旬月不敢措手【中谢 涉旬或作旬涉】窃惟自古神圣之君既立殊功异德卓絕之迹必有奇能博辯之士为时而生持简操笔从而写之各有品章条贯然後帝王之美巍巍煌煌充满天地其载於书则尧舜二典夏之禹贡殷之盘庚周之五诰於诗则玄鸟长发归美殷宗清庙臣工小大二雅周王是歌辞事相称善并美具号以为经【号或作纂经上或有正字】列之学官置师弟子读而讲之从始至今莫敢指斥向使撰次不得其人文字暧昧虽有美实其谁观之辞迹俱亡善恶惟一然则兹事至大不可轻以属人【中谢 或无此二字】伏惟唐至陛下【惟或作以】再登太平剗刮羣奸扫洒疆土天之所覆莫不宾顺然而淮西之功尤为俊伟碑石所刻动流亿年必得作者然後可尽能事今词学之英所在麻列【麻或作成方从阁杭苑李谢本 今按作麻殊无理疑此本是森字误转作麻後人见其误而不得其说乃改作成耳且公答孟简书亦有森列之语可考也方氏固执旧本定从麻字舛繆无理不成文章固为可怪然幸甚如此存得本字使人得以因疑致察遂得其真若便废麻而直作成字则人不复疑而本字无由可得矣然则方本虽误而亦不为无功但不当便以为是而直废它本不复思索参考耳今以无本亦未敢轻改且作麻字而着其说使读为森云】儒宗文师磊落相望外之则宰相公卿郎官博士【官或作中】内之则翰林禁密游谈侍从之臣不可一二遽数召而使之无有不可至於臣者自知最为浅陋顾贪恩待【或作侍】趋以就事丛杂乖戾律吕失次乾坤之容日月之光知其不可绘画强顏为之以塞诏旨罪当诛死其碑文今已撰成谨録封进无任慙羞战怖之至【谨上或有随表二字慙羞战怖或作慙惶怖惧此下或有谨奉表以闻三月二十五日臣愈诚惶诚恐顿首顿首谨言二十三字 今按此或本以闻下便着月日与今表式不同未详其说】

奏韩弘人事物表【古本云四月一日涯度羣夷简奉进止碑文宣赐韩弘一本】

右臣先奉恩勅撰平淮西碑文【或无恩字或无勅字】伏缘圣恩以碑本赐韩弘等今韩弘寄绢五百匹与臣充人事未敢受领谨録奏闻伏听进止谨奏

谢许受韩弘物状

臣某言今日品官第五文嵩至臣宅奉宣圣旨令臣受领韩弘等所寄撰碑人事绢者恩随事至荣与幸并慙拚怵惕罔知所喻【中谢】伏以上赞圣功臣子之职下沾羣帅文字所宜陛下谦光自居劝励为事各赐立功节将碑文一通使知朝廷备録劳效韩弘荣於宠赐遂寄缣帛与臣於臣何为坐受厚赐恩由上致利则臣归慙戴兢惶举措无地无任感恩慙恳之至

东雅堂昌黎集注卷三十八

卷三十九

钦定四库全书

东雅堂昌黎集注卷三十九

表状

论捕贼行赏表【宪宗纪元和十年六月癸卯镇州节度使王承宗遣盗夜伏於靖安坊刺杀宰相武元衡死之又遣盗於通化坊刺御史中丞裴度伤首而免京城大骇武元衡死数日未获贼兵部侍郎许孟容请见奏曰岂有国相横尸路隅而不能擒贼因洒泣极言乃诏京城诸道能捕贼者赏钱万贯仍与五品官至是获贼而未即加赏此公所以以状论列其号令之不信也】

臣愈言臣伏见六月八日勅以狂贼伤害宰臣擒捕未获陛下悲伤震悼形於寢食特降诏书明立条格云有能捉获贼者赐钱万贯仍加超授今下手贼等四分之内已得其三【一作二】其余两人盖不足计根寻踪迹知自承宗再降明诏絶其朝请又与王士则士平等官【士则士平皆王武俊之子张宴等诛士平为左金吾卫大将军士则士平或作士平士则】八日之制无不行者独有赏钱【独上或有内字】尚未赐给羣情疑惑未测圣心闻初载钱置市之日市中观者日数万人巡绕瞻视咨嗟叹息既去复来以至日暮百姓小人重财轻义不能深达事体但见不给其赏便以为朝廷爱惜此钱不守言信自近传远无由辨明且出赏以求贼今贼已诛斩若无人捉获国家何因得此贼而正刑法也【因或作由法一作罚】承宗何故而赐诛絶也士则士平何故与美官也三事既因获贼获贼必有其人不给赏钱实亦难晓假如圣心独有所见审知不合加赏其如天下百姓及後代久远之人哉【或无之人字】况今元济承宗尚未擒灭两河之地太半未收陇右河西皆没戎狄所宜大明约束使信在言前号令指麾以图功利况自陛下即位已来继有丕续【已或作以下同】斩杨惠琳收夏州斩刘辟收劔南东西川斩李錡收江东缚卢从史收泽潞等五州【五州泽潞邢洛磁】威德所加兵不污刃收魏博等六州【六州魏博贝相卢卫】致张茂昭张愔收易定徐泗濠等五州【易定二州张茂昭所管徐泗濠三州张愔所管愔於针切】创业已来列圣功德未有能高於陛下者可谓赫赫巍巍光照前後矣此由天授【由上或有皆字】陛下神圣英武之德为巨唐中兴之君宗庙神灵所共佑助勉强不已守之以信【或作道】则故地不足收而太平不难致如乘快马行平路迟速进退自由其心有所欲往无不可者於此之时特宜示人以信孔子欲存信去食人非食不生尚欲舍生以存信况可无故而轻弃也昔秦孝公用商鞅为相欲富国强兵行令於国恐人不信立三丈之木於市南门募人有能徙置北门者与五十金有一人徙之辄与五十金秦人以君言为必信法令大行国富兵强无敌天下三丈之木非难徙也徙之非有功也孝公辄与之金者所以示其言之必信也【言为必信言之必信阁杭本两句皆无信字无理甚明亦足以见二本之谬矣】昔周成王尚小与其弟叔虞为戏削桐叶

为珪曰以晋封汝其臣史佚因请择日立叔虞为侯【择杭本作泽非是】成王曰吾与之戏耳史佚曰天子无戏言言之则史书之礼成之乐歌之於是遂封叔虞於晋昔汉高祖出黄金四万斤与陈平恣其所为不问出入令谋项羽平用金间楚数年之间汉得天下论者皆言汉高祖深达於利【达或作远】能以金四万斤致得天下以此观之自古以来未有不信其言而能有大功者亦未有不费少财而能收大利者也【方无亦未至利者十三字今详文意上文引秦孝公周成王事故此以未有不信而能成大功结之又引汉高祖事故此以未有不小费而能收大利结之不可欠阙方本但以酷信阁杭之故不问可否直行删去举正亦不复载殊为无理今悉补而足之】臣於告贼之人【告或作捕】本无恩义彼虽获赏了不关臣所以区区尽言不避烦黷者欲令陛下之信行於天下也伏望恕臣愚陋僻戆之罪而收其恳款诚至之心天下之幸非臣之幸也谨奉表以闻臣愈诚惶诚恐

论佛骨表【新旧史皆具载於本传先是凤翔法门寺有护国真身塔塔内有释迦文佛指骨一节其法三十年一开开则岁稔人泰至是宪宗遣中使杜英奇押宫人三十持香花迎入大内留禁中三日乃送佛祠王公士庶奔走赞叹公为刑部侍郎上表极谏帝大怒欲抵死崔羣裴度戚里诸贵皆为公言乃贬潮州刺史时宰相疑公此表为冯宿所草以宿尝与公同年进士又同佐裴度淮西故疑之遂贬宿歙州刺史时宰相必皇甫鎛也亦可谓无识鉴矣此表宿所能了耶闻见録云宪宗元和十四年自凤翔法门寺迎佛骨入禁中韩退之以谏逐十五年有陈洪志之祸懿宗咸通十四年又迎其骨入禁中谏者以宪宗为戒懿宗曰生得见之死亦无恨不数月崩送佛骨还法门寺愈之谏云奉佛以来享年不永者其知言哉】

臣某言伏以佛者夷狄之一法耳【伏以或作臣伏闻或作臣闻】自後汉时流入中国【流上旧史有始字新史流作始】上古未尝有也昔者黄帝在位百年年百一十岁【或作一百十】少昊在位八十年年百岁【或作一百】颡顓在位七十九年年九十八岁【新史无八字考之世纪非也】帝嚳在位七十年年百五岁帝尧在位九十八年年百一十八岁【百五岁百一十八岁二语上或皆有一字】帝舜及禹年皆百岁【新史舜下有在位字以上多帝王世纪之文】此时天下太平百姓安乐寿考然而中国未有佛也【而下方有此时二字旧史无然而此三字今从新史】其後殷汤亦年百岁汤孙太戊在位七十五年武丁在位五十九年书史不言其年寿所极推其年数盖亦俱不减百岁【五十九年新旧史无九字脱也言方作定新旧史皆无年所极三字方本无推其年数四字今从新旧史方本俱下有年字二史并无俱字】周文王年九十七岁武王年九十三岁穆王在位百年此时佛法亦未入中国【入或作至】非因事佛而致然也汉明帝时始有佛法明帝在位才十八年耳【或无耳字】其後乱亡相继运祚不长宋齐梁陈元魏已下事佛渐谨年代尤促惟梁武帝在位四十八年【八或作九】前後三度舍身施佛宗庙之祭不用牲牢昼日一食【昼新旧史作尽】止於菜果其後竟为侯景所逼饿死台城国亦寻灭事佛求福乃更得祸【乃或作反乃更或作乃反】由此观之佛不足事亦可知矣【事上或有信字新旧史无事字有信字】高祖始受隋禅则议除之【武德九年四月高祖诏有司沙汰天下僧尼道士女冠】当时羣臣材识不远【材识新旧史作识见】不能深知先王之道【知新旧史作究】古今之宜推阐圣明以救斯弊【圣明或作明圣】其事遂止臣常恨焉伏惟睿圣文武皇帝陛下神圣英武数千百年已来未有伦比即位之初即不许度人为僧尼道士又不许创立寺观【不上或无即字创上

或无许字新旧史创作别】臣常以为高祖之志必行於陛下之手【常新旧史作当时二字】今纵未能即行岂可恣之转令盛也【新史无转字】今闻陛下令羣僧迎佛骨於凤翔御楼以观昇入大内【昇音舆】又令诸寺递迎供养【迎新史作加或作相】臣虽至愚必知陛下不惑於佛作此崇奉以祈福祥也直以年丰人乐【年丰人乐新旧史作丰年之乐】徇人之心为京都士庶设诡异之观戏翫之具耳【或无设字】安有圣明若此而肯信此等事哉然百姓愚冥易惑难晓苟见陛下如此将谓真心事佛皆云天子大圣犹一心敬信【云上或无皆字敬信新史作信向】百姓何人岂合更惜身命【何人新旧史作微贱岂合更惜或无岂合字而有於佛二字旧史无更字今从新史】焚顶烧指【焚顶上新史有以至字旧史有所以字谢本作以至无故新旧史焚作灼烧作燔】百十为羣解衣散钱自朝至暮转相仿效惟恐後时老少奔波弃其业次【少作幼业次作生业】若不即加禁遏更历诸寺必有断臂齟身以为供养者【或无齟字】伤风败俗传笑四方非细事也夫佛本夷狄之人【佛上新旧史无夫字下或有者字】与中国言语不通衣服殊制口不言先生之法言【不言新旧史作不道】身不服先王之法服不知君臣之义父子之情假如其身至今尚在奉其国命【新旧史无至今二字奉下或无其字】来朝京师陛下容而接之不过宣政一见礼宾一设赐衣一袭卫而出之於境不令惑衆也【而出之於或无而於二字或无之字惑下旧史有於字新史惑作貳误也】况其身死已久枯朽之骨凶秽之余岂宜令入宫禁【令新旧史作以又作直】孔子曰敬鬼神而远之古之诸侯行吊於其国尚令巫祝先以桃茢祓除不祥【祓阁杭蜀本作拂】然後进吊【礼记君临臣丧以巫祝桃茢执戈恶之也注桃鬼所恶茢苇苕可扫不祥左氏襄二十九年公如楚楚康王卒楚人使公亲禭公使巫以桃茢先祓殡楚人悔之】今无故取朽秽之物亲临观之巫祝不先桃茢不用羣臣不言其非御史不举其失臣实耻之乞以此骨付之有司投诸水火【付下或无之字新旧史作付之水火无有司投诸四字】永絶根本断天下之疑絶後代之惑【或无代字後新史作前】使天下之人知大圣人之所作为出於寻常万万也岂不盛哉岂不快哉【新史无此二语】佛如有灵能作祸祟【或作福】凡有殃咎宜加臣身上天鉴临臣不怨悔无任感激恳悃之至谨奉表以闻臣某诚惶诚恐【邵太史曰传奕上疏请除佛法云降自羲农至于有汉皆无佛法君明臣忠祚长年久汉明帝始立祆神泊于符石笃信佛法主庸臣佞祚短政虐云云予谓愈之言盖广奕之言也故表出之林之奇曰崔浩辟佛而死於魏韩愈辟佛而贬於唐此浮屠者得为口实以为辟佛者之戒至于梁武三舍身而饿死台城宋齐以下事之渐谨而年代尤促则浮屠之徒又以为学佛不尽其道之过自非卓然不惑之士未有不为其所迷也】

潮州刺史谢上表【或无刺史字本传具载公此表宪宗得表谓宰相曰昨得韩愈到潮州表因思其所谏佛骨事大是爱我我岂不知然愈为人臣不当言人主事佛乃年促也帝欲复用愈故先语及观宰相意皇甫鎛恐其复用乃率先对曰愈终太踈狂且可量移一郡遂授袁州刺史欧阳文忠公云前世有名人当论事时感激不避诛死真若知义者及到贬所则戚戚怨嗟有不堪之穷愁形於文字虽韩文公不免此累或者又罪其以封禅谏帝皆非也】

臣某言臣以狂妄戇愚不识礼度上表陈佛骨事言涉不敬正名定罪万死犹轻【新史作莫塞】陛下哀臣愚忠恕臣狂直谓臣言虽可罪心亦无他特屈刑章以臣为潮州刺史既免刑诛又获禄食圣恩弘大天地莫量破脑刳心岂足为谢臣某诚惶诚恐顿首顿首臣以正月十

四日蒙恩除潮州刺史【正上或有今年字】即日奔驰上道【或作就路】经涉岭海水陆万里以今月二十五日【三月己卯公至潮州】到州上讫与官吏百姓等相见具言朝廷治平【或无具字】天子神圣威武慈仁子养亿兆人庶无有亲踈远迩虽在万里之外岭海之陬待之一如畿甸之闲輶轂之下有善必闻有恶必见早朝晚罢兢兢业业惟恐四海之内天地之中一物不得其所故遣刺史面问百姓疾苦【面或作亲】苟有不便得以上陈国家宪章完具为治日久守令承奉诏条违犯者鲜虽在蛮荒无不安泰闻臣所称圣德惟知鼓舞譟呼不劳施为坐以无事臣某诚惶诚恐顿首顿首臣所领州在广府极东界上去广府虽云才二千里然来往动皆经月【经旧史作俞】过海口下恶水涛洸壮猛【洸音双】难计程期【程期新旧史作期程】 风鳄鱼【其遇切】患祸不测州南近界【州南近界或作州之南境】涨海连天毒雾瘴氛日夕发作臣少多病年才五十髮白齿落理不久长加以罪犯至重所处又极远恶忧惶慙悸死亡无日单立一身朝无亲党居蛮夷之地与魑魅为羣【新旧史作同羣】苟非陛下哀而念之谁肯为臣言者臣受性愚陋人事多所不通惟酷好学问文章未尝一日暂废实为时辈所见推许【旧史无所见字许或作表】臣於当时之文亦未有过人者至於论述陛下功德与诗书相表里作为歌诗荐之郊庙纪泰山之封镂白玉之牒铺张对天之闕休扬厉无前之伟蹟编之乎诗书之策而无愧措之乎天地之闲而无亏虽使古人复生臣亦未肯多让【乎新旧史并作於虽或作纵臣亦新旧史并无亦字多让新史无多字杭本并无二字尤非是】伏以大唐受命有天下【大新史作皇】四海之内莫不臣妾南北东西地各万里自天宝之後政治少懈文致未优【优旧史作复】武克不刚孽臣奸隸【孽或作嬖】蠹居棊处摇毒自防外顺内悖父死子代以祖以孙【一作继孙】如古诸侯自擅其地不贡不朝六七十年【不贡不朝新旧史作不朝不贡】四圣传序以至陛下陛下即位以来躬亲听断旋乾转坤关机阖开雷厉风飞日月清照天戈所麾莫不宁顺【宁新旧史作从】大宇之下生息理极高祖创制天下其功大矣而治未太平也太宗太平矣而大功所立咸在高祖之代非如陛下承天宝之後接因循之余六七十年之外赫然兴起南面指麾而致此巍巍之治功也【巍下或无之字治功作功治】宜定乐章以告神明东巡泰山奏功皇天【范太史唐监曰终唐之世惟柳宗元以封禪为非以韩愈之贤犹劝宪宗则其余无足怪也】具着显庸明示得意使永永年代服我成烈【年下或无代字旧史年代作万年】当此之际所谓千载一时不可逢之嘉会【际或作时一上或有之字】而臣负罪婴豐自拘海岛戚戚嗟嗟日与死迫曾不得奏薄伎於从官之内隶御之间穷思毕精以赎罪过【新旧史作前过】怀痛穷天死不闭目瞻望宸极魂神飞去【或作迭非是】伏惟皇帝陛下天地父母哀而怜之无任感恩恋阙慙惶恳迫之至谨附表陈谢以闻

贺册尊号表【公时在潮州奉表陈贺尊号之称始自开元至是遂以为故事云古者皇曰皇帝曰帝王曰王至秦始皇始兼皇帝之号汉哀帝始有圣刘太平之称唐高宗中宗遂有天皇应天之名而明皇遂称尊号曰开元圣文神武皇帝其後子孙因之以为故事范祖禹所谓使其臣子生而加谥於人君岂不悖哉】

臣某言臣伏闻宰相公卿百官及关辅百姓耆耄等以陛下功崇德钜天成地平宜加号於殊常以昭示於来代【或作载】陈请恳至【句】于再于三【陈请恳至于再于三或作载陈情款恳到再三非是】陛下仰稽乾符俯顺人志乃以新秋首序令月吉辰发扬鸿休膺受显

册【元和十四年七月羣臣上尊号曰元和圣文神武法天应道皇帝】天人合庆【合或作交】日月扬光环海之间【或作中】含生之类欢欣踊跃【欣一作拚】以歌以舞【或作以舞以歌】臣某诚欢诚喜顿首顿首臣闻体仁长人之谓元【长上或有以字无人字】发而中节之谓和无所不通之谓圣妙而无方之谓神【妙而或作妙筭下同】经纬天地之谓文戡定祸乱之谓武先天不违之谓法天道济天下之谓应道伏惟元和圣文神武法天应道皇帝陛下子育亿兆视之如伤可谓体仁以长人矣喜怒以类刑赏不差可谓发而中节矣明照无私幽隐毕达可谓无所不通矣发号出令云行雨施可谓妙而无方矣三光顺轨草木遂长可谓经纬天地矣除剗寇盗宇县清夷可谓戡定祸乱矣风雨以时祥瑞辐凑可谓先天而天不违矣国内无饥寒【国下或无内字】四夷皆朝贡【朝上或无皆字】可谓道济天下矣衆美备具名实相当赫赫巍巍超今冠古方当议明堂辟雍之事【议或作讲或上别有讲字】撰泰山梁父之仪【撰下或有集字】三代之逸礼补百王之漏典时乘六龙肆觐东后微臣幸生圣代触犯刑章【一作宪】假息海隅死亡无日瞻望宸极心魂飞扬有永弃之悲无自新之望曾不得与鸟兽率舞蛮夷纵观为比【与或作如】衔酸抱痛且耻且慙无任感恩恋阙恳迫彷徨之至【彷徨或作傍惶】谨奉表陈贺以闻

袁州刺史谢上表【或无刺史字】

臣某言臣以去年正月上疏论佛骨事先朝恕臣愚直【宪宗以元和十五年正月崩穆宗即位故此谓宪宗为先朝】不加大罪自刑部侍郎贬授潮州刺史伏遇其年七月十三日恩赦至【元和十四年七月上尊号大赦天下】其年十月二十四日准例量移改授袁州刺史以今月八日到任上乞臣某诚欢诚喜顿首顿首伏以州小地狭税赋及时人安吏循闾里无事微臣惟当布陛下惟新之泽守国家承平之规劝以耕桑使无怠惰而已臣以愚陋无堪累蒙朝廷奨用掌诰西掖【元和九年十二月公知制诰】司刑南宫【元和十二年十二月公为刑部侍郎】显荣频频称效寂蔑又蒙赦其罪累授以方州德重恩弘身微命贱无阶答谢惟积慙惶无任感恩慙惕之至谨差军事副将郝泰奉表陈谢以闻

贺皇帝即位表【穆宗即皇帝位公在袁州以表贺】

臣某言伏闻皇帝陛下以闰正月三日【或无三日二字】奉遗诏昭升大位【升或作承元和十五年闰正月穆宗即位书昭升于上】天地神只永有依归华夏蛮貊永有承事神人交庆日月贞明臣某诚欢诚喜顿首顿首臣闻王者必为天所相为人所归上符天心下合人志然後奄有四海以君万邦伏惟皇帝陛下承列圣之不绩当中兴之昌运爰自主鬯春宫齿胄国学孝友之美实形四方英伟之姿久动羣听及初嗣位遐迩莫不欢心爰降诏书老幼或至垂泣【或作涕】举用俊乂流窜奸邪【帝即位之日召翰林学士段文昌杜元颖沈传师李肇侍读薛放丁公着对思政殿并赐金紫丁未贬宰臣皇甫鎛为崖州司户参军】虽虞舜之去四凶举十六相不能过也【浑敦穷奇檮杌饕餮四凶也苍舒隤鬻檮戴大临彤降庭坚仲容叔达伯奋仲堪叔献季仲伯虎仲熊叔豹季狸十六相也见左传】天下翘首以望太平天下倾心以观至化臣某诚欢诚喜顿首顿首臣闻昔者尧舜以吁嗟君臣相戒以致至治周文王以忧勤日中不食以和万民故能泽流无穷名配日月伏惟皇帝陛下仪而象之以永多福

天下幸甚天下幸甚微臣往因言事得罪先朝守郡远方拘限条制【守郡或作僻守制或作例】不获奔走称庆阙庭无任欣欢踊跃感恩恋阙之至谨奉表以闻

贺赦表

臣某言伏奉二月五日制书大赦天下常赦所不原者咸蒙除罪【或无蒙字】与之更始令得自新恩浹幽明庆溢寰海臣某诚欢诚喜顿首顿首臣闻王者必於嗣位之始降非常之恩所以象德乾坤同明日月伏惟皇帝陛下文思聪明圣神睿哲发号出令云行雨施惧刑政之或差怜鰥寡之重困知事久之滋弊虑法讹之益奸罪人悉原坠典咸举生恩既及於四海和气遂充於八紘臣某诚欢诚喜顿首顿首微臣往因论事获谴海隅旋沐朝獎待罪山郡未离贬窜之地忽逢旷荡之恩踊跃欣欢实倍常品限以官守不获随例称庆阙庭无任感恩恋阙之至谨奉表陈贺以闻

贺册皇太后表【穆宗纪元和十五年闰正月尊母为皇太后即宪宗懿安皇后郭氏子仪之孙也】

臣某言伏承闰正月二十七日皇太后光膺令典受册宫闈欢心始自於内朝孝理遂形於寰海臣某诚欢诚喜顿首顿首皇太后夙赞先皇弼成至化诞生明圣纘继鸿休华胥实赞於轩图【帝王世纪华胥太昊母】文母有光於周道【文母太姒诗亦右文母】惟懿德克配前芳皇帝陛下出震承乾垂衣御极式展臣子之志以明教化之源礼命载崇华夷同庆臣待罪外郡不获随例称贺阙庭【贺或作庆】无任踊跃欣欢之至谨奉表陈贺以闻

贺庆云表【穆宗元和十五年六月十六日也公时为袁州刺史以表图称贺云】

臣某言臣所领州今月十六日申时有庆云见於西北至暮方散臣及举州官吏百姓等无不见者五采五色光华不可偏观非烟非云容状詎能详述抱日增丽浮空不收既变化而无穷亦卷舒而莫定斯为上瑞实应太平臣某诚欢诚喜顿首顿首谨按沈约宋书云庆云五色者太平之应又据孝经援神契曰王者德至山陵则庆云出【陵或作泽】故黄帝因之以纪事【左氏昭十七年黄帝以云纪故为云师而云名说者以黄帝有景云之瑞故以名官也】虞舜由之而作歌【尚书大传曰俊乂百工相和而歌卿云帝乃倡之曰卿云烂兮礼纍纍兮】又按季夏六月土王用事【王或作正】其日丙戌亦主於土【今按历家四季之月土王用事各十八日今云六月明当作王丙戌以历推之十六日也】西北方者京师所在土为国家之德祥见京师之位既徵於古又验於今伏惟皇帝陛下德合覆载道光轩虞嗣位之初祯祥继至昇平之符既兆仁寿之域以跻【以或作已】微臣往在先朝以论事得罪身居贬黜之地目覩殊常之庆拚跃欣幸【欣一作欢】实倍常情伏乞宣付史官以彰圣德所致瞻恋阙庭心魂飞驰无任欣拚踊跃之至【驰下或有并图奉进四字或附於下文奉表陈贺之下】谨差某官奉表陈贺以闻

举张惟素自代状 国子监【公自袁州召为国子祭酒举以自代时元和十五年冬也】

中散大夫守左散骑常侍上柱国赐紫金鱼袋张惟素

右伏準建中元年正月五日制常参官上後三日举一人自代者前件官文学治行衆所推与累历中外资序已深【序或作考】和而不同静而有守敦厚退让可以训人臣所不如辄举自代谨録奏闻

举韩泰自代状 袁州【公自潮州移刺袁州举泰以自代时元和十五年春也】

使持节漳州诸军事守漳州刺史韩泰【泰永贞元年十一月坐王叔文之败贬?州司马元和十年三月迁漳州刺史】

右伏準建中元年正月五日制常参官及刺史授上讫三日内举一人自代者前件官词学优长才器端实早登科第【贞元十一年泰登第】亦更台省【贞元中泰累迁至户部郎中】往因过犯贬黜至今十五余年自领漳州悉心为治官吏惩惧不敢为非百姓安宁并得其所臣在潮州之日与其州界相接臣之政事远所不如乞以代臣庶为允当谨録奏闻

慰国哀表【宪宗以元和十五年正月庚子崩於大明宫中和殿公时刺袁州奉表称慰】

臣某言伏奉正月二十七日诏书大行皇帝奄弃万国承诏哀惶号踊无地伏惟圣情何可堪处大行皇帝功济寰区仁沾动植奉讳之日率土崩心凡在臣子不胜殒裂伏惟陛下痛贯宸极圣情难居臣拘守远郡不获匍匐奉慰瞻望阙廷且悲且恋谨奉表陈慰以闻举荐张籍状【籍字文昌苏州吴人贞元十五年进士公时为国子祭酒以状荐籍藉用是自校书郎除国子博士元和十五年也籍祭公诗云我官麟台中公为大司成念此委末秩不能力自扬特状为博士始获升朝行未几享其资遂忝南宫郎可以知公之荐也或有国子监字】

登仕郎守秘书省校书郎张籍

右件官学有师法文多古风沈默静退介然自守声华行实光映儒林臣当司见阙国子监博士一员生徒藉其训导伏乞天恩特授此官以彰圣朝崇儒尚德之道谨録奏闻伏听勅旨

请上尊号表【或有国子监字元和十五年九月公自袁州召为国子祭酒至是有此表】

臣某言臣得所管国子太学广文四门及书算律等七馆学生沈周封等六百人状【或无得字】称身虽贱微然皆以选择得备学生读六艺之文修先王之道粗有知识皆由上恩今天子整齐乾坤出入神圣【或无今字】经营乎无为之业游息乎混元之宫不谋於廷不战於野坐收冀部【元和十五年十月成德军节度使王承元以镇赵深冀四州归于有司】旋定幽都【长庆元年三月幽州节度使刘总以所管八州归于有司】析木天街星宿清润北岳医闾神鬼受职【析木天街北岳医闾皆以幽冀言也天文志昴为天街属冀州自尾十度至南斗十一度为析木属幽州北岳恒山在定州恒阳县在古冀州之域也医闾周礼职方氏幽

州其镇医闾也 今按此长庆元年刘总纳土时也】地弥天区界轶海外舜之十有二州周之千七百国章亥所步禹契所书四面辐辏各修贡职【章亥所步山海经云禹使大章步自东极至于西垂二亿三万三千五百里七十一歩又使豎亥自南极尽於北垂二亿三万三千五百里七十一歩】西谢之首北上之渠怛威愧德失据狼狽收其种落逃遁远去来献羊马千里不絶功既如此德又如彼【或作如何非是】爰初嗣位首去奸嬖【谓贬皇甫鎛嬖或作孽】随所顾指应时清宁哀天下之鰥寡释四海之郁结左右前後莫匪俊良小大之材咸尽其用无所诛诘一和以仁由是五谷岁登百瑞时见六府三事惟序惟歌昔者娲皇杀黑龙以济冀州尧诛九婴以定下土【娲皇杀黑龙尧诛九婴二事并见淮南子】血兵剗刃仅就厥功以方吾君一何远也尧之在位七十余载戒飭咨嗟以致平治孔子之圣自云三年有成今自嗣位以来岁有余耳臻此功德其何捷哉置邮传命未足以谕以非常之功袭寻常之号以冠古之美屈守文之名臣子之诚【子或作下】阙而不奏天号人称不满事实斯亦缙绅先生之过也谓臣官居师长不言谓何考其所陈中於义理天人合愿不谋而同非臣之愚所敢隐蔽辄冒死以闻伏乞天恩特允诚志令公卿大夫得竭思虑取正於经以定大号有司备礼择日以颁天下幸甚天下幸甚臣某诚惶诚恐【方本无臣某下六字】举韦顥自代状尚书兵部【长庆元年七月公自国子祭酒除兵部侍郎举顥自代 顥语岂切】

中散大夫守大理少卿骁骑尉韦顥

右伏準建中元年正月五日制常参官上後三日举一人自代者前件官学识该达器量弘深朝推直道代仰清节显映班序十五年余夷险一致风猷益茂屈居少列未副羣情文昌政本侍郎官重尚德之举顥宜当之乞回臣所授庶弭官谤谨録奏闻谨奏

东雅堂昌黎集注卷三十九

卷四十

钦定四库全书

东雅堂昌黎集注卷四十

表状

论孔戣致仕状【或无孔戣字公尝志孔尚书墓言尚书七十三上书去官公尝贤其能谓公尚壮上三留奚去之果曰吾负二宜去尚奚顾子言明日奏疏请留不报此公所论之状也时长庆三年作】

某官某

右臣与孔戣同在南省为官数得相见【或无同字】戣为人守节清苦议论平正今年才七十筋力耳目未觉衰老忧国忘家用意深远所谓朝之耆德老成人者臣知戣上疏求致仕故往看戣戣为臣言已蒙圣主允许伏以陛下优贤尚齿见戣频上三疏言词恳到重违其意遂即许之此诚陛下仁德之至然如戣辈在朝不过三数人实可为国爱惜自古以来及圣朝故事年虽八九十但视听心虑苟未昏错尚可顾问委以事者虽求退罢无不殷勤留止优以禄秩不听其去以明人君贪贤敬老之道也礼大夫七十而致事【礼下或有曰字致事或作致仕今按礼记作事】若不得谢则必赐之几杖安车七十求退人臣之常礼若有德及气力尚壮则君优而留之不必年过七十尽许致事也诗曰虽无老成人尚有典刑此言老成人重於典刑不可不惜而留也今戣幸无疾疹【音軫】但以年当致事据礼求退陛下若不听许亦无伤於义而有贪贤之美况左承职事亦极清简若戣尚以繁要为辞自可别授秩崇而务少者今中外之臣有年过於戣尚未得退戣独何人得遂其愿【其或作所】然人皆求进戣独求退尤可贤重臣所领官无事不敢请对【或无领字】蒙陛下厚恩苟有所见不敢不言伏望圣恩特垂察纳

举马总自代状

京兆府【公为京兆尹举以自代长庆三年也时总自天平军节度使方入为户部尚书】

银青光禄大夫检校尚书右仆射兼户部尚书马总

右伏准建中元年正月五日制常参官上後三日举一人自代者伏以近者京尹用人稍轻所以市井之间【或无近者至所以十字市井作畿甸】盗贼未断郊野之外疲瘵尚多前件官文武兼资宽猛得所畧更方镇皆有功能若以代臣实为至当谨録奏闻谨奏

贺雨表【公尹京兆时作】

臣某言臣闻圣人之德与天地通诚发於中事应於外始闻其语今见其真臣诚欢诚喜顿首顿首伏以季夏以来雨泽不降臣职司京邑祈祷实频青天湛然旱气转甚陛下悯兹黎庶【悯一作怜】有事山川中使才出於九门阴云已垂於四野龙神效职雷雨应期【雷或作雷】嘉谷奋兴根叶肥润抽茎展穗不失时宜人和年丰莫大之庆微臣幸蒙宠任获覩殊祥庆拚欢呼倍於常品无任踊跃之至谨奉表陈贺以闻

贺太阳不亏状【状蜀作表公尹京兆时作】

司天台奏今月一日太阳不亏【长庆三年九月壬子朔日食角十二度今月一日十月一日也盖九月朔日食则十月朔当亏今太阳不亏故以为贺】

右司天台奏今日辰卯间太阳合亏陛下敬畏天命克己修身诚发於中灾销於上自卯及巳当亏不亏【及或作至】虽隔阴云转更明朗北於常日不觉有殊天且不违庆孰为大臣官忝京尹亲覩殊祥欣感之诚实倍常品谨奉状贺以闻【状下或有陈字闻下或有谨奏字】

举张正甫自代状 尚书兵部【公两为兵部侍郎长庆元年七月初为兵侍举大理少卿韦顓以自代长庆三年自京兆尹再除兵侍则举正甫以自代前後皆可考也】

通议大夫守右散骑常侍上柱国南阳县开国子食邑五百户赐紫金鱼袋张正甫【正甫元和末年自同州刺史入拜左散骑常侍正甫大和八年卒年八十二】

右臣蒙恩除尚书兵部侍郎伏准建中元年正月五日制常参官上後三日举一人自代者前件官稟正直之性怀刚毅之姿嫉恶如仇讎见善若饥渴备更内外灼有名声年齿虽高气力逾励【力或作志】甘贫苦节不愧神明可谓古之老成朝之硕德久处散地实非所宜乞以代臣以副公望【或有谨録奏闻谨奏六字】

袁州申使状【王黄州尝答丁晋公书云退之为袁州刺史故事观察使牒部刺史皆曰故牒时王仲舒廉问江西以吏部巨贤特自损曰谨牒而退之致书恳请以为宜如旧制元之所云即谓此尔】

使司牒州牒

右自今月二日後每奉公牒牒尾故牒字皆为谨牒字有异於常初不敢陈论以为错误今既频奉文牒前後并同在愈不胜战惧之至伏乞仁恩特令改就常式以安下情

国子监论新注学官牒【李习之状公行曰其为国子祭酒也奏儒生为学官日使会讲生徒多奔走听闻皆喜曰韩公来为祭酒国子监不寂寞矣此疏公为祭酒时所论元和十二年也】

】

国子监应今新注学官等牒准今年赦文委国子祭酒选择有经艺堪训导生徒者以充学官近年吏部所注多循资叙不考艺能至令生徒不自劝励伏请非专通经传博涉坟史【坟一作文】及进士五经请色登科人不以比拟其新受官【受或作授】上日必加研试然後放上以副圣朝崇儒尚学之意具状牒上吏部仍牒监者谨牒

黄家贼事宜状【黄家贼自贞元十一年黄洞首领黄少卿攻邕管等州经畧使孙公器请发岭南兵穷讨之德宗不许遣中人招谕不从自是叛服不常元和闲又有黄承庆黄少度黄昌瓘继起长庆初以严公素为经畧使复上表请讨公以近贬岭外谓自潮方移袁继入为祭酒知岭外事详故以是三事为请时元和十五年也】

一臣去年贬岭外刺史【一臣去年一作右臣伏以臣去年】其州虽与黄家贼不相怜接然见往来过客并谙知岭外事【谙或作诸】人所说至精至熟其贼并是夷獠亦无城郭可居依山傍险自称洞主衣服言语都不似人寻常亦各营生急则屯聚相保比缘邕管经畧使多不得人德既不能绥怀威又不能临制侵欺虏缚以致怨恨蛮夷之性易动难安遂至攻劫州县侵暴平人或复私讎或贪小利或聚或散终亦不能为事近者征讨本起於裴行立阳旻此两人者【此下或有时字】本无远虑深谋意在邀功求赏亦缘见贼未屯聚之时将谓单弱立可摧破争献谋计惟恐後时朝廷信之遂允其请自用兵已来已经二年【或无下已字当删上已字】前後所奏杀获计不下一二万人【或无二字】傥皆非虚贼已寻尽至今贼犹依旧足明欺罔朝廷邕容两管因此凋弊【因或作内经二字】杀伤疾患【或作疫】十室九空百姓怨嗟如出一口阳旻行立相继身亡实由自邀功赏【自或作身】造作兵端人神共嫉以致殃咎【嫉或作怒致或作至】阳旻行立事既已往今所用严公素者【素或作集】亦非抚御之才不能别立规模依前还请攻讨如此不已臣恐岭南一道未有宁息之时

一昨者并邕容两管为一道深合事宜【或无并字】然邕州与贼逼近容州则甚悬隔其经畧使若置在邕州与贼隔江对岸兵镇所处物力必全一则不敢轻有侵犯一则易为逐便控制今置在容州兵马必少贼见势弱易生奸心伏请移经畧使於邕州其容州但置刺史实为至便

一比者所发诸道南讨兵马例皆不谙山川不伏水土【伏或作服】远乡羁旅疾疫杀伤臣自南来见说江西所发共四百人曾未一年其所存者数不满百【或无者字】岳鄂所发都三百人其所存者四分才一续添续死每发倍难若令於邕容侧近召募添置千人便割诸道见供行营人数粮赐均融充给所费既不增加而兵士又皆便习长有守备不同客军守则有威攻则有利

一自南讨已来贼徒亦甚伤损察其情理厌苦必深大抵岭南人稀地广贼之所处又更荒僻假如尽杀其人尽得其地在於国计不为有益容贷羈縻此之禽兽来则扞御去则不追亦未亏损朝廷事势以臣之愚若因改元大庆【元和十六年穆宗即位之明年当改元】赦其罪

戾遣一郎官御史亲往宣谕必望风降伏謹呼听命【呼或作叫】仍为择选有材用威信谄岭南事者为经畧使【有或作其】处理得宜【理或作置】自然永无侵叛之事

应所在典贴良人男女等状【方无在字或又无等字方云二状皆袁州进
今按状云往任袁州刺史方说非是】

应所在典贴良人男女等【此是状首标目所论事与前卷贺白龟状体正同犹今之贴黄及状眼也方本删去非是】

右准律不许典贴良人男女作奴婢驱使臣往任袁州刺史日捡贵州界内得七百三十一人【责或作到】并是良人男女准律计佣折直一时放免【计上或有例字】原其本末或因水旱不熟或因公私债负遂相典贴渐以成风名目虽殊奴婢不别鞭笞役使至死乃休既乖律文实亏政理袁州至小尚有七百余入天下诸州其数固当不少今因大庆伏乞令有司重举旧章一皆放免仍勒长吏严加检责如有隐漏必重科惩则四海苍生孰不感荷圣德以前件如前谨具奏闻伏听勅旨

论淮西事宜状【或无状字吴少阳初为彰义军节度使元和九年卒而其子元济自立宪宗欲讨之明年遣御史中丞裴度视师还奏兵可用与宰相意不合既而盗杀宰相伤中丞不克遂相度以主东兵公时为中书舍人乃上淮西事宜谓三小州残弊困剧之余而当天下之全力其破贼可立而待然由是失宰相意左迁为右庶子十二年裴度出讨蔡以公为行军司马卒擒吴元济皆如公言】

右臣伏以淮西三州之地自少阳疾病去年春夏已来图为今日之事有职位者劳於计虑抚循【於或作其】奉所役者修其器械防守金帛粮畜耗於赏给【耗於或作匱于】执兵之卒四向侵掠农夫织妇携持幼弱餉於其後【携上或有皆字餉或作饱非是】虽时侵掠小有所得力尽筋疲不偿其费又闻畜马甚多自半年已来皆上槽枥譬如有人虽有十夫之力自朝及夕常自大呼跳跃初虽可畏其势不久必自委顿乘其力衰三尺童子可使制其死命况以三小州残弊困剧之余而当天下之全力其破败可立而待也【待下或有之字非是】然所未可知者在陛下断与不断耳夫兵不多不足以必胜【不足上一有则字必或作取】必胜之师必在速战兵多而战不速则所费必广两界之间疆场之上日相攻劫必有杀伤近贼州县徵役百端农夫织妇不得安业或时小遇水旱百姓愁苦当此之时则人人异议以惑陛下之听【下或有矣字】陛下持之不坚半途而罢伤威损费为弊必深所以要先决於心详度本末事至不惑然可图功【然新吏作乃然犹然後也下文然可集事然拟许其承继皆一义今按此盖当时俗体如此故公状中用之不欲改也】为统帅者尽力行之於前而参谋议者尽心奉之於後内外相应其功乃成昔者殷高宗大圣之主也以天子之威伐背叛之国三年乃克不以为迟志在立功不计所费【背叛或作叛背】传曰断而後行鬼神避之【史记赵高曰断而後行鬼神避之】迟疑不断未有能成其事者也臣谬承恩宠获掌纶诰地亲职重不同庶寮辄竭愚诚以効裨补谨条次平贼事宜一如後

一诸道发兵或三二千人势力单弱羁旅异乡与贼不相谙委望风慑惧难便前进【便或作更】所在将帅以其客兵难处使先不存优恤【处下或有指字不下或有抚字皆非是】待之既薄使之又苦或被分割队伍隶属诸头士卒本将一朝相失心孤意怯难以有功又其本军各须资遣道路辽远劳费倍多士卒有征行之艰间里怀离别之思今闻陈许安唐汝壽等州与贼界连接处村落百姓悉有兵器小小俘劫皆能自防习於战鬪识贼深浅既是土人护惜乡里比来未有处分犹愿自备衣粮共相保聚以备寇贼若令召募立可成军若要添兵自可取足贼平之後易使归农伏请诸道先所追到行营者悉令却牒归本道据行营所追人额器械弓矢一物已上悉送行营充给【却下或无牒字据下或无行字给上或无充字 今按上下文势合有行字行下更合有营字其理甚明今辄补足】所召募人兵数既足加之教练三数月後诸道客军一切可罢比之徵发远人利害悬隔

一绕逆贼州县堡栅等各置兵马【绕一作统】都数虽多每处则至少【至上或有兵字】又相去阔远难相应接所以数被攻劫致有损伤今若分为四道【或无分字】每道各置三万人择要害地屯聚一处使有隐然之望【隐或作殷 按汉书隐若一敌国方本非是】审量事势乘时逐利可入则四道一时俱发【四或作诸】使其狼狈惊惶首尾不相救济若未可入则深壁高垒以逸待劳自然不要诸处多置防备临贼小县可收百姓於便地作行县以主领之使免散失

一蔡州士卒为元济迫胁势不得已遂与王师交战原其本根皆是国家百姓进退皆死诚可闵伤宜明勅诸军使深知此意当战鬪之际固当以尽敌为心若形势已穷不能为恶者不须过有杀戮喻以圣德放之使归销其凶悖之心贷以生全之幸自然相率弃逆归顺一论语曰欲速则不达见小利则大事不成比来征讨无功皆由欲其速捷有司计筭所费苟务因循小不如意求休罢河北淮西等见承前事势知国家必不与之持久并力苦战幸其一胜即希冀恩赦朝廷无至忠忧国之人不惜伤损威重因其有请便议罢兵往日之事患皆然也【往或作近】臣愚以为淮西三小州之地元济又甚庸愚而陛下以圣明英武之姿用四海九州之力除此小寇难易可知太山压卵未足为喻

一兵之胜负实在赏罚赏厚可令廉士动心【廉或作战非是】罚重可令凶人丧胆然可集事【然或作则】不可爱惜所费憚於行刑

一淄青恒冀两道与蔡州气类畧同今闻讨伐元济【伐或作罚非是】人情必有救助之意然皆闇弱自保无暇虚张声势则必有之至於分兵出界公然为恶亦必不敢宜特下诏云蔡州自吴少诚已来相承为节度使亦微有功效少阳之歿【阳或作诚非是】朕亦本拟与元济恐其年少未能理事所以未便处置待其稍能缉綏然拟许其承继【拟或作後】今忽自为狂勃侵掠【勃或作悖】不受朝命事不得已所以有此讨伐【或作罚】至如淄青恒州范阳等道祖父各有功业相承命节【或无命字节下或有制字或有制字而无节字 今按李德裕之讨泽潞正用此策以伐其交世以为奇不知韩公已言之矣】年岁已久朕必不利其土地轻有改易各宜自安如妄自疑惧敢相扇动朕即赦元济不问回军讨之自然破胆不敢妄有异说

以前件謹錄奏聞伏乞天恩特賜裁擇謹奏

論變鹽法事宜狀【長慶二年張平叔為戶部侍郎侍疏請官自賣鹽可以富國強兵陳利害十八條詔下其說令公卿詳議公與韋處厚條詰之事遂不行平叔所陳十八條此可見者十六白樂天行平叔判度支詞曰計能析秋毫吏畏如夏日東坡曰此必小人也按柳氏家訓平叔後以賊敗窮失官錢四十萬緡是宜以此終也】

張平叔所奏鹽法條件

右奉勅將變鹽法事貴精詳宜令臣等各陳利害可否聞奏者平叔所上變法條件臣終始詳度恐不可施行各隨本條分析利害如後

一件平叔請令州府差人自糴官鹽收實估匹段省司准旧例支用自然獲利一倍已上者臣今通計所在百姓貧多富少除城郭外有見錢糴鹽者十无二三多用雜物及米谷博易鹽商利歸於已无物不取或从賒貸升斗約以時熟填还用此取濟兩得利便今令州縣人吏坐鋪自糴利不關已罪則加身不得見錢及頭段物恐失官利必不敢糴變法之後百姓貧者无从得鹽而食矣求利未得歛怨已多自然坐失鹽利常數所云獲利一倍臣所未見

一件平叔又請鄉村去州縣遠處令所由將鹽就村糴易不得令百姓闕鹽者臣以為鄉村遠處或三家五家山谷居住不可令人吏將鹽家至戶到多將則糴貨不尽少將則得錢无多【无或作不】計其往來自充糧食不足比來商人或自負擔斗石往與百姓博易所冀平價之上利得三錢兩錢不比所由為官所使到村之後必索百姓供應所利至少為弊則多此又不可行者也一件平叔云所務至重須令廟堂宰相充使臣以為若法可行不假令宰相充使若不可行虽宰相充使无益也【下若字或作令或有若字无下十一字】又宰相者【或无者字或无又者二字】所以臨察百司考其殿最若自為使纵有敗闕遣誰舉之此又不可者也

一件平叔又云【或无一件字 今按此別是一條当有一件字】法行之後停減鹽司所由糧課年可收錢十萬貫臣以為變法之後弊隨事生尚恐不登常數安得更望贏利

一件平叔欲令府縣糴鹽每月更加京兆尹料錢百千司錄及兩縣令每月各加五十千其餘觀察及諸州刺史縣令錄事參軍多至每月五十千少至五千三千者臣今計此用錢已多其餘官典及巡察手力所由等糧課仍不在此數通計所給每歲不下十萬貫未见其利所費已廣平叔又云停鹽司諸色所由糧課約每歲合減得十萬貫錢【或无所由一字】今臣計其新法亦用十萬不啻減得十萬却用十萬所亡所得一无贏余也平叔又請以糴鹽多少為刺史縣令殿最者遷轉不拘常例如闕課利依條科責者刺史縣令職在分憂今惟以鹽利多少為之升黜不复考其治行非唐虞三載考績黜陟幽明之义也

一件平叔請定鹽價每筋三十文又每二百里每筋價加收二文以充腳價量地遠近險易加至六文腳價不足官與出名為每筋三十文其實已三十六文也【也上或无文字】今鹽價

京师每筋四十【一有文字】诸州则不登此变法之後祇校数文於百姓未有厚利也【祇或作只】脚价用五文者官与出二文【用或作每二或作三】用十文者官与出四文是盐一筋官榷得钱名为三十其实筋多得二十八少得二十六文折长补短每筋收钱不过二十六百姓折长补短每筋用钱三十四则是公私之间每筋常失七八文也下不及百姓上不归官家积数至多不可遽算以此言之不为有益平叔又请令所在及农隙时并召车牛般盐送纳都仓不得令有阙绝者州县和雇车牛百姓必无情愿事须差配然付脚钱百姓将车载盐所由先皆无检齐集之後始得载盐及至院监请受又须待其轮次不用门户皆被停留轮纳之时人事又别凡是和雇无不皆然百姓宁为私家载物取钱五文不为官家载物取十文钱也【文下或无钱字】不和雇则无可载盐和雇则害及百姓此又不可也

一件平叔称停减盐务所由收其粮课一岁尚得十万贯文【尚或作计】今又称既有巡院请量闲剧留官吏於仓场勾当要害守捉少置人数优恤粮料严加把捉如有漏失私榷等并准条处分者平叔所管盐务所由人数有几量留之外收其粮课一岁尚得十万贯此又不近理也比来要害守捉人数至多尚有漏失私榷之弊今又减置人数谓能私盐断絶此又於理不可也

一件平叔云变法之後岁计必有所余日用还恐不足谓一年已来【谓一作请】且未责以课利後必数倍校多者此又不可方今国用常言不足若一岁顿阙课利为害已深虽云明年校多岂可悬保此又非公私蓄积尚少之时可行者也

一件平叔又云浮寄奸猾者转富土着守业者日贫若官自榷盐不问贵贱贫富士农工商道士僧尼并兼游惰因其所食尽输官钱并诸道军诸使家口亲族递相影占不曾输税若官自榷盐此辈无一人遗漏者臣以此数色人等官未自榷盐之时从来榷盐而食不待官自榷然後食盐也【榷上或有来字今按文势恐来字上更有从字今亦补足】若官不自榷盐此色人等不榷盐而食官自榷盐即榷而食之则信如平叔所言矣若官自榷与不自榷皆常榷盐而食则今官自榷亦无利也所谓知其一而不知其二见其近而不见其远也国家榷盐【国或作官】榷与商人商人纳榷榷与百姓则是天下百姓无贫富贵贱皆已输钱於官矣不必与国家交手付钱然後为输钱於官也一件平叔云初定两税时绢一匹直钱三千今绢一匹直钱八百百姓贫虚或先取粟麦价及至收获悉以还债又充官税颗粒不残若官中榷盐一家五口所食盐价不过十钱随日而输不劳驱遣则必无举债逃亡之患者【举债或作举赁】臣以为百姓困弊不皆为盐价贵也今官自榷盐与依旧令商人榷其价贵贱所校无多通计一家五口所食之盐平叔所计一日以十钱为率一月当用钱三百是则三日食盐一筋一月率当十筋【三百是或作三百六十足云或云六十字恐羨非盖盐每筋已当三十六文月当十筋则三百六十也足或作是属下句今按平叔所定盐价一筋止三十文韩公通计民间所加脚费多者一月或至三十六文耳其地近者自不及此难预计也故此六文但云一日以十钱为率则一月安得用二百六十乎其六十字当依或说删云足改作是而属下句为当】新法实价与旧每筋不校三四钱以下通计五口之家以平叔所约之法计之贱於旧价日校一钱月校三十不满五口之家所校更少然则改用新法百姓亦未免穷困流散也初定税时一匹绢三千今只八百假如特变盐法绢价亦未肯贵五口之家因变盐法日得一钱之利岂

能使免作债收获之时不被徵索输官税後有赢余也以臣所见百姓困弊日久不以事扰之自然渐校不在变盐法也今绢一匹八百百姓尚多寒无衣者若使匹直三千则无衣者必更衆多况绢之贵则皆不缘盐法以此言之盐法未要变也

一件平叔云每州榷盐不少长吏或有不亲公事所由浮词云当界无人余盐臣即请差清强巡官检责所在实户据口团保给一年盐使其四季输纳盐价口多榷少及盐价迟违请停观察使见任改散慢官其刺史已下贬与上佐其余官贬远处者【或无与字】平叔本请官自榷盐以寛百姓令其苏息免更流亡今令责实户口团保给盐令其随季输纳盐价所谓因而扰之非前意也【或无非字】百姓贫家食盐至少【或作小】或有淡食动经旬月若据口给盐依时徵价【或无盐字】办与不办并须纳钱迟违及违条件观察使已下各加罪谴【或作於】官吏畏罪必用威刑臣恐因此所在不安百姓转致流散此又不可之大者也

一件平叔请限商人盐纳官後不得辄於诸军诸使觅职掌把钱捉店看守庄磴【午对切】以求影庇请令所在官吏严加防察【防或作访】如有违犯应有资财并令纳官仍牒送府县充所由者臣以为盐商纳榷【或作税】为官榷盐子父相承坐受厚利比之百姓实则较优【此下当有今字今补足】今既夺其业又禁不得求觅职事及为人把钱捉店看守庄磴不知何罪一朝穷蹙之也【何或作其】若必行此则富商大贾必生怨恨或收市重宝逃入反侧之地以资寇盗此又不可不虑者【或作也】

一件平叔云【叔下疑当有云字或称字之类今亦补足】行此策後两市军人富商大贾或行财贿邀截喧诉请令所由切加收捉如获头首所在决杀连状聚衆人等各决脊杖二十检责军司军户盐如有隐漏并准府县例科决并赏所由告人者此一件若果行之不惟大失人心兼亦惊动远近不知榷盐所获几何而害人蠹政其弊实甚

以前件状奉今月九日勅令臣等各陈利害者谨録奏闻伏听勅旨

东雅堂昌黎集注卷四十

东雅堂昌黎外集注卷一

<集部,别集类,汉至五代,东雅堂昌黎集注>

钦定四库全书

东雅堂昌黎外集注卷一

【诸本外集分为十卷凡三十四篇不知何人所编据行状云有集四十卷小集十卷亦不知便是此外集与否方云只据蜀本定录二十五篇其篇目次第皆与诸本不同以为可以旁考而的然知为公文者然蜀本刘晔序乃云後集外顺宗实录为十卷则似亦以实录入於其中皆不知其何说也唯吕夏卿以为明水赋通解崔虞部书河南同官记皆见於赵德文录计必德亲受於文公者比它本最为可信而李汉不以入集则疑凡外集所载汉亦有所未得未必皆其所不取者其说近是故今且从诸本而考其真伪异同之说以详注於其下其甚伪者即虽不载其文而犹存其目使读者犹有考焉其石刻联句遗诗文等则从方本录之以补外集之阙又诸本有遗文一卷方本亦多不录今亦存之以附于後】

明水赋【以玄化无宰至精感通为韵精或作诚出周礼司烜氏掌以夫遂取火於日以鉴取明水於月以供祭祀之明盥明烛共明水明洁也取水火於日月欲得陰阳之洁气也公贞元八年登第即明水赋御沟新柳诗今诗逸矣时礼部侍郎陆?典贡举进士则贾棱陈羽欧阳詹李观冯宿王涯张季友齐孝若刘遵古许季同侯继穆?韩愈李绹温商庾承宣员结胡谅崔羣邢册裴光辅万瑄李博等二十三人中第其间多知名士时号为龙虎榜云】

古者圣人之制祭祀也【或无者也二字】必主忠敬崇吉蠲【诗天保吉蠲为饔毛氏注云吉善蠲洁也】不贵其丰乃或荐之以水不可以黷斯用致之於天【於或作于】其事信美其义惟玄月实水精故求其本也明为君德因取以名焉於是命烜氏【烜音毁】清夜或将祀圆丘於玄冬或将祭方泽於朱夏【祀或作祭祭或作祀】持监而精气旁射照月而陰灵潜下视而不见谓合道於希夷挹之则盈方同功於造化应於有生於无【生或作声】形象未分徒骋离娄之目【赵岐注孟子离娄古之明目者黄帝时人帝使离朱索遗珠即离娄也】光华暗至如还合浦之珠【见东汉孟尝为合浦太守珠还事】既齐芳於酒醴【芳方作高云礼夏尚明水商尚醴周尚酒今作齐芳非今按明水当在酒醴之上不应反言齐高此盖以其都无臭味嫌不足於芬芳故有齐芳之语方说非是】讎比贱於潢污【左隐三年潢污行潦之水可荐於鬼神潢污浊水也】明德惟馨玄功不宰于以表诚洁于以戒荒怠苟失其道杀牛之祭何为【易既济东隣杀牛不如西隣之禴祭】如得其宜明水之荐斯在【宜或作情荐或作为】不引而自致不行而善至虽辞麴蘖之名实处罇罍之器降於圆魄殊匪金茎之露【匪或作非露或作灵汉建章宫露盘金茎事见三辅黄图】出自方诸【郑氏注周礼云鉴镜属取水者世谓之方诸淮南子曰方诸见月则津而为水高诱注云方诸陰燧大

蛤也熟摩令热以向月则水生铜盘受之下水数石也】乍似蛟人之泪【乍或作已梁任昉述异记南海有蛟人水居而能织曾寓人宿既去泣别所堕泪皆成珠】将以赞于陰德配夫阳燧【配上或有非独二字夫或作于】夜寂天清烟消气明桂华吐耀兔影腾精【兔影或作玉兔腾或作流】聊设监以取水伊不注而能盈霏然而象的尔而呈【而象或作垂象或作无象的或作酌】始漠漠而霜积【漠漠而或作茫茫以】渐微微而浪生岂不以德协于坎同类则感【同或作有今按同类与气应对属差互恐当作类同】形藏在空【在或作於】气应则通鹤鸣

在陰之理不谬虎啸于谷之义可崇【理或作论虎或作武义或作道 今按作虎为是但当时程试避太祖讳也易中孚鸣鹤在陰其子和之淮南子虎啸而谷风生】足以验圣贤之无党知天地之至公【足以验圣贤或作庶令知圣真党或作穷知或作验】窃比大羹之遗味幸希荐於庙中

芍药歌【蜀本删去今恐是公少作姑存之一本芍字上有王司马红四字王司马不详为谁贞元中亦有芍药一絶乃元和十年知制诰时作此不能知其作之时日矣】

丈人庭中开好花更无凡木争春华翠茎红蘂天力与此恩不属黄鍾家【孙汝听曰富贵家】温馨熟美鲜香起似笑无言习君子霜刀翦汝天女劳何事低头学桃李娇痴婢子无灵性【或作性灵】竞挽春衫来比并欲将双颊一睂红【睂或作稀】綠窻磨徧青铜镜一罇春酒甘若饴丈人此乐无人知花前醉倒歌者谁楚狂小子韩退之

海水【水下或有诗字观诗意谓当世无托足之地有还归之兴岂贞元及第後归江南时作耶】

海水非不广邓林岂无枝【邓林事见列子】风浪一荡薄鱼鸟不可依海水饶大波邓林多惊风岂无鱼与鸟巨细各不同海有吞舟鲸【吴都赋云长鲸吞航】邓有垂天鹏【事见庄子】苟非鳞羽大荡薄不可能我鳞不盈寸我羽不盈尺一木有余陰一泉有余泽我将辞海水濯鳞清冷池我将辞邓林刷羽蒙笼枝海水非爱广邓林非爱枝风波亦常事鳞羽自不宜【或作不自疑】我鳞日已大我羽日已修风波无所苦还作鲸鹏游

赠崔立之【此篇从文苑公与立之唱和最多有赠崔立之评事有酬崔二十六少府有寄崔二十六立之有雪後寄崔二十六丞公而此诗乃见於外集又有酬蓝田崔丞咏雪之作世传以为公逸诗今亦附集後云】

昔者十日雨子桑苦寒饥【桑苦寒或作来寒且考庄子大宗师篇实作子桑】哀歌坐空屋【或作房】不怨但自悲其友名子舆忽然忧且思褰裳触泥水裹饭往食之入门相对语天命良不疑好事漆园吏【庄子尝为漆园吏】书之存雄辞千年事已远二子情可推我读此篇日正当雨雪时吾身固已困吾友复何为薄粥不足裹深泥谅难驰曾无子舆事空赋子桑诗【或无此二句山谷诗有次韵杨明叔见钱云桑舆金石交既别十日雨子舆裹饭来一笑

相告语云云事意皆与公此诗同】

赠河阳李大夫【疑为李芄德宗初为河阳节度使公年十二当大历十四年随伯兄会迁岭表会卒从郑嫂归葬河阳时李希烈李惟岳田悦梁崇义朱滔之徒相扇继变中原骚然故祭郑嫂文云既克反葬遭时艰难而此時亦有四海失巢穴之句時年十四五矣公尝自言十三而能文恐或然也】

四海失巢穴两都困尘埃感恩由未报【由未或作未能或作能未 今按由犹古字通】惆怅空一来裘破气不暖马羸鸣且哀【裘破或作破裘气或作竟马羸或作羸马】主人情更重空使劒锋摧

苦寒歌

黄昏苦寒歌夜半不能休【夜半或作半夜】岂不有阳春节岁聿其周【或作岁聿不其周节岁或作岁节】君何爱重裘兼味养大贤【何爱下疑有脱字养或作成】冰食葛制神所怜【神所或作诚可】填窗塞户慎勿出暄风暖景明年日【或作需明年非是】

赠同游者【已见正集】

请迁玄宗庙议【蜀本旧志或无庙字非是旧史礼仪志长庆四年五月礼仪使奏时穆宗当祔公岂以吏部侍郎为礼仪使耶】

右礼仪使奏谨按周礼天子七庙【谷梁传云天子至於士皆有庙天子七庙诸侯五大夫三士二】三昭三穆与太祖之庙而七尚书咸有一德亦曰七世之庙可以观德【尚书至观德十六字旧史阙】荀卿子曰有天下者祭七代有一国者祭五代【或无乡字曰上或有亦字祭七代或作事七世祭五代或作事五世或作祭五庙】则知天子上祭七庙【或作代】典籍通规祖功宗德不在其数国朝九庙之制法周之文太祖景皇帝始为唐公肇基天命义同周之后稷高祖神尧皇帝创业经始化隋为唐义同周之文王太宗文皇帝神武应期【应或作膺】造有区夏义同周之武王【下或有也字】其下三昭三穆谓之亲庙与太祖而七四时常飨自如礼文伏以今年宗庙递迁玄宗明皇帝在三昭三穆之外是亲尽之祖虽有功德新主入庙礼合祧藏太庙中【藏下或有迁字或作祧迁藏太庙中中下或有从字】第一夹室每至禘祫之岁合食如常谨议

范蠡招大夫种议

诗之序议

三器论【此三篇蜀本删去 今从之】

东雅堂昌黎外集注卷一

东雅堂昌黎外集注卷二

钦定四库全书

东雅堂昌黎外集注卷二

上贾滑州书【旧史云贾耽以贞元二年改检校右仆射兼滑州刺史义成军节度使此篇从蜀苑书称年二十三则贞元六年也八年而公登第九年而耽入相十一年公三上宰相书耽时正当国亦不报诚以暗投人耶义成今改为武成矣】

愈儒服者不敢用他术干进【术或作艺】又惟古执贄之礼窃整顿旧所着文一十五章以为贄【章或作首下同】而喻所以然之意於此曰丰山上有钟焉人所不可至霜既降则铿然鸣【或无既字山海经云丰山有九钟知霜鸣注云霜降则钟鸣】盖气之感非自鸣也愈年二十有三读书学文十五年【或无有字三或作二读书学文十五年洪庆善云公与邢尚书书云生七岁而读书十三而能文二十有五而擢第於春官】言行不敢戾於古人愚固泯泯不能自计【或作故非是】周流四方无所适归伏惟合下昭融古之典义含和发英【和或作华】作唐德元【或作臣】简弃诡说保任皇极是宜小子刻心悚慕又焉得不感而鸣哉徒以献策阙下方勤行役且有负薪之疾不得稽首轩阶遂拜书家仆待命于郑之逆旅【仆或作僮逆上或无之字】伏以小子之文可见於十五章之内小子之志可见於此书与之进敢不勉与之退敢不从【或作退】进退之际实惟合下裁之

上考功崔虞部书【或作上考功宏词官虞部崔员外书或云崔元翰也元翰史有传名鹏以字行举进士博学宏辞贤良方正皆异等独不载为虞部员外郎或畧之也公贞元八年登第明年以博学宏词试于吏部而作此书故书云年二十有六矣】

愈不肖行能诚无可取行已颇僻与时俗异态抱愚守迷固不识仕进之门迺与羣士争名竞得失行人之所甚鄙【或无行字】求人之所甚利其为不可虽童昏实知之如执事者不以为念援之幽穷之中推之高显之上是知其文之或可而不知其文之莫可也知其人之或可而不知其时之莫可也【下知其人上或有是字】既以自咎【以或作已】又叹执事者所守异於人人【句】废耳任自【废上或有之字】华实不兼【不疑当作必】故有所进故有所退且执事始考文之明日浮器之徒已相与称曰某得矣某得矣问其所从来必言其有自一日之间九变其说凡进士之应此选者三十有二人其所不言者【不言或作不云】数人而已而愈在焉及执事既上名之後三人之中其二人者【或无其字】固所传闻矣【固上或有则字】华实兼者也果竟得之而又升焉【果或作毕下同】其一人者则莫之闻矣实与华违行与时乖果竟退之如是则可见时之所与者时之所不与者之相远矣然愚之所守竟非偶然故不可变【竟非或作懂非故或作固】凡在京师八九年矣足不迹公卿之门名不誉於大夫士之口【或无誉字於或作一或无士字】始者谬为今相国所第此时惟

念以为得失固有天命不在趋时而偃仰一室啸歌古人今则复疑矣未知夫天竟如何命竟如何由人乎哉不由人乎哉【未上或有又字或无夫字天竟或作天意人乎或并作乎人】欲事干谒【欲上或有夫字】则患不能小书困於投刺【於或作于】欲学为佞则患言讷词直卒事不成【为或作于患下或有於字卒或作则】徒使其躬僂焉而不终日【其躬方本如此而举正躬作穷盖误而诸本作如方云蜀本作而今本皆以表记君子不以一日使其躬僂如不终日语刊作如然不知古而如同意此语不当以如似之义读之唐人惟韩柳知此子厚答韦中立书假而以仆年先吾子与公此文是也董彦远曰春秋书星陨如雨左氏室如县罄是皆以如为而风俗通国人望君而望岁邹阳书白头而新是皆以而为如按家语君入庙如右荀子作而右乐府艾如张亦作艾而张今人所用漣湏考之李善文选乃漣而也实用易之泣血漣如为义去古益远字义多失惟韩柳文时见一二因为详之今按孟子望道而未之见亦是此例方言又有而如古字通用之说然陆德明论当时语音之失有曰北人则而如靡异盖不以为然也然则此而字须读为如乃为正耳董引室如县罄乃据左传作罄字而杜预注云如而也言居室而资粮县尽故其说如此国语则作县罄而韦昭注云府藏空虚但有榱桷如县罄左传盖借罄为罄而杜氏误解国语则正作罄字而韦说得之董氏所引不足据以为说今并论之附见于此】是以劳思长怀中夜起坐【中一作终】度时揣已废然而返虽欲从之末由也已又常念古之人日已进今之人日已退【常或作尝】夫古之人四十而仕其行道为学既已大成而又之死不倦故其事业功德老而益明死而益光故诗曰虽无老成人尚有典刑言老成之可尚也【可上或有人字】又曰乐只君子德音不已谓死而不亡也【已或作忘亡或作忘方作已】夫今之人务利而遗道【或无夫字遗或作违】其学其问【问上或无其字】以之取名致官而已得一名获一位【或作官】则弃其业而役役於持权者之门故其事业功德日以忘月以削老而益昏死而遂亡【忘或作亡】愈今二十有六矣【今下或有年始字】距古人始仕之年尚十四年岂为晚哉【岂上或有年始字】行之以不息要之以至死不有得於今必有得於古不有得於身必有得於後用此自遣且以为知己者之报执事以为如何哉其信然否也【为如或作谓如】今所病者在於穷约无僦屋赁仆之资无緇袍粢食之给【粝兰未厉赖二音】驱马出门不知所之斯道未丧天命不欺岂遂殆哉岂遂困哉窃惟执事之於愈也【执事下或有者字愈下或无也字】无师友之交无久故之事无顔色言语之情【顔色言语或作言语顔色】卒然振而发之者必有以见知尔【或作耳】故尽暴其所志不敢以默【以默或作默默】又惧执事多在省非公事不敢以至是则拜见之不可期【至下或有於字期下或有也字】获侍之无时也是以进其说如此庶执事察之也【庶或作幸之下或无也字】

与张徐州荐薛公逵书【此篇疑非公作当删】

与少室李拾遗书【诸本室下有山字李下有渤字今从蜀苑新书此书作於元和三年公时尚为博士据新史渤有传字濬之刻志於学隐少室元和初户部侍郎李巽谏议大夫韦况交章荐之诏以右拾遗召於是河南少尹杜兼遣使特诏币即山敦促渤上书谢昔屠羊说有位三旌禄万钟知贵於屠羊然不可使妄施彼贱贾也犹能忘已爱君臣虽欲盗荣以济所欲得无愧屠羊乎不拜洛阳令韩愈遗书云云渤心善其言始出家东都每朝廷有缺政辄附章列上即此书也然公尝为河南令而未尝为洛阳令史之误类如此以公之集考史之载其差误

盖不止此云耳此书虽不见於正集而史载之则知外集之文亦未可轻议其非也渤元和九年起为著作郎太和中终太子宾客】

十二月某日愈顿首【或无此八字】伏承天恩诏河南敦谕拾遗公【拾遗公新书作遗公篇内并同】朝廷之士引颈东望若景星凤皇之始见也争先覩之为快方今天子仁圣小大之事【小大举正作大小恐误事或作士】皆出宰相乐善言如不得闻自即大位已来於今四年【宪宗以永贞元年即位至今四年即元和三年也】凡所施者无不得宜【者或作为凡所施者新书作凡所出而施者】勤俭之声寛大之政幽闺妇女草野小人【草或作山人新书作子】皆饱闻而厌道之愈不通於古【愈或作某於或作于】请问先生世非太平之运欤【或无世字非作匪新书作兹非太平世欤】加又有非人力而至者年谷熟衍符颺委至若干纪之奸不战而拘累强梁之凶销铄缩栗迎风而委伏其有一事未就正自视若不成人【新书无自字视或作是非是】四海之所环无一夫甲而兵者【而或作与】若此时也【若上或有未有字】拾遗公不疾起与天下之士君子乐成而享之斯无时矣昔者孔子知不可为而为之不已足迹接於诸侯之国【或无足迹字】即可为之时自藏深山牢关而固距即与仁义者异守矣想拾遗公冠带就车惠然肯来舒所蓄积以补缀盛德之有阙遗【或作遗阙新书无有遗二字】利加於时【利下或无加字加於新书作加于】名垂於将来踊跃悚企倾刻以冀【倾或作顷】又窃闻朝廷之议必起拾遗公使者往若不许即河南必继以行【或无即字】拾遗徵君若不至必加高秩如是则辞少就多【则或作即新书无则字】伤於廉而害於义拾遗公必不为也善人斯进其类皆有望於拾遗公拾遗公悦不为起使衆善人不与斯人施也【或无使字也或作者今按此句疑有误】由拾遗公而使天子不尽得良臣君子不尽得显位人庶不尽被惠利其害不为细【人庶或作庶人】必望审察而远思之【而下或有长字远新书作谿】务使合於孔子之道幸甚愈再拜

答刘秀才论史书【刘秀才或云名轲字希仁集中不他见公是时为史馆修撰刘作此书以勉之柳子厚有与公论史官书曰前获书言史事云具与刘秀才书及今乃见书藁私心甚不喜云云反复论辨皆以公为不肯任作史之责则柳所见即公此书也李汉自谓收拾遗文无所失坠乃逸此篇于正集之外岂以其尝为子厚所辨驳而遂弃欤或问张子韶曰退之与刘秀才论史书谓为史不有人祸必有天殃子厚作书辟之其说甚有理退之於理似屈子韵曰此亦退之说得未尽处想其意亦不专在畏祸但恐褒贬足以貽祸故迁就其说而失之泥宜为子厚所攻也】

六月九日韩愈白秀才【或无此九字或作某月日韩愈白刘君足下】辱问见爱教勉以所宜务敢不拜赐愚以为凡史氏褒贬大法春秋已备之矣【为或作谓】後之作者在据事迹实录则善恶自见【或复出实录二字见下或有矣字】然此尚非浅陋偷惰者所能就况褒贬邪孔子圣人作春秋辱於鲁卫陈宋齐楚卒不遇而死齐太史氏兄弟几尽【或无氏字左传襄二十五年太史书曰崔杼弑其君崔子杀之其弟嗣书而死者二人南史氏闻太史尽死执简以往闻既书矣乃还】左丘明纪春秋时事以失明【司马迁与任安书曰左氏失明厥有国语】司马迁作史记刑诛【汉书天汉二年李陵降匈奴迁盛言陵忠武帝以迁诬罔下迁蚕室】班固瘐死【和帝永元初洛阳令种兢以事捕固固死狱中洪庆善云瘐音愈囚以

饥寒死也诸本误作疲或作瘦或作废皆非是】陈壽起又废卒亦无所至【寿字承祚仕蜀为观阁令史遭父丧有疾使婢侍药乡党以为贬议後以母忧母遗言葬洛阳壽遵其志又坐不归葬竟被贬议】王隐谤退死家【隐字处叔晋太兴初官著作令为虞预所斥竟以谤黜归死于家】习凿齿无一足【凿齿字彥威襄阳人以脚疾居里巷】崔浩范煜赤诛【浩字伯渊後魏人着国书三十卷太武帝太平真君十一年以罪夷其族字蔚宗宋人删衆家後汉书为一家之作文帝元嘉二十二年谋反伏诛赤或作赤族二字】魏收夭絶【收字伯起着後魏书一百三十卷北齐後主武平三年卒无子夭或作天】宋孝王诛死【孝王事高齐为北平王文学撰关东风俗传三十卷周大象初预尉迟迥事诛死】足下所称吴兢【兢撰梁齐周史各十卷陈史五卷隋史二十卷天宝八载卒於恒王傳】亦不闻身贵而今其後有闻也【或无今其字或无其後字】夫为史者不有人祸则有天刑岂可不畏惧而轻为之哉唐有天下二百年矣圣君贤相相踵其余文武之士【士上或无之字】立功名跨越前後者不可胜数岂一人卒卒能纪而传之邪【能上或无复出卒字司马迁传卒卒无须臾之闲顔曰促遽之意也】仆年志已就衰退不可自敦率【或无就字敦率犹敦勉也或作敢为或无此二字今按此二字恐有脱误】宰相知其无他才能不足用【他上或无无字】哀其老穷齟齬无所合不欲令四海内有戚戚者猥言之上苟加一职荣之耳非必督责迫蹙令就功役也【就下或有其字】贱不敢逆盛指行且谋引去【且一作自】且传闻不同善恶随人所见【传闻或作传云闻见】甚者附党憎爱不同巧造语言凿空构立善恶事迹於今何所承受取信而可草草作传记令传万世乎【或无乎字】若无鬼神岂可不自心慙愧【自心上或有可字非是或无心字】若有鬼神将不福人仆虽騃亦粗知自爱实不敢率尔为也夫圣唐钜迹【或无圣字】及贤士大夫事皆磊磊轩天地决不沈没【亦苑决下有必字又云蜀本作落落掀天地而无必字又按决或作决地或作抉地今按古潮本轩亦作掀而无必字盖因柳子厚书云所云磊磊轩天地者决不沈没诸本或误加必字耳今从柳集作轩从潮本去必字】今馆中非无人将必有作者勤而纂之【将必或作必将】後生可畏安知不在足下【或脱不在二字】亦宜勉之愈再拜

与大颠师书【此书诸本皆无唯嘉佑小杭本有之其篇次在此与作召颠作巔师作和尚方本列於石刻之首今从杭本附此而名篇从方氏杭本又注云唐元和十四年刻石在潮阳灵山禪院宋庆历丁亥江西袁陟世弼得此书疑之因之滁州谒欧阳永叔永叔覽之曰实退之语它意不及也方本畧载其语又録欧公集古録跋尾云文公与颠师书世所罕传予以集録古文其求之博盖久而後获其以系辞为大传谓着山林与着城郭无异等语宜为退之之言其後书吏部侍郎潮州刺史则非也盖退之自刑部侍郎贬潮州後移袁州召为国子祭酒迁兵部侍郎久之始迁吏部而流俗相传但知为韩吏部尔颠师遗记虽云长庆中立盖并韩书皆国初重刻故谬为附益尔方又注云今石刻乃元佑七年重立又云按公三简皆邀速常语耳初无崇信佛法之说妄者旁沿别譔答问等语以肆诬谤要当存此简以解後世之惑今按杭本不知何人所注疑袁自书也更以跋尾参之其记欧公之语不谬矣而东坡杂说乃云韩退之喜大颠如喜澄观文畅意非信佛法也而或者妄撰退之与大颠书其词凡鄙虽退之家奴仆亦无此语今一士人又於其末妄题云欧阳永叔谓此文非退之不能作又诬永叔矣苏公此语盖但见集注之出於或人而未见跋尾之为欧公亲笔也二公皆号一代文宗而其去取不同如此览者不能无惑然方氏尽载欧语而畧不及苏说其意可见至吕伯?乃於文监特

着苏说以备乙览则其同异之间又益後人之惑矣以余考之所传三书最後一篇实有不成文理处但深味其间语意一二文势抑扬则恐欧袁方意诚不为过但意或是旧本亡逸僧徒所记不真致有脱误欧公特观其大概故但取其所可取而未暇及其所可疑苏公乃觉其所可疑然亦不能察其为误而直斥以为凡鄙所以其论虽各有以而皆未能无所未尽也若乃後之君子则又往往不能究其本根其附欧说者既未必深知其所以为可信其主苏氏者亦未必果以其说为然也徒幸其言可为韩公解纷若有补於世教故特表而出之耳皆非可与实事而求是者也至如方氏虽附欧说然亦未免曲为韩讳殊不知其言既曰久闻道德又曰侧承道高又曰所示广大深迥非造次可喻又曰论甚宏博安得谓初无崇信其说之意邪韩公之事余於答孟简书盖已论其详矣故不复论特从方本载此三书於别集并録欧公二语而附苏说方说於其後且为全载书文於此而考其同异订其谬误如左方以为读者以此观之则其决为韩公之文而非它人之所能作无疑矣方氏所据石本与杭本又自不同则疑传写之讹而欧公所疑官称之误亦得为之但愚意犹恐当时既谪刺远州亦未必更带侍郎旧官也方氏所驳世俗伪造诬谤之书即今所谓别传者洪庆善辨证云别传载公与大颠往复之语深诋退之其言多近世经义之说又伪作永叔跋云使退之复生不能自解免吴源明云徐君平见介甫不喜退之故作此文方氏又云周端礼曰徐安国自言年二十三十四时戏为此今悔之无及然则其为徐作无疑矣但君平字安道而方云安国未知便是君平否耳然灵山石刻张系所撰其间载韩公问大颠云西国一真之法何不教人颠云教人達性离无明贪嗔骄慢不生嫉妬此亦释子常言初无难解但韩公素所未闻而颇中其病故虽不尽解而适亦有会於心耳又载韩公责云人生贵贱各有定分何得以三涂之说诳人而颠答云公何不常守侍郎之任而来此为官耶则恐其有谬误或其徒所附益也】

愈启【或无此二字】孟夏渐热【下或有伏字】惟道体安和愈弊劣无谓坐事贬官到此久闻道德切思见顔【切杭作窃据石本如此切乃恳切之意此下大率多从石本云】缘昨到来未获参谒傥能暂垂见过实为多幸【杭本无傥能以下十字】已帖县令具人船奉迎日久竚瞻【帖杭作贴久当作夕竚据石本作伫】不宣愈白【据石本无愈白字今据石本此下具銜姓名下云上颠师四月七日】

愈启【或无此二字】海上穷处无与话言侧承道高思获披接专辄有此咨屈傥惠能降喻非所敢望也【惠字疑衍或下有然字而并在能字之下诸本及石本皆误】至此一二日却归高居亦无不可旦夕渴望【杭本无傥惠以下二十七字而有此句来晴明不甚热傥能乘闲一访实谓幸也十八字今按此句以下乃下篇语定从石本】不宣愈白【据石本无愈白字今据石本与前书同但云六月初三日】愈启【或无此二字】惠匀至辱答问珍悚无已所示广大深迥非造次可喻【杭作量】易大传曰【或无易大二字曰一作云】书不尽言言不尽意然则圣人之意其终不可得而见邪【据石本意作旨无而字邪作也今按易实作意邪而无终而二字大氏石本亦自多误也後放此】如此而论读来一百遍【一字疑衍苏氏所谓凡鄙盖指此等处耳】不如亲□顔色随问而对之易了【据石本如此但无亲字今按亲下当有见字而两本皆阙故不敢增而空其处以待知者杭但云不如亲面而对之是亦苏氏所谓凡鄙者然亲字乃方本之阙文面字乃问字之误笔而又脱去口顔色随易了六字耳】此句来晴明旦夕不甚热傥能乘闲一访幸甚旦夕驰望【杭本已见上篇此不复出】

愈闻道无疑滞行止系缚苟非所恋着则山林闲寂与城郭无异【此从杭本但郭作隍今据欧公语据石本止下有所字缚下有爱恋字所下无恋字及则字而着字下复出着字及与字异下有邪字皆非是其用邪字尤不当律令亦所谓凡鄙者也但或疑非字下当有有字言於行止系缚若无所恋着则静闇一致语尤明白耳或又疑非当作有则语意宾主尤顺然未知孰是又诸本皆无不敢辄增改也】大颠师论甚宏博而必守山林义不至城郭【颠杭见上或无师字杭无义字城作州】自激修行独立空旷无累之地者非通道也【自或作似然细考之与下文激修行四字皆可疑或又以也爲矣而并非通道四字属於行字之下又以独爲自而立下有於字皆非是】劳於一来安於所适道故如是【於杭作于适方据石本与杭本并作识今得真石本考之乃如此然则方之所考亦不详矣盖适犹便也与唯适之安之语用字畧同言一来虽劳而既来则当随其所便无处不安也道故如是即所以结上文道无疑滞之意方以如爲此亦石本误】不宣愈顿首【据石本无末三字今据石本与前二书同但云大颠禅师七月十五日不知韩公之於大颠既闻其语而爲礼益?如此何也】

东雅堂昌黎外集注卷二

东雅堂昌黎外集注卷三

钦定四库全书

东雅堂昌黎外集注卷三

送汴州监军俱文珍序【并诗 陇西公董晋为汴州陈留郡节度使治汴州俱文珍为监军公为观察推官文珍将如京师作序诗以送之时贞元十三年也】

今之天下之镇陈留为大【汉书音义曰留本郑邑後为陈所并故曰陈留今属汴州】屯兵十万连地四州【陈留郡宣武节度使所治汴宋亳颍四州隶焉】左淮右河抱负齐楚洙流浩浩舟车所同故自天宝已来当藩垣屏翰之任【屏翰或作翰屏】有弓矢鉞钺之权皆国之元臣天子所左右其监统中贵必材雄德茂荣耀宠光能俯达人情仰喻天意者然後为之故我监军俱公辍侍从之荣受腹心之寄奋其武毅张我皇威遇变出奇先事独运偃息谈笑危疑以平【危疑或作疑危】天子无东顾之忧方伯有同和之美十三年春将如京师相国陇西公饮饯於青门之外【於或作于或无青字】谓功德皆可歌之也命其属咸作诗以铺绎之诗曰

奉使羌池静临戎汴水安【或作间非是】冲天鹏翅阔报国劒铓寒晓日驱征骑春风咏采兰【束皙补亡诗曰循彼南陔言采其兰采兰以养亲也】谁言臣子道忠孝两难全

送浮屠令纵西游序【或无浮屠字纵下有上人二字公尝送文畅师序曰人固有儒名而墨行者墨名而儒行者至是送令纵又曰其行异其情同君子与其进可也二序大抵同意故公集中虽与澄观惠师灵师盈上人无本师广宣僧约高闲大颠之徒游皆取其行而不取其名焉不然则排释老为虚语矣】

其行异其情同君子与其进可也【或无进字非是】令纵释氏之秀者又善为文【又上或有而字】浮游徜徉迹接天下藩维大臣文武豪士令纵未始不褰衣而负业往造其门下【衣或作裳】其有尊行美德建功树业【树或作植】令纵从而为之歌颂典而不谀丽而不淫其有中古之遗风与【有中或作中有古下或有人字风下或有可字】乘闲致密【或无此四字而有及字】促席接膝讥评文章商较人士【或作士人或作人事】浩浩乎不穷愔愔乎深而有归於是乎吾忘令纵之为释氏之子也其来也云凝其去也风休方懽而已辞虽义而不求吾於令纵不知其不可也盍赋诗以道其行乎

与路鹄秀才序【送路鹄赠别二序语意无伦脱误不可读如曰自河南令为博士於公所历官次亦不合故并阙之今从其说删去】

赠别序【说已见上】

送毛仙翁十八兄序【直諫表论顾威状种蠡议毛仙翁序皆最末见决非公文据杭本之有外集者表状亦不録足以知其果伪也今并删去】

东雅堂昌黎外集注卷三

东雅堂昌黎外集注卷四

钦定四库全书

东雅堂昌黎外集注卷四

通解【洪庆善曰通解择言解鄠人对或云皆少作陈齐之云通解之乎者也下皆未当此虽少作然亦本讹也通解虽不见於正集然亦赵德文録中所载当知其为公文也】

今之人以一善为行而耻为之慕達节而称夫通才者多矣然而脂韦汨没以至於老死者相继亦未见他之称【他下或有人字 今按此句疑有脱误】其岂非乱教贼名之术欤【乱或作害】且五常之教与天地皆生【地下或有而字非是】然而天下之人不得其师终不能自知而行之矣故尧之前千万年天下之人促促然不知其让之为美也於是许由哀天下之愚且以争为能迺脱屣其九州高揖而辞尧由是後之人竦然而言曰虽天下犹有薄而不售者况其小者乎【或作焉下同】故让之教行於天下许由为之师也【为之或作之为下二语同】自桀之前千万年天下之人循循然不知忠易其死也故龙逢哀天下之不仁覩君父百姓入水火而不救於是进尽其言退就割烹【就下或有其字非是】故後之臣竦然而言曰虽万死犹有忠而不惧者况其小者乎故忠之教行於天下【忠之上或有其字非是】由龙逢为之师也自周之前千万年【周或作殷】浑浑然不知义之可以换其生也【或无以字】故伯夷哀天下之偷且以强则服食其葛薇逃山而死【之下或有人字服或作伏且以强则服一句疑有脱误】故後之人竦然而言曰【故或作於是】虽饿死犹有义而不惧者况其小者乎【义或作死或作强】故义之教行於天下由伯夷为之师也是三人俱以一身立教而为师於百千万年间【或无百字】其身亡而其教存扶持天地功亦厚矣【存下或有於字功上或有而字】向令三师耻独行慕通達则尧之日必曰得位而济道安用让为【用或作能】夏之日必曰长进而否退安用死为周之日必曰和光而同尘【和光而同尘或作同尘而和光】安用饿为若然者天下之人促促然而争循循然而佞浑浑然而偷其何惧而不为哉是则【或无则字】三师生於今必谓偏而不通者矣【或无必字谓偏作为偏矣作也矣上或无者字】呜呼今之人其慕通達之为弊也且古圣人言通者盖百行衆艺备於身而行之者也【而上或有通字】今?人之言通者盖百行衆艺阙於身而求合者也是则古之言通者通於道义今之言通者通於私曲其亦异矣【古之今之下或并有人字】将欲齐之者其不犹矜粪丸而拟质隋珠者乎【或无其字或无不字或无其矜二字】且令今父兄教其子弟者曰尔当通於行如仲尼虽愚者亦知其不能也【或无亦字也或作邪非是】曰尔尚力一行如古之一贤虽中人亦希其能矣【贤上或无一字】岂不由圣可慕而不可齐邪贤可及而可齐也【也或作邪今按恐上句无邪字下句也字却当作邪】今之人行未能及乎贤而欲齐乎圣者亦见其病矣【一作也】夫古人之进修【或作中人非是】或几乎圣人今之人行不出乎中人而耻乎力一行为独行且曰我通同如圣人【我下或有周字同字疑衍】彼其欺心邪吾不知矣彼其欺人而贼名邪吾不知矣余惧其说之将深为通解

择言解

火泄於密而为用且大能不违於道可燔可炙可熔可甄以利乎生物【乎或作於】及其放而不禁反为灾矣【或无其字下二语同】水发於深而为用且远能不违於道可浮可载可饮可灌以济乎生物【乎或作於】及其导而不防反为患矣言起於微而为用且博能不违於道可化可令可告可训以推於生物及其纵而不慎反为祸矣火既我灾有水而可伏其焰能使不陷於灰烬矣【陷或作蹈或作焰】水既我患有土而可遏其流能使不仆於波涛矣【或无而可字】言既我祸即无以掩其辞能不罹於过者亦鲜矣【於过或作其失过下或有失字】所以知理者又焉得不择其言欤其为慎而甚於水火【言上或无其字而字恐误】

鄠人对【新史孝友传唐时陈藏器注本草拾遗谓人肉治羸疾自是民间以父母疾多刲股肉以进或给帛或旌门闾善乎韩愈之论谓父母疾烹药餌以是为孝未闻毁肢体者也则公之此论有益於时俗多矣 鄠胡古切京兆县名】

鄠有以孝为旌门者【为字疑衍又疑是而字】乃本其自於鄠人曰彼自刲股以奉母疾瘳大夫以闻其令尹令尹以闻其上【按尹谓京兆尹令字恐衍下同】上傳聚土以旌其门【或无其字】使勿输赋以为後劝【以为或作欲为】鄠大夫常曰他邑有是人乎愈曰母疾则止於烹粉药石以为是【或无愈字或无止字母下十二字新史作父母疾烹药餌以是为孝 今按是字或是事字按下文又有未闻字此未闻字恐衍或是若夫字之类】未闻毁伤肢体以为养在教未闻有如此者苟不伤於义则圣贤当先衆而为之也【圣贤或作贤圣】是不幸因而致死【而下或有且字今按此句上是字疑是且字】则毁伤?絶之罪有归矣【灭絶一作絶灭】其为

不孝得无甚乎苟有合孝之道【苟或作若合下疑有乎字】又不当旌门盖生人之所宜为曷足为异乎【或无足字】既以一家为孝是辨一邑里皆无孝矣以一身为孝是辨其祖父皆无孝矣然或陷於危难能固其忠孝而不苟生之逆乱【生之刘仲忱谓之当作於】以是而死者乃旌表门闾【表下或有其字】爵禄其子孙斯为为劝已矧非是而希免输者乎曾不以毁伤为罪灭絶为忧【或作其忧非是】不腰於市而已黥於政况复旌其门河南府同官记【或无府字记谓永贞元年愈自阳山移江陵法曹获事河东公言裴均时节度荆南也後五年始立石则元和五年也记亦赵德文録所载吕夏卿以为可信者其叙事笔力非公不能减公之作矣】

永贞元年【贞元二十一年八月改元永贞】愈自阳山移江陵法曹参军【是岁八月宪宗即位公量移江陵法曹参军】获事河东公【江陵节度使裴均字君齐河东人】公尝与其从事言【或无公字】建中初天子始纪年更元【大历十五年正月改元建中】命官司举贞观开元之烈【或作例或作列非是】羣臣惕栗奉职命材登良不敢私违当时自齿朝之士而上以及下百执事【百下或有吏字】官阙一人将补必取其良然而河南同时於天下称多独得将相五人【或无同时二字方无将字 今按下文所记实为宰相者三人裴顾未为

真相故特着其官职戎马之盛则此处宜有将字方本误也】故於府之参军则得我公【裴均也】於河南主簿则得故相国范阳卢公【迈字子玄范阳人】於汜水主簿【汜水名前汉渡兵汜水 汜音凡】则得故相国今太子宾客荥阳郑公【余庆字居业荥阳人下相国上方无故字今按所谓故相者犹今言前宰相非亡没之谓方本误也】於陆浑主簿则得相国今吏部侍郎天水赵公【宗儒字秉文邓州人相国今一本作今相国】於登封主簿则得故吏部尚书东都留守吴郡顾公【少连字夷仲苏州人故下一本或有相国字今以下文考之非是】卢公去河南为右补阙其後由尚书左丞至宰相【贞元元年五月迈自左丞同平章事至十三年九月罢】郑公去汜水为监察御史佐山南军其後由工部侍郎至宰相罢而又为【余庆去汜水为监察御史史传逸之建中末山南西道府节度使严震辟余庆为府从事贞元十四年七月自工部侍郎同平章事十六年九月罢为郴州司马永贞元年八月复以尚书左丞同平章事元和元年五月罢】赵公去陆浑为右拾遗其後由给事中为宰相【中为或作中至贞元十二年十月宗儒自给事中同平章事十四年七月罢】顾公去登封为监察御史其後由京兆尹至吏部尚书东都留守【贞元十六年五月以少连为京兆尹十八年六月自吏部尚书为东都留守】我公去府为长水尉其後由膳部郎中为荆南节度行军司马遂为节度【均去府为长水尉史传逸之贞元十九年五月均自荆南行军司马为本军节度使】自工部尚书至吏部尚书三相国之劳在史册【在上或有布字】顾吏部慎职小心于时发声我公愿洁而沈密开亮而卓伟行茂于宗事修于官嗣绍家烈不违其先【均曾祖行俭祖光庭】作帅南荆【帅或作扞】厥闻休显【闻音问】武志既扬文教亦熙【亦或作熙】登槐赞元其庆且至故好语政事者以为五公之始迹也同其後进而偕大也亦同其称名臣也又同官职虽分而功德有巨细【或无官职字分作则属之下文而无而字】其有忠劳於国家也同【忠上或无有字家下或无也字而有亦字】有若将同其後而先同其初也有闻而问者【或无有字】於是焉书既五年【谓元和五年也】始立石刻其语河南府参军舍庭中【语下或有于字】於时河东公为左仆射宰相【时或作是】出藩大邦开府汉南【元和三年四月均自荆南召为右仆射是岁九月庚寅出为山南东道节度使汉南谓汉水之南】郑公以工部尚书留守东都【元和三年六月余庆自工部尚书为东都留守史传逸之独见公此记又见公上留守郑尚书啓及送郑涵校理序】赵公以吏部尚书镇江陵【元和三年宗儒检校吏部尚书为荆南节度使】汉南地连七州【山南东道管襄邓隋唐安均房七州】戎士十万其官宰相也留守之官居禁省中【守下或无之字】岁时出旌旗序留司文武百官於宫城门外而衙之江陵故楚都也戎士五万三公同时【时卢顾死矣故止及裴郑赵三公云】千里相望可谓盛矣河东公名均姓裴氏

记宜城驿【或作宜城驿记下或有愈代侄孙作五字宜城襄州县公尝有楚昭王庙诗云丘园满日衣冠尽城郭连云草树荒犹有国人怀旧德一间茅屋祭昭王与此记合】

此驿置在古宜城内【下或有复出宜城字楚昭王畏吴迁於郡郡即宜城】驿东北有井传是昭王井【或无昭字】有灵异至今人莫汲【开元二十二年初置十道采访韩朝宗以襄州刺史兼山南东道襄川南楚故城有昭王井传言汲者死行人虽渴困不敢俯视朝宗移书谕神自是饮者亡恙也更号韩公井】驿前水传是白起堰西山下涧灌此城坏【或脱堰字】楚人多死流城东陂臭闻远近因号其陂臭陂【臭陂上或有曰字】有蛟害人渔者避之

井东北数十步有楚昭王庙【或无昭字】有旧时高木万株多不得其名【或作始】历代莫敢剪伐尤多古松大竹于太傅【于頔】帅襄阳【或无阳字】迁宜城县并改造南境数驿材木取足此林旧庙屋极宏盛今惟草屋一区然问左侧人尚云每岁十月民相率聚祭其前庙後小城盖王居也【後或作复】其内处偏高广员八九十亩号殿城当是王朝内之所也【城或作域朝或作庙】多甃可为书砚自小城内地今皆属甄氏甄氏於小城北立墅以居甄氏有节行【谓甄济元侍御尝以书请於公乞书甄氏父子节义见公答元侍御书】其子逢以学行为助教元和十四年二月二日题

题李生壁【李平】

余始得李生於河中今相遇於下邳【或作邳非是洪庆善云下邳贞观中属泗元和中属徐】自始及今十四年矣始相见吾与之皆未冠未通人事追思多有可笑者与生皆然也今者相遇皆有妻子昔时无度量之心寧复可有是生之为交何其近古人也【近下或有於字】是来也余黜於徐州将西居於洛阳泛舟於清泠池泊於文雅台下西望商邱【或作州非是】东望修竹园入微子庙求邹阳枚叔司马相如之故文【清泠池文雅台商邱修竹园微子庙皆在睢阳即梁孝王城邹枚相如皆孝王之客也】久立於庙陛间【庙陛间或作庙下或作庙下陛闲】悲那颂之不作於是者已久【颂之或作之颂那商颂祀成汤之诗睢阳有亳城汤所都也其後武王伐殷以微子奉商祀有正考父者得商颂十二篇於周之太师以那为首】陇西李翱太原王涯上谷侯喜实同与焉【涯或作渥与音预】贞元十六年五月十四日昌黎韩愈书

东雅堂昌黎外集注卷四

东雅堂昌黎外集注卷五

钦定四库全书

东雅堂昌黎外集注卷五

除崔羣户部侍郎制【旧史云羣元和初为翰林学士以谏言正论闻於时九年迁礼部侍郎十年知贡举取士三十余人选拔才行咸为公当转户部新史不载其为礼部逸之也公掌纶诰一年惟外集有此制一首则其文遗逸多矣李汉云收拾遗文无所失坠信乎】

勅地官之职邦教是先必选国华以从人望具官崔羣体道履仁外和内敏【或作内和外敏】清而容物善不近名从容礼乐之间特達珪璋之表比参密命弘益既多【羣元和初为翰林学士历中书舍人】及贰仪曹升擢惟允迈兹令德【兹或作此】蔼然休声选贤与能于今虽重【虽或作惟重或作盛】择才均赋【均或作经】自古尤难往慎乃司以服嘉命可【下或有云云字】

祭董相公文【董公名晋祭下或有汴州字公时为汴之观察推官晋薨之三日而歛既歛而行於行之四日公从丧至偃师而汴军乱此文公与一时僚吏共为文以祭於丧之将行也其名位具载本篇然陆长源孟叔度皆死於军乱之日惟公蠲免者也】

维贞元十五年岁次己卯二月乙亥朔某日节度行军司马检校右散骑常侍兼御史大夫知使事吴县开国男食邑三百户陆长源【吴县开国或作吴郡或无食邑三百户字】度支营田判官检校金部员外郎侍御史孟叔度观察支使监察御史里行邱穎观察推官守秘书省校书郎韩愈等谨以少牢之奠敬祭于故尚书右仆射平章事陇西公之灵呜呼天高而明地厚而平五气叙行万彙顺成交感旁畅圣贤以生雨水于云渌水于坤【或作神】蕃昌生物【昌生或作生庶】有假有因天睠唐邦锡之元臣肫肫元臣【肫肫或作吨吨误 肫音谆】其德孔硕不谄不笑不威不赫【不谄不笑或作不容不谄或作不陷不酷或无不笑二字而连下文不威为句下文其敌下别出不讐二字与上求字叶】不求其盈【或作用】不致其敌爰立作相【立或作初】訏谟实勤出若无辞畴德之闻【德或作得】帝念东土公其来抚乃守洛都【贞元十六年三月晋为东都留守】乃藩浚郊廼去厥疾廼施厥膏不知其劳鰥寡以饶维昔浚郊厥乱维旧【昔或作若厥乱维旧或作维乱旧政或作乱维政旧】有狡有狂其羣孔丑公其来矣为民父母【为民或作公为非是】父诲其义母仁其愚既变既从孰云其初【孰云或作亲去或作亲云非是】自迺徂远混然一区公来自中天子所倚公今不归谁佐天子公既来止【或作既来至止或作公来至止今依行状更定】东人以完公既歿矣人谁与安浊流浑浑有辟其郛填道欢呼公来之初今公之归公在丧车旨酒既盈嘉肴在盛【音成】呜呼我公庶享其诚尚飨

雷塘禱雨文【此篇乃柳子厚文此不當錄】

祭石君文【或作祭石濬川文石洪濬川也河南人為京兆昭應尉遂葬於死所故曰客葬秦原也公既志其墓又同宋景為文以祭之】

維元和七年歲次壬辰七月二十七日右補闕宋景國子博士韓愈謹以清酌庶羞之奠敬祭于石三學士之靈【或無敬字】惟君學成于身名彰于人知道之可行見人之不幸【見人或作知命或作見命不上或無之字】不事顧讓以圖就功如何奄忽永喪其躬【此四字或作以喪其良能下或有知微有議四字或作不負長已誰知曰有義何害今按諸本皆無文理疑不足據】曰景與愈與游為久【或無曰字景下或無與字愈下】

【有也字為久作日久】自君之逝相遇輒哀傍無強親子孩妻姪【或作稚姪古文姬字然義亦不近】敢忘分濟念力未任客葬秦原孤誰附奠以送訣悲何可窮尚飡

祭房君文【房次卿字蜀客公嘗志其父武墓有子曰次卿即君也次卿卒于京兆興平尉文曰吾未死無以妻子為念其恤孤之意厚矣】

維某年月日愈謹遣旧吏皇甫悅以酒肉之饋展祭於五官蜀客之柩前【或無維某字愈作某或無日字於一作于】嗚呼君迺至於此吾復何言【於此或作於斯】若有鬼神吾未死無以妻子為念嗚呼君其能聞吾此言否【君上或有房字】尚飡

高君仙硯銘【并序】

儒生高常與予下天壇中路獲硯石似馬蹄狀外棱孤耸內發墨色幽奇天然疑神仙遺物寶而用之請予銘底

仙馬有靈迹在于石棱而宛中有点墨迹文字之祥君家其昌【應劭武紀注大宛旧有天马种蹋石汚血顏曰蹋石謂蹋石有迹言其蹄堅利朱新仲謂銘語本此宛平聲】

高君畫贊【此篇从蜀本錄之今按疑非公所作然姑存之】

君子溫閑骨氣委和迹不拒物心不揚波澄源卷璞舍白瑳瑳遺紙一張德音不忘

潮州請置鄉校牒【東坡潮州廟記謂始潮之人未知學公命進士趙德為之師自是潮之人篤於文行延及齊民至于今号称易治此即公請置鄉校之意也】

孔子曰道之以政齊之以刑【齊上或有而字】則民免而無耻不如以德禮為先而輔以政刑也【或無則字禮字】夫欲用德禮未有不由于學校師弟子者此州學廢日久進士明經百十年閑【百十年閑或作百十數年非是】不聞有業成貢於王庭試於有司者【貢試下或

并无於字或作于字】人吏目不识乡饮酒之礼耳未尝闻鹿鸣之歌【或无日与耳字】忠孝之行不劝亦县之耻也夫十室之邑必有忠信今此州户万有余岂无庶几者邪刺史县令不躬为之师里闾後生无所从学尔【或作耳又或作矣非是】赵德秀才沈雅专静颇通经有文章能知先王之道论说且排异端而宗孔氏可以为师矣【师下或有友字】请摄海阳县尉为衙推官【或无官字】专勾当州学以督生徒兴恺悌之风刺史出已俸百千以为举本【举或作学】收其赢余以给学生厨饌

直谏表【说见第三卷】

论顾威状【同上】

东雅堂昌黎外集注卷五

东雅堂昌黎外集注卷六

<集部,别集类,汉至五代,东雅堂昌黎集注>

钦定四库全书

东雅堂昌黎外集注卷六

顺宗实録卷一【起藩邸尽贞元二十一年二月】

【方本不载实録云诸本顺宗实録皆以附外集然李汉序谓又有注论语十卷传学者顺宗实録五卷列於史书不在集中则知实録固不必附也 今按李汉之说据当时而言之似未为失然其为害已足使笔解亡逸无复真本实録窜易不成全书是则皆李汉之为也方氏不察而从其说既已误矣况今去公之时又益以远比之当日事体又大不同故其片文只字名为公之作而决可知其非伪者皆当收拾使无失坠乃为真能好公之文者固不当以一时苟简之论为限断而直有所遗也故今於实録姑仍外集而详加校定庶几犹足以见公笔削之大指云 旧史公传云时谓愈有史笔及撰顺宗实録繁简不当叙事拙於取舍颇为当代所非穆宗文宗尝诏史臣添改时愈壻李汉蒋系在显位诸公难之而韦处厚别撰顺宗实録三卷且公进实録表状所云乃监修李吉甫以韦处厚所撰未周悉令臣重修而旧传反谓所撰不当处厚别撰三卷误矣新史又云自韩愈为顺宗实録议者闐然不息卒窜定无全篇按路隋传文宗嗣位隋以宰相监修国史初韩愈撰顺宗实録书禁中事太切直宦寺不喜訾其非实帝诏隋刊正隋建言卫尉卿周君巢谏议大夫王彦威给事中李固言史官苏景裔皆言改修非是夫史册者褒贬所在匹夫善恶尚不可诬况人君乎议者至引雋不疑第五伦为比以蔽聪明臣宗闵臣僧孺谓史官李汉蒋系皆愈之壻不可参撰俾臣得下笔臣谓不然且愈所书已非自出元和以来相循逮今虽汉等以嫌无害公议请条示甚谬误者付史官刊定有诏摘贞元永贞间数事为失实余不复改汉等亦不罢由是观之则公於元和十年夏进此实録後才一刊正是文宗朝所特改者贞元永贞间数事耳旧史以为韦处厚别撰者固非而新史又谓卒窜定无全篇者亦非也司马温公考异云景佑中编次崇文总目顺宗皇帝实録有七本皆五卷题云韩愈等撰五本畧而二本详编次者两存之其中多异同然则是非取舍後世安所折衷耶终之唯公之信而已此新史所以采摭无遗且以公为知言也欤】

史臣韩愈撰【或无此五字】

顺宗至德大圣大安孝皇帝【德下史有弘道二字】讳诵德宗长子母曰昭德皇后王氏上元二年正月十二日生【正月戊戌生於长安之东内】大历十四年封为宣王建中元年立为皇太子【史云大历十四年六月进封宣王十二月乙卯立为皇太子】慈孝寛大仁而善断留心艺学亦微信尚浮屠法礼重师傅引见辄先拜善隶书德宗之为诗并他文赐大臣者

率皆令上书之德宗之幸奉天仓卒间【仓或作苍】上常亲执弓矢率军後先导卫备尝辛苦上之为太子於父子间慈孝交洽无嫌每以天下为忧德宗在位久稍不假宰相权而左右得因缘用事外则裴延龄李齐运韦渠牟等以奸佞相次进用延龄尤狡险判度支【贞元九年五月以裴延龄为户部侍郎判度支】务刻剥聚歛以自为功天下皆怨怒上每进见候颜色辄言其不可至陆?张滂李充等以毁谴朝臣?惧【?所江切】谏议大夫阳城等伏合极论德宗怒甚将加城等罪内外无敢救者上独开解之城等赖以免德宗卒不相延龄渠牟上有力焉贞元二十一年癸巳德宗崩景申上即位太极殿册曰维贞元二十一年岁次乙酉正月辛未朔二十三日癸巳皇帝若曰於戏天下之大实惟重器祖宗之业允属元良咨尔皇太子诵睿哲温?宽仁慈惠文武之道秉自生知孝友之诚发於天性自膺上嗣毓德春闱恪慎于厥躬祇勤于大训必能诞敷至化安劝庶邦朕寝疾弥留弗兴弗寤是用命尔继统俾绍前烈宜陟元后永绥兆人其令中书侍郎平章事高郢奉册即皇帝位尔惟奉若天道以康四海懋建皇极以熙庶功无忝我高祖太宗之休命【仓猝召翰林学士郑絪卫次公等至金銮殿草遗诏宦官或曰禁中议所立尚未定衆莫敢对次公遽言曰太子虽有疾地居冢嗣中外属心必不得已犹应立广陵王絪等从而和之议始定】上自二十年九月得风疾因不能言使四面求医药天下皆闻知德宗忧戚形于颜色数自临视二十一年正月朔【辛未朔】含元殿受朝【元或作光】还至别殿诸王亲属进贺独皇太子疾不能朝德宗为之涕泣悲伤叹息因感疾恍惚日益甚二十余日中外不通两宫安否朝臣咸忧惧莫知所为虽翰林内臣亦无知者【含元殿至日益甚四十一字史云德宗不豫诸王亲戚皆侍医药独上卧病不能侍德宗弥留思见太子涕咽久之】二十三日知内外忧疑紫衣麻鞋不俟正冠出九仙门召见诸军使京师稍安二十四日宣遗诏上褰服见百寮二十六日即位【丙申即皇帝位於太极殿卫士尚疑之企足引领而望之曰真太子也乃喜而泣】上学书於王伾【杭人】颇有宠【伾下或有复出伾字】王叔文【山陰人】以暮进俱待诏翰林数侍太子暮叔文诡譎多计【譎音决】上在东宫尝与诸侍读并叔文论政至宫市事上曰寡人方欲极言之衆皆称赞独叔文无言既退上独留叔文谓曰向者君奚独无言岂有意邪叔文曰叔文蒙幸太子有所见敢不以闻太子职当侍膳问安不宜言外事陛下在位久如疑太子收人心何以自解上大惊因泣曰非先生寡人无以知此遂大爱幸与王伾两人相依附俱出入东宫闻德宗大渐上疾不能言伾即入以诏召叔文入坐翰林中使决事【诏下或无召字文下或无入字使下或无决字】伾以叔文意入言於宦者李忠言称诏行下外初无知者以检校司空平章事杜佑摄冢宰兼山陵使中丞武元衡为副使宗正卿李纾为按行山陵地使刑部侍郎郑云逵为鹵簿使【或无兼字纾或作杼逵或作達】又命中书侍郎平章事高郢撰哀册文礼部侍郎权德輿撰谥册文太常卿许孟容撰议文庚子百寮请听政曰自汉以来【以或作已】丧期之数以日易月而皆三日而听政我国家列圣亦克修奉罔或有违况大行皇帝酌於故实重下遗诏今日至期而陛下未亲政事羣臣不敢安宜存大孝以宁万国天下之幸不许是月升泗州为上州二月辛丑朔中书侍郎平章事臣郢门下侍郎平章事臣珣瑜检校司空平章事臣佑奉疏曰大行皇帝知陛下仁孝虑陛下悲哀不即人心听政事故发遗诏令一行汉氏之制今陛下安得守曾闵匹夫之小行忘皇王继亲之大孝以亏臣子承顺之义犹不许壬寅宰臣又上言曰陛下以圣德至孝继受宝命宜奉先帝约束以时听断不可以久从之癸卯朝百寮于紫宸门杜佑前跪进曰陛下居忧过礼羣臣惧焉愿一覩圣顔因再拜而起左右乃为皇帝举帽百寮皆再拜佑复奏曰陛下至性殊常哀毁之甚臣等不胜惶灼伏望为宗庙

社稷割哀强食 景午罢翰林陰阳星卜医相覆碁诸待诏三十二人【三或作四】初王叔文以碁待诏既用事恶其与已侪类相乱罢之 已酉易定节度使张茂昭可同中书门下平章事余如故【或无使字可史作兼】河北节度自至德已来不常朝覲前年冬茂昭来朝未还故宠之 辛亥【史作卯】诏吏部侍郎韦执谊守左丞同中书门下平章事赐紫【侍郎史作郎中左丞史作尚书右丞】初执谊为翰林学士知叔文幸於东宫倾心附之叔文亦欲自广朋党密与交好至是遂特用为相 乙卯太常奏礼云丧三年不祭惟祭天地社稷周礼圜鍾之均六变天神皆降林鍾之均八变地示咸出不废天地之祭不敢以卑废尊也乐者所以降神也不以乐则祭不成今遵遗诏行易月之制请制内遇祭辍乐终制用乐从之又奏礼三年祭宗庙今请俟祔庙毕复常从之 辛酉贬京兆尹李实为通州长史诏曰【诏下或有词一道字曰下或有京尹嗣道王字】实素以宗属累更任使骤升班列遂极宠荣而政乖惠和务在苛厉比年旱歉【或作嘆】先圣忧人特诏逋租悉皆蠲免而实敢肆诬罔复令徵剥颇紊朝廷之法实惟聚斂之臣自国哀已来增毒弥甚无辜毙踣深所兴嗟朕嗣守洪业敷弘理道宁容蠹政以害齐人宜加贬黜用申邦宪尚从优贷俾佐远藩实谄事李齐运骤迁至京兆尹恃宠强愎不顾文法【文或作乃】是时春夏旱京畿乏食实一不以介意方务聚斂徵求以给进奉每奏对辄曰今年虽旱而谷甚好由是租税皆不免人穷至坏屋卖瓦木贷麦苗以应官【或无贷字】优人成辅端为谣嘲之实闻之奏辅端诽谤朝政杖杀之实遇侍御史王播於道故事尹与御史相遇尹下道避实不肯避导骑如故播诘让导骑者实怒遂奏播为三原令廷诟之【原或作泉非是】陵轹公卿已下【陵或作凌】随喜怒诬奏迁黜朝廷畏忌之尝有诏免畿内逋租实不行用诏书徵之如初勇於杀害人吏不聊生至譴市里謗呼皆?瓦砾遮道伺之实由间道获免 壬戌【洪庆善云史作寅误】制殿中丞皇太子侍书翰林待诏王伾可守左常侍依前翰林待诏【书或作读依前翰林待诏史作充翰林学士 今按前云上学书於王伾後云以侍书得幸於上则此当从史作侍书为是】苏州司功王叔文可起居舍人翰林学士又以司勳员外郎翰林学士知制诰郑絪为中书舍人学士如故又以给事中冯伉为兵部侍郎以兵部员外郎史馆修撰归登为给事中修撰如故登伉皆上在东宫时侍读以师傅恩拜

东雅堂昌黎外集注卷七

钦定四库全书

东雅堂昌黎外集注卷七

顺宗实录卷二【起二月尽三月】

二月甲子上御丹凤门大赦天下自贞元二十一年二月二十四日昧爽已前大辟已下罪无轻重常赦所不原者咸赦原之诸色人中有才行兼茂明於理体者经术精深可为师法者达於吏理可使从政者宜委常参官各举所知其在外者长吏精加访择具名闻奏仍优礼发遣旧事宫中有要市外物【下或有闲字】令官吏主之与人为市随给其直贞元末以宦者为使抑买人物稍不如本估末年不复行文书置白望数百人於两市并要闾坊阅人所卖物但称宫市即斂手付与真伪不复可辨无敢问所从来其论价之高下者【其论疑当作与论】率用百钱物买人直数千钱物仍索进奉门户并脚价钱将物诣市至有空手而归者名为宫市而实夺之尝有农夫以驴负柴至城卖遇宦者称宫市取之才与绢数尺又就索门户仍邀以驴送至内农夫涕泣以所得绢付之不肯受曰须汝驴送柴至内农夫曰我有父母妻子待此然後食【待或作得】今以柴与汝不取直而归汝尚不肯我有死而已【有死或作必死】遂殴宦者街吏擒以闻诏黜此宦者而赐农夫绢十匹然宫市亦不为之改易谏官御史数奏疏谏不听上初登位禁之至大赦又明禁又贞元中要乳母皆令选寺观婢以充之而给与其直例多不中选寺观次当出者卖产业割与地买之【地上与字恐误或卖产业是本文後改作割地而传者不去旧文又误增与字】贵有姿貌者以进其徒苦之至是亦禁焉贞元末五坊小儿张捕鸟雀於闾里皆为暴横以取钱物至有张罗网於门不许人出入者或有张井上者使不得汲水近之辄曰汝惊供奉鸟雀痛殴之出钱物求谢乃去或相聚饮食於肆醉饱而去卖者或不知就索其直多被殴骂或时留蛇一囊为质曰此蛇所以致鸟雀而捕之者今留付汝幸善饲之勿令饥渴卖者愧谢求哀乃携而去上在春宫时则知其弊常欲奏禁之【奏或作东】至即位遂推而行之人情大悦乙丑停盐铁使进献旧盐铁钱物悉入正库一助经费其後主此务者稍以时市珍翫时新物充进献以求恩泽其後益甚岁进钱物谓之羨余而经入益少至贞元末遂月有献焉【遂或作逐非是】谓之月进至是乃罢命右金吾将军兼中丞田景度持节告哀於吐蕃以库部员外郎熊执易为副兵部郎中兼中丞元季方告哀于新罗且册立新罗嗣王主客员外郎兼殿中监马于为副三月庚午朔出後宫三百人辛未以翰林待诏王伾为翰林学士壬申以故相抚州别驾姜公辅为吉州刺史前户部侍郎判度支汀州别驾苏弁为忠州刺史追故相忠州刺史陆贽郴州别驾郑余庆前京兆尹杭州刺史韩皋前谏议大夫道州刺史阳城赴京师德宗自贞元十年已後不复有赦令左降官虽有名德才望以微过忤旨谴逐者一去皆不复叙用至是人情大悦而陆贽阳城皆未闻追诏【闻下或有於字】而卒於迁所士君子惜之

癸酉出後宫并教坊女妓六百人听其亲戚迎于九仙门百姓相聚譟呼大喜景戌诏曰检校

司空平章事杜佑可检校司徒平章事充度支并盐铁使以浙西观察李錡为浙西节度检校刑部尚书赐徐州军额曰武宁制曰朕新委元臣综厘重务爰求贰职固在能臣起居舍人王叔文精识瓊材寡徒少欲质直无隐沈深有谋其忠也尽致君之大方其言也达为政之要道凡所询访皆合大猷宜继前劳伋光新命可度支盐铁副使依前翰林学士本官赐如故【赐如或作余如】初叔文既专内外之政与其党谋曰判度支则国赋在手可以厚结诸用事人取兵士心以固其权骤使重职人心不服藉【或作籍或无藉字】杜佑雅有会计之名位重而务自全易可制故先令佑主其名而除之为副以专之【除之疑当作除已】以户部尚书判度支王绍为兵部尚书以吏部郎中李鄘为御史中丞武元衡为左庶子初叔文党数人贞元末已为御史在台至元衡为中丞薄其人待之鹵莽皆有所憾而叔文又以元衡在风宪欲使附已使其党诱以权利元衡不为之动叔文怒故有所授 庚寅制【或有曰字】门下侍郎守吏部尚书平章事贾耽可检校司空兼左仆射守门下侍郎平章事郑珣瑜可守吏部尚书守中书侍郎平章事高郢可守刑部尚书守尚书左丞平章事韦执谊可守中书侍郎并依前平章事 癸巳诏曰万国之本属在元良主器之重归於长子所以基社稷而固邦统古之制也广陵王某孝友温?慈仁忠恕博厚以容物寛明而爱人祇服训词言皆合雅讲求典学礼必从师居有令闻动无违德朕获纘丕绪祇若大猷惟怀永图用建储贰以承宗庙以奉粢盛爰举旧章俾膺茂典宜册为皇太子改名某仍令所司择日备礼册命初广陵王名从水傍享至册为皇太子始改从今名 丁酉吏部尚书平章事郑珣瑜称疾去位其日珣瑜方与诸相会食於中书故事丞相方食百寮无敢谒见者叔文是日至中书欲与执谊计事令直省通执谊直省以旧事告叔文叱直省直省惧入白执谊执谊逡巡慙 【乃版切与赧同】竟起迎叔文就其合语良久宰相杜佑高郢珣瑜皆停筯以待【郢下或有郑字】有报者云叔文索饭韦相已与之同餐合中矣佑郢等心知其不可【或无不字非是】畏惧叔文执谊莫敢出言珣瑜独叹曰吾岂可复居此位顾左右取马径归遂不起前是左仆射贾耽以疾归第未起珣瑜又继去二相皆天下重望相次归卧叔文执谊等益无所顾忌远近大惧焉

东雅堂昌黎外集注卷八

钦定四库全书

东雅堂昌黎外集注卷八

顺宗实录卷三【起四月尽五月】

夏四月乙巳上御宣政殿册皇太子册曰建储贰者必归於冢嗣固邦本者允属於元良咨尔元子广陵王某幼挺岐嶷长标洵淑佩诗礼之明训宣忠孝之弘规居惟保和动必循道识达刑政器合温文爱敬奉於君亲仁德闻於士庶神祇龟筮罔不协从是用命尔为皇太子於戏维我烈祖之有天下也功格上帝祚流无穷光缙洪业逮予十叶??寅畏日慎一日付尔以承祧之重励尔以主鬯之勤以贞万国之心以扬三善之德其尊师重傅亲贤远佞非礼勿践非义勿行对越天地之耿光丕承祖宗之休烈可不慎欤时上即位已久而臣下未有亲奏对者内外盛言王伾王叔文专行断决日有异说又属频雨皆以为羣小用事之应至将册礼之夕雨乃止迨行事之时天气晴朗有庆云见识者以为天意所归及覲皇太子仪表班行既退无不相贺至有感泣者 戊申诏曰惟先王光有天下必正我邦本以立人极建储贰以承宗祧所以启迪大猷安固洪业斯前代之令典也皇太子某体仁秉哲?敬温文德协元良礼当上嗣朕奉若丕训宪章前式惟承社稷之重载考春秋之义授之匕鬯以奉粢盛爰以令辰俾膺茂典今册礼云毕感庆交怀思与万方同其惠泽自贞元二十一年二月二十四日已後至四月九日昧爽已前天下应犯死罪者特降从流流已下递减一等文武常参并州府县官子为父後者赐勲两转古之所以教太子必茂选师傅以翼辅之法於训词而行其典礼左右前後罔非正人是以教谕而成德也给事中陆质中书舍人崔枢积学懿文守经据古夙夜讲习庶协于中并充皇太子侍讲天下孝子顺孙先旌表门闾者委所管州县各加存恤

庚戌封皇太子长子宁等六人为郡王【宁寛宥察寰察等六男也】癸酉【当作丑】赠吐蕃吊祭使工部侍郎兼御史大夫史馆修撰张荐礼部尚书荐字孝举代居深州之陆泽祖文成博学工文词性好诙谐七登文学科荐聪明强记历代史传无不贯通为太师顔真卿所称赏遂知名大历中江东观察表荐之【江或作浙】授左司御率府兵曹参军兼史馆修撰贞元初为太常博士四年回纥求和亲使送咸安公主入回纥以荐为判官改授殿中侍御史累迁谏议大夫十一年册回纥子荐以秘书少监持节为使还久之迁秘书监二十年吐蕃赞普死以荐为工部侍郎兼御史大夫持节吊赠卒於赤岭东回纥辟吐蕃传归其柩【辟字恐误】前後三使异国自始命至卒常兼史职在史馆二十年着宰辅传畧五服图记寓居録灵怪集等 景寅罢闽中万安监先是福建观察柳冕久不迁欲立事迹【立或作以】以求恩宠乃奏云闽中南朝放牧之地畜羊马可使孳息请置监许之收境中畜产【收或作牧】令吏牧其中羊大者不过十斤马之良者佑不过数千不经时辄死又歛百姓苦之远近以为笑至是观察阎济美奏罢之 丁卯命焚容州所进毒药可杀人者【可或作所】

五月己巳【史作戊辰无五月字】以杭州刺史韩皋为尚书左丞【左或作右】辛未【史

作五月己巳】以右金吾大将军范希朝为检校右仆射兼右神策京西诸城镇行营兵马节度使叔文欲专兵柄藉希朝年老旧将故用为将帅使主其名【主或作在】而寻以其党韩泰为行军司马专其事甲戌以度支郎中韩泰守兵部郎中兼中丞充左右神策京西都栅行营兵马节度行军司马赐紫 乙亥追改为检校兵部郎中职如故 甲申【史作丁丑】以万年令房启为容州刺史兼御史中丞初启善於叔文之党因相推致【或无因字】遂获宠於叔文求进用叔文以为容管经畧使使行约至荆南授之云脱不得荆南即与湖南故启宿留於江陵【宿音秀留音溜】居久之方行至湖南又久之而叔文与执谊争权数有异同故不果寻闻皇太子监国启惶骇奔驰而往是日以郴州员外司马郑余庆为尚书左丞【是日史作癸未】 乙酉以尚书左丞韩皋为鄂岳观察武昌军节度使【以尚下十八字史作以右丞韩皋为鄂岳沔蕲团练观察使仍日系甲辰下】初皋自以前辈旧人累更重任颇以简倨自高嫉叔文之党谓人曰吾不能事新贵人皋从弟晔幸於叔文以告叔文故出之 辛卯以王叔文为户部侍郎职如故赐紫初叔文欲依前带翰林学士宦者俱文珍等恶其专权削去翰林之职叔文见制书大惊谓人曰叔文日时至此商量公事若不得此院职事即无因而至矣王伾曰诺即疏请不从再疏乃许三五日一入翰林去学士名又与归登同日赐紫内出衫笏赐登而叔文不沾文珍等所恶独不得赐【今按而叔文下数句重复不可读疑因後來修改已增新字而不去旧文如前买乳母之例也盖上文已有俱文珍等恶其专权之句则此不当更有文珍等所恶五字有不沾字即不当更有独不得赐四字若并此九字即上不当有不沾字且此文珍等字上亦合更有脱字谬误甚明今当削去文珍等以下九字则语意明白无复可疑矣】由此始惧以衢州别驾令狐峘为秘书少监峘国子祭酒德棻玄孙进士登第司徒杨绾未达时遇之以为贤为礼部修史引峘入史馆自华原尉拜拾遗累迁起居舍人大历八年刘晏为吏部尚书奏峘为刑部员外判南曹累迁至礼部侍郎峘之判南曹晏为尚书杨炎为侍郎峘得晏之举分阕必择其善者与晏而以恶者与炎炎固已不平至峘为礼部而炎为相有杜封者故相鸿渐之子求补弘文生炎尝出杜氏门下托峘以封峘谓使者曰相公欲封成其名乞署封名下一字峘因得以记焉炎不意峘卖之署名属峘峘明日疏言宰相炎迫臣以威臣从之则负陛下不从即炎当害臣【即或作则】德宗以问炎炎具道所以德宗怒曰此奸人不可奈欲杖而流之炎救解乃黜为衡州别驾贞元初李泌为相以左庶子史馆修撰徵至则与同职孔述睿争竞细碎数侵述睿述睿长告以让不欲争【告或作者 长告谓长假也】泌卒窦参为相恶其为人贬吉州别驾改吉州刺史齐映除江西观察过吉州峘自以前辈怀怏怏不以刺史礼见入谒从容步进不袜首属戎器【或无袜字或又作袜非是】映以为憾去至府奏峘举前刺史过失鞫不得真无政事不宜临郡贬衡州别驾上即位以秘书少监徵未至卒峘在史馆修玄宗实录一百卷撰代宗实录三十卷虽颇勤苦然多遗漏不称良史初德宗将厚奉元陵事峘时为中书舍人兼史职奏疏谏请薄其葬有答诏优獎元和三年以修实录功追赠工部尚书【新史初峘受诏撰代宗实录未就会贬诏听在外成书元和中其子太仆丞丕献之以劳赠工部尚书】是月以襄州为襄府【按元和郡国志作襄阳大都督府恐襄下当有阳字】徙临汉县於古城曰邓城县

东雅堂昌黎外集注卷九

钦定四库全书

东雅堂昌黎外集注卷九

顺宗实录卷四【起六月尽七月】

六月乙亥【乙或作巳】贬宣州巡官羊士谔为汀州宁化县尉士谔性轻躁时以公事至京遇叔文用事朋党相煽颇不能平公言其非叔文闻之怒欲下诏斩之执谊不可则令杖杀之执谊又以为不可遂贬焉由是叔文始大恶执谊往来二人门下者皆惧先时刘辟以劔南节度副使将韦臯之意于叔文求都领劔南三川谓叔文曰太尉使某致微诚於公【某或作辟】若与其三川【与其疑当作与某】当以死相助若不用某亦当有以相酬叔文怒亦将斩之而执谊固执不可辟尚游京师未去【尚下或有以字】至闻士谔【士或作贬今按士上当别有贬字】遂逃归左散骑常侍致仕张万福卒万福魏州元城人也自曾祖至父皆明经官止县令州佐万福以祖父业儒皆不达不喜书学骑射年十七八从军辽东有功为将而还累迁至寿州刺史州送租赋诣京师至颍川界为盗所夺万福使轻兵驰入颍川界讨之【入颍川或作入颍州】贼不意万福至忙迫不得战万福悉聚而诛之尽得其所亡物并得前後所掠人妻子财物牛马万计悉还其家为淮南节度崔圆所忌失刺史改鸿臚卿以节度副使将兵千人镇寿州万福不以为憾许杲以平卢行军司马将卒三千人驻濠州不去有窥淮南意圆令万福摄濠州刺史杲闻即提卒去止当涂陈庄贼陷舒州圆又以万福为舒州刺史督淮南岸盗贼连破其党大历三年召赴京师代宗谓曰闻卿名久欲一识卿且将累卿以许杲万福拜谢因前曰陛下以许杲召臣如河北贼诸将叛以属何人代宗笑曰且欲议许杲事方当大用卿即以为和州刺史行营防御使督淮南岸盗贼至州杲惧移军上元杲至楚州大掠节度使韦元甫命万福讨之未至淮陰杲为其将康自勤所逐【勤或作劝下同】自勤拥兵继掠【拥或作权】循淮而东万福倍道追而杀之免者十二三尽得其所虏掠金银妇女等【女或作人】皆获致其家代宗诏以本州兵千五百人防秋京西遂带和州刺史镇咸阳固留宿卫【固或作因】李正己反将断江淮路令兵守埇桥涡口【埇音勇】江淮进奉船千余只泊涡口不敢进德宗以万福为濠州刺史万福驰至涡口立马岸上发进奉船淄青将士停岸睥睨不敢动诸道继进改泗州刺史为杜亚所忌徵拜左金吾卫将军召见德宗惊曰杜亚言卿昏耄卿乃如是健耶图形凌烟阁数赐酒馔衣服并勅度支籍口畜给其费至贺阳城等於延英门外天下益重其名二十一年以左散骑常侍致仕元和元年卒【元和元年当作贞元二十一年】年九十万福自始从军至卒禄食七十年未尝病一日典九郡皆有惠爱癸丑韦臯上表请皇太子监国又上皇太子牋寻而

裴垍严绶表继至悉与臯同赠故忠州别驾陆?兵部尚书故道州刺史阳城左常侍?字敬輿吴郡人也年十八进士及第【?大历八年及第时年二十】又以博学宏词授郑县尉书判拔

萃授渭南尉迁监察御史未几选为翰林学士迁祠部员外郎德宗幸奉天?随行在天下搔扰远近徵发书诏一日数十下【一日或作日百非是】皆出於??操笔持纸成於须臾不复起草同职皆拱手嗟叹不能有所助常启德宗言方今书诏宜痛自引过罪已以感人心昔成汤以罪已致兴後代推以为圣人楚王失国亡走一言善而复其国至今称为贤者陛下诚能不愆改过以言谢天下臣虽愚陋为诏词无所忌讳庶能令天下叛逆者回心喻旨德宗从之故行在制诏始下闻者虽武人悍卒无不挥涕感激议者咸以为德宗克平寇难旋复天位不惟神武成功爪牙宣力盖以文德广被腹心有助焉累迁考功郎中谏议大夫中书舍人兼翰林学士丁母忧免丧权知兵部侍郎复入翰林中外属意旦夕俟其为相窦参深忌之?亦短参之所为且言其黷货於是与参不能平寻真拜兵部侍郎知礼部贡举於进士中得人为多八年春迁中书侍郎平章事始令吏部每年集选人旧事吏部每年集人其後遂三年一置选选人猥至文书多不了寻勘真伪纷杂吏因得大为奸巧选士一蹉跌或至十年不得官而官之阙者或累岁无人?令吏部分内外官员为三分计阙集人以为常其弊十去七八天下称之初窦参出李巽为常州刺史且迫其行巽常衔之至参贬为郴州别驾巽适迁湖南观察德宗常与参言故相姜公辅罪参漏其语参败公辅因上疏自陈其事非臣之过德宗诘之知参泄其语怒未有所发会巽奏汴州节度刘士宁遗参金帛若干士宁得汴州参处其议士宁常德之故致厚赐德宗以参得罪而以武将交结【以武当作与武】发怒竟致参於死而议者多言参死由?焉【司马温公云?传曰德宗杀参?有力焉按?请令长举属吏状云亦由私访所亲转有所卖其弊非远圣鉴明知乃解参之语也及参之死?解救甚至当时之人见参?有隙遂以己意猜之史官不悦者因归罪於?耳唐小说云窦参所宠青衣上清者参死没入掖庭因言陆?诬陷参事德宗乃下诏雪参此说与旧史同】裴延龄判度支天下皆嫉怨而独幸於天子朝廷无敢言其短者?独身当之日陈其不可用延龄固欲去?而代之又知?之不与已多阻其奏请也谤毁百端翰林学士吴通玄故与?同职奸巧佻薄与?不相能知?与延龄相持有间因盛言?短宰相赵璟本?所引同对嫉?之权密以?所戢弹延龄事告延龄【戢通监作讥或作谈戢弹或作弹戢】延龄益得以为计由是天子益信延龄而不直?竟罢?相以为太子宾客而黜张滂李充等权【按史滂充皆以论裴延龄得罪此但着黜滂充等而上文不言其所以得罪之由盖脱漏也】言事者皆言其屈【皆或作多】?固畏惧至为宾客拒门不纳交亲士友春旱德宗数猎苑中延龄疏言?等失权怨望言於衆曰天下旱百姓且流亡度支爱惜不肯给诸军军中无所食其事奈何以摇动羣心其意非止欲中伤臣而已後数日又猎苑中会神策军人跪马前云度支不给马草德宗意延龄前言即回马而归由是贬?为忠州别驾滂充皆斥逐德宗怒未解?不可测赖阳城等救乃止?之为相常以年少入翰林得幸於天子长养成就之不敢自爱事之不可者皆争之德宗在位久益自揽持机柄亲治细事失君人大体宰相益不得行其事职而议者乃云由?而然【温公云凡为宰相者皆欲专权安肯自求失职不任宰相乃德宗之失而归咎於?岂人情也?论朝官阙员状云顷之辅臣鲜克胜任过蒙容养苟备职员致劳睿思巨小经虑此乃谏德宗不任宰相亲治细事之词也】?居忠州十余年常闭门不出入人无识面者避谤不着书习医方集古今名方为陆氏集验方五十卷卒於忠州年五十二上初即位与郑余庆阳城同徵诏始下而城?皆卒城字亢宗北平人代为官族好学贫不能得书乃求入集贤为书写吏窃官书读之昼夜不出经六年遂无所不通乃去沧州中条山下【州或作洲非是】远近慕其德行来学者相继於道间里有争者不诣官府诣城以决之李泌为相举为谏议大夫拜官不辞未至京师人皆想望风采【想或作相】云城山人能

自苦刻不乐名利必谏诤死职下咸畏惮之既至诸谏官纷纷言事细碎无不闻达天子益厌苦之【子或作下非是】而城方与其二弟牟容连夜痛饮【牟或作并容或作密二字或作并容】人莫能窥其意有怀刺讥之者将造城而问者【今按此二句亦衍一句疑亦以修改重复而误也今当削去讥之者将四字】城揣知其意辄强与酒【辄上或有强与坐字】客或时先醉仆席上或时先醉卧客怀中不能听客语约其二弟云吾所得月俸汝可度吾家有几口月食米当几何买薪菜盐米凡用几钱先具之其余悉以送酒媪无留也未尝有所贮积虽其所服用切急不可阙者客称其物可爱城辄喜举而授之陈莼者候其始请月俸常往称其钱帛之美月有获焉至裴延龄谗毁陆?等坐贬黜德宗怒不解在朝无救者城闻而起曰吾谏官也不可令天子杀无罪之人而信用奸臣即率拾遗王仲舒数人守延英门上疏论延龄奸佞?等无罪状德宗大怒召宰相入语将加城等罪良久乃解令宰相谕遣之於是金吾将军张万福闻谏官伏合谏趋往至延英门大言贺曰朝廷有直臣【或作直言】天下必太平矣遂徧拜城与仲舒等曰诸谏议能如此言事天下安得不太平也【或无也字】已而连呼太平万岁太平万岁万福武人时年八十余自此名重天下时朝夕相延龄城曰脱以延龄为相当取白麻坏之恸哭於庭竟坐延龄事改国子司业至引诸生告之曰凡学者所以学为忠与孝也诸生宁有久不省其亲乎明日谒城归养者二十余人有薛约者尝学於城狂躁以言事得罪将徙连州客寄有根蒂吏纵求得城家【纵当作踪】坐吏於门与约饮决别涕泣送之郊外德宗闻之以城为党罪人出为道州刺史太学生鲁郡李傥等二百七十人诣阙乞留住数日吏遮止之疏不得上在州以家人礼待吏人宜罚者罚之宜赏者赏之一不以簿书介意赋税不登【赋税或作税赋】观察使数请让上考功第城自署第曰抚字心劳徵科政拙考下下观察使尝使判官督其赋至州怪城不出迎以问州吏吏曰刺史闻判官来以为已有罪自囚於狱不敢出判官大惊驰入谒城於狱曰使君何罪某奉命来候安否耳留一两日未去城固不复归馆门外有故门扇横地城昼夜坐卧其上判官不自安辞去其後又遣他判官崔某往按之【按或作或非是】崔承命不辞载妻子一行中道而逃城孝友不忍与其弟异处皆不娶给侍终身有寡妹依城以居有生年四十余【生或作甥或作男】痴不能如人常与弟负之以游初城之妹夫亡在他处家贫不能葬城亲与其弟舁尸以归【舁音舆】葬於其居之侧往返千余里卒时年六十余戊午以户部侍郎潘孟阳为度支盐铁转运副使其日王伾诈称疾自免自叔文归第伾日诣中人并杜佑请起叔文为相且总北军既不得请以威远军使平章事又不得其党皆忧悸不自保伾至其日坐翰林中疏三上不报知事不济行且卧至夜忽叫曰伾中风矣明日遂舆归不出戊子以礼部侍郎权德舆为户部侍郎以仓部郎中判度支陈谏为河中少尹伾叔文之党於是始去乙未诏军国政事宜权令皇太子某勾当百辟羣后中外庶僚悉心辅翼以底于理宣布朕意咸使知闻上自初即位则疾患不能言至四月益甚时扶坐殿羣臣望拜而已未尝有进见者天下事皆专断於叔文而李忠言王伾为之内主执谊行之于外朋党誼譁荣辱进退生於造次惟其所欲不拘程度既知内外厌毒虑见摧败即谋兵权欲以自固而人情益疑惧不测其所为朝夕伺候会其与执谊交恶心腹内离外有韦臯裴垍严绶等賤表【垍当作均】而中官刘光奇俱文珍薛盈珍尚解玉等皆先朝任使旧人同心怨猜屡以启上上固已厌倦万机恶叔文等至是遂召翰林学士郑絪卫次公王涯等入至德殿撰制诏而发命焉【诏或作诰】又下制以太常卿杜黄裳为门下侍郎左金吾卫大将军袁滋为中书侍郎并平章事又下制吏部尚书平章事郑珣瑜刑部尚书平章事高郢并守本官罢相皇太子见百寮於东朝百寮拜贺皇太子涕泣不答拜景申诏宰臣告

天地社稷皇太子见四方使於麟德殿西亭

东雅堂昌黎外集注卷九

东雅堂昌黎外集注卷十

钦定四库全书

东雅堂昌黎外集注卷十

顺宗实录卷五【起八月尽至山陵】

八月庚子诏曰惟皇天佑命烈祖诞受方国九圣储祉万方咸休肆予一人获纘丕业严?守位不遑暇逸【或作给今从史】而天佑匪降【匪史作不】疾恙无瘳【无或作弗今从史】将何以奉宗庙之灵展郊禋之礼畴咨庶尹对越上玄内愧于朕心上畏于天命夙夜祗栗惟怀永图【惟怀史作深惟】一日万机不可以久旷天工人代不可以久违皇太子某睿哲温文寛和慈惠【慈史作仁】孝友之德爱敬之诚【爱敬或作敬爱或作仁爱今从史】通于神明格于上下是用推皇王至公之道遵父子传归之制付之重器以抚兆人必能宣祖宗之重光荷天地之休命奉若成宪永绥四方宜令皇太子即皇帝位朕称太上皇居兴庆宫制勅称诰所司择日行册礼永贞元年八月辛丑太上皇居兴庆宫诰曰有天下者传归於子前王之制也钦若大典斯为至公式扬耿光用体文德朕获奉宗庙临御万方降疾不瘳庶政多阙乃命元子代予守邦爰以令辰光膺册礼宜以今月九日册皇帝於宣政殿仍命检校司徒杜佑充册使门下侍郎杜黄裳充副使【仍命下二十一字史无】国有大命恩俾惟新宜因纪元之庆用覃在宥之泽宜改贞元二十一年为永贞元年自贞元二十一年八月五日昧爽已前天下应犯死罪特降从流流已下递减一等又下诰曰人伦之本王化之先爰举令图允资内辅式表后妃之德俾形邦国之风兹礼经之大典也良娣王氏家承茂族德冠中宫雅修彤管之规克佩姆师之训自服勤苹藻祇奉宗祧令范益彰母仪斯着宜正长秋之位以明继体之尊良媛董氏备位後庭素称淑慎进升号位【或作位号】礼亦宜之良娣可册为太上皇后良媛宜册为太上皇德妃仍令所司备礼择日册命宣示中外咸使知闻壬寅制王伾开州司马王叔文渝州司户并员外置驰驿发遣叔文越州人以暮入东宫颇自言读书知理道乘间常言人间疾苦上将大论宫市事叔文说中上意遂有宠因为上言某可为将某可为相幸异日用之密结韦执谊并有当时名欲侥幸而速进者陆质吕温李景俭韩煜韩泰陈谏刘禹锡柳宗元等十数人定为死交而凌准程异等又因其党而进交游踪迹诡秘莫有知其端者贞元十九年补阙张正买疏谏他事得召见正买与王仲舒刘伯刍裴蒨常仲孺吕洞相善【按史王仲舒下更有韦成季三字今详下文有成季字则此处当有此三字亦脱漏也?昌亥切】数游止正买得召见诸往来者皆往贺之有与之不善者告叔文执谊云正买疏似论君朋党事宜少诚执谊叔文信之执谊尝为翰林学士父死罢官此时虽为散郎以恩时时召入问外事执谊因言成季等朋讌聚游无度皆谴斥之人莫知其由叔文既得志与王伾李忠言等专断外事遂首用韦执谊为相其常所交结【常或作尝】相次拔擢至一日除数人【或无至字】日夜羣聚伾以侍书幸寝陋吴语上所褒狎而叔文颇任事自许微知文义好言事上以故稍敬之不得如伾出入无阻叔文入至翰林而伾入至栢林院见李忠言牛昭容等故

各有所主。主往来传授刘禹锡、陈谏、韩煜、韩泰、柳宗元、房启、凌准等主谋议唱和采听外事。上疾久不瘳，内外皆欲上早定太子位。叔文默不发议，已立太子，天下喜，而叔文独有忧色。【喜上或有皆字】常吟杜甫题诸葛亮庙诗末句云：出师未用身先死。【按杜诗用作捷或作战】长使英雄泪满襟，因歔歔流涕。【歔音虚，歔音希】闻者咸窃笑之。虽判两使事，未尝以簿书为意。日引其党屏人切切细语，谋夺宦者兵以制四海之命。既令范希朝、韩泰总统京西诸城镇行营兵马，中人尚未悟。会上诸将各以状辞中尉，且言方属希朝，中人始悟兵柄为叔文所夺，乃大怒曰：从其谋，吾属必死其手。密令其使归告诸将曰：无以兵属人。希朝至奉天，诸将无至者。韩泰白叔文计无所出，唯曰：奈何奈何！无几而母死，执谊益不用其语。叔文怒与其党日夜谋起复，起复必先斩执谊而尽诛不附己者。闻者皆恟惧。皇太子既监国，遂逐之。明年乃杀之。伾，杭州人，病死，迁所，其党皆斥逐。叔文最所贤重者李景俭，而最所谓奇才者吕温。叔文用事时，景俭持母丧在东都，而吕温使吐蕃半岁，至叔文败方归。故二人皆不得用。叔文败後数月，乃贬执谊为崖州司马。後二年病死海上。执谊，杜黄裳子，壻与黄裳同在相位，故最在後。贬执谊进士对策高等。【执谊，京兆人，建中三年中进士第。贞元元年，中贤良方正直言极谏第一人】骤迁拾遗，年二十余，入翰林，巧惠便辟，媚幸於德宗，而性贪婪，诡贼其从祖兄夏卿为吏部侍郎。执谊为翰林学士，受财为人求科第，夏卿不应，乃探出怀中金，以内夏卿袖。夏卿惊曰：吾与卿赖先人德致名位，幸各已达。【已或作以】岂可如此自毁坏！摆袖引身而去。执谊大慙恨，既而为叔文所引用，初不敢负叔文。迫公议，时时有异同，辄令人谢叔文云：非敢负，约为异同。【约或作终，非是】盖欲曲成兄弟尔。【弟疑当作事】叔文不之信，遂成仇怨。然叔文败，执谊亦自失形势，知祸且至，虽尚为相，常不自得，长奄奄无气。闻人行声，辄惶悸失色。以至败死时，才四十余。执谊自卑，尝讳不言岭南州县名为郎官，时尝与同舍郎诣职方观图，每至岭南图，执谊皆命去之，闭目不视。至拜相，还所坐堂北壁有图，不就省七八日，试就观之，乃崖州图也。以为不详甚，恶之，惮不能出口。至贬，果得崖州焉。

永贞二年正月景戌朔【戌史作寅下同】太上皇於兴庆宫受朝贺，皇帝率百僚奉上尊号曰应乾圣寿太上皇。册文曰：维永贞二年【二或作元，非是】岁次景戌正月景戌朔，皇帝臣某稽首再拜奉册言：臣闻上圣玄邈，独超乎希夷，强名之极。【强或作疆，非是】犹存乎罔象，岂足以表无为之德，光不宰之功。然称谓所施，简册攸着，涵泳道德，感於精诚，仰奉洪徽，有以自竭。伏惟太上皇帝陛下道继玄元，业纘皇极，膺千载之休，历承九圣之耿光，昭宣化源，发扬大号，政有敦本示俭。【政有二字疑衍】庆裕格天，恩翔春风，仁育羣品，而功成不处，褰裳去之，付神器於冲人，想汾阳以高蹈，体尧之德，与神同符，其动也天，其静也地，巍巍事表，无得而言。顾兹寡昧，属膺大宝，惧忝传归之业，莫申继述之志。夙夜兢畏，惟怀永图。今天下幸安，皆睿训所被，而未极徽号，孰报君亲？是以台臣庶官，文武之列，抗疏於内，方伯藩守，亿兆之衆，同词於外，请因寿历，以播鸿名。臣不胜大愿，谨上尊号曰应乾圣寿太上皇。当三朝献寿之辰，应五纪启元之始，光膺徽称，允协神休，斯天下之庆也。元和元年正月甲申，太上皇崩於兴庆宫咸宁殿。年四十六。遗诰曰：朕闻【或作观】死生者物之大归，修短者人之常分。古先哲王，明於至道，莫不知其终以存义，顺其变以节哀。故存者不致於伤，生逝者不至於甚痛。谓之达理，以贯通丧。朕自弱龄，即敦清静，逮乎近岁，又婴沈痼，尝亦亲政，益倦于勤。以皇帝天资仁孝，日跻圣敬，爰释重负，委之康济，而能内睦于九族，外勤于万机，问寝益严，侍膳无旷，推此至德，以安庶邦。朕之知子，无愧天下。今厥疾大渐，不寤不兴，付托得人，顾复何憾！四海兆庶，亦奚所哀！但

圣人大孝在乎善继枢务之重军国之殷纘而承之不可𡇗阙以日易月抑惟旧章皇帝宜三日而听政十三日小祥二十五日大祥【五或作三非是】二十七日释服方镇岳牧不可离任赴哀天下吏人诰至後出临三日皆释服无禁婚嫁祠祀饮酒食肉宫中当临者朝晡各十五举音非朝晡临时禁无得哭释服之後勿禁乐他不在诰中者皆以类从事伏以崇陵仙寝复土才终旬邑疲人休功未几今又重劳营奉朕所哀矜况汉魏二文皆着遗令永言景行常志夙心其山陵制度务从俭约并不用以金银锦彩为饰百辟卿士同心尽忠克申送往之哀宜展事居之礼【居或作君非是】布告天下明知朕怀
七月壬申葬丰陵谥曰至德大圣大安孝皇帝庙曰顺宗

东雅堂昌黎外集注卷十